


23380/B



Digitized by the Internet Archive
in 2016 with funding from
Wellcome Library

DELECTUS

OPUSCULORUM

MEDICORUM

ANTEHAC

IN GERMANIAE DIVERSIS ACADEMIIS

EDITORUM

QUAE

In Auditorum commodum collegit,
& propriis aucta recudi curavit

IOANNES PETRUS FRANK M. D.

*Sac. Caes. & Reg. Apost. Maiest. a Consiliis Magistratus
Politici & Oeconom. Mediolan. facultatis Medicae ac
Nosocomiorum per Insubriam Austr. Praeses, Xenodochii
Papiens ad S. Math. Moderator, Therapiae Spec. &
Clinices in Ticinensi Academia Professor P. & O.
Academiar. Reg. Scientiar. Goetting., Mantuanae,
& Elect. Mogunt., tum Societ. Patriot.
Mediol. & Medic. Helvet. Sodalis.*


VOL. XII.


TICINI

EX TYPIS HAEREDUM PETRI GALEATHI

PRAESID. REI LITTER. PERMITT.

ANNO MDCCXCIII.





PRAEFATIO.

DUodecimum ultimumque huius operis Volumen Lectoribus hic offero , atque si , quos mihi , fere octo abhinc annis , praefixeram , artis Medicae & Chirurgicae apud studiosam iuventutem progressus hoc labore aliquomodo promoverim : a fine mihi proposito , certe unico , non aberravi , gaudeoque me civis non inutilis & hac felici terrarum in parte vices egisse .

Superesset nunc , ut alterum , cuius spem aliquando inieceram (*), laborem susciperem , atque , sicut Italici Germaniae , ita & Germanis Italiae opuscula Medica Romano sermone conscriptra , non facile ab Indigenis — ab Exteris vero non sine maxima difficultate conquirenda , in fasciculos colligerem , atque Patriae quoque meae ,

(*) Praefat. ad Delect. Opusc. Vol. I.

pretii insignis , quod Italici laboribus ingenii proprium est , certe non insciae , offerrem ; ast vero hanc interea sibi metam proposuit cl. IOANNES IACOBUS ROEMERUS (*) ; atque novo nunc labori (**) implicatus , de opere tam feliciter iam suscepto , literisque utilissimo , ne manum alterius messi immittam , desisto .

Dabam Ticini Reg. die 25. Aprilis
1793.

(*) Delectus opusculorum ad omnem rem medicam spectantium , quae primum a celeberrimis Italiae Medicis edita fuerunt . Zurici & Lipsiae Vol. I. a. 1791.

(**) De curandis hominum morbis Epitome , cuius quatuor iam libri prodierunt .

IOANNIS PETRI FRANK
 ROTALBANI, AUSTRASO-BADENSIS,
 DISSERTATIO INAUGURALIS MEDICA
 CURAS INFANTUM
 PHYSICO-MEDICAS
 EXHIBENS

Heidelberg. die 28. Augusti 1766. ()*.



§. I.

Aetas est certa vitae periodus, quae a primo, quo mundum salutamus, die ac momento, initium suum capere dicitur, vita, quam in utero materno viximus (nescio quare)

Delect. Opusc. Vol. XII. A

(*) Quae meo quondam sub nomine comparuit *de curis Infantum* dissertatio, ea ereptum nunc morte celeberrimum MATTHAEUM GATTENHOFFIUM, non me ipsum, pro auctore agnoscit.

penitus exclusa. Aetatis vero infantilis nomine, stricte loquendo, intelligitur illud vitae nostrae spatium, quo fari, seu loqui nequit homo, organis licet bene, & ad aetatem proportionate constitutis. Communiter autem sumitur pro illo, quod a natali die ad septimum usque annum durat, tempore; septem vero alios, qui hos insequuntur, annos, pueriles appellare consueverunt. Infantiam praeprimis curae nostrae spectant, quam plurima mors, tum sua a fabricae tenerrimae imbecillitate, tum minori contra causas morbificas resistentia, notare so-

Conscripseram quidem extensum magis *de physica infantum*, & *puerorum educatione* libellum, atque eximio huic Viro corrigendum commiseram: Connamini iuvenis laudem aliquam indulgit, sed typis immaturum opus evulgari non consuluit Praeceptor; atque meliorem longe, quam, viginti duorum tunc annorum adolescens, potuissem, tractatum de *Infantum modo curis* componens, huic ipsi, ut saepe solent in Academiis, nomen Candidati praefixit. Parum igitur ex meis huic opusculo inesse lubens fateor, semperque fastus sum; sed non possum, quin in suppresso, tunc praecoci nimis, labore, alterius propriique de *Politia Medica* operis ineunabula quaeram. Haec ipsa vero dissertatio, eodem, quo *Heidelbergae* prodiit, anno, in *Lotharingiae Academia Muscipontana*, nunc *Nanceiana*, cui aggregari tunc honor mihi oblatus est, typis iterum commissa fuit.

let. Uti tertiam hominum partem in iuventute perire adnotat HALLERUS (a). Inter centum natos, plus quam triginta ante tertium aetatis annum, e vitalium numero iterum decedere GRAUNTII (b), aliorumque calculus est. Ex plurium locorum observationibus collectis eam fere regulam e numeris mediis ponit WARGENTIN (c) unam quartam natorum partem primo anno interire, alteram quartam inde, a primo ad vigesimum quartum annum, tertiam quartam, usque ad sexagesimum durare. Intra duos primos annos plus, quam unam tertiam natorum mori, adnotant *physicalische oeconomische Aufzüge* (d). Adeo humana aetas non nisi inter ambiguos gradus ad aliquam vitae constantiam enititur.

§. II.

Brevis sed difficilis ad mundum via est, & plures, quin unquam, vel vix unico tractu

A. 2

(a) Comment. BOERH. T. III. §. 436. p. 630.

(b) *Anmerck der Todtenzettel der Stadt London.*

(c) Act. A. Suec. conf. comment. de reb. in sc. & med. gest. Vol. VI. pag. 202.

(d) T. II. p. 305. T. IV. p. 653.

atmosphæram nostram spiraverint, vel ex propria naturae, vel obstetricantis minus provi-
dae manus, culpa concidunt, pro sempiterno
pauculum illud, quod inspirare aerae cum vita,
cumque hac omnem & Patriae, & parentum
spem miseri efflant.

*Ab! quam simul rapiuntur in discrimina!
Moritur, priusquam sinu vagiit puer
A matre anabela vix rubens, atque interit.
Vitamque linguit, ante qui nec vixerat (a).*

§. III.

Medetur his, si non omnibus, plurimis
saltem, agilis quaedam ac dextera obstetricantis
manus: haec prolis, haec matris vitam, haec
cara patris ac patriae pignora parvo saepe la-
bore ambo conservat. Sed quam dolendus est
Germaniae nostrae status! „ubi (uti suo iam
tempore de suis conquestus est DEVENTER)
„(b) ut plurimum urgente necessitatis telo, im-
„prudentes quaedam pauperculae mulieres vel
„viduae miserrima mercede conductae isthoc

(a) FLUD a GILDE elog. ad Devent. nov. lum. obst.

(b) Nov. lum. obst. c. 1. §. 1.

„munus suscipiunt, non sine dispendio vitae
 „multarum gravidarum, & foetuum“; accedit
 ridicula foeminarum ex nostris plurimarum vir-
 tus, qua defectu obstetricis foeminae rerum
 suarum peritioris, manum virilem, scitam, ac
 exercitatam respuunt: ignarae quid proli,
 ignarae quid patriae, quid sibi ipsis debeant.

§. IV.

Ast, si forte situs foetus optimus, hic, si
 felici forte omine, singularis e matris pudici-
 tiae, & plorandae obstetricis ignorantiae mani-
 bus evaserit, nascitur miser, & futurorum quasi
 malorum sibi conscius plorat. Sed in primo
 hoc aerae vitalis limine, quanta ea in athmo-
 sphaerae, pressioni, frigoris calorisque mutatione
 pericula occurrunt! Debilissimi toties & nativo
 tenerrimo flamine, & praegressi partus iniuria,
 vel respiratione quacunque causa impedita oc-
 currunt, quos vel mortuos credant, ac tumultu
 condant, vel fato relinquant ignari, impiique:
 uti tristia exempla docuere. Infantis debilissi-
 mi, atque obstetricis negligentia mortui causam
 agit FABRICIUS (a). Resuscitati vario admi-

A 3

(a) *Samml. med. respons. T. 2. c. 1.*

niculo infantis exemplum refert HEISTERUS (a); ROEDERER (b); imo sepulti diutius, ac sponte demum reviviscentis mirabiles observationes extant (c). Id quamquam longo porrissimum partus labore contingat, ut exhaustis viribus summoque nervorum languore, cor suo a vitali contractionum rythmo desciscat plane, vel eo fungatur debilissimo, extus vix observabili, nedum respirationem, atque aëris subsidia exigente, dum apertae adhuc singulares foetui sanguinis viae debiliori humorum vitium rivo aliquandiu sufficiunt (d). Aliae nihilominus causae existunt, quae vitalem primam inspiratione trahendum spiritum impediunt; muci copiam, in ore, faucibus, aspera arteria, ipsisque saepe pulmonibus collectam adnotat KAAW (e); ROEDERER a liquore amnii

- (a) De mirab. part. foetus in somno mortui profundo.
 (b) Opusc. med. p. 305. plura collegit BRUHIER von ohngewissen Todteszeichen p. 639. & 640.
 (c) Hamb. Magaz. T. 19. p. 311. BOHN, de renunt. vuln. p. 178. 179. inde dubium experimentum pulmonum. LUDWIG med. for. p. 98.
 (d) Caecellos Caesareos ex matris utero resectos vidit HALLER vivere multis minutis absque respiratione. Elem. T. III. p. 225. Similia BUFFONII in catellis recens natis experimenta refert BROUZET de l'educat. med. des enfans ed. Germ. p. 56.
 (e) De perspir. §. 156. liquori intestinorum, quem

repetit (a), qui in cava haec aperta penetrans, eo muci genere condensatus, inter causas suffocationis pertinet; aliae huc causae spectant: a velo palatino, palato osseo adplicato, dorsoque linguae ad eandem fornicem elevato, impeditam sufficientem respirationem observat ROEDERER (b), ipsam curvam foetus figuram, ac plicam colli super pectus adducti huc refert HALLERUS (c); ut sola extensio ad faciliorem respirationem sufficeret. Adparet, quam cauto hic attentoque ad omnia iudicio inter imperiosa muliercularum congregatarum consilia versandum, ut debilissimae vitae succurramus, mox plane succubiturae: quod vario stimuli genere fit, quo nervorum vegetiores motus animentur, muscoli elevandae thoraci servientes incitentur, vacuisque demum pulmonibus externus aër invitetur. Fricantur pedes, totumque corpus ad spinam dorsi praecipue; plumula nares irritantur, mucus ex ore abstergitur (d), fauces immisso

A 4

meconium vocant, comparat BROUZET l. c. p. 59. atque formandis annulis tracheae servire credit.

(a) Opusc. p. 315. 319. 322.

(b) L. c. p. 316.

(c) Elem. T. III. p. 225.

(d) Sic muci extensio inter primas curas pertinet, qua

digito vel plumula laceffuntur, ad vomitum cientur nifus, fumus tabaci ori infufflatur, ac intestino recto immittitur; calidi potus in os instillationem reliquis praefert ROEDERER (a). Abdomen comprimitur, ut diaphragmate in motum acto pulmonum agitetur machina. Suctionem papillae pectoris complures observationes efficacem docent in EPHEMER. N. C. descriptae (b) qua nervosissima papilla irritata, nervi intercostales praecipue animentur ad musculos pectoris sua in munia ciendos. Qua porro in calamitate prospiciendum sedulo, ne, quae communis cum matre vita per placentam alitur haftenus, dum respiratione necdum fungitur infans, percisso fune, sublatisque materni sanguinis subsidiis, vita debilis extinguatur illico; hincque, nisi infans sat respiraverit, nec deligandum nec rescindendum funiculum umbilicalem praecipit SWIETENIUS (c). Idem SMELLIE consilium est (d), nisi ultro ipsa uteri vi

neglecta, infantes tertia, vel quarta die, inter respirationis violentos strepitus mortuos adnotat LOESEKE therap. spec. T. IV. p. 182.

(a) L. c. p. 308.

(b) Decad. 2. ann. 5. obs. 121. ann. 7. obs. 67. ann. 6. obs. 69.

(c) T. IV. p. 647.

(d) Von der Hebammen-Kunst P. 1. p. 241. 242.

contractrice expellatur placenta, quam & ideo aquae calidae vel vini balneo fovendam ex eadem ratione suadet: nisi quidem facies tumida lividaque, atque alia congesti in pectore vel capite sanguinis phaenomena adparuerint; quae congestio, aut ipsa partus difficilioris iniuria, aut inchoata respiratione, neque continuata dein, facile concipitur; ubi optimo consilio, praescisso fune nec ligato, aliquot sanguinis uncias emittit SWIETENIUS (a), ut pectus nimio sanguine liberetur. Item ROEDERER (b); ad praecavendas convulsiones eodem consilio utitur SMELLIE (c). Adpareret praeterea, quanta cautela in casibus forensibus infanticidii opus, ut pulmonum in aqua subsidentia vel innatatio quid certi de infantis in partu vita vel morte doceat.

§. V.

Ita multiplicem praeterea infantis vix nati vita sibi curam exigit, atque omnes sollicite

idem argum. vid. in comment. de reb. in sc. nat. & med. gest. Vol. 5. p. 440. 441.

(a) L. c.

(b) L. c. p. 306.

(c) L. c. T. II. p. 396.

considerandae partes, an quid vitii subsit. Capitis praecipua habenda ratio, quod ossibus adhucdum mobilibus; laxiusque invicem per membranas coniunctis munivit natura, ut in partu, dum pelvis angustias transit, cedere, atque capitis molem in figuram magis transitui accommodatam, oblongam reddere, vi contractrice uteri retro pellente posset. Unde ea conditione ossium cranii, suis iam futuris coalitorum, partus laboriosus redditur, imo difficillimus, si pelvis materna angustior fuerit (a). Cedentia vero ossa, partus labore acuminata, in naturalem figuram, ipsa naturae opera, ipsoque infantis clamore abeunt, quo impulsu in vasa encephali sanguinis nisu, ossa sibi arctius iuncta discedunt (b). Sed maiori aliquando malo fit, ut partu difficiliore longioreque ossa ita super se altius efferantur, ut ossa sincipitis (c), se invicem, vel os frontis super-

(a) SMELLIE l. c. T. I. c. 3. WALBAUM vers. LEURRETI p. 300. HEBENSTREIT de capitonibus §. 3.

(b) SMELLIE l. c. T. I. p. 475. RUYSCH adv. anat. dec. 2. p. 41.

(c) Tabulae SMELLIANAE id clarius ostendunt, quoties in partu capitis moles in Cylindrum ducitur, occipitis ossa, & frontis, infra, ossa bregmatis mota notavit ROEDERER l. c. p. 332.

scandant, vel os occipitis; id quod sine gravi quidem partium contusione, fibrarum vasorumque laceratione, ipsiusque cerebri contenti compressione haud fieri adparet; unde sanguinis, tum in cellulosa telam, tum sub dura matre effusio, inflammatio, ingensque tumor cum maximo infantis discrimine, vel ipsa morte etiam coniuncta nascitur (a). Sectione cadaveris hos effectus ostendit ROEDERER (b). In minori malo, infanteque sat vegeto, manus opera leniter cauteque premens, restituendae sensim capitis figurae sufficit (c). Sed, ne id nimis, cautelam suggerit infaniae relictæ effectus ab imprudenti compressione capitis (d). Integrarum id nationum vitium, quo ad certam normam caput effingant, sed stupiditatis, imbecillitatis relictæ, effectus memorat BALLEXSERDE (e): sub maiori vero cerebri compressione id probe agit SMELLIE l. c. ut praescisso funiculo, aliquot cochlearia sanguinis emittat, alvum laxet clystere, vel cataractico, parvum

(a) MONROO osteolog. p. 112.

(b) L. c. p. 322. 327. conf. item *Göttingischen Anzeigen* an. 1760. p. 6.

(c) SMELLIE l. c. P. 2. p. 392.

(d) V. SWIETEN T. III. p. 330.

(e) *Dissert. sur l'éducation physique des enfans* p. 14.

umeris interponat vesicatorium, aliaque administret, quæ mole sanguinis revulsa, liberetur cerebrum; atque instantibus etiam convulsionibus, v. I. secta aliquot uncias sanguinis emittit. Verum, eo in tumore capitis infantilis recte cognoscendo cautela est, ne confundatur cum alio genere, aliisque causis nato, ac sinistra medendi ratione cum summo periculo tractetur. A futuris nimium distantibus enatus tumor vel partum immaturum, vel collectam in calvariae cavo lympham, atque prodeuntem hydrocephalum docet (a); vel ab imperfecta alicubi ossificatione, datoque spatio minus resistente, propullulantem cerebri portionem recondit, uti sectione cadaveris comperit CORVINUS (b), aliorumque observationes colligit.

§. VI.

Inter primas porro curas spectat, ut infans deligato funiculo, cuius tota cutis lubrico viscidoque smegmate tegitur a liquore amnii, cui immersus degebat, profecto, continuo abstergatur mundeturque: unde morbi cutanei, ob-

(a) SWIETEN T. IV. p. 649.

(b) De hernia cerebri, Vol. II. chir. HALLER p. 336.

Aruētis vasis exhalantibus, glandularumque cutanearum ductibus, praecaveantur; lavacris olim & balneis, & nunc aliquorum more, aut ablutione saltem cum aqua & vino usi sunt: quo in argumento notatu digna momenta sunt: neque enim veterum germanorum mores imitandos velim, qui infantulos ab utero calentes ad vicinum fluvium deferebant, & periclitaturi vires genuinamque parentum prolem, & corpus roboraturi; quod institutum ipse iam olim GALENUS damnavit (a) non magis, refert, se Germanis aliisque scribere, quam ursis, apris, & leonibus; neque GALENUM audiendum putem, qui salem cuti inspergendum iubet, quo gluten adhaerens tum abstingeretur efficacius, tum fibrae cutaneae solidioris, firmioresque redderentur (b): utramque certe iniuriam aegerrime fert tenella cutis nunc rubescens, & quasi erysipelatosa, ad tantas stimuli vires ipso naturae ductu horrescens, quae omnem subitam mutationem renuit, in adultiore etiam & robusto corpore periculosam; quam certe summam, cum e calore animali blandissimo, quo fovebantur flamina, in aërem sicciolem, frigi-

(a) De Sanit. tuend. l. i. c. 10.

(b) Ibid. c. 7.

dioremque (a), emergit, non sine periculo subit: quamquam non negandum, balneum hoc frigidum, cui continuo infans immergitur, toties visum esse innoxium, ut KRUGERUS (b), aliique complures testantur, atque integrae gentes septentrionales, indiaeque occidentalis eo retento more, non nisi robustissimorum corporum exemplis probant: non diffitendum tamen, delicatorem, tenellamque foetuum nostrorum fibram, quae tantopere a robore infantum Nigritarum, ac Lapponum, perinde ac parentum robur, quam maxime differt, fotu caloris egere omnino, atque leves vitae scintillulas excessu frigoris extinguere facile, cuius summa in nervos vis est, ipso teste HIPPOCRATE, qui in tenero corpore tum summe irritabiles, tum ad reliquas corporis partes maximam proportionem ac dominium habent (c), indeque constrictis vasis, repressa unda sanguinis cordis labilem machinam facile obruit, suffocatque. Inde ipsam sacri lavacri undam frigidiorē aliquando fune-

(a) Unde & cutis illam rubedinem quasi inflammatoriam repetit BROUZET l. c. p. 48. ac primam febriculam credit, quae excretionē meconii solveretur p. 69.

(b) *Von Erziehung der Kinder* p. 25.

(c) HALLER Elem. T. IV. p. 198.

flam extitisse, MAURICEAU exemplum refert (a); cum ossium cranii tenuior compages eaque necdum continua, sed per fontanellas dehiscens, vi frigoris penetranti haud satis resistat. Ab extremorum infantis recens nati in aquam frigidam immersione natum icterum brevique mortem secutam describunt MISCEL. N. C. (b). Vino hinc tepido primum abluendos detergendosque vult BALLEXSERDE (c), balneaque frigida ipsasque sacri fontis frigidiores aquas reiecit. Aquam moderate calidam, cui modica saponis vel & vini quantitas adiecta, commendat SWIETENIUS (d). Sed cum caloris, praesertim humidi, vim summe relaxantem consideremus, cum qua laxitate, uti imminuta partium cohaesio, ita debilitas coniuncta est (e); sequitur eo diutius continuato calidorum balneorum usu, fibras non tam cutaneas, quam totius demum solidae compagis vires infirmari quam maxime: inde debilioribus vasis

(a) C. V. Obs. 422. similem ALBERTI observ. refert BROUZET l. c. p. 64.

(b) Ann. 1. Dec. 3. Obs. 86.

(c) L. c. p. 14.

(d) T. 4. p. 648.

(e) Capilli ipsi calida debilitati ad $\frac{5}{10}$ roboris sui visi sunt exp. ROBINSONII. HALLER elem. T. V. p. 36.

cutaneis perspiratio aequabilis, unde tantum sanitatis momentum pendet, turbatur, quae, uti omnis secretio, ipsas vasorum vitales vires sequitur: congeritur in vasa haec debiliora acre liquidum, atque glandularum cutaneorum smegmatico humori immersum, exanthemata effingit molestissima; omnes fibrae laxae morbi suam inde originem repetunt: ad balnea adeo sensim frigidiora & aquarum e fonte continuo haustarum usum accedendum, ut roborata fibra cutanea, vasorum cutaneorum officia rite vigeant, transpiratio succedat optime, neque facile aëris vicissitudine turbanda; rachitidem, obstructions, morbos cutaneos, ipsasque huic aetati adeo faciles convulsiones praecaveri monet TISSOT (a), atque ea methodo universalius induta, communem prolium stragem maximopere imminutum iri, merito expectat; pueris inde robur, agilitatem, calorem augeri, hernias faciles, tussim, scrophulas arceri adnotat MACKENZIE (b); rachitidem angliae ignotam refert FLOYERUS, cum immersio plenaria in aquam frigidam ab omnibus sanctissime coleretur,

(a) Avis au peuple §. 340.

(b) *Geschichte der Gesundheit* p. 165.

tur, cum hac demum neglecta, caput extulisse (a). In curanda rachitide summum in balneis frigidis momentum ponit HUXHAM (b). Iis infantes suos ita roborare Indos, ut nullos lussos, claudos valgosque reperiās, testis est FURSTENAU (c). Quae certe roborandi virtus in adplicata frigida, in excoriationibus, ulceribusque cutaneis saepe chronicis adparet, quas optime aqua fluviali aut pluviali frigida adplicata curari, quotidiana observatio docet (d). Roboratis vasis cutaneis, unde & acre excutiaturs facilius, & ulteriori adfluxui resistatur, & quae ipsa vasis debilitate fit, morbosa liquidi degeneratio impediatur. Verum licet infantibus, quo debiliores sunt, eo maiora inde commoda ab immersione in frigidam, aut crebris cum ea lotionibus speranda videantur; cautelae tamen sunt, quas probe exponit MACKENZIE, l. c. ut inde perspiciatur; an calorem maioremque agilitatem commonstret infans a lotionem vel extractionem ex aquis; si pallidus inde, aut artus quidam a frigore rigidus adpa-

Delect. Opusc. Vol. XII. B

(a) Conf. LUDERS de educ. liberor. med. p. 7.

(b) T. 2. pag. 39.

(c) De med. Indorum Vol. 6. pr. HALLER p. 774.

(d) Conf. Froenckische Anmerck T. 4. p. 122.

reat, talisque aliquandiu maneat, aut omittendum per aliquot dies, vel plane intermittendum esset hoc ab aquis frigidis subsidium. Alias balneorum frigidorum cautelas habet VAN SWIETEN (a): ut sensim fiat immersio, ac pedum primo, dein reliqui successive corporis.

§. VII.

Inchoata ergo nunc inspiratione infantis nati viscera varie moventur, ac sopitus ventriculi intestinorumque motus, animatus, validiore fibrarum contractione agit; ipsa bilis reliquaque liquida liberiora in intestina defluunt; sanguinis omniumque liquidorum motus acceleratur, vegetiorique circulo instauratur. Unde summum, tum in dissolvendo glutine intestina replente, momentum, tum & alimenti sensim succrescit necessitas: quod ex iisdem humoribus, quibus foetus hucusque adolevit, natura parat tenerime fabricae summe accommodatum, dum contractis uteri vasis, liquidum in mammas ex vasorum utrobique secretoriorum analogia (b) derivat, novosque alimenti fontes aperit. Se-

(a) T. III. p. 661.

(b) HALLER, prim. lin. phys. §. 818.

cernitur lac tenue serosum primo salinumque, quod novellae digestionis operae sufficiat, ac tenacem intestinorum saburram commode dissolvat ac expellat, vasa lactea subiens humores solvat, novo fibrarum nervearum musculariumque stimulo vitam vitae plenius excitet; donec crescentibus infantis viribus, dilatatis magis mammarem vasis, lac sensim crassius pinguiusque, post tertiam diem secernatur (a), in qua secretionis modo ordineque peculiarem naturae operam miramur, quam non nisi temere contemnunt, qui primum illud lac tanquam nocivum rejiciunt. Sed de tempore quaeritur, quo primum mammis infans adplicandus sit? Alii non nisi expurgato meconio id volunt, quo lac suctum cum summis incommodis ipsarum convulsionum metu coagularetur, adeoque non nisi decem, vel duodecim post horas admovendum volunt (b), aliique 24 horas requirunt (c); quod, licet de lacte alieno, crasso ac pingui potius metuendum, atque ieiunium quidem pri-

B 2

(a) PLATTNER, opusc. T. I. p. 264.

(b) *Bremisches Magazin* Vol. I. p. 53. DESESSARZ p. 85.

(c) TISSOT avis au peuple §. 338. BALLEXSER, DE I. c. p. 13.

mum decem vel 12 horarum maxime ad gluten
 illud solvendum conferat (a): minus tamen me-
 tus habet paucum tenueque lac primum, quod
 ad expellendam saburram vires addit, exhibito,
 uti solet plerumque, solvente ac saponaceo re-
 medio, melle cum paucio vino, syrupo quodam
 cum soluto sapone veneto; ut, si maturae lacta-
 tionis commoda consideremus, illorum placeat
 consilium, quo somno aliquot horarum relecta
 puerpera, sumptoque iusculo, esurienti puero
 mammam praebere iubetur; febrim lacteam in-
 de praecaveri, dilatatis tubulis lactiferis, ac
 portione lactiseducta, nimiam ac impetuosam
 mammarum distensionem, cui debilis pueri
 suctio haud sufficit, indeque plures mammarum
 noxas impediri, contendit ROSNERUS (b);
 quod, & idem SWIETENII consilium est (c):
 nisi quidem manifestum earum vitium vasa pro
 recipiendo lacte minus dilatabilia huicque inepta
 reddat, aut, quod in primiparis saepe fit, vasa
 magis resistentia seriore lactis ac difficiliorem
 impulsu ac dilatationem admittant; in quibus
 praematurae suctionis noxa est, monente LOE.

(a) V. SWIETEN, T. IV. p. 655.

(b) De viribus lactis, Vol. 7. HALL. pract. p. 239.

(c) T. IV. p. 608.

SEKE (a) ; sed crescentes indies infantis vires copiosius nutrimentum exigunt , cui & ipsa natura invigilat , lac tenue primum , ferosumque paulatim crassius ac dulci cremore ditissimum reddendo , largiori nutritioni aptum . Sed eo in lactationis opere momentum probe notandum est , ut recens nato , dum proxime ab eo tempore , quo liquidi materni continuo adfluxu nutriebatur , abest , frequentius ac definitis horis ubera praebeantur , omni bihorio parum simul & semel fugat , ne aut nimia distensione offendatur debilis ventriculus , aut lactis male digesti coagulo variisque noxis gravetur ; sed illa alimenti copia praesto sit , quae nutrimento hac aetate inter reliquas vitae periodos maximo , sufficiat . Adultiori infanti & trimestri copia maior lactis convenit , neque tam frequens , quae & nutritioni , & probae digestioni sufficiat : parciora ubera , quae tota sugendo exhauriat infans , sanitati conducere optime , rusticorum infantum sanissimorum exempla docent , qui eiulatu relicti , matres ab agresti opere reduces non nisi ter quaterve de die vident excipiuntque avidius , sanitate non tam illibata , quam

B 3

(a) Therap. spec. T. 4. p. 187.

incremento roboreque corporis indies aucto. Ploratum adeo clamoremque, quod pulmones dilatet melius, nares, os, oculos expurget, calorem nativum vegetiorem reddat, non nimis inhibendum PARAEUS vult (a), sed causae indagandae potius, quae multiplices, tum a meconii retenti portione (b), tum fasciarum iniquo genere, tum sordium relictarum acrimonia pendent, maxime vero ab ipso nutrimenti genere lactandique modo, quo lac ad singulos clamores nimis copiose ingestum, aut pinguius, tenellum ventriculum molestius adficit, atque coagula magis sensim acida, vomitiones, ructus, singultus, tormina, flatus, foeces congrumatas, acres viridescentesque; alvi constipationes, urinae suppressionem, pavores ac maiora mala producit: ut his in eulatu nimio potius cibum omnem detrahendum, recte consulat PLATTNER (c), ut abstinencia ventriculi vitia corrigat (d), quae continuato errore in summa mala invalescunt.

(a) Op. p. 680. it. LANCISIUS de Corde p. 58.

(b) V. SWIETEN, l. c. p. 659.

(c) L. c. T. I. p. 274.

(d) Lactationis nimiae noxas exponit V. SWIETEN l. c. p. 680.

§. VIII.

Sed , quod per universum animalium regnum natura officii genus imposuit , corporisque ea sub lege fabricam aptavit , mutuique amoris sancivit vinculo , dolendum sane vel corporis vel animi vitio saepius impediri , vel haberi negligentius , ut propriae delicatiori corporis culturae & commoditatibus hoc naturae amorisque studium cedat , ac alieno & meretricio toties lacti mercenariae nutricis committatur , quod sanctissima adeo lege natura imperat ; hanc naturae obligationem veteres philosophi perspexere optime , inter quos FAVORINI sensa refert GELLIUS (a) „ oro te , inquit , mulier , sine eam totam , integram esse matrem „ filii sui , quid est enim hoc contra naturam „ imperfectum atque dimidiatum matris genus , „ peperisse ac statim ab sese abiecisse ? aluisse „ in utero sanguine suo , nescio quid , quod „ non videret , non alere nunc suo lacte , quod „ videat iam viventem , iam hominem , iam „ matris officia implorantem : an tu quoque „ inquit , putas naturam foeminis mammaram

B 4

(a) A. GELLII noct. att. L. XII. c. 1.

„ ubera quasi quosdam naevulos venustiores ,
 „ non liberum alendorum, sed ornandi pectoris
 „ causa dedisse? sic enim, quod a vobis scilicet
 „ abest, pleraeque istae prodigiosae mulieres
 „ fontem illum sanctissimum corporis, humani
 „ generis educatorem, arefacere & relinquere
 „ cum periculo averſi corruptique lactis labo-
 „ rant, tanquam pulchritudinis sibi insignia
 „ devenuſſet: quod quidem faciunt eadem ve-
 „ cordia, qua quibusdam commentitiisſque frau-
 „ dibus nituntur, ut foetus quoque ipſi in cor-
 „ pore ſuo concepti aboriantur, aequor illud
 „ ventris irrugetur, ac de gravitate oneris &
 „ labore partus fatiſcat, quod cum ſit publica
 „ deteſtatione communique odio dignum, in
 „ ipſis hominum primordiis, dum fingitur,
 „ dum animatur, inter ipſas artifices naturae
 „ manus interfectum ire, quantulum hinc
 „ abeſt, iam perfectum, iam genitum, iam
 „ filium, proprii atque conſueti, ac cogniti
 „ ſanguinis alimonia privare “ ! Sed ſi veteris
 philoſophi oratio minus ad perſuadendum virium
 habet, audi naturam, ſaeviſſimis toties tum
 materni tum infantilis corporis noxis legem
 ſuam vindicantem.

Largioris certe cuiuſcunque ſecretionis &
 excretionis laeſae prohibitaque, uti inſignis

semper in corpore iniuria est, ita & par huius excretionis neglectae ratio ac noxa est in secretorio non tam organo, quam per universum corpus diffusa: mammarum sequitur distensio, tumor dolorque, vasis novo liquidi impulsu nimis dilatatis, ut vasorum tum sanguineorum, tum lacteorum invalescente obstructione, inflammatio, febris, suppuratio vario tumoris genere ac vario periculo increascit; dum vel liquidis in cellulosa effusis, aequabilis tumoris facie, facilia mala, inaequalibus vero tuberculis, quae ipsius glandulae vitia indicant, difficiliora portendit (a), quae relictus toties scirrhus perpetuo carcinomatis metu cruciat; ac certe lactis stagnantis mutationes solitae, partium mutua secessio, feri aquosi expressio, cremoris pinguis contracta per calorem febrilem rancescentia, caseosae partis mutatio in putridum (b), horum adfectuum vehementiam ac periculum docent. Sed resorpti demum, & in communem humorum massam reducti lactis varii in ipso corpore effectus sunt: dum copiosus, crassus pinguisque humor in corpore, praegressis partus laboribus debili, plethoram gignit, quam

(a) V. SWIETEN, l. c. p. 640.

(b) V. SWIETEN, T. IV. p. 637.

ad vires vocant, atque attritui vasorum vitali calorigue cum sanguine subiectum, in acrimoniam saepe pessimam degenerat (a), cum novae violentae, & saepe lethalis febris excitatae eventu. Dolor capitis enormis, scintillantes oculi, pulsus fortiores celerioresque, dolores artuum rheumatici, hanc vasorum plenitudinem stimulosque violentos docent, cum variis humorum in varias partes congestionibus; nisi mature salutaris per transpirationem, sudorem, urinas, alvum, lochia, menstrua, evacuatio supervenerit (b); verum minus felici hac naturae opera, acre magis evectum varias morborum saevissimorum formas effingit, ut pleuritidem, phrenitidem aliarumque partium inflammationes, purpuram illam toties puerperis lethalem, facta in cutem metastasi producat (c). Erysipelatosa febris alias affligit, lato exanthemate faciem defoedans: alias maiori felicitate molestissimis faciei pustulis, variisque ac crebris per corpus furunculis notat (d), atque sollicita illa pulchritudinis studia enervat. Sed & pari

(a) DESESSARZ, l. c. p. 186.

(b) GAUBIUS, parhol. §. 564.

(c) Recueil periodique par Mrs. VANDERMONDE
T. VI. art. 4.

(d) DESESSARZ, l. c.

ratione pulmonum tubercula, insultus asthmaticos, viscerum infarctus, aberrimos sudores foetidos cum urinis turbidis, febres indomabiles, tremores, convulsiones, stuporem, paralyfin induci adnotat LIEUTAUD (a): sed maiora toties a lactis percussu congestione, ac metastasi mala sunt; per alias vias & organa secretoria non tam effusum visum est, uti per renes diabetis specie, per alvum, per vasa salivalia excreti observationes refert HALLERUS (b), quam per ipsa vasa exhalantia abdominis in eiusdem cavo ascitem lacteum efficit; unde maximam puerperarum partem a medio tolli testatur de SAUVAGES (c), varias has in cavum cranii pectorisque, atque alias partes metastases atque effusiones adnotat SWIETENIUS (d), in cameram oculi effusum refert de SAUVAGE (e): verum frequentior lactis repressi nataeque plethorae in uterum impetus esse solet ob manifestum uteri cum mammis consensum: prima docent lochiorum inde copiosiorum, ac diutissime saepe fluentium phaenomena vim po-

(a) Synops. univ. prax. med. T. I. p. 465.

(b) Element. ph. T. II. p. 373.

(c) Nosol. T. II. p. 469.

(d) T. IV. p. 610.

(e) Ibid. T. III. p. 259.

crassissimam vasis uterinus inferri, uti lactantibus pauciora lochia ab lib. γ vel lib. γ β adnotat de HAEN (a), non lactantibus largiora & diuturniora, per 40, & ultra dies, fluentia restatur BALLEXSERDE (b), SWIETENIUS (c); sed adparet hoc in vasa uteri impetu, nisi quidem omnia dilatabilia satis, atque ad recipiendos humores apta invenerit, quantum hic obstructionis atque inflammationis periculum flagret (d), in tanta uteri, atque a partu praesertim maiore irritabilitate (e); unde pessima febris, cum summa virium prostratione atque purpureo potissimum exanthemate, toties funesta emergit: sed re felicius quidem cedente, vasa uteri nimia dilatatione suo a vitali tono deiciuntur, ut debiliore osculo crassiora liquida perpetuo in cavum uteri demittant, ac perpetuo fluore albo divexent (f); quo corporis universi sensim fatiscit robur, magnaque muliercularum pars pessumdatur (g), relicta saepe vasorum ali-

(a) Nat. med. T. 4. p. 205.

(b) L. c. p. 36.

(c) L. c. p. 593.

(d) ZIMMERMANN, *von der Erfahrung*, T. 2. p. 428.

(e) V. SWIETEN, l. c. p. 616.

(f) BALLEXSERDE, l. c. p. 37.

(g) TISSOT, *de febr. bil.* p. 258.

quorum obstructione scirrhusa, demum maiori aetate ac periculosa illa cessantium menstruorum epocha, in funestum carcinoma dehiscence.

§. IX.

Sed nec minora toties mala teneros alumnos feriunt, quibusdum a succis maternis, quibus feliciter haecenus corporis, structam debent fabricam, depelluntur, idem fere, ac plantis accidit, quae a natali solo translatae radicibus non bene firmatis facile arescunt, aut succo alieno turgentes a naturali forma in alienam deflectunt luxuriam; ita certe in humoris nutritii perfectionem propria ac singularis corporis fabrica atque idiosyncrasia laborat, ut nullo alio, licet sanissimo alterius corporis humore suppleri compensarique possit, perinde ac per transfusum ex sano corpore sanguinem nunquam bonos humores restituas, quippe proprii corporis fabrica parandos (a): pari ratione lac alienum, quamvis omni charactere sanissimum, fere semper infra illam virtutem nutriendi erit, quae est in materno, cui haecenus adsuevit tenella fabrica, ipsius naturae opera ac lege

(a) RICHTER, de cunus infant. §. V.

parato. Sed primæ a negato primo lacte nativam saburram expurgante, noxæ sunt, quæ vel retento, vel non satis eliminato meconio, funesta symptomata emergunt; in qua re licet artis ac medicamenti solventis ac saponacei potestas sit ad illa præcavenda, imitari tamen naturam haud licet, quæ pro crescentis ætatis viribus lactis conditionem mutat, ac digestionis operæ ac definitæ teneri corporis indigentia accommodat; nascuntur supradicti malæ digestionis effectus ac saburra caseosa, propriæ degeneratione, partim acido, partim alcalino spontaneo in sævam corruptelam confluit, quam nec ipsa bilis emendare possit, ut cum ea potius in corrosivam indolem linteamina exedentem pervertatur; viridescens excrementi, quod cum atrocibus ventris torminibus, inquietudine, febre, motibus convulsivis, ipsaque epilepsia coniunctum est, recte a bile per mixtum acidum corrupta, ratio petitur; quam experimenta BAGLIVII (a), BOHNIIQUE (b) confirmant, quæ bilis, quo fortiori acido miscetur, in colorem eo magis viridescens, imo

(a) Oper. om. p. 284.

(b) Circul. anat. p. 280.

in aeruginosum obscurum mutatur (a), disparet-
 que adfuso oleo tartari per deliq. (b); queis in
 calibus insufficientia toties artis subsidia, crebra
 infantum funera docent (c). Sed & ultra pri-
 mas vias alieni pinguiorisque lactis noxae sunt:
 dum debilia pulmonum vasa gravat, cum ma-
 gna respirandi difficultate, atque dum eidem
 in boni sanguinis dotes mutando, vasorum de-
 bilis actio haud sufficit, aquoso ac pituitoso
 humore totum sensim corpus inundat, ut obesi-
 tatis quidem ac sanitatis specie fallat, sed plura
 simul morborum recondat seminia. Verum cum
 in lac ipsum transire omnia liquidorum vitia
 possint, tum quae a primarum viarum visce-
 rumque, ac malae digestionis vitiis promanant,
 tum quae circulantium humorum massae inhae-
 rent, e qua immersus antea chylus, ac vaso-
 rum vitali actione emendatus, lactis specie se-
 cernitur; uti variorum morborum, ipsius etiam
 calculi, dysenteriae, epilepsiae, scorbuti, om-
 nium, qui a pituitosis humorum vitiis pendent,

(a) HUXHAM, op. T. III. p. 67. 69. TRALLES,
 hist. chol. p. 212.

(b) LOESEKE, therap. spec. p. 204. T. IV.

(c) Canum, feliumque foetus praematurus a lacte
 materno depulso, & lacte vaccino nutritos, cum
 torminibus, convulsionibus, vermibus mortuos
 vidit DESESSARZ, l. 6, p. 271.

ui glandulosarum obstructionum ac tumorum scrophulosorum (a), &, qui potissimus metus est, contractae per furtivam venerem pernicialis syphilidis per lac infanti communicatae exempla refert PLATTNERUS (b), ita a largiore quidem secretionem, ac copiosiori liquidorum in vasa mammaria adplicatione, tum maiori nervorum irritabilitate fit, ut haec prae aliis vitio corporis animique adficientur (c). Animi quoque, ac scelerum vim in lac ipsum, quo & infantum animus contaminari possit, plurima exempla probant: per iram lac reddi noxium venenatumque, tristis saepe observatio loquitur; ut epilepsia etiam per reliquam vitam manserit (d), communis observatorum celeberrimorum consensus docet (e), ut nutrice timore, aut ira incitata, lac omne emulgendum, negandumque infanti consulant (f). Venere lac contaminari,

tum

(a) DESESSARZ, l. c. p. 217.

(b) Opusc. T. I. p. 255. 261.

(c) KRAUSE, de naevis maternis. *Hamb. Magaz.* Vol. XX. p. 119.

(d) PLATTNERUS, l. c. p. 283.

(e) KRUGER, l. c. p. 33. BOERHAAVE de morb. nerv. p. 556. HARRIS, de morb. infant. p. 7.

(f) LANGHUTH, de regimine lactentium. P. VII. PLATTNER, l. c. p. 284.

tum veterum iam observatis datisque inde legibus (a) tum recentiorum exemplis confirmatur; ut peiorem vero clandestinum amorem, venterisque cupidinem, ac nocentiolem declarat PLATTNERUS (b); unde natae infantum aegritudines difficulter & cognoscantur, & curentur: atque eum quoque in ipsum animi habitum moresque influxum celeberrimi viri testantur; licet obscurissima eius rei ratio sit, quia partium, in quibus maxime mentis in corpus, corporisque in mentem actio est, tanta est subtilitas, quae omnem ingenii industriaeque humanae vim eludat (c). A malae moratae nutricis lacte infantis bene nati animus corrumpitur, atque in turpissima flagitia a sua stirpe prorsus aliena deflectitur: familiarum aliquando dissidia fratrumque odia eo maxime fonte inaequalis atque alieni, saepe turpissimi lactis, quod tenerrima fere flamina aedificavit, ac temperamentum condidit, derivat BALLEX.

Delect. Opusc. Vol. XII. C

(a) FULVIUS olim SABINAM puteo mergi, & corrivalem securi percuti iussit, quia compressa DRUSIAM lactavit. GARM de mirac. mortuor. p. 653.

(b) L. c. p. 288.

(c) GAUBIUS, sermone academ. I. de regimine mentis p. 98.

SERDE (a). Extra dubium ponit PLATTNERUS (b), victum resque omnes, quarum usu vita continetur, ad animi habitum moresque aliquid conferre, quo in argumento pluribus elegantibus momentis versatur; alii variis observationibus comprobant (c) perinde, ac veteres iam homines, immanitate emittentes, tygridum duxisse ubera, dixere (d). Dum certe animi propensio ac impetus temperamenti rationem definitam, sed mere corpoream sequitur, quae maxime victus norma conciliatur, aut emendari potest aut augeri etiam (e); cuius in teneriore corpore eo maior energia est, quo flaminibus adhucdum imperfectioribus maior a victu perfectio ac soliditas accedit, maxime in subtilioribus ac nobilioribus partibus, cerebro, nervis, spiritibus, a quorum certo habitu temperamenta repetit HEUERMANN (f). Quanquam hic id monere oporteat, non perpetuam constantissi-

(a) L. c. p. 60.

(b) L. c. p. 283.

(c) Nov. act. phys. med. T. I. obs. XVI. KRUGER, l. c. p. 33. Casp. a REIES camp. quaest. iucund. q. 47.

(d) VIRGILIUS AENEID. L. IV. v. 365. OVIDIUS Trist. L. I. & L. VIII.

(e) HALLER, elem. T. II. p. 143. 147.

(f) Physiol. T. II. p. 416.

namque hanc esse sceleratae nutricis in alumni animum efformandum facultatem : uti vario ex argumento dubitat SWIETENIUS (a), ipseque BROUZET (b), se a nutrice vino dedita absque vitio aut corporis, aut animi inde oriundo, educatum testatur. Attamen, tanti hoc momenti visum est viris celeberrimis; ut cum deleta pristina morum vitaeque integritate, vitia nostris praedominari temporibus, morborum adeo & criminum seminia una cum humano lacte in infantes propagari credant; unde nec ipsae toties excipiendae matres essent, magno generis humani bono fieri consulant, ut humano lacti in nutrimentum infantis lac brutorum animalium domesticorum substituatur, quae quippe adfectibus animi ac perturbationibus nec obnoxia, nec morbis subiecta facile, sic ali regique possint, ut optime valeant, & lac bonum fundant, unde & morborum & scelerum scaturiginem obstructum iri, generisque humani imbecillitatem sensim emendandam sperant (c): quod,

C 2

(a) T. IV. p. 669.

(b) Education medicinale des enfans p. 175.

(c) VANDERMONDE Essai sur la maniere de perfectionner l'espece humaine. Conf. Comm. de reb. in sc. nat. & med. gest. Vol. VI. p. 451. eandem senten-

quanquam satis ab aliis refutatum sit (a), tum quod omnino melius de saeculo nostro censendum sit, neque desint virtutes, licet vitia numerosa fuerint; tum quod tolerabilior omnino sit homo, qui animi perturbatione impulsus, quandoque vitiose agit, quam alius, cuius mores cum feritate, immanitate ac stupiditate bestiarum congruunt, qui nec consilio nec iudicio regi possint; tum quod optime semper ipsius naturae institutum amplectendum sit, quae sola novit liquida, pro determinata vasorum ratione ac diametro, ac peculiari corporis fabrica parare. Sunt nihilominus, qui dum lactis humani defectu ad brutorum lactis subsidia confugere necessitas iubet aliquando, eo in delectu animalis inclinationes attendendas, indeque liquidorum indolem iudicandam esse suadent, quae emendari possit cognitum humorum humanorum vitium, indeque pendens totius corporis constitutio; ita, quibus segnior humorum motus, ac tardiora pigrioraque corpora sunt, lacte vividioris atque alacrioris animalis succurrendum

tiam defendit LUDERS de educ. Liber. §. X. BROUZET l. c. praeface p. 41.

(a) V. SWIETEN, T. IV. p. 668. 669. BALLEX-SERDE, l. c. p. 58. UNZER, *Wochenschrift der Arzt* T. I. p. 193.

fit; unde populis septentrionalibus lac caprinum, Italis vaccinum, aliis mediae indolis lac praescribit **BALLEXSERDE** (a); quo illorum tarda corpora, pigrioresque animi, horum vivacitas vanitasque lactis opposita indole corrigentur (b).

§. X.

Sed humano lacti, eique materno primas merito deferimus partes, matremque in officio tam nobili necessarioque ad corpus, non tam ad probas diaetae leges, quam animum ad morum probitatem, a gravioribus adfectibus alienam componendum sedulo hortamur. Sed varia quidem huius officii impedimenta sunt, quae

© 3

(a) L. c. p. 62. 63.

(b) Si quidem vera sit, quae ex spectatore Anglico apud **UNZERUM**, l. c. p. 329. extat, historia viri probi integrique, animo in actionibus composito, discretoque, qui, cum lacte caprino educatus esset, saepe, cum solus degeret, saltibus efferri exercerique gaudebat. Puerum refert a **REIES** q. 41. lacte porcino nutritum, qui adolescens, in edendo bibendoque spurcus atque intemperatus adeo evasit, ut nullam sui cultus curam haberet, quin lutosa & coenosa loca adeo optabat, ut in eis perpetuo volutari appetierit, imo remotis arbitris, se in istis volutaverit.

lactationem propriam vel difficillimam, vel impossibilem saepe, vel cum magno matris periculo coniunctam reddunt. Mammarum papillarumque vitia huc pertinent, dum vel nimis parvae latentisque papillae educi, atque infante adprehendi nequeunt; quod in primiparis, neglecta matura infantis adplicatione, intumesciente ab impulsu sanguinis mamma, fit, &, licet variis adminiculis artis emendari id vitii saepe possit, saepe mala papillae conformatio artem eludit, quae diuturna a thoracibus angustioribus foemellarum compressione inducitur (a); papillarum fissurae, atque ulcuscula, vel lactis, vel salivae infantilis acrioris influxu, vel infantilis oris, nimis atterentis vi conciliatae, uti a summa partis sensibilitate ingentes sugendo dolores, ita & totius saepe mammae inflammationem creant, nec semper remediis lubricantibus, demulcentibusque cedunt. In aliis lactis defectus peccat, vel ipsorum vasorum mammariorum nimis contractorum aut plane obstructorum & concretorum vitio, ut lacti adpulso cedere nequeant; quod in habitu corporis torosiore, ac solidorum nimia strictura, atque aetate puerpe-

(a) LOESEKE, therap. spec. T. IV. p. 172. V. SWIETEN, l. c.

rae provectiore fit, aliquando ductuum lactiferorum compressione ab adipe incumbente in maiori obesitate (a); maxime si contractioribus vasis prima illa a fotu, frictione leni, ac frequentiori suctu, adminicula mollities puerperae neglexerit: vel aliis evacuationibus largioribus per alvum, sudores, ipsaque lochia copiosiora, queis in mammas influxus suspenditur; vel totius corporis ac viscerum chylopoëion debilitate fit, ut probi chyli lactisque penuria, aut morbo puerperae, aut victus parcioris, gravioris, ac coctu difficilioris culpa, aut continuato animi adfectu, moestitiae aut amoris taciti peccet. Quae vitia, licet complura artis adminiculis corrigi possint: non enim desperandum recte censet SWIETENIUS l. c., cum historia medica doceat, non tantum virginibus, sed & viris lac in mammas derivatum fuisse, dum morosos infantes vanae, ut putabant, lactationis specie placare conabantur: neglecta tamen, liquidi huius deinceps secretionem negant. In aliis ubertas lactis peccat & infanti & matri summe noxia, quod tum effectu corporis iam

C 4

(a) V. SWIETEN, l. c. p. 645. atque inde maiores mammas minore lactis copia scatere constat, l. c. p. 670.

debilioris, & solidae partis nimis relaxatae, tum humorum maternorum nimis resolutorum vitio contingens, aut phthisicam corporis dispositionem, vel scorbuticam supponit (a), aut crebriore lactatione ingenti humoris nutritii iactura inducit, cum aucta inde humorum acrimonia, siti, febricula accensa, atque aucto indies marasmo corporis, ac debilitate; quos effectus probe exponit SWIETEN (b), item GAUBIUS (c), KLOEKHOF (d), aliique. Atque eo quidem magis attendendos cupit LUDWIGIUS (e), quo magis cum hysterici morbi effectibus confundi solent, cum quibus quoad spasmos ac lypothymias, aliaque quae a debilitate nervosa pendent, effecta conveniunt,

(a) Lactis copia in foeminis, vel conspicua ad phthisin dispositione, vel ipsa phthisi laborantibus eadem ratione adest saepe, qua & gravidae infantes praeter morem crassos, torolos, magnosque alunt roties, & enituntur, observante ROEDERER, de temporum in graviditate, & partu aestimatione §. X. gelatina nutritia haud intimius humorum massae commixta, subactaque, sed facile per placentam ex utero, in abundans embryonis beneficium, devorata quasi haustaue.

(b) L. c. p. 645.

(c) Pathol. §. 564.

(d) De morbis animi p. 37.

(e) Progr. de excretionibus immoderatis ut causa debilitatis in morbis p. 10.

neque adeo tum in obesis, tum macilentis, negligendos vult, ut nascitura rescindantur mala: phthisin inde inductam pluribus observationibus refert MORTONUS (a), eumque metum, adparentibus praecipue dictis symptomatibus, cum oppressione hypochondriaca vel hysterica, adpetitu imminuto, ingruentibus aliis a spirituum penuria ac debilitato nervorum tenore phaenomenis, succedente demum calore extremitatum, hectico incutit. Tabidam corpori induci dispositionem, atque varia debilitatis, & liquidorum a naturali crasi diffluentium effecta, fluorem album, pustulas toto corpore natas, sudores profusos, memorat RAMAZZINI (b).

Quois adeo in casibus, ut servetur matris incolumitas, arcendum a lacte materno infan-tem esse adparet, nisi probis diaetae regulis, victu demulcente, blando, gelatinoso, quem praescribit SWIETEN l. c. ac minus crebra infantis lactatione, addita corporis exercitatione placida, animoque ad laetitiam composito, aliis probae digestionis subsidiis, nimiae humorum nutritiorum iacturae viribusque maternis succurri

(a) Phthisiol. p. 14.

(b) De morb. opif. cap. 19.

possit. Infantum quoque eo e lactis genere noxas facile perspicimus, si eosdem in materno corpore; ac inediae nimiae effectus consideramus, quibus humores acriores redduntur, & subputridi (a), nimiaeque cum alcalescentia iuncta tenuitas, facili se phaenomeno prodit, quae varii infantum morbi propullulant.

§. XI.

Ea in necessitate materno lacti lac alterius foeminae substituere malimus, quo infantis vitae sanitatique, optimo quo licet, modo prospiciatur; quod quippe humani corporis viribus elaboratum, humani & inquilini liquidi characterem imbutum, tum ex uberibus haustum, absque partis spirituosae optimeque perfectae iactura (b), vasa corporis subit optime, atque nutritionis materiam facile ulterius elaborandam praebet. Sed ut difficultates supradictas elucet-

(a) SWIETENIUS, l. c.

(b) Immediatae e mammis suctionis commoda a parte spirituosa repetit, eamque a nervis ipsis per mammas dispositis, atque uti in omni glandula, ita & hic humores suos subtilissimos effudentibus derivat SWIETEN; unde ratio, quare adfectus animi in lactis mutationes tam valide operentur. Conf. Comment. T. I. p. 30.

mur, plura hic momenta notatu digna sunt: in nutrice ad hoc opus eligenda non tam corporis ipsius constitutionem sanam & ; si fieri potest, robustam, inprimis vero ad humorum bonitatem respiciendum esse, praeceptum LUDWIGII est (a); atque, si rem accuratius ad artis regulas pensitemus, maiori hic cautela opus; ut lac infanti comparandum, eius viribus digestionis & humorum indoli, ut fieri potest, proxime respondeat. Adeo non externa sanitas & vividus color floridusque, qui non semper sanitatis effectus, sed in phthisicis saepe (b), atque visceribus obstructis accidit, nec lactis salubrior character unice attendi debent, sed potissimum convenientia nutricis cum matre infantis ratione aetatis, formae, temperiei & temporis partus. Si mater iuncea est, talis sit nutrix; si tenera, haec non sit torosa, si iuvenis, haec non sit vetula; si hodie peperit, haec non ante annum; cuius spissius omnino lac est illo naturae perpetuo consilio, quo lactis tenuitatem ac conditionem aetati viribusque coctionis infantis accommodat, neque a tenerioribus infan-

(a) Institut. clin. §. 1025.

(b) V. SWIETEN, T. III. p. 645. BONETUS
sep. T. III. p. 536.

ribus facile digerendum. Errorum circa hæc ingens numerus est: sunt, qui robustioribus nutritibus ruri petitis optime existimant infantes committi, qui tamen a mollibus & delicatulis parentibus nati, male lac illud agreste coquunt, quod, uti robustiore corpore factum, ita & prolibus robustiore nativo flamine natis, ipso naturae consilio destinatum erat. In quo argumento eleganter versatur PLATTNER (a), qui & porro alia sanitatis externae phaenomena curiosius attendit; ut reiiciat, cui vari, lentisculae, & copiosae ephelides in facie nascuntur; dentium item observationem singularem requirit merito, quorum nitor & stabilitas, absque ullo glutinoso humore adhaerente, bonae valetudinis signum constituit; cum flavedo dentium, rubiginosa scabrities aut caries cacochymicam humorum dispositionem indicet (b). Eadem ratione sudorem animamque halantem attendit BALLEXSERDE (c), ne graveolento odore infecti sint; atque capillorum ruforum foeminas, ingratum plerumque odorem spirantes, eo ab opere excludit, quae lac plerumque magis aci-

(a) PLATTNER, opusc. P. I. p. 258.

(b) LUDWIG, instit. clin. §. 743.

(c) L. c. p. 39.

dulum habent; rufis anteponeit fufcorum capillorum, aut nigrorum foeminas LIEUTAUD (a). Alia fanitatis integrae huc phaenomena pertinent, inter quae praecipue attendendum, an fluore albo, vel & menftruis inter lactandum corripatur, quae ordinario ea sub opera fuppreffa, fed fluentia, aut fingulare laxitatis vaforum uterinorum vitium, aut quandam sanguinis ab acri maiorem resolutionem indicant, atque lactis materiem detrahunt; unde variarum temporis infantum incommoda nascuntur. Neque tamen ea in re communibus matronarum confiliis fubfcribit SWIETENIUS (b), ut nulla adparente fanitatis mutatione, nec lactis dote naturali mutata, nunquam in mutanda nurrice confentiat, ac plus omnino a frequenti nutricum mutatione metuendum credat; quod idem HEISTERI (c), PLATTNERI (d), aliorumque confilium eft. Notae vero lactis boni eae praecipue habentur, ut fit gultu & olfactu fuave, & fpeciatim ratione confiftentiae ungui pollicis vel fpeculo inftillatum nec diffuat

(a) L. c. P. I. p. 483. SMELLIE, P. I. p. 490.
DESESSARZ, l. c. p. 214.

(b) T. IV. p. 673.

(c) Obf. med. chir. p. 359. 374.

(d) L. c. p. 286.

nimis tarde, nec subito; ratione coloris subcoeruleum, nec nimis albicans, nec in flavedinem declinans, quod nimis tenue acreque esse solet (a). Quod album cum multo cremore, nimis spissum est, atque quo pinguius, eo peius esse solet (b). Ipsam partis serosae & caseosae proportionem praecipitatio cum spiritu vini rectificato, vel liquore acido facta docere potest; dum maior feri ratio maiorem tenuitatem, minor crassitiem, aequalis mediocritatem salubrem docet. Varia a spisso lacte infantum mala ex alvi obstructione, ac globulis pinguibus durisque intestini motu in colli cellulis compactis, torminibus ac convulsionibus inde sequentibus (c): ratione saporis nec salsum, nec acidum, nec amaricans sit, oportet. Neque explorari hoc lac debet, nisi aliquot horis a pastu nutricis, & in utrisque eius mammis, ubi lac semper optimum, sed continuo a pastu crudum, nocivumque est, uti probe BOERHAAVE (d). Est enim, licet lac unum videatur, omni fere hora varium, & diverso gradu nutriens pro du-

(a) LUDWIG, l. c. §. 1025.

(b) KRUGER, *von Erziehung der Kinder*, p. 32. V. SWIETEN, l. c. p. 671.

(c) PLATTNER, l. c. p. 266.

(d) Praelect. T. IV. P. II. p. 452.

ratione virium coquentium, chylo adplicatarum; dum a pastu, continuo chylum crudum viribus adsumptorum viciatum sistit, donec repetita viscerumque actione peregrinus adsumptorum character deleatur; sed & diutius a pastu, chylo potissima parte in serum converso, lac denuo nauseosum evadit. Sed cum tam facilis ab adsumptorum chylique inde parati indole lactis mutatio sit; primum est, ut probae nutricis diaetae ac digestionis invigiletur; pertinent huc subsidia omnia ad coctionis probae negotium spectantia: exercitatio corporis, imprimis si robustiores eique ante adsuetae fuerint; quae non sine gravi chylopoiesios damno omititur, atque aëri liberiori, cui adsuetae, plerumque relinquantur, quas malo e contra consilio conclavibus saepe angustis, aëreque humido impuroque includunt, cum pessimis & nutricis & infantum noxis (a); atque exercitationis hoc genus praecipue in partibus superioribus requiritur (b), quo pectus & lacerti cum quadam varietate moventur, ad copiosorem succum in mammas derivandum; atque cibum antecedit

(a) KRUGER, l. c. p. 47. 202. TISSOT, avis §. 341.

(b) V. SWIETEN, l. c. p. 673. PLATTNER, l. c. p. 282.

potius, requirit PLATTNER l. c. Post satisfactionem autem nihil agendum, ne crudus succus ex ventriculo detrusus, cum sanguine ad mammas ducatur. Diaetae ratio convenit tum bonae notae cibis, tum potus genere, cui maxime adsueta incolumis vixit antea; quam etsi difficiliorem haud mutandam continuo, ipse monet SWIETENIUS (a). Multiplex vero hic error dominatur; dum lactis bonitati ac copiae prospectura mater, non nisi victus iurulenti copiam; cibaria omni arte culinaria parata cum potionibus saepe meracioribus praebent, ac debiliorem aliquando adpetitum sollicitant: unde digestionis depravatur integritas, maxime sub aëris impuri inclusi vitaeque sedentariae noxis, lacque ipsum, vel nimiae visciditatis oleosae, vel acrimoniae alcaliscentis, in quam facile ea victus genera etiam sub integriori corporis ac coctionis robore abeunt, vitio contaminatur (b); unde primariorum puerorum frequens languor ac strages est, acri hoc tenelli corporis fabricae inimico, aut in varias cutis exulcerationes, aut ipsorum viscerum labem abeunte, & tormina atrocia,

(a) L. c. p. 672.

(b) KRUGER, diæt. p. 36. 39.

atrocia, diarrhoeas saepe sanguinolentas, ac funestas demum convulsiones operante. Quae humorum vitia ipso plerumque spontaneo appetitu, cui relinquitur nutrix, mixtoque ex acescentibus victu corrigerentur. Sed & ad has lactis mutationes addere oportet, quod supra monitum, illud aliquot a pastu horis demum optimum esse, continuo a pastu crudum nocivumque pro varietate adsumptorum diversum, id quod tenendum praecipue, si crudioribus aliquando haud abstinet nutrix: unde & potus copiosioris, cui sibi plus indulgendum credit aliquando, noxas derivat PLATTNERUS (a); quo perpetuo chylus dilutior quidem, sed a perfectione animali alienus, citius in massam sanguinis, ipsaque in ubera praecipitur; adeo lactis bonitas ipsius chyli perfectionem, viriumque corporis integritatem sequitur. Sed & exercitiis nimis corporis, aut febre, vel a quacunque maiori vasorum actione, lac acre subflavum, tenue fieri adnotat QUESNAY (b), alcallescere febre, testatur HALLERUS (c); putri-

Delect. Opusc. Vol. XII D

(a) L. c. p. 278.

(b) Act. acad. chir. T. I. p. 105.

(c) Elem. T. II. p. 88.

dum fieri, HUXHAM (a) item a ieiunio, prostrato adpetitu, vigiliisque nimis, febre cibos nauseante, potu idem parco, sudore multo, easdem lactis mutationes adnotat LANGGUTH (b); queis in casibus infans ab uberibus arcendus: febrem inde ab infante contractam lethalem memorat DESESSARZ (c); dum in largissimam hanc secretionem acre quodvis, vel attritu febrili natum, vel morbi materiam alens, vel medicamentorum opera evolutum, ad excretionem dispositum perinde transit, ac in aliis organis secretoriis, pro ratione secretionis plus minus largae, adparet.

§. XII.

Hisce sub diaetae praesidiis maiores sensim proprii corpusculi vires nanciscitur infans, quae digestionis adsumptorum magis a natura sua alienorum, crassiorum, sufficiant, demumque ablationem exigant: quae & sua momenta habet, notatu digna: matres indulgentiores ultra annum & ad duos etiam lactationem protrahunt; aliae

(a) De febr. p. 82. 83.

(b) L. c. p. V. VI.

(c) L. c. p. 259.

ad sextum saltem & octavum mensem, suis singulae argumentis fultae; contra quae non nisi inter medicos eloquentior valet. Naturae ductum sequitur, quae lactationis terminum illum ponere videtur, ubi dentes aliqui ad comminuos cibos destinati, sex vel octo proruperint; nisi singularis adhuc infantis infirmitas tenerius a matre alimentum exegerit: quod artuum imbecillitas, musculorum cutisque nimia teneritudo absque elastica torositate docet, cui externo fibearum habitui & interna viscerum compages responderet. Diuturnioris lactationis incommodum illud est, ut succi nutritii vi nimis accumulata, obefiores redditi, pituitosis facilius pateant morbis; licet nec constans id vitii genus sit, ut matre vel nutrice sana, ac salubritate coeli ruralis boni apertique fruente, quotidiano labore exercitata, moribus probis composita, nullas a lactatione diutius continuata noxas metuamus (a). Urbium rarior haec felicitas est, atque dum mater vel nutrix conclavi suo inclusa, segnitie languet, atque cum lautioris vitae mollitie, variis animi commotio-

(a) V. SWIETEN, l. c. p. 689. PLATTNER, l. c. p. 289.

nibus , libidine , iracundia rapitur , quantum a vitae victusque simplicitate abest , tam multiplici tum corpus proprium , tum infantem morbo exponit , ut maturius a lacte materno depelli debeat . Sed eo in negotio plura sunt , quae & matrem & infantem spectant , incommoda , lactatione praesertim subito nimis finita , qua insignis in corpore se , & excretio supprimitur ; cuius vel ipso organo secretorio , vel aliis in partibus corporis , insignes noxae esse possunt , quatenus ab accumulata liquidi secreti mole glandulae mammarum intumescunt , atque inflammantur facile , vel facta in alias partes metastasi simile vitium flagrat , de quo supra dictum . Uti a subita ab lactatione phthisin induitam MORTONUS (a) memorat . Infanti ab alieno victus genere id accidit , ut colore vegeto mutato , subsidente carni torositate tumidula , diarrhoeis saepe molestis corripiatur ; in quibus rarius quid mali , atque seni opii dosi , ac roborantium remediorum ope succurrit VOUNG (b) , nisi collecta saburra , aut viscerum obstructio alias indicationes fecerit , opiumque

(a) Phthisiolog. p. 14.

(b) De Op. p. 48.

excluserit (a). Sed praecaventur maxime, si lacte materno sensim detracto cibis aliis infans assuescat.

§. XIII.

Quod quidem monitum paullo minus necessarium est, dum contrario errore praematurius, ac primis plerumque diebus alia ciborum genera, pulticulas praesertim farinosas cum lacte coctas ingerere solent (b); cum tribus primis mensibus nullo alio cibo, quam materno lacte nutriri oporteat infantem, alimento tum debilitati infantili congruo, tum pro nutritione sufficiente (c); pulticularum harum, infante praesertim avide ac copiose lac simul ex uberibus hauriente, ingentes tum a copia, quam bis, ter quaterve de die ingerunt, tum a visciditate cibi noxae sunt; dum ea virium coctricium debilitate in gluten spontaneum tenax, cum acido propria indole magis evoluto abeunt: in quod praec-

D 3

(a) TRALLES, de Opio p. 141. 142.

(b) MAURICEAU, l. c. obs. 263. mortem infantis feliciter nati, inter tormina, ac convulsiones secutam, a pulticula prima die ingesta describit.

(c) V. SWIETEN, l. c. p. 686.

cipue tum farinosorum omnium mucilago, tum & praecipue tritici, & quae ad hoc genus spectat, spelta, zaeque glutinosa natura vertitur, quam experimentis pluribus illa BECCARII imitatus, tentavit exposuitque KESSELMEYER (a), indeque plurimos infantum morbos repetit; quam visciditatem lac ipsum per coctionem parte tenuiore privatum, ac relicta parte caseosa auget. Summa certe tenacitas haud facile solubilis, tenuissima vasculorum secretoriorum oscula obstruit, fibrae intestinalis actionem ac robur relaxat, glandularum mesentericarum aliorumque viscerum abdominis angustias obstipat, atque acido haec inter digestionis vitia dominante, lac ingurgitatum caseosa coagula addit cum malorum pessimorum eventu, quo tormina, vomitus, diarrhoeae, excrementa illa, mucosa viridia, flatuum molestiae, atrophiae potissimum, asthmata, cardiogmi, catarrhi suffocativi &c. enascuntur; motuum convulsivorum varia genera infantili corpori familiaria inde repetit ZIMMERMANN (b), atque rachitidis

(a) De quorundam vegetabilium principio nutriente
p. 4. 16.

(b) L. c. P. II. p. 264. SWIETEN, l. c. p. 686.
post mortem convulsionibus inductam, ventricul-
um caseosa materia distentum, pylorum plane
obstructum vidit.

tum ab acido, tum viscido in universa demum humorum massa dominante, plenam inde scatiginem statuit, quorsum etiam infarctus glandularum scrophulosi spectant. Vermes, qui in infantibus recens natis, vel & praeter lac maternum nullo alio cibo usis rarissimi, plenis toties erumpunt ovariis, favente ventriculi debilitate, ipsaque hac ingestorum corruptela (a); dum puls praecipue diutius aëri relicta, muscis aliisque insectis locum fecerit, cui copiosa committant ovula; perniciosissimum adeo infantis alimentum in pulve farinacea recte adpellat VANDERMONDE (b). Cuius noxas non nisi robustiores infantes, agresti durioreque flamine nati effugiunt, sentiunt plerique imbecilliores, & rarius, nisi summas inter difficultates, eluantur. Verum, dum farinae haec tenacitas varia arte emendatur, fermentatione praegressa, quae pastam nunc aqua solubilem reddit, atque succedente debita coctione in panem paratur, meliora certe ex pane similagineo cum lacte, vel iusculo carneo dilutiore in pulvem cocto alimenta sunt; farinam prius leniter tostam suadet

D 4

(a) DESESSARZ, l. c. p. 271.

(b) Comm. de reb. in sc. nat. & med. gest. Vol. VI. p. 454.

BALLEXSERDE (a) ; qua pariter opera tenacitas glutinosa frangitur, aërque (b) latens expellitur, qui in ventriculo, recuperato elatere summaque distensione nocet ; quod idem in farina ex Malta parata refert SWIFTEN (c), dum incepta & mox suffocata granorum vegetatione, lentior farinosus immittitur.

Quae victus momenta eo curiosius attentiusque considerata ; quando humano lacte destitutus infans soli arri & matronarum consiliis, maiori periculo relinquitur : quibus ipse quidem inter paucos patrocinator BROUZET (d). Eo in casu, uti a lacte naturalis maxime & potissima nutritio petitur, ita humano tenuitatis ac reliquorum principiorum ratione, lac asininum, vel equinum succedit, eique substitui potest : Elegantiâ SPIELMANNI eo in argumento experimenta sunt (e), queis primas ab humano lacte partes asinino, equino (f) defert, crassius omnino lac vaccinum, crassissi-

(a) L. c. v. 91.

(b) Qui forte eadem copia, ac in granis Malis experimentis HALESII, ad quartam totius latet.

(c) T. IV. p. 687.

(d) L. c. P. I. cap. 5.

(e) De optimo recens nati alimento §. 17.

(f) BARBEIRAC const. medic. p. 246.

mun caprinum & ovillum invenit (a); quae lactis genera adeo a spissitudine sua, quae maiores digerendi vires requirit, quo plures vehunt partes pingues & caseosas, eo deteriora, atque nutriendo debili infanti ineptiora existunt. Sed tyranni usus maior & hic vis ac potestas est, ut eum in scopum plerumque, quod omni tempore locoque praesto est, vaccinum feligatur, quod coctum tepore dein animalī praebeatur, licet eo in genere censura BOERHAAVIANA notatum, quae a partium fluidiorum tenuiorumque iactura coctionem non tam inutilem, quam nocivam declarat. Licet vero lac coagulari plerumque in ventriculo ipso coctionis opere videatur (b), neque vero coagulum, nisi nimis crassum durumque, ac maiori copia collectum, noceat, cui quippe solvendo proba bilis saponaceae reliquorumque influentium liquidorum virtus sufficiat; constat facile, has tenuioris lactis minores, sed cras-

(a) Contrarius est BOERHAAVE, elem. chem. T. II. it. SWIETEN, T. IV. p. 679. lac vaccinum reliquis pinguius refert, quos refellit SPIELMANN, l. c. §. XVIII. ratione tenuitatis caprillum etiam bubulo praefert ZIMMERMANN l. c. P. II. p. 259.

(b) SWIETEN, l. c. p. 679. BROUZET, l. c. p. 113.

fioris vaccini maiores omnino noxas esse supra pluribus dictas. In ea adeo crassitie lactis emendanda varia opera est, dum vel addito theae infuso (a), decocto tenuiore hordei, aut avenae, aliisque pro varia foemellarum arte atque ingenio diluunt; sed saepe adeo non emendant, ut vel promptiore acescentia lactis augeant coagula, vel crudiores simul partes viscidasque, debiliori ventriculo molestas, nutritioni ineptas ingerant. Quois artibus solum decoctum panis, minime acescentis, probe cocti, similaginei praetulerim, cuius partes fermentatione optime attenuatae & solubiliores, nutritioni magis ferviunt. Alii ad solvendas tenaciores caseosas particulas saponacea miscent, uti sacharum, vitellum ovorum, amygdalas dulces cum eodem lacte terunt: quorum ea quidem virtus visa est, ut in experimentis minus casei subsideret, praesertim a tritis amygdalis (b), idque tenerri- mum, mollissimumque: qua ratione lac vaccinum ad usus probos tum ratione pinguedinis

(a) Cautelam addit LOESECKE therap. spec. P. IV. p. 193. ne saturatius infusum, a vi adstringente, tenerrima lacteorum oscula, glandularum tenuissima vasa sensim obstruat, atque atrophiae inde primam pandat originem.

(b) SPIELMANN, l. c. §. XIX.

adfusa aqua, tam casei ratione amygdalarum ope corrigi possit. Quod idem COSNERI (a) consilium est. Eodem SWIETENIUS (b) pilulas ex bile bubula lento igne inspissata, vitellum ovi, ac saponem veterum quotidiana ad grana aliquot dosi praescribit. Alii probo quidem consilio tenerioribus infantibus solum serum lactis dulce adhibent, dum lac vaccinum recens emulctum cum ovis recentibus probe conquassatis miscent agitantque, e quo coctione dein crassiores lactis partes cum albumine subsident, ac serum relinquunt dulce, saponacea vitelli virtute imbutum, ad nutritionem, absque coaguli metu debilissimo ventriculo optimum, quo & auctori infanti panis bis coctus, vel similagineus, vel ex oryza in iuscula ac panatellas gratissimas redigi potest. Has lactis vaccini noxas rescissuræ aliae, quae a venerabili matronarum coetu sibi sapientiores videntur, lac omne reiciunt, solis decoctis hordei, avenae excorticatae, dactylorum, aliorumque infantem sustentant. Sed adparet, longe crudiora, viscidioraque, a natura animali alienissima ingeri, quæ coctionis vires plane impares sunt; ut vel

(a) L. c. p. 240.

(b) L. c. p. 684.

obstructione vasorum sensim magis invalescente; vel summa virium nervosarum prostratione nutritio fatiscat omnis, atque abdomine prominente, reliquae partes corporis emacientur; ubi diarrhoea plerumque comitans aquosa, pituitosa, cum lenta febricula, cum atroci saepe tormine, atque convulsionibus necat; neque in his sectione cadaveris obstructions glandularum viscerumque scrophulosae semper adparent, testante ROEDERER (a), sed a sola partium solidarum debilitate, succorumque vitalium exhaustione, phthisin nervosam sistunt. Uti & SYDENHAM (b) tumores abdominis infantum ab evacuationibus nimis saepe ortos adnotat.

§. XIV.

Alia diaetae infantilis momenta huc pertinent: atque victus iusculorumque e carne paratorum, quae acido praedominanti saepe opponuntur, suae cautelae sunt; ut, cum gelatina praecipue animalis corporis, coctione extracta, imbuta sint, ea pari quidem lege viribus coctionis respondeant; dum pro robore animalis

(a) De phthisi infantum.

(b) Pag. 779.

duritieque partium, ex quibus extrahitur, tenaciores plane ac digestu difficiliiores gelatinas continent, quae in gluten fatiscunt, sed spontanea degeneratione putrescens; sed & circulantium humorum massae immerstae gelatinosae particulae licet animalibus viribus iam elaboratae, infanti corpori difficiliiores saepe existunt, quam ut vasorum debili actione subigi, & in probam nutritionis materiem redigi possint; habitus inde corporis obesior ac pituitosus infanti nascitur, cum maiori vasorum onere, ac fibrae debilitate plerumque coniuncta: futuras capitis his molles manere, rachitidi, tussi convulsivae, aphthis, scrophulis obnoxios esse, annotat QUALT. HARRIS (a); omnia maioris in his debilitatis argumenta, e tardiore plane vigore puerili, pedum in deambulatione usu, dentitione aliisque corporis evolutionibus tardioribus colligit LUDWIGIUS (b), succo nutritio tum minus perfecto, tum vasa & cellulas potius distendente, quam solidorum fibris intimius applicato. Sed & glutinosa toties immeabilitate, atque acrimonia alcalescente sanguinem imbuunt cum variis morboris eventibus, cutaneis non

(a) L. c. p. 14.

(b) De celer. obes. p. 11.

tam foetidis exulcerationibus, quam viscerum infarctu, unde per pulmones traiectu facili impedito, peripneumoniae nothae genera ac catarrhos suffocativos creat: ita per vasa exhalantia viscerum transpressa visa est gelatina, ut sectione cadaveris omnia inter se viscera coalita observarentur a BUCHWALDO (a), quod carniū abusu tribuit. Sed tenuiorum iusculorum, e carnibus tenerioribus paratorum, summus ille in debili corpore usus est, ut & minori digestionis opera indigeat, & probam nutritionis materiam suppeditet; dum acre interposito victu acescente temperamus; qua cautela & tenerioribus infantibus absque noxa aliquando concessum hunc victum adnotat SWIETENIUS (b). Tempus, quo adultioribus aliquid carnis concedi possit, ab eruptione dentium molarium determinat BALLEXSERDE (c). Noxas praematurioris carniū usus, tum a cruditate putrida, tum vermium progenie observat HARRISIUS (d); quae in carne assata, vel aroma-

(a) Obs. Vol. VI. pract. HALLERI, p. 784. ad concretionem pericardii cum corde disposuisse, credit MEKEL. conf. comm. de reb. in sc. n. & m. gest. Vol. VI. p. 631.

(b) L. c. p. 687.

(c) L. c. p. 93.

(d) L. c. p. 8.

tibus condita praecipua incommoda sunt, atque inter cibos, teterrimum merito nimis pinguem vocat V. HALLER (a), qui & difficillime tardissimeque e ventriculo expellatur (b), & spontanea corruptela in rancidum abeat. Simplici vero coctione, uti gelatinoso principio exuitur, ita minus in putredinem prona, optime infantis usui cedit, illa sollicite ubique servata cautela, ne nimio usu alcalescens in liquidis invalescat acrimonia, pessimorum in morbis eventuum causa (c). Eodem de ovis, eorumque vitellis cautela est, quae cibis potibusque mixta eorum spissitudinem augent; licet vitellus copiosas partes in naturam animaleam versas contineat, atque saponaceae indolis adparentibus colostri acidi indiciis convenire possit (d). Verum & uti a nimio victu plerique infantum morbi pendet (e), quo suas in proles amore insanire toties mater

(a) Elem. T. VI. p. 211.

(b) Idem l. c. p. 324.

(c) Variolas, quae inter morbos huic aetati congruos pertinent, toties infantibus carne praematurius passis accidere malignissimas, cel. viri observant DETHARDING de facie a variolis praeserv. Vol. V. HALL. pr. p. 638. ROEDERER, de morb. variol. p. 39. KIRCKPATRIK, de inocul. ed. Germ. p. 39. alique plurimi.

(d) V. SWIETEN, l. c. p. 684.

(e) TISSOT avis au peuple §. 346.

videtur ; ita & alimenti quantitas infanti congrua attendenda est . Quae quidem pro crescentibus eius viribus augenda , sed & pro maiori debilitate imminuenda est , ut prima aetate non nisi lac conveniat ; ac licet nulla eo in argumento generalis sit certa regula locum habeat , id monendum , ne ad quosvis infantis clamores , sed eo vere esuriente & naturali instinctu adpetente , quod ex vacuis neque censis hypochondriis colligere licet , ad cibos recurramus . Quod uti monitum maxime aetatem teneriorem spectat ; ita crescentibus viribus , dum pedum atque exercitationum usu sponte valet paullo adultior , corpore legibus haecenus dictis sit firmato , negligendum ipsi cupimus . Huic alimenti genera non nisi tenuiora mollioraque , ac victus nimis iurulentus adeo non salubris existunt , ut relaxata solidorum compage , hacque ingenerata ventriculi intestinorumque mollitie , ad solidiora digerenda ineptitudinem , atque totius corporis teneritate contracta , ad quosvis morbos , ex variis rerum non naturalium mutationibus , summam inducant proclivitatem . Ventriculi enim ac cuiusvis musculi , par illa spectanda conditio est , qui usu ac labore roboratur , quiete infirmatur , ut pene atoniam incidat . Victum adeo nimis iurulentum mollioremque ,

remque, victum item nimis simplicem, eundemque semper damnat BALLEXSERDE (a), cuius male digestae reliquiae acre uniforme, vel acidum, vel alcalescens, demum in humorum massa praedominans diffundunt, quin alterius cibi reliquiis mixtis aut emendari, aut novo motus peristaltici stimulo eliminari queat. Adeo, dum hactenus tenerioris corpusculi nutritioni praecipue prospeximus, sensim maius robur, firmiorque corporis habitus conciliandus est, quod & cibos aliquando duriores, nec salitis carnibus, brassica condita, ac leguminibus exceptis, expostulat, ea lege, ut iis per gradus adsuescat proles; neque vero ad satietatem oneretur: firmanatur sic increscuntque vires coctionis, ut absque noxa, crudis durioribusque vesci videamus incolumes, atque digestionis etiam vitia ac voracitatis effectus propriis corrigere viribus.

Eadem de potu momenta valent; quem etsi primitus sub caloris animalis gradu natura destinasse videatur, atque frigidi potus praesertim nocturni, in infantibus variae noxae esse soleant, quas in chylo inspissando, indeque

Delect. Opusc. Vol. XII.

E

(a) L. c. p. 125.

glandularum mesentericarum obstructione, natoque fluxu coeliaco, adnotat *historia morb. Vratislav* (a). Corpori tamen paullo vegetiori varia ab ea matrum indulgentia ac sollicitudine incommoda sunt, quæ sub potu perpetuo calido ac infusis theiformibus, universæ solidæ compagis primæ ex utero flacciditas sustentatur, qua nihil ad morbos suscipiendos opportunius; ut vegetiori adeo infanti potus frigidus atque aquæ inprimis puræ saluberrimus sit; liquoresque fermentatos, uti vinum ac cerevisiam, licet ab infantili diæta excludat KRUGER (b), item HARRISIUS (c); atque evoluto inde sub debili digestionē acido noxas ossium præsertim, perfectius nutriendorum, metuat LUDWIGIUS (d); aut ne pars alcoholica tenerrima mollissimaque cerebri vascula facile destruat (e): id potius de abusu intelligimus; dum a virtute roborante leniter adstringente, quæ fibris laxioribus inprimis, atque ad præcavendam nimiam mucigenationem convenit, vini aliquis usus esse

(a) P. 340. STORCK, *von Kindern Krankheit* P. III. p. 204.

(b) l. c. p. 79.

(c) l. c. p. 8.

(d) Præfat. ad NESBIT *osteog.* p. VIII.

(e) DESESSARZ, l. c. p. 325.

merito potest (a) ; quem & ad impediendam vermium genesis, huic aetati familiarem, commendant (b). Sed & ea in re abusum damnamus, quo praematureo fibrarum robore inducto, incrementum corporis impeditur, quod solidorum flexilitate ad vires cordis fundatur ; id quod praematuriore spirituosorum ingurgitatione fit (c). Eodem roborandi scopo praecipue, dum crudiorum usus in infante adultiore conceditur, modicum potus Coffeae usum haud damnare licet (d), in quo quidem arbitram se sexus sequioris gratia sistit. Sed in hoc de potu argumento in genere monendum, ab humorum ad solida superpondio, cum partium omnium insigni laxitate, semper minorem potus quantitatem permittendam esse : sacchari ciborumque dulcium, quae suis blanditur infantibus matrum indulgentia, usus huc pertinet : atque saccharum quidem, quod sale acido blanda oleosaque

E 2

(a) LUDERS, l. c. §. XVIII. BALLEXSERDE, l. c. p. 66.

(b) *Bremisches Magazin* Vol. I. p. 67.

(c) BALLEXSERDE, l. c. p. 95. hunc a spiritu vini effectum adnotat ROSEN Vol. VI. pr. HALLERI, p. 734. MONRO, osteol. p. 52. HALLER, elem. T. VI. p. 252. KRUGER, diæt. p. 44.

(d) LUDERS, l. c. §. XIX.

mucilagine obvoluto constat, atque a compluribus ob noxas, quas copiosam pituitam generando, humoresque incrassando, vermium generationi favendo credunt, male audit; sed cum saponaceam indolem, tum principiis suis, tum variis phaenomenis experimentisque referat (a), dicta incommoda adeo non metuimus, ut potius pituitam solvendo, liquida attenuando prodesse possit; uti sanguinem solutorem inde reddi, experimentis SCHWENKII (b) constat: vermium pituitosos destruit nidos exturbatque; hinc infantibus quidem pituitosis plerisque omnino utile; atque virtute saponacea feliciori ingestorum digestionis servit, lacteisque resistit coagulis, ciborum tenacitatem attenuat, oleosaeque magis subigendo in summa digestionis commoda conspirat, nisi abusu peccetur, quo nimia tandem liquidorum solutione, fibrarumque solidarum quadam demum relaxatione, ac maiori

(a) Olea, resinasque subigere, & aquae miscibilia reddere, lacti mixtum, omnem eius in butyrum secessum, dum aquosum principium cum oleoso intimius iungit, prohibere notum est, testaturque NEUMANN, Chem. T. I. p. 1069. BOERHAVE, Chem. T. II. p. 159. saponem purissimum vocat, qui vim habeat, sese permiscendi cum omnibus humoribus viscidis.

(b) Haematol. p. 189.

irritabilitate inducta nocet; hinc in adultis malo hypochondriaco favet (a); addendum, quod eadem virtute saponacea pinguedinis generationem liberalius sumptum impediat, atque adeo maxime macilentis noceat, quod BOERHAVIUS adstruit (b); quod idem adgnoscat Theophil. LOBB (c), noxas ab abusu similes addit, quales a potu aquae nimio, aut comestione nimia fructuum horraeorum notamus effectus relaxationis, maioris resolutionis, fermentationis natae; id, quod maxime in hypochondriacis, hysteriis, sensibiliore fibrae intestinalis systemate quovis notandum, quod, tum a stimulo, tum acidi magis evoluti iniuria magis lacescit. Bellariorum ac placentularum, quae a saccharo placent, potior haec noxa est, quae nimia copia adsumptae ventriculum gravant, atque in tenacem acidamque massam degenerant. Nodulorum, quos ex pane dulciario, vel pane masticato & saccharo confectos, ori-

E 3

(a) ZIMMERMANN, l. c. p. 281.

(b) Chem. T. II. p. 159. solosque adeo scorbuticos, rachiticosque excipit l. c. p. 139 ab attenuatione nimia humorum, quae debilitatem producit, & laxitatem nimiam.

(c) Exp. circa calc. podagr. p. 274.

infantum ingerunt, tum ab aëre, si negligentius habeantur, tum copiosiore aëre, quem sugendo deglutiunt, incommoda sunt, ut ex nimia ventriculi distensione nauseae ac vomitiones sequantur.

§. XV.

Sed somni quoque ac vigiliarum, motuumque regimen ad sanitatem infantum stabilendam pertinet. Somnus eo largior ipso naturae consilio est, quo tenerior, utque a partu minus distat infans, uti recte in foetu fere perpetuus esse videtur ob animalitatem pene tunc nullam, ideasque nullas adhucdum per sensus illatas, ac summam cerebri mollitiem (a); ita utero egressus maxima ex parte dormit (b), somno tunc nutritioni optime prospiciente, absque quo nulla nutritio: decrefeit somni ratio crescentibus viribus, corpore nutrito magis firmatoque (c). Unde adparet, largiores vigilias

(a) HALLER, not. ad praelect. BOERHAAVII, §. 599. not. V.

(b) V. SWIETEN, l. c. p. 659.

(c) A blandissimo tunc sanguine repetit HALLERUS, elem. T. II. p. 254. hincque minor in senibus.

infantis semper praeter naturales ac nocivas esse, a stimulo vel externo fasciarum strictio-
rum, immundarum, aut cuiuscunque rei pun-
gentis, vel interno doloris a gravato ventri-
culo vel aliis causis morbofis nati. Somno
igitur nihil quidquam detrahendum esse, inter
proba diaetae infantilis praecepta ponit TISSOT
(a), dummodo in aëre sat puro, neque nimis
sub stragulis aut conclavis calore fiat, de quo
postea dicendum. Situs ratione notandum, ca-
piti leniter elevato in somnum componi debere
infantes, dum horizontali vel declivi etiam
situ maior sanguinis in mollissimam adhucdum
ac pene fluidam cerebri compagem vis, ac
noxa est; id quod de infantibus motibus con-
vulsivis obnoxiiis praecipue adnotat LOWERUS
(b). Monendum praeterea, ne adultiores pueri
unquam cum senibus dormiant, qui blanda
inde transpirabili materie repleti, puerum li-
quido subtilissimo, plantarum instar parasytia-
carum, exhauriunt; uti probe BALLEXSER-
DE (c), item HUXHAM (d), alique mo-

E 4

(a) Avis &c. §. 346. n. 3.

(b) De corde p. 169.

(c) L. c. p. 98.

(d) Op. P. I. p. 47.

nent. BOERHAAVE, certum est, inquit, vim sani corporis posse transire in corpus effectum, nam virgines, quae cum aniculis dormiunt, liquet consumi, vetulas vero melius inde habere (a). Exemplum puellae nobilis adducit RAMAZINI (b), ex contubernio & consuetudine aviae, tabidae redditae, quae nullis remediis saluti restitui potuit, nisi ab avia remotione & puellarum restituto consortio: alia exempla adducit DESESSARZ, ipsius imo lateris, quo vetulae lecto accumbere solebat puella, male adfecti observationes adfert (c). GALENUS ipse (d) seni consulturus, puerum accumbere voluit, ut abdomen eius contegeret. Alia aliorum observata sunt (e), quae magnum ea in re momentum stabiliunt. Motuum praeterea atque exercitationum uti ad roborandum corpus summus usus est; ita & varia ratione pro infantis aetate ac viribus adplicatur; in

(a) Praelest. T. VI. p. 353.

(b) L. c. p. 13.

(c) L. c. p. 126.

(d) Merh. med. L. VII. c. 7.

(e) VERULAM. hist. vitae, & mort. p. 161. SWIETEN, exempla tabis feliciter curatae ex FORESTO, & CAPPIVACCIO refert, lacte humano non tam ex uberibus ducto, quam eodem cum nutricibus sanis lecto decubitu. Conf. T. I. p. 30.

quo pariter genere multiplex error est : atque cunarum inprimis agitatio vulgari usu invaluit , ad demulcendos morosos infantes somnumque alliciendum ; cuius motus ea quidem utilitas est , ut leni corporis concussione ad robur corpusculi firmandum conferat : atque quadam aëris circumstantis ventilatione , eum faciat plenior ac profundiore pulmone hauriri ; id quod ad dilatandos pulmones non tam , quam quassandos cogendosque in extremis eorum arteriis varios succos servit (a). Sed , si limites mollioris & aequabilis motus excedat , varias a concussione teneri corpusculi noxas habet , tum ventriculum vehementius agitando , unde vomitus ingesti lactis saepe grumosi , cardialgia ab acri latente , orificio ventriculi superiori vehementius adplicato , ipsius ingesti lactis coagula sequuntur (b) , tum potissimum tenerrima cerebri nervorumque stamina concutiendo turbandoque , unde stupor quidam ac vertigo infantem ad somnum componens (c) , sed & vomitus , & convulsivi mo-

(a) PLATTNER , l. c. P. II. p. 144.

(b) V. SWIETEN , T. IV. p. 680. 681.

(c) BALLEXSERDE , l. c. p. 70. stuporem potius , ac levissimam quandam apoplexiae speciem , quam verum , & naturalem somnum , cunarum ope produci , vult DESESSARZ , l. c. p. 114.

tus oriuntur; aut illa saltem mutatio tum in vasis, frequentiori hoc motu sanguinisque maiori nisu dilatatis, tum & ipsis cerebri staminibus relinquitur, ut in motus epilepticos promptiores existant, vel stupidi capitis superfit infirmitas (a); quae noxae praesertim brevi a partu evidentiores sunt, quo magis caput infantis maternas inter angustias passum ac debilitatum fuerit: adparetque, quam male continuo a partu cunis commissus, agitetur infans; urgente item febre quantis noxis hac corporis motione, sanguinis motus magis acceleretur; aut in quovis convulsionum metu, morbo ipso epileptico, cum maioribus encephali turbis haec consuecta cunarum agitatio celebratur (b). Alia motionum genera, quae teneris adhibent pulsionibus, suas a teneriore corporis viscerumque fabrica, tum maxime ab ossium mollitie cartilaginosa ac imbecillitate, qua processus educunt adhuc cartilagineos aut media cartilagine iunctos, cautelas habent.

Innumera hic mala ab improvida gestatione aut lussibus motibusque corporis nasci possunt:

(a) KRUGER, l. c. p. 72. nov. act. phys. med. T. I. p. 84.

(b) PLATTNER, l. c. p. 145.

atque a natura in primis adhuc cartilaginosa processus odontoidis secundae vertebrae colli illud monitum suggerit MONRO (a), ut dum e lecto eximitur, vel ulnis gestatur infans, sedulo capitis retrorsum prolapsus caveatur, qui absque ingenti huius processus iniuria fieri nequit, donec musculorum crescente robore hoc motus periculosi genus prohibeatur. Alia a gestatione in ulnis, vel sedendo in sellis, ad id aptatis, incommoda sunt; dum corpore antrosum nimis diuque inclinato, donec muscoli erectores suo robore valeant, par corporum vertebrarum dorsi lumborumque iniuria flagrat; qua magna parte adhucdum cartilaginea antrosum maiori pressione incumbunt, impeditaque nutritione, vasorum compressione, gibbositate ad vertebrae dorsi ultimas lumborumque primas deformatur, quod adnotat propriaque observatione confirmat LUDWIGIUS (b). Idem improvida gestatione in brachio semper eodem fieri potest; ut in oppositum latus cum mutata necessario costarum directione, spina declinet, atque nutritione pressarum partium minori ac inaequali, earum deformitatem relinquat; in cervice femoris, lar-

(a) Osteol. p. 272.

(b) Praefat. ad NESBIT osteog. p. XIX.

giore epiphysis instructa, eadem mala sunt, quae arctiori pressioni cedit in alienas figuras, ipsius imo epiphysis abruptionem adnotat SWIETENIUS (a), si dum ulnis gestatur infans, subito corpus retrorsum proiicit; iidem in aliis artubus effectus esse possunt, pessima illa consuetudine, qua puerorum corpora, manibus aut brachiis adprehensis, in altum tollunt (b), unde in tene-rioribus non sola luxatio, sed & periculosior haec epiphysis avulsio contingere potest. Similia aliorum lusuum mala sunt, dum inter brachia sua varie concutiunt moventque, atque dum stando in mensa puerum exercent, subito in pedes genuaque ruere permittunt; quod sine ossium, extremis suis cartilaginosorum, ipsarumque coxarum iniuria fieri nequit; rotunda cartilaginosa ossium capitula cum mollioribus sinubus articulatoriis complanari quasi hoc allisu, ac latiora fieri adnotat DESESSARZ (c), malo haud continuo, sed serius saepe adparente. Aliorum maior infelicitas esse solet, dum infantem ulnis incumbentem in aërem quasi proiicere celeriterque rursus dimittere solent; quod

(a) T. I. p. 599.

(b) REICHEL, de epiphys. ab ossium diaph. diduc-tione §. VIII.

(c) L. c. p. 139.

ut absque lapsus periculo faciant, manum sinistram inferioris corporis parti adplicant, dextrae digitos pectori costisque vehementer iniiciunt, ut thoracem comprimant, costasque spurias intorqueant, unde gravissimam infantis malum (a): quod sectione cadaveris comprobatur HUBERUS (b). A sedendo illum effectum adnotat SWIETENIUS (c), quo infantes foemellae ab osse coccygis & sacro nimis antrosum pressa, pelvis angustiam contrahunt, quae maturis demum nuptisque summas partus molestias inferat: adeo summa artuum ossiumque teneritudo summas hic curas in omni motuum genere exigit, ut pro aequabili ossium nutrimento praecipue lectulis potius committendus, rariusque sedeat aut gestetur infans, donec robore corporis invaluerit. Adultiorem stando atque ambulando exercet mater; in quo etiam genere cautelae & incommoda sunt: dum imbecilliores, quales obefiores prae reliquis esse solent (d), ossium minus firmorum femeris, ab incumbente corporis pondere, vel ossium coxa-

(a) LUDERS, l. c. §. XVI.

(b) Ex transact. phil. refert *Hamburg. Magaz.* Vol. IX. p. 641.

(c) L. c. T. I. p. 538.

(d) LUDWIG., de obef. cel. p. XI.

tum etiam, ac spinæ dorsi pravitates adquirent, atque in gressu difficultates per totam deinceps vitam superstites. Membrarum namque ac cartilagine[m] imbecillitate fit, ut, licet haud excidat epiphysis, illa paullulum in aliquam partem promineat (a) cum membri distortionem; unde vel incurvata artus figura cum variis valgique specie (b), vel ipsa femoris cervix paullo magis adhuc obsequiosa, in angulum maiorem ac rectum fere pondere corporis deprimatur, ut maiori distantia femorum gressus non nisi maiore trunci inclinatione fieri possit, seu axis trunci maiori intervallo transferri a dextris ad sinistras & vicissim, anatum more, debeat, qua ratione de SAUVAGES utitur (c), ne centrum gravitatis corporis ultra basim cadat: quae phaenomena utplurimum incipienti rachitidi adscribi solent, praematuriori huic atque incauto matrum studio debita. Stationis diuturnae in pueris noxas eadem ratione declarat HEUERMANN (d), quod totius corporis pressio in pelvis illam partem, quae acetabula pro femoris articulo continet, nitatur, sed quae

(a) PLATTNER, l. c. P. I. p. 189.

(b) RUYSCH, adv. anat. dec. II. p. 16.

(c) Nosol. T. III. p. 67.

(d) L. c. T. III. p. 175.

imperfecta adhuc, tribus ossibus in acetabulo ipso concurrentibus atque cartilagine unitis, continuo sensim cedit nisi cum figurae naturalis depravatione, unde claudicatio relinquitur; quod saepe fit, dum curricularis illis stantes inclasi, dimidium toties diem agunt. Similes in ossibus tenerioribus pectoris scapularumque noxae a loris sunt, quos pectore scapulisque cincti suspensique, ingredi coguntur: qua pressione scapulis sursum tractis, capite antrosum dimisso atque ad pectus depresso, ossa pectoris certe aequabili nutrimento destituuntur (a). Crescentibus demum viribus proprio nisu ad motus gressusque instigatur infans, facili tunc labore iuvandus atque a lapsu cavendus, qui variis partibus ipsique toties capiti noxas, vel ossium fracturis aut fissuris, aut sola etiam tenerrimi encephali commotione infert (b); quae mala pileolo crassiori, capiti imposito, sat bene caventur vel mitigantur saltem. Sed alia lusuum genera periculosiora existunt: sunt, qui animo

(a) LUDWIG., l. c. p. XXI. DESESSARZ, l. c. p. 458.

(b) Noxas in ossibus sincipitis maximas, a subitus decurrentibus arteriis adnotat BERTIN, apud VANDERMONDE, l. c. P. V. art. VII. ubi ab effuso sanguine mors demum, etiam absque signis antea comparentibus, serius accessit.

ludendi caput infantis ambabus manibus arreptum & in aërem elevatum tenent, qua ratione vertebrarum articuli, elongatis ligamentis, facili accedente motu corporis dislocari ac distorqueri possunt, vel cum repentina etiam morte, vel colli obliqui pravitate relicta.

§. XVI.

Vestitus etiam infantilis considerationem nostram meretur, in quo prima pariter ab ortu matrum cura versatur; ut in eo diutius ante partum magnis saepe impensis laborent, magnaque sollicitudine concurrat avia, & cognatarum studia conspirent, quæ inter adplausus novum hospitem excipiant; fasciarum & lintheaminum magnus vastusque adornatur adparatus, quæ advenæ brachia, quæ umbilicum totumque abdomen, quæ pedes, quæ caput, quæ præter hæc totum demum corpus stringant devinciantque: vel hostem crederes, quem nunc devictum inermem, captivum gratulentur, vel honoris pignus, quod aut facile aufugiturum aut avolaturum metuant; ad quod certius securiusque possidendum ea concurrerent officia, atque compedes, vincula, ligamina necerent. En! quam faevis vinculis liget amor! quam durum amabilis

bilis sexus imperium, quod sibi vindicat, dum
 resecto funiculo, naturae legibus solatus videtur
 infans; qui imperante sola natura in utero ma-
 terno, liquido immersus tepido mollissimoque,
 membra omnia omnesque articulos movebat
 quam liberrime, artubus caeterum omnibus,
 collo, manibus, cruribusque, toto corpore le-
 viter molliterque inflexis quiescebat: quod na-
 turae consilium, artuum corporisque dispositio-
 nem in omni, dum quiescit, animalium genere
 videmus; nunc, cum alterius, quam naturae,
 legibus parendum, exporrectis sollicitè artubus
 omnibus legatisque membris, stipitis instar dis-
 ponitur, atque, ne ulla motus facultas sit,
 stragulis includitur obruiturque: atque, dum has
 suas miseras inquietudine & ploratu prodit,
 nonnisi cibo potuque succurrit mater, omnia
 siti famique tribuens, aut & medicamentorum
 & enematum adparatus prostat, qui has vincu-
 lorum iniurias sinistra plane arte soletur. Licet
 vero non negandum, tenellum recens nati cor-
 pus, ossaque cerea suis indigere curis, atque
 a ligamentorum, quæ articuli continentur,
 debilitate, molliore ossium in adpendicibus suis
 commissura, fasciarum adminiculo coercenda
 sustinendaque esse, ne motu membri facile
 aberrante, corporisque saepius in latus quoddam

inclinatione atque obliquo procubitu, facile distorsiones, membrorum deformitates, incrementi varia nascantur vitia, neve rudior attractus cereas epiphyfes diducat aut infirmet; quod ipsa in spina dorsi pluribus adhuc processibus, maxima parte cartilaginosis instructa, facile fit: quae plura quidem a congrua fasciatione commoda sunt (a), noxasque ab ea praematurius omissa refert THEBESIUS (b): sed forte plura maioraque a nimio hoc studio strictionibusque fasciis ac vinculis a tanta naturae vi illata, incommoda sunt: arctiore certe constrictione vasa cutis compressa circulationis impedimenta ferunt, liquidisque ad superiora vergentibus, vasa encephali liberiora copiosiore sanguine distendantur debilitanturque, ut vel inde convulsionum metum faciant (c), vel alias capitis aut ex dentitione adfectiones exacerbent. Totius cutis inde inflammationem erysipelaceam vasorum quadam suffocatione observavit PLATTNERUS loc. cit. Urinam saepe copiosam, nares perpetuo muco fluentes, parotides, glandulasque

(a) Conf. PLATTNER, l. c. P. I. p. 102. 103. SWIETEN, l. c. p. 665.

(b) Nov. act. N. C. T. I. obs. XVI.

(c) Convulsionum solutis vinculis continuo mitescere, cessare saepe, vidit DESESSARS, l. c. p. 99.

maxillares intumescences, scabiei genus, caput copiosius obsidens, ea ex ratione impeditae per vasa cutanea circulationis, suppressae transpirationis, atque liquidi in alias partes determinati, repetit DESESSARZ (a). Alia in pectore mala flagrant, tum a congesto huc sanguine, respiratione facile impedita, atque ipsarum costarum tenerrimarum ab adstrictis utrinque brachiis pressione, quam thoracis deformitas aliquando sequitur (b). Atrophiam phthisinque Anglorum a pectore ipsis nimium constricto derivat SPIGELIUS (c); atque a thoracis amplitudine dum multum pulmonum libertas integraque actio pendet, indeque corporis totius robur sanitasque aestimatur (d), iniuria certe ingens ab impedita huius dilatatione debita, atque incremento prohibito facile liquet (e). Asthma inde per totam vitam relinquitur.

F 2

(a) L. c. p. 93. 94.

(b) LOESECKE, l. c. P. IV. p. 185.

(c) De hum. corp. fabr. L. I. c. IX.

(d) BOERHAAVE, Inst. §. 885.

(e) Turcas, quibus ignotus hic fasciandi modus, scapularum latitudine, amplitudine pectoris eminere, atque a graecis distingui, quos fasciae infantiles pectore angustos, scapulis minus latis, lacertosisque reddidissent, refert BALLEXSERDE l. c. p. 118.

adnotat DESESSARZ (a). Viscerum abdominalium ab hac compressione incommoda vomitionibus se produnt, dum hepar in infantibus maius contra ventriculum pressum, cum coarctat necessario, natisque contractionibus spasticis exagitat (b). Atque ventriculus, dum plenus curvaturam maiorem antrorsum dirigit, hac compressione impeditur; ut pressio haec potius in subiectam aortam, venamque cavam terminetur, cum magno ac periculoso circulationis impedimento. Atque eum imo detestabilis artis effectum vidit IUCHIUS, ut in cadavere viscera abdominis inter se concreta omnia, glandulas mesenterii induratas ulcerosasque invenerit, quae arctiori huic, & diuturniori adstrictioni adscribere non dubitat (c). Capitis demum, quae a constrictione per vittas aliaque ligamenta, vel & in adultioribus a pileolo arctiore noxae sint, haud difficulter intelligimus, a cerebri ipsius compressione, aut incremento debito prohibito, futurarum ab ossibus ad se compressis citiore coalitu (d). Et quid demum robori corporis conciliando adversum

(a) L. c. p. 96.

(b) BALLEXSFERDE l. c. p. 48.

(c) De nu, abusu involutionis, & fasc. infantum.

(d) Conf. SWIETEN l. c. p. 666.

magis? dum quiete ac compressione musculorum omnium, vigor déficitur magis, ac inertia inducitur, uti musculos auriculae constrictio & inertia immobiles rigidosque reddit (a). Inde haud dubie in iis, quos minor matris cura adstringit, praestantior vigor in musculis omnibus est, ut pedibus circa finem primi anni firmi insistant. Quid nutritioni atque incremento corporis magis infensum, quae vasa aequabili humorum circuitu, ac impulsu vitali dilatanda atque explicanda essent, hisce angustantur stricturis, ossaque ipsa viribus vitalibus per vasa agentibus, cedere in maius sensim incrementum roburque prohibentur, ut vel varias inde pravitates ac distorsiones, quae maxime eo adminiculo cavendis amoris toties ineptientis conatus studet, contrahant: dum, vel haec inter vincula, artus maiori nixu mover inquietus infans: (b) vel musculorum antagonistarum deiectione aequilibrio, ossa flexilia inaequaliter trahuntur, vel vasis aliis compressis, in alia copiosior exundat humor, atque inaequalem reddit nutritionem (c). Fibulae curvaturam certe a fasciarum modo

(a) BROUZET l. c. p. 76.

(b) Ab eo conatu, ossum & articularum mala reperit DESESSARZ l. c. p. 98.

(c) DESESSARZ l. c. p. 96.

repetit WINSLOW (a). Gibbos inde reddi, HILDANUS suis comprobat observationibus (b). Graviter in hos errores invehitur RUYSCHIUS (c), atque ad universae Asiae, Americae, Africae mores & exempla, Europae delicatioris sapientiorisque ineptias perstringit: ubi recens nati laxis involuti pannis, solius naturae sapientiae dantur, atque optime inde corpora crescunt: quod idem testatur FURSTENAU (d), complures alii. A laxitate fasciarum adeo nunquam aliquid metuendum, uti probe SWIETENIUS (e), quique nisi manifeste perciperet, omnes artus lidere flecti posse, totum adparatum removendum iussit illico, quantumvis obmurmurarent mulierculae, non consilio, sed auctoritate compescendae; id in laxioribus fasciis adnotandum, eas, si lotio, sudore, facibus maduerint, semper magis adstringi paribus cum infantum noxis, quas inquietudine restan-

(a) Exposition. Anat. T. I. §. 780. DESESSARZ p. 97. quorsum mala illa consuetudo pertinet, pedes ita disponendi ut digiti extrorsum, calces introrsum spectent, qui usus omnino praeternaturalis BROUZET l. c. p. 80.

(b) Cent. II. Obs. 99.

(c) L. c. Dec. II. p. 40.

(d) De Med. Iad. Vol. VI. HALLERÏ pr. p. 768. 774.

(e) L. c. p. 665.

tur, dum linum omne, ex quo pannus contextus est, aqua bibita breviatur (a).

Verum cum crescente infantis aetate atque adolescente etiam, crescit amoris durities, quae pulchritudini corporis, cui maxime studet, conservandae conciliandaeque, artificiales thoraces ac loricas parat, quae & pectus, & abdomen coerceatur; atque his quidem, si probe constructi, nec valde rigidi, nec nimis adstricti fuerint, sua commoda sunt, quae infantum pectora, ossiumque, ex quibus truncus componitur, compages tenerior contra externas iniurias muniatur optime firmeturque, atque imbecillior dorsi spina, adhuc cartilaginosa, naturali directione sustineatur, ut absque distortionis periculo, e lectulis sedere, vel ulnis gestari, ac ludentibus matronarum gratiis vacare possit. Sed ea fere huius amoris rabies est, ut eo ipso, formae ac proceritatis studio, rigidiores & velint loricas, & arctius constringant; quo fere nihil perniciosius, atque sanitati & pulchritudini demum magis adversum. Eorum certe insaniam, qui in definiendo pulchri corporis habitu, legislatores se gerunt, atque eum quidem in crassitie

corporis superius aucta, ac conice versus ima abdominis decrescente, ut utraque palma comprehendi possit, gustu male sano determinant, Natura ipsa refellit, quae pectus superius angustius, inferne latius, abdomenque dilatabile certos in usus oeconomiae vitalis, haud impune turbandos dedit. Compressione hac, quae tutam faciat spinam, musculi dorsi, pectorisque diuturna quiete inertes, fere paralytici fiunt, ut sustinendo corpori deposita lorica, impares, antrosum corpus inclinare faciant, ac gibbum referant (a); quem correctura, mater arctiore vinculo, sed maioribus indies malis, utitur (b). Sed & in ipsis ossibus ea vis est, ut motu ac flexione prohibita, debitam, per elasticam cartilaginem nuclei ossescentis extensionem impediat (c): maxima certe in mollioribus ossibus, horum epiphysibus, cartilaginibus, ligamentis haec vis est, ut costis ad vertebrarum corpora transversosque processus, quibus committuntur, adpressis, processibus spinosis, qui post partum demum e vertebrarum posteriore parte exsur-

(a) V. SWIETEN T. III. p. 354. DESESSARZ l. c. vitium musculi sacro lumbaris huc potissimum refert.

(b) KRUGER l. c. p. 43.

(c) LUDWIG. praef. ad NESBIT p. 19.

gunt, coërcitis repressisque, epiphysibus facile expulsis diductisque, cartilagine, quae vertebra-
rum sinus, costarumque capitula largior investit
(a), deformata, varia conformationis vitia na-
scantur; dum vertebrae exterius pressae versus
interiora aliamque partem intumescunt; ster-
num, magna parte cartilagineum, costarum
pressu versus anteriora erigitur, sic ut superior
pars, magis a costis superioribus firmata, altior,
inferior minus resistens, depressior fiat, uti ob-
servat DESESSARZ (b). Contorquentur costae,
atque a naturali directione deflectunt, ac figu-
ram pectoris foeminei a natura plerumque alic-
nam conciliant. Cartilago mucronata reprimitur;
ab ilibus ad alas surgente thorace, eadem &
cartilaginibus ligamentisque quae ossa innomi-
nata, & sacrum devinciunt, pressio ac vis
infertur, ut ea a laxatis ligamentis cartilagini-
busque mobilitate, vel claudicationis necessitas,
vel crebra in aliquod latus inflexione, spinae
deflexio, vel scapulae unius prae alia elatior
situs inducatur (c). Hasque inter angustias com-

(a) Quae vitia sectionibus cadaverum adnotat WIN-
SLOW aët. Ac. Reg. Sc. Conf. *Hamb. Magaz.*
Vol. III. p. 533.

(b) *L. c.* p. 402.

(c) PLATTNER *l. c.* p. 144.

pressi pulmones suis in chylo, sanguine aliisque humoribus rite perficiendis, desunt officiis, atque ipsa viscerum abdominalium functione turbata, non nisi crudus per vasa humor dimanat, neque nutritioni, nec incremento sufficiens; ut summa cum imbecillitate, lurido genarum colore varios inter morbos, demum insaniae muliebris victima succumbat. Dispositionem inde in phthisim induci, pluribus momentis refert SWIETEN (a). Varia viscerum abdominalium mala adnotat WINSLOW (b), MORGAGNE (c): vitia renum (d), ventriculi mala conformatio (e), hydrops faccatus (f), situs viscerum abdominalium mutatus (g), casameniorum vitia (h), viscera abdominis coalita (i), aliaque copiosissima mala observata leguntur. Aliae vestitus infantilis regulae ea maxime ratione fundantur, ne compressis alicubi vasis, aut nutritio

(a) T. III. p. 10.

(b) L. c.

(c) De sed. & caus. morb. ep. 38. n. 55.

(d) Hamb. Magaz. Vol. XX. p. 16.

(e) Nov. act. phys. med. T. I. p. 305.

(f) SLEVOGT. de infelici hydropis curatione Vol. IV. pr. HALLERI p. 303.

(g) LUDWIG. de caus. praeternat. visc. sit. p. 4.

(h) LUDWIG. inst. clin. §. 404.

(i) STORCH. Weib. Kranckh. P. VIII. p. 107.

aequabilis, atque partium incrementum, aut robar impediatur; vestes omnes arctiores damnatae **BALLEXSERDE** (a). Vestitum circa collum & pectus nimis strictum ad haemoptoen disponere, adnotat **LUDWIG**. (b) collarium nimis arcta constrictione frequentem adfectuum capitis causam ali, refert **WINSLOW** (c). In debilibus ab adstrictis arctius vestibus natae anxietates, vim ac resistantiam cordi a plurimis compressis vasis fieri docent (d), laxatis vestibus levandae. Tibialium caligarumque ligacula cautiora, nec unquam strictiora sunt; sed illa super humeros diducta placent; calceorum illas regulas tradit **BALLEXSERDE**, l. c. ut nec arctiores, partium hic dispositarum pressione, nutritione, incremento ac robore privent, atque cum elegantiore pedis pusilli forma, quae sexui sequiori placet, a compressis callosisque partibus musculosis, motu ossium tarsi & metatarsi, qui in infantia admodum sensibilis, saepe destructo (e), debilitatem illam inducant, qua

(a) L. c. p. 120. 123. noxas complures exponit **GAUBIUS** Path. §. 592.

(b) Inst. clin. §. 336.

(c) Act. Ac. Reg. Sc. an. 1740. atque de eo argumento elegantia pertractantur apud **UNZERUM**, *der Arzt, eine Wochenschrift*, P. IX. p. 174.

(d) **SWIETEN** T. II. p. 296.

(e) **WINSLOW** l. c. §. 288.

nec firmo ingredi talo, nec diu erecto corpore stare, nec iter aliquod pedibus conficere, absque summa molestia queant. Sed &, qui in artificiosis figuris sibi magis placet sexus, calcem sibi minorem a natura datam, alia subiecta artificiali eo maiori corrigit, quo altiore quaeque cothurno gestire velit; qua ratione statum ossium tarfi naturalem plane mutant, atque eandem ibi perturbationem causantur, quae in vertebrae gibbosorum observatur (a): tendine achyllis, musculis posterioribus extensoribus nimis contractis, illis qui antrorsum flectendo pedi inserviunt, elongatis, tum vasis liberoque per ea liquidorum transitui impedimentum nascitur, tum robur, atque elater imminuitur, qui in genere animalium salientium praecipuus (b). Alia vestium momenta ad regimen caloris pertinent.

§. XVII.

Atque aëris quoque caloris frigorisque regimen ad sanitatem infantum tuendam firmandamque summas vires habet: caloris perpetui,

(a) Idem l. c.

(b) De eo arg. eleganter WINSLOW Memoires de l'Academie des Sciences, l'année 1740.

quocum plerumque aëris impuritas in cubiculis angustioribus, famulantium ac condormientium turba, lectorum copia, atque evitata sollicitate aëris ventilatione, coniuncta est, is maxime effectus notari debet, quo perpetua corporis infirmitas, atque solidae fibrae laxitas alitur, vasa cutanea laxiora, aequabilem haud ferunt perspirationem, sed modo sudoribus diffluentia, acre quodvis ad peripheriam alliciunt perpetuo inde exanthemate squalidam (a): cui rite curando caloris regimen intendit mulieris error; modo minimis mutationibus aëris aegrius adficiuntur. Capitis tegmine nimis calido, atonia vasis excephali capitisque universi inducitur, quae humorum decubitus ad hanc partem derivat; inde frequentes lippitudines, tineae, phthiriasis, scrophulae colli nascuntur. Pulmonum increfcit debilitas, atque humorum acrim coluviei frequentiori favet; dum necessario illo liberi purique aëris subsidio, quod ad naturalem sanguinis diatesin conciliandam requiritur, destituitur. Ea re certe nihil perniciosius infanti credit TISSOT (b), cui copiosae illae infantum mortes adscribi debeant: spirandi an-

(a) PLATTNER praef. cit. p. XVIII.

(b) Avis §. 341.

gustias per totam saepe vitam reliquas, ab eo inter cortinas incluso, impurissimo, foetidoque aëre, suo fere elatere exuto derivat **BALLEXSERDE** (a): cuius quantae in adultis noxae sint, quam larga inde morborum pestiferorum origo pateat, copiosis observatis constat, queis hic loci immorari superfluum. Adeo a libero aëre non sollicitè nimis custodiendos infantes esse, inter primarias regulas statuitur ab omnibus, qui memorem Iunonis ob iram, artis praecepta non negligant; imo adultiores a frigido aëre haud arcendos esse, caput haud sollicitè tegendum, monet **TISSOT** l. c., item **DESESSARZ** (b). Pedibus nudis incedere iubet **KRUGER** (c); imo capillos abscindendos, frigida pedes abluendos **BALLEXSERDE** (d), omniaque illa adminicula, queis corporis compages sensim roboretur magis, vasorum viscerumque vires in adsumptorum probam coctionem, liquidorum omnium naturales dotes, excretionum omnium ac maxime perspirationis integritatem conservandam incrementum. Adparetque quantum a probis diaetae legibus absint le-

(a) L. c. p. 70.

(b) L. c. p. 351.

(c) Diaet. p. 45.

(d) L. c. p. 124.

Etuli illi molliores calidioresque , atque ab adspirante salutari aura seclusi , vestium densiorum pellicearum genera , quæ corpora puorum muniunt , atque atmospheræ perpetuo humidæ effluviis animalibus , mora putridissimis , elateri aëris inimicis refertæ includunt : unde cutis totiusque corporis imbecillitas , ad leves aëris mutationes ferendas impar , vitæque perpetuo valetudinaria , fere sine spe longævitæ acquirendæ acquiritur . Verum & aëris non tam , quam linteorum , lectulorum , vestium puritas , munditiesque requiritur ad sanitatem infantum conservandam roborandamque (a) , dum sordes relictæ variam cutis labem , adfectusque cutaneos , atque solidæ fibræ corporis laxitatem , liquidorum a resorpto acri impuroque mutatam diathesin , nutritionis vitia , secretionis cutaneæ impedimenta inferunt ; quem ipsius etiam naturæ instinctum , quo animalia pleraque foetus suos lambendo sollicitè purgant , quam parvi toties negligentior nutrix aut mater habet , ut in mutanda artificiosa fasciarum ligatura operam sibi haud satis frequentem sumat .

(a) BALLEKSERDE l. c. p. 53. 54.

 IO. GAUDELI

OFFENBACENSIS

DISSERTATIO

DE

HYDROCEPHALO

Goettingae 1793. (*)



§. I.

Inter morbos, qui genus humanum diu saepe,
& miserabiliter, licet, quod equidem gaude-
mus, paullo rarius adfligunt, iure suo sibi lo-
cum Hydrocephalon vindicat. Est id tumoris
aquosi sine hydropis genus, quo aqua praeter
naturam in capite colligitur, atque vel inter
cutem

(*) Haec Dissertatio ad potiores de Hydrocephalo la-
bores spectat, eamque, ne sorte foliis tam
paucis communi, periret, licet plura iam hoc, de
morbo meliora habeamus, hic inserendam esse
putavi.

cutem & pericranium consistit, vel inter pericranium & os, vel inter os & cerebri membranas, vel inter harum duplicaturas, vel inter has & cerebrum, vel inter huius plicas ac in ipsis ventriculis, seorsim vel coniunctim, quod posterius quidem frequentissimum (a) vel denique, quod rarissimum omnium & ab uno dumtaxat Viro, quod sciam, haecenus reperi-
tum, in praeternaturalibus saccis intra cerebri substantiam erumpit (b), totumque caput mon-
strose saepe immaniterque distendit, ita, ut duplo, triplo, & amplius naturalem magnitudi-
nem excedat (c). Latius siquidem hodie huius mali limites distendendi sunt, ac quidem a ve-
teribus Medicis ac Chirurgis factum, utpote qui cerebrum ipsum humore expleri ignorantes, omnem intus in encephalo collectam aquam cal-
variā inter & cerebri membranas tantum haere-
re existimarunt (d).

Delect. Opusc. Vol. XII.

G

-
- (a) PETIT in Mem. de l'Ac. des Sc. de Par. 1718. p. 80. WEPFER Obs. de affect. capit. 28. 29. 30. 31. SEVERIN. de abscess. p. 186.
(b) EUSEB. SGUARIO in *Raccolta d' Opuscoli scientif. e filolog.* Vol. 40. p. 230.
(c) DEKKERS Exercit. pract. p. 682. Misc. Nat. Cur. dec. 2. an. 4. HILDAN. observ. cent. IV. 10. BARTHOLIN. Cent. I. obs. anat. 28.
(d) PAUL. AEGINET. L. 6. c. 3.

§. II.

Ita vero in hydrocephalo effusus humor aut supra, aut infra calvariam, occasionem mementibus iam antiquis suppeditavit, ut duo eius genera summa constituerent, alterum externum, ubi cutis capitis aqua dumtaxat distenta; alterum vero internum, cum in ipsum caput aqua contrahitur (a). Unde nescio plane, qui ETTMULLERO, celebri Medico Germano, excidere potuerit, ante VESALIUM non fuisse cognitum aut descriptum a Medicis hydrocephalum internum (b); cum tamen GALENUS (c) & iam citatus AEGINETA, aliique plures de eo tanquam malo bene cognito, neque tum novo, scripserint, & plures etiam ante VESALIUM, ut ALBUCASIS & GUIL. DE SALIGETO, luculentissimam eius mentionem fecerint. Utrumque vero vel per se existere consuevit, vel cum altero combinatum est, ita tamen, ut observationum fide frequentius multo externum sine interno, quam hoc sine illo conspiciatur.

(a) AEGINET. l. c.

(b) Coll. pract. T. 2. L. 1. S. 21. c. 3. art. 3.

(c) In Finition. medic.

§. III.

Quandoquidem vero omne hydrocephalon a tumore capitis aquoso determinamus; haud sane difficile erit, id ipsum distinguere a cerebri hydrope, qui cum vel doctissimi Viri illud haud raro confuderunt (a). In hoc enim, licet magna vis etiam aquae intra encephalon effusa, caput nullo modo tumet, sed naturalem suam capacitatem retinet.

§. IV.

Sed de singulo hydrocephalo cum externo, tum interno, seorsim ut differamus, operae erit pretium. Igitur ut ab illo ordiamur, quod externum appellatur & a Veteribus hydrocephalon simpliciter dictum fuit, ipsius discrimina primum omnium notamus, notasque eorundem discretivas; siquidem in ipso modo tumoris aliquid est, quod species inter se distinguit.

G 2

(a) BORELL. observ. Cent. I. 38. HARDER. observ. med. pract. 33. PAISLEY in Medic. Essays of Edinb. T. III. obs. 23.

Illud autem omnibus commune est, aquam vel totam capitis cutem subire (a), vel partem eius saltem, eamque imprimis superiorem occupare (b), vel demum minutos plures ac disjunctos tumores facere, id quod nobis in connubio hydrocephali interni semel fuit observatum. Sedes autem aquae inter cutem & calvariam effusae vel in ipso celluloso cutis textu, vel calvariam inter & pericranium existit: unde duae fiunt species hydrocephali externi. At prius quidem frequentius multo, quam alterum observatur; neque in posteriore casu tantopere caput ac in isto intumescit, in quo tumor aliquando ad immanem magnitudinem increscit, atque humor per cutim tanquam in vitro cornuque apparet (c). Quodsi humor cuti & membranae calvariam integenti interiacet, tumor sequitur tactu mollis, indolens, concolor, in sublime elevatus, digitisque prementibus ille facile cedit & rursus assurgit. Interdum etiam palpebrae tument, adeoque connivent, ut aperiri oculus non possit (d). Quibus autem pericranium & os intercedit humor, reliqua sane

(a) CAR. PISO de morb. a serof. colluv. p. 41.

(b) FOREST. obs. chir. III. 5.

(c) RUYSCH. thes. anat. p. 23. tab. 3.

(d) PISO l. c. p. 41. obs. 1.

respondent, caput vero non ita intumescit, tumorque multo est durior, atque pressus sicut uter repletus & arcte adstrictus renititur; dolor etiam magis urget ac ipso tactu alioquin exacerbatur, quid? quod de nocte ingravescit cum agrypnia (a). Atque ita facile hydrocephalum externum ab artificiali hydrocephalo, sive rectius emphysematoso capitis tumore, physocephalon hodie vocant, distingui potest, quem excitare pueris scelesti mendiculi aliquando solent, ut hydrocephalum mentiatur (b). Est enim id physocephalum tumor admodum elasticus atque tensus, qui digito pressus obstrepit ac crepitat.

§. V.

Puerorum quidem ac infantum affectus proprius est utrumque hydrocephalon, sed non sic, ut grandes aetate non quoque pertentet. Quamvis equidem hoc prorsus PLACENTINUS negavit (c); exempla tamen non desunt

G 3

(a) PISO l. c. p. 43.

(b) HILDAN. Cent. III. obs. 18.

(c) Chir. L. I. c. 1.

cum iuvenum (*a*) tum virorum (*b*), quibus vitium hoc accidit. Utrumque nonnunquam ex utero natales suos ducit, & plures menses, quin annos saepe tenet. Exordium aequè ac incrementum plerumque lentum ac tardum est; rarissime contra oritur repente, & intra paucos dies in monstrosam magnitudinem erumpit (*c*). Persaepe externum ab interno producit, siquidem humor encephalum inundans facile vias per hiantes futuras aut praeternaturale ostium in cranii particula ex osse (*d*) invenit, quo subire integumenta capitis possit; vel ex eadem causa ille simul cum supra calvariam, tum subter ea morbose colligitur. Tum vero humor non per totam capitis superficiem diffundi solet, sed plerumque in saccum quasi aliquem colligitur, qui capiti adhaerescens morbum constituit (*e*). Eiusmodique saccus in mollibus ossium commissuris, inque ea se praecipue attollit, quae inter occiput atque bregmata est, &

(*a*) PISO l. c. p. 41. Nov. Act. Ac. N. C. T. I. obs. 3.

(*b*) SEVERIN. l. c. p. 283.

(*c*) ALBUCASIS Chir. L. 4. c. 1. Eph. N. C. Cent. I. & II. obs. 157. Nov. Act. N. C. l. c.

(*d*) WEPFER. observ. 23. p. 48. Act. Helvet. Vol. I. p. v.

(*e*) MANGET. bibl. med. p. 872. WEPFER. obs. 23.

ita increfcit, ut tandem a capite dependeat (a). Aliquoties adeo RUYSCHIUS talem tumorem in foetibus recens natis confpexit a capite poftice pendentem, qui ipfum caput magnitudine, quid? quod femel totum foetum superaret (b).

§. VI.

Si fubter calvaria humor coit & hydrocephalum internum effecerit, tumor quidem eft, fed qui prementi non cedit, neque tactu mollis eft, nifi admodum tenera offa fuerint, aut penitus defecerint. Vifa nempe eft VESALIO puella, cui cranium non offeum, fed totum membranofum erat. Interim & violenter preffus tumor nonnihil cedit, fiquidem offa infantum facile adhuc cedunt; & humor, cum illum comprimere volumus, ex adverfo repreffus in altum exfurgit. Calvaria autem ultra modum per omnem fuam circumferentiam, perraro in alterutro faltem latere (c), unde fingularis fpecies hydrocephali dimidiati oritur, a fubfiftente

G 4

(a) WEPFER. l. c.

(b) Obs. anat. chir. 52. p. 64. f. 45.

(c) TULP. obs. L. 1. 25.

humore plus minus distenditur, indeque ossa eam compingentia magis ampliantur, attenuantur, excavanturque, insimulque suturae vel omnes (a) vel aliquae saltem (b) magis a se invicem recedunt & hiatum faciunt, quem admoti digiti facile deprehendunt, quique interdum tam late patet, ut ultra unum, quin duos palmos ossa inter se distent (c); interdumque adeo diaphanus est, ut aqua per eundem transluceat (d). In ipso tumore saepe inaequalitas est, sic, ut modo frons, modo sinciput, modo occiput, vel tempora magis protuberent. Quod equidem uno omnes ore auctores adfirmant, in hydrocephalo interno hiatum suturarum nunquam deesse, illud non esse perpetuum, ex quorundam clarorum Virorum accuratis observationibus mihi liquet; siquidem integram calvariam in grandi hydrocephalo invenit HILDANUS (e); & RIEDLINUS confirmat in hydrocephalo 24. annorum, in quo non solum arcte clausae suturae, sed in quibusdam locis

(a) PAUL. INGRASS. L. de tumorib. praeternat. p. 380.

(b) SMET. miscell. p. 578.

(c) WEPFER. obs. 29. p. 57.

(d) INGRASS. l. c.

(e) Obs. Cent. III. 19.

illarum vix vestigium quoddam adeo notari potuerit (a); denique ex novissima dissertatione de hydrocephalo interno 45. annorum, praeside Exc. SAM. AURIVILLIO in Academia Upsalienfi a. 1763. habita constat, totam calvariam, licet magnopere ac monstrose distentam, futuris ubique prorsus fuisse occlusam, easque hinc inde prorsus fuisse oblitteratas, multis officulis intermistis §. 3. Quapropter si Vir Ill. BOISSIER DE SAUVAGES in *Nosologia methodica* scribit, hydrocephalum internum ex hiatu futurarum cognosci (b), id signum nonnunquam, licet, quod fatemur, rarissime fallere posse, ex modo dictis satis superque apparet. Ossa autem ipsa ut plerumque ex distentione, quam patiuntur, magnopere & excavantur & extenuantur, sic, ut aliquando etiam pelluceant & per haec ipsum cerebrum & sinus durae matris conspici queant (c); ita vicissim quoque, quod mireris, docente rerum usu, ea nonnunquam, licet rarius, magnitudinem suam naturalem in tanta distentione non solum retinent, sed etiam duplo crassiora sunt (d).

(a) Eph. N. C. Cent. I. & II. obs. 29.

(b) T. III. P. II. Cl. IV. ord. 3. p. 325.

(c) Hist. de l'hydrocephale DE BEGLE, par Mr. BETBEDER Bourd. 1755.

(d) Eph. N. C. Cent. I. & II. obs. 29.

§. VII.

Quod multo crebrius aquae in ipsos cerebri ventriculos confluere soleant, quam in alias eius sedes, supra iam mihi fuit memoratum: hoc loco igitur adhuc observo, ventriculos dictos inde magnopere saepe ampliari, ita v. c. ut duos pugnos quilibet admittat (*a*). Inde vero ipsum cerebrum etiam valde comprimitur, distenditur (*b*), atque liquatur, ita, ut aliquando una cum ipsa calva pelluceat (*c*) & quasi diffluat (*d*) ac emissâ aqua tantopere subsidat, ut vix duodecimam partem calvariae nunc repleat, imo prorsus deesse videatur (*e*). Rarius multo cerebrum in sua compressione durum est, quod autem tum maxime incidit, si aquae supra cerebrum effusae (*f*). Aqua ipsa autem collecta vel pellucida est (*g*), vel foetida, vel cruen-

(*a*) Eph. N. C. l. c.

(*b*) L. c.

(*c*) HILDAN. Cent. III. obs. 17. BETBEDER l. c.

(*d*) AURIVILL. diff. cit.

(*e*) TULP. l. 24. WEPFER. obs. 27. p. 53. HARDER. obs. 33. p. 149.

(*f*) KALTSCHMIED Pr. de hydroceph. interno raræ magnitud. Ien. 1752.

(*g*) HILDAN. l. c.

ta (a) & ad plures libras, quatuor (b) quinque (c) octo (d) decem (e) octodecim (f) imo viginti quatuor (g) ascendit. Cerebellum in plerisque casibus integrum est.

§. VIII.

Ceterum si in caput aqua contrahitur, frons inprimis extuberat (b) aut caput fastigiatum est (i), oculi torvi sunt ac eminentes (k) aut contra retracti & prorsus obteſti (l), crebro etiam illacrymant (m). Interdum unus oculus magis, quam alter est depressus (n). Nutritio in plerisque valde tardatur, ut licet adultam aetatem iam consecuti aegri, infantum tamen staturam praeseferant (o), aut saltem

(a) WEPFER. l. c.

(b) SGUARIO l. c.

(c) TULP. I. 24.

(d) Eph. N. C. dec. 3. a. 1.

(e) Phil. Trans. n. 407.

(f) HILD. l. c.

(g) Id. I. 5.

(h) BARTHOL. l. c.

(i) SEVERIN. l. c.

(k) WEPF. obs. 24. Essays of Edinb. III. 22.

(l) WEPF. obs. 27.

(m) AEGIN. l. c.

(n) WEPFER. obs. 30.

(o) AURIVILL. diff. cit.

valde emarcidi sint (a). In paucissimis nutritio ac incrementum corporis recte procedit (b), plerisque auditus & visus hebetatur (c) & alii quoque sensus (d). Alii nulla verba articulata proferre possunt (e). Aliqui continuo salivant (f). Multi fiunt amentes (g) & somnolenti (h). Aliqui spina bifida simul laborant sive congenita, sive posthac demum accedente. At nullus vero pene in recto situ caput tenere prae ipsius gravitate potest. Quidam subinde convulsionibus vel particularibus vel universalibus, aut distentionibus simul pertentantur (i) per intervalla aliquoties etiam repetentibus (k), interdum etiam paralyti, quae adeo membrum quoddam a nativitate iam occupat (l). Atque

(a) HILD. l. 10. *Essays of Edinb.* n. 22.

(b) WEPF. obs. 25. SGUARIO l. c. HILD. IV. 10. DUVERNEY des malad. des os T. II. p. 8.

(c) WEPF. II. cc. HILD. I. 11.

(d) HILD. I. 11. IV. 10.

(e) BARTHOL. I. 28.

(f) Id. obs. 27. WEPF. obs. 23. AURIVILL. diss. cit.

(g) WEPF. obs. 23. Eph. N. C. dec. III. a. 1.

(h) SEVERIN. l. c. *Essays of Edinb.* III. 22. WEPF. obs. 24.

(i) SEVERIN. l. c. FOREST. obs. L. VIII. obs. 30. WEPF. obs. 29. Aët. Helvet. Tom. I. p. 1.

(k) WEPF. obs. 30.

(l) Id. obs. 29.

haec vitia inprimis sub finem lethiferi morbi superveniunt, & vel coniunctim adfligunt, ita, ut v. c. pes unus paralyticus sit, cum reliqua membra motibus convulsivis torqueantur (a). Alii in soporem lethargicum coniiciuntur & non multo post obeunt (b). Sub ultimis vitae mensibus nonnullis subito artus rubent, posteaque livent, digitique simul intumescunt & splendent ceu aqua suffusi; non diu postvero color iste praeternaturalis & tumor rursus evanescent (c). Nonnullis ante mortem maculae rubrae in toto habitu corporis erumpunt: aliis ante mortem humor subcruentus ex ore fluit (d). Quibusdam urinae incontinentia & prolapsus ani accedunt (e). Perraro paralytica affectio ex apoplexia secuta remanet haud lethifera (f). Nisi repente increfcit hydrocephalon, ubi intra paucos dies (g) vel primo alterove mense lethum adfert (h); tunc ut plurimum infantes per annum dimidium, unum, duos vel tres eo

(a) Id. obs. 23.

(b) HILD. Cent. I. 11.

(c) WEPFER. obs. 25.

(d) Id. ib.

(e) MANGET. bibl. chir. I. 8.

(f) Eph. N. C. Cent. I. obs. 29.

(g) ALBUCAS. l. c.

(h) WEPF. obs. 29. Act. Helv. l. c.

pertentantur ; ut rarioribus exemplis annumeranda sint hydrocephala quatuordecim annorum (a), viginti quatuor, (b) & quadraginta quinque (c). Neque vero capitis moles continuo augeri pergit in tanta mali diuturnitate ; sed intra certos demum limites per plures annos nunc continetur (d). Rarum est, hydrocephalon foetus rumpi intra uterum : quod mortem omnino adfert (e).

§. IX.

In hydrocephalo interno humor aliquando e ventriculis descendit in medullam spinalem, & in inferiore spinae loco, aut, quod rarius, in cervice vel infima ossis sacri parte tumorem facit, quem spinam bifidam appellant (f). Inque foetibus vitium hoc iam oritur (g) aut paullo post enixum : atque tum saepe hydroce-

(a) TRIOEN. Fasc. obs. med. chir.

(b) RIEDLIN. in Eph. N. C. Cent. I. & II. obs. 29.

(c) AURIVILL. diff. cit.

(d) RIEDLIN. l. c.

(e) WEPFER. obs. 26.

(f) WEPF. observ. 29. TULP. L. 3. observ. 230. RUYSCH. obs. anat. chir. 34. 35. 36. ZACH. VOGEL chir. WAHRNEHM. p. 413.

(g) Eph. N. C. Cent. I. & II. obs. 127. VOGEL l. c.

phalon praecedit. Ratio eius ortus haec est : humor in arterioribus cerebri ventriculis incre-
 scens, per aquaeductum SYLVII in tertium
 ventriculum fertur, & ex hoc in quartum per
 valvulam cerebri maiorem perumpit, tandemque
 ex hac viam sibi utcumque in istum vertebra-
 rum canalem facit, quo medulla cerebri pro-
 longata continetur. Atque cum in foetibus ac
 pueris singulae vertebrae ex tribus officulis per
 mediam cartilaginem tenerrimam divisas con-
 stant, humor eam, quae in parte postica est,
 ubi adutorum vertebrae processus spinales exi-
 gunt, paullatim una cum ipsis cereis officulis
 diducit, cutemque demum ipsam supra attollit.
 Saepe pueris, qui cum his tumoribus nati sunt,
 pedes resoluti & incurvi sunt, ac in interiora
 obtorti : quod ex eo incidere potest, quod spi-
 nae medulla, ubi ex ea nervi educuntur, qui
 ad artus inferiores pertinent, ab humore com-
 pressa resolvitur. Membra vero resoluta, quo-
 niam non aequabiliter increfcunt, eam figuram
 retinent, quam forte a situ, qui eis in utero
 fuit, traxerunt. Hoc genus tumoris, quia cre-
 brius cum hydrocephalo interno esse solet, haud
 dubie ex aquarum in caput redundantia enasci-
 tur : etenim non solum hydrocephalum decre-
 scit, si ex lumborum tumore per scalpellum

diviso humor effluxit; sed vicissim denuo incre-
scit, si illa plaga iterum fuit glutinata (a). Ex
inciso tumore multus & limpidus humor ple-
rumque exit, & infantes, eo aperto, brevi
post moriuntur. Idemque etiam a sponte rupto
tumore contingit (b).

§. X.

Hydrocephali autem tam interni, quam
externi causae non aliae esse possunt proximae,
quam quae hydropem generatim inferre in cor-
poribus humanis consuerunt. Serum ob apertio-
nem vasorum lymphaticorum exhalantiumve in
capite extravasatum istiusmodi tumorem produ-
cit: ut adeo, quidquid sanguini & lymphae
obicem aliquem in suo cursu obicit, ipsam
illam apertionem efficiat & facili-
tet, sive hoc
sit externum aliquid comprimens, aut nimia
venarum lymphaticarum laxitas, aut vitium
ipsius lymphae, quo ipsius excretio impeditur.
Neque ita semper hae causae latent, quin sen-
sibus clare percipiantur: siquidem lapsus, con-
tusio,

(a) Eph. N. C. dec. 3. a. 1. obs. 152.

(b) Eph. N. C. Cent. I. & II. obs. 127.

tusio, morbi praegressi acuti vel longi, maxime rachitis, atque tinea, & cachexia hydrocephalum ingenerant. Ita v. c. notarunt id malum ex praecipiti lapsu capitis in pavementum WOLFIUS (a), ex morbo acuto HILDANUS (b), ex suppressione febris intermittens & subsequente cachexia cl. MATERNUS (c), ex crusta lactea sponte regressa SGUARIO (d), ex insigni asthma, tussi & macie GABELCHOVERUS (e), ex illito adversus capitis tineam unguento, quod arsenicum & sulphur habuit (f) a scabie capitis & faciei per adspersionem ligni putridi a vermibus erosi farinam AURIVILLIUS (g). Venas encephali ac plexum choroideum plerumque turgidum & varicosum reppererunt dissectiones, glandulam etiam pituitariam induratum: cui vero omne hydrocephalum adscribere cum PETITO non licet (h); siquidem haec & integra saepe reperitur (i) ac

Delect. Opusc. Vol. XII.

H

(a) Obs. 14. p. 47.

(b) III. 19. IV. 10.

(c) Nov. Aët. N. C. T. I. obs. 3.

(d) *Raccolta d' opusc. scient. e filol. T. 40. p. 239.*

(e) Cent. I. cur. 7.

(f) Eph. N. C. Cent. I. & II. obs. 157.

(g) Dissert. cit.

(h) Mem. de l'Ac. des Sc. de Par. 1718. p. 82.

(i) Ib. ann. 1740. p. 530. edit. Amstel.

interdum prorsus deest in hydrocephalo (a). Quandoquidem vero evidentes causae hydrocephalum producentes non semper adsunt, & sanissimi infantes eodem pertentantur; vitium occultum in vasis lymphaticis tum merito adcuramus, quod in ipsorum praeternaturali & sponte orta laxitate quaerendum; quae in encephalo infantum ac puerorum, utpote parte corporis imbecilliori, pluribus aliis morbis ideo quoque opportuna, facillime oriri potest. An violenta capitis ab obstetricis manu in ipso enixu compressio, quam auctores tum veteres, tum recentiores inter causas hydrocephali allegant, tantum valeat, ut id ipsum inde oriatur, illud quidem probabile mihi haud videtur; siquidem nec a fortiore compressione, quam forceps praestat, id malum produci observamus. Similiterque perperam PLACENTINUS ortum mali positurae infantis in utero materno, qua capite inclinato propendet, adscribere mihi videtur; quum multo illud frequentius sic excitari oporteret, ac quidem occurrit. Neque verisimile est, quod HILDANUS credit (b), hydrocephalum ex imaginatione matris in utero contrahi.

(a) M. N. C. Dec. I. 2. 2. obs. 47.

(b) Cent. obs. 3.

§. XI.

In curatione interni hydrocephali nihil valet ars medica: neque enim evacuantia aut topica aliquid hic praestant, neque ossium perforatio aut dissectio futurarum. Prudenter iam monuit AEGINETA, manum huic hydrocephalo ceu desperatae salutis non esse adhibendam (a). Et quam infeliciter trapanatio aut incisio futurarum in hoc morbo suscipiatur, illud plures quoque recentiores observatores testatum eunt, ac simul adfirmant, quod mors inde omnino acceleretur, siquidem quotquot huic chirurgiae subiecti fuerint, ii certissime ad summum intra 48. horas pereant, saepeque inter quinque vel sex, etiamsi aqua non una vice, sed partitis emittatur (b). Equidem cl. LE CAT sibi persuasit, quod singulari acutriquetra, a se ad perforandum cranium inventa, & ita quidem fabrefacta, ut repetita aquae eductio inde commodissime obtineri possit, ope-

H 2

(a) L. c.

(b) WEPFER. obs. 24. 26. Phil. Transf. Vol. 47. p. 267. Mem. de l'Ac. des Sc. Par. 1718. p. 81. vers. germ. SGUARIO l. c.

ratio feliciorum exitum habitura sit: at finem tamen speratum ille haud obtinuit, siquidem infans nihilominus paucis post primam operationem diebus exspiravit (a). Rapiuntur vero tum infantes lethargo aliquo & convulsionibus. Equidem sub legitimorum remediorum internorum, purgantium iteratorum, diureticorumque usu videtur subinde hydrocephalum internum nonnihil detumescere; at gaudium istud nunquam longum est (b). Neque alii morbi supervenientes, qui alias praesidio esse corporibus affectis consueverunt, velut febres, variolae & morbilli hydrocephalum internum levant, ut nos aliquoties vidimus. Ut adeo SEVERINO certe citra omnem usum excidisse videatur pronuntiatur, quod variolae & alia exanthemata pueros ab hoc malo praemuniant (c).

§. XII.

Hydrocephalum externum tam insanabile, ut prius, non est. Novit natura interdum id malum sanare; nec artis praesidia hic inutilia

(a) Phil. Transf. l. c.

(b) WEPE. obs. 30.

(c) L. de abcess. p. 185.

aut supervacua sunt. Puerum se vidisse asserit PLACENTINUS, nullius Medici auxilio, sed ipsius naturae opera per temporis diuturnitatem curatum, qui multos adhuc annos superstes fuerit (a). Et vidit quoque KHERNIUS hydrocephalum externum, ex repressa tinea ortum, per effluxum feri copiosum ex naribus, auribus & oculis sublatum, relicta quidem inde lacrymali fistula (b). Neque tamen, si inveteravit hydrocephalum externum & cum malo corporis habitu est, curationem tam facile admittit, ac recens morbus, & a causis, quae extrinsecus accidere solent, ortus. Tum vero remedia topica, discutientia, reprimentia atque roborantia omnem fere paginam sola absolvunt, si satis diu capiti superhabeantur. Cuiusmodi sunt herba absinth. rutae, maioran. serpill. thym. sabin. puleg. rosmar. lavend. flores arnic. baccae iunip. agaric. semen cartham. aneth. carv. radix ireos Fl. bryon. myrrh. quae ex vino austero rubro aut aqua calcis vivae coquuntur, & ex quo decocto dein parum calide exprimuntur: quibus sub finem demum reprimentia, velut rad. bistort. tormentill. fol. quercus, gallae, herba alchym.

(a) L. c.

(b) Eph. N. C. Cent. I. & II. obs. 157.

& verben. possunt admisceri. Nec spirituosii liquores, ut spir. salis ammon. anthos atque balf. sulph. thereb. capiti inutiliter illinuntur, simulque cum facculis frequentantur, quo intra paucos dies hydrocephalum potest dispelli (a). Ceterum feliciū curationum specimina prodiderunt AMAT. LUSITANUS, FORESTUS, & PLACENTINUS: quae brevibus hoc loco memorare non supervacuum existimo. Ille intra tres dies sanavit hydrocephalum unguento ex pulvere absinthii, fl. chamom. Rom. butyr. rec. ol. chamom. & cera parato (b), FORESTUS vero sola olei hyperici continua illitione, addito pulvere myrtillorum, intra paucum tempus curationem absolvit (c). Expertum quoque habet linimentum, quod ex melle, sale, & pulvere origani componitur. PLACENTINUS autem liberavit puellam ab hoc tumore intra anni dimidii spatium linimento ex ol. chamom. & sulphure composito, quod quotidie illivit; simulque in parte tam anteriore quam posteriore capitis ulcus excitavit (d). Cutim flaccidam optime quoque adstringit, simulque calvariae

(a) ZACH. VOGEL l. c.

(b) Cent. I. obs. 69.

(c) Obs. L. III. 5.

(d) L. c.

ossa adducit illa fascia a GUID. DE CAULIACO inventa, quae in duo fines glomerata caput arctius comprehendit, *la Capelline* appellatur. Quin adeo haec sola interdum sufficit ad tumoris discussionem, ut fidem facit SAM. FORMIUS apud RIVERIUM (a). Quodsi vero tumor his non discutitur, scalpelli etiam opera adhiberi debet, ita, ut caput humore turgidum una linea per medium transversa incidatur, si exiguus humor substat; sin magis caput inturgescat, duobus per medium se mutuo secantibus; sin magis adhuc sit tumidum, etiam tribus, ad similitudinem H litterae. Reperti sunt in Graecia, qui novem lineis cutem capitis inciderent; item reperti sunt, qui a capite recte eas lineas ad tempora diducere. Ubi humori exitus sic datus est (quem sine necessitate per cannulam faciliat (b)), insertis linimentis benelaeo perfusis pars commode deligatur, hocque ipso per aliquot dies perfunditur. Sane antiqui omne hydrocephalum externum statim ab initio inciderunt, haecque incisio sola ad sanationem omnino sufficit; quemadmodum id

(a) Opp. obs. Cent. n. 6.

(b) HIER. FABR. AB AQUAPENDENTE Chir. p. 353.

aliquoties etiam FORESTUS expertus est (a) : candide tamen ille quoque expertus scribit, infantes hydrocephalo laborantes facilius & tutius postmodum cum exsiccantibus & resolventibus medicamentis exterius admotis a se curatos esse, quam incisione (b). Interim & ferro candente occipitium recte aduritur in vicem incisionis, inprimisque in altera hydrocephali specie, ubi inter calvariam & periosteum aquosus humor collectus est: cuius chirurgiae egregium successum a PISONE confirmatum legimus (c). Fere etiam aequale est, &, ut PLATTNERUS scribit, magis opportunum, per cutim perforatam seraceum traicere, quo & aqua effluat per plagam, & pus moneatur (d): ubi vero videndum, ne gangrena ulcus comprehendat. Interna, quae alias ratione magis, quam rerum usu commendari solent, remedia ex purgantium, diureticorum, sternutatoriorum atque collutoriorum classe, fere supervacua habenda, cum citra istorum administrationem malum perfectam curationem recipiat.

SALOM.

(a) L. III. obs. 5.

(b) L. c.

(c) Libr. cit. P. I. c. 4. p. 43.

(d) Instit. Chirurg. §. 753.

SALOM. CONSTANT. TITII

PROF. MED. VITEBERG.

ORATIO

DE

PELLAGRAE

MORBI INTER INSUBRIAE AUSTRIACAE AGRICOLAS
GRASSANTIS PATHOLOGIA

Viteberg. 1792.



Morborum, quos in nosocomiis maioribus, Mediolanensi atque Ticinensi, medicorum curae subiectos vidi, alii quidem aliis maiorem mihi attentionem moverunt, maximam tamen ille, qui & singulari suo decursu, & indomita indole, & mira, domestica quasi frequentia, prae reliquis omnibus longe videbatur gravissimus. Quaecunque igitur illius observandi occasio, mihi tum in instituto clinico, tum in ipsis nosocomiis, subnascebatur, ea effecit, ut non viva solum voce ill. FRANKII, Praeceptoris

Deleß. Opuscul. Vol. XII. I.

mei admodum colendi, sed amici quoque meritissimi, exper. STRAMBII colloquio, & propria tandem observatione, plenior morbi cognitionem colligerem, simulque, quas nonnulli scriptores de eo prodiderunt, conferrem animadversiones. Qua quidem ratione ortus est libellus hic, quem in praesens, cum specimen aliquod sub novi muneris auspiciis edendum sit, publici iuris facere eo minus abhorrens ab instituto meo putavi, quo magis argumenti novitate lectoribus sese commendaret. De morbo ipso neque opus integrum componere, neque de methodo illius medendi quicquam addere placet. Est enim lentissimum malum & insidiosum, de cuius persanatione nonnisi post multos annos certi quicquam statuere licet; adeoque de medela hucusque medicis parum constat. Solam itaque morbi historiam exhibeo, eo etiam consilio, ut si qui sint inter nostrates, qui eiusmodi morbum vel similem observarint, aut persanarint extra Italiam, ad promulgandas suas observationes invitentur, atque sic a medicis quoque exteris quicquam medelae terris Insubricis forte afferatur.

Commune huius affectionis morbosae nomen *Pellagra* (a), a pelle sive cute vitata

(a) Formationi huius vocabuli hybridi similis illa *Pudendagrae* atque *Mentagrae* est. Hanc postero-

derivatum, rectius Dermatagra dicendum. Anni effluxere non multi, ex quo morbus hic frequentia sua medicorum in se convertit attentionem, quam initio levibus suis principiis & per vices recursum effugerat. Non enim subito & uno quasi impetu caput extulisse videtur. Quod, quam verum sit, tum quaedam aegrotorum historiae, tum medicorum testimonia comprobant. Plures enim huius generis aegroti, quinquaginta amplius annos nati, patres suos eodem malo quondam periisse, conquesti sunt. Addunt alii, morbum olim fuisse leviolem, & symptomatum, quae nunc observantur, nervosorum comitatu caruisse, & propter manuum defoedationem, imprimis sensus ferientem, malum rubrum (*il mal rosso*), fuisse appellatum. Cl. STRAMBIO testimonium affert medici octuagenarii, qui iuvenis exempla diri huius

I 2

rem PLINIUS descripsit in Hist. Natur. Lib. XXVI. c. 1. in quem locum CONR. IOHRENS Diss. de Mentagra. Praef. ad Viadr. commentatus est. Alludit quoque ad hunc PLINII locum ANDR. ALCIATUS Emblem. n. 198. Mentagram vero a nostro morbo vehementer differre, & ipso aspectu multo diriolem nostro esse, ex horum scriptis, praecipue ex PLINIO, ut etiam ex ill. HENSLERI libro: *Vom abendländischen Ausätze*. Hamb 1790. 8. pag. 307. seqq. liquet.

morbi, rariora tamen minusque atrocia viderat. Idem sua auctoritate Cl. VIDEMAR confirmat. Hodiernus igitur morbus si dissimilis olim observato est, id, puto, vel gradui, minorumque symptomatum vehementiae, vel minori causarum vi atque frequentiae,tribuendum esse, ut malo paullatim aucto, vel quicquam imminuto noster tandem funestissimus morbus prodierit. Caeterum num novus morbus sit, an ab antiquis iam descriptus, nihil nuac attinet disquirere; his enim amplior locus infra dabitur, ubi de natura huius mali disputabo. Sufficiat ea, quae novimus, morbi primordia ab eo inde tempore, quo latius serpere coepit, investigare. Ipsius itaque faciem primo & symptomata, quae vel perpetua sunt, vel abesse possunt, aliorumque morborum simul accedentium connubia, deinde diversas mali formas, causas & exitum describam; quo facto locum suum isti morbo in systemate nosologico assignare, minime erit difficile.

HISTORICA.

Ea est huius morbi indoles, ut clanculum subrepat, nec ei, quem primum invasit, ullam molestiam, nisi debilitatem, quae tot mala co-

mitatur, atque impetiginis speciem cum cutis rubore coniunctam afferat, ita, ut aegrotantem pariter ac medicum per vices eundo & redeundo facile decipiat. Plerisque incredibile videtur, exigua morbi nascentis phaenomena, tantarum miseriarum praesagia esse. Quam ob rem, malum olim, cum mitius, rariusque esset, fere neglectum fuisse, minime mirandum est. De morbi historia, quae forte memorantur, obscura sunt, usque ad illud tempus, quo FRAPOLLI (a), medicus quondam nosocomii Mediolanensis, eundem, adiectis ex eiusdem nosocomii diario aliquot aegrotantium historiis, nostra aetate omnium primus descripsit. Qui quidem libellus, quamvis multa contineat, quae successu temporis rectius vel limitata, vel emendata fuerunt, sat claram tamen morbi fatalis exhibet notionem. Aliquot annos post biga medicorum in diversis regionibus novitate morbi adducta, eiusdem descriptionem promulgavit. Alter quidem ZANETTI (b) poliarer quondam Cannobii, ad

(a) Physici FRANCISCI FRAPOLLI, --- Animadversiones in morbum, vulgo Pellagram. Mediolani 1771. 8.

(b) D. FRANC. ZANETTI --- de morbo vulgo Pellagra, dissertatio, missa a. d. 12. April. 1775. & publicata in Nov. Act. Nat. Cur. Tom. VI. Norimb. 1778. 4. Observ. XXIV. pag. 118. seqq.

lacum Verdunum (*il Lago maggiore*) in comitatu Novariensi, dissertationem super hoc argumento Novis Actis Naturae Curiosorum inferi curavit, quae utcumque brevis, probe tamen, qua diligentia in morbum parum tunc cognitum inquisiverit, docet. Alter ODOARDI (a), protomedicus olim Belluni, civitatis Venetae in viciniis Foroiulii, orationem in confesso Academiae Bellunensis, de morbo in provinciis Feltriensi, Bellunensi, Foroiulii endemio, atque pellagrae nostrae simillimo (b) recitavit, quae postea Venetiis typis fuit exscripta. Crescente interim aegrotorum in Mediolanensi

(a) *D' una specie particolare di scorbutto, dissertazione del Dott. IACOPO ODOARDI, --- recitata li 18. Luglio 1776. --- Typis impressa in Nuova Raccolta d' Opuscoli scientifici e filologici, Tom. 30. Venez. 1776. 12. no. 7. & in Opuscoli scelti sulle scienze e sull' arti di Milano. Vol. V. 4.*

(b) Propositum quidem mihi est, pellagram, qualem in Ducatu Mediolanensi reperi, describere: id vero satis recte fieri nequit, nisi ea adiiciam, quae medicorum Venetorum observata docuerunt. Videlicet morbum illum in agro Veneto saevientem veram esse pellagram, in sequentibus demonstrabo, etiamsi forte in morbi gradu, imo in complicatione, ut videtur, scorbutica frequentiori, quaedam suboriri videatur differentia. Quibuscum enim locutus sum, Medici Patavini, se summum illud morbi acumen, quod Mediolanenses descripserunt, in agro Veneto rarissime vidiſſe, aſſeruerunt.

nosocomio numero, remediisque morbo compe-
 scendo oppositis, parum vel nihil prorsus va-
 lentibus; cl. GHERARDINI (a) medicus huius
 nosocomii, uberiores morbi historiam diligen-
 ter composuit. Neque minus Societas patrido-
 phila Mediolanensis (b) bene de miserorum sa-
 lute merendi studio impulsam, medicos ad huius
 mali naturam, causas, curam maiori diligentia
 explorandas proposito praemio (1781.) exci-
 tavit. Quo melius autem medici publici per
 agros dispersi, cognita morbi natura operam
 suam eidem impendere possent, quaestiones
 quaedam ad hoc argumentum spectantes, propo-
 nebantur. Praemium publice indictum Senatus
 Regius Ducatus Mediolanensis, & nosocomii
 maioris curatores, haud mediocri pecunia auxe-
 runt. Ex multis autem, qui de praemio per
 plures annos successive promulgato, certarunt,
 nemo eodem potitus est, cum in descriptione

I 4

(a) *Della Pella-gra, descrizione di MICHELE GHE-
 RARDINI, --- Milano (1780.) 4. --- Cuius
 quidem libri versionem germanicam hoc ipso anno
 prodiisse legimus, cuius titulus: MICH. GHE-
 RARDINI'S Geschichte des Pella-gra; a. d. Ital.
 Lemgo 8.*

(b) *Atti della Società Patriotica di Milano, Vol. I.
 Mil. 1789. 4. pag. XXIII. seqq.*

& accurata morbi cognitione multa desiderarentur. Non multo tempore post singularis tractatus auctore ALBERA (a) medico Varese, prodiit. Novis quibusdam observationibus hic morbi historiam illustravit, cuius sub finem ad quaestiones illas propositas simul respondit. Quibus certantium contentionibus cum prorsus nihil proficeretur, morbusque in dies latius vagaretur IOSEPHI II., Imperatoris Augusti munificentia factum est, ut nosocomium huic soli aegrotantium generi dicatum, duplici quidem consilio, partim ut miseris agricolis, hoc morbo correptis, subveniret, partim ut studium huius mali, quovis vere recrudescentis, eisdemque homines periodice invadentis foveret, exstrueretur. In quem finem illius regionis, ubi malum in dies latius manaret, oppidum, *Legnano*, ab urbe, Mediolano, sex circiter horis versus septentrionem distans, eligebatur; ibidemque anno 1784. nosocomium ad procurandos quinquaginta aegrotos condebatur, cura illius exp. CAIET. STRAMBIO (b) demandata, qui

(a) *Trattato teorico-pratico delle malattie dell' Insolato di primavera, volgarmente dette della Pellagra, del Medico-Fisico GIOVANNE MARIA ALBERA d'Oleggio. Varese 1784. 8.*

(b) *De Pellagra observationes, quas in regio Pellagrosorum nosocomio collegit D. CAIETANUS*

quanta diligentia & dexteritate officio suo satisfecerit, singulari opere, tribus voluminibus, optime comprobavit. Ibidem enim observationes per triennium factas, candide enarrat, & quae ad constituendam morbi historiam facere possunt, magno cum iudicii acumine inde deduxit. In eodem pellagroforum instituto recens condito, observationes suas medicus Batavus, cl. IANSEN (a) collegit, qui peracto itinere litterario, postquam morbum satis sibi cognitum reddiderat, illius descriptionem, vel hoc nomine laudandam edidit, quod pellagrae cum morbo alio, similique admodum, Asturiensi, quem cl. THIERRI (b) diligentius exposuit,

STRAMBIO, Reginus eiusdem Director; ann. I. II. III. 1784. -- 1787. Mediol. 1786. -- 89. 3. Vol. 4.

(a) De Pellagra, morbo in Mediolanensi Ducatu endemio, auctore X. W. IANSEN, Phil. & Med. Doctor. Lugd. Batav. 1787. 8. ---- recusa haec dissertatio in I. P. FRANK Delectu Opuscul. ad medic. pract. spectantium Vol. IX. pag. 325. seqq. Ticini 1790. 8.

(b) THIERRI in *Recueil periodique d'Observations de Médecine, de Chirurgie & de la Pharmacie*, à Paris. Tom. 2. 1755. p. 337. seq. -- & in versione germanica: *Sammlung auserlesener Wahrnehmungen aus der Arzney-Wissensch. Wundarzn. und Apothekerk.* Aus dem Franz. B. 2. Frkf. u. Leipz. 1758. 8. pag. 334. seqq.

comparationem continet. Post quatuor circiter ab instituto nosocomio annos, Divus IOSEPHUS II. mutato, quod prius ceperat, consilio, illud ipsum rursus sustulit. Sed miseris colonis, ne, quod hucusque praestiterat, auxilium subtraheret, sumtus, unde nosocomium hucusque sustentaverat, per plura praecipua ditionis Mediolanensis nosodochia, habita amplitudinis ratione, divisit, atque Mediolanum triginta aegrotos, publico alendos sumtu, reliquos in Ticinense, Varesinum, aliaque nosodochia, deferri iussit. Cl. STRAMBIO provinciam, qua cum laude functus erat, retinuit, & Mediolanensi nosotropheo praefectus est, ut diligenter, pro more suo, quaenam huius mali natura sit, indagare ulterius posset. Quo certius vero suam de miserorum salute curam Senatus Supremus Mediolanensis confirmaret, magisque medentium studia inflammaret, Cl. VIDE-MAR (a), medico Mediolanensi pro insigni labore, quem ad tractatum de pellagra, licet non decisa quaestione, contulerat, centum aureorum praemium decrevit. In quo quidem libro, Societati antea patridophilae oblato, dein-

(a) De quadam imperiginis specie, morbo apud nos in rusticis nunc frequentiori, vulgo Pellagra nuncupata. Mediol. 1790. 8.

ceps litterarum formis exscripto , pellagram auctor pro hypochondriasi ab atra bile deducenda , habet . Tantum vero abest , ut haec Augusti providentia , medicorumque solertia , malum coërcere potuerit , ut potius altiores radices nuperrime egerit , multaque in agro Ticinensi , Laudensi , quin Placentino , atque ultra Padum , talium miserorum exempla protulerit . Hinc probi omnes in votis ardentissimis habent , ut tandem modus certus proponatur , quo haec pestis longe lateque per populos vagata , extirpari , & praemia eam in rem digna a Senatu Ducatus Supremo ulterius conferri possunt .

Non melior , ut videtur , fortuna territorii Veneti incolis , hucusque arrisit . Numerum enim eiusmodi aegrotorum in istis etiam regionibus increvisse , scripta medicorum Venetorum abunde docent . Morbum certe , quem PUILLUS atque ODOARDUS Feltriae & Belluni endemium descripserunt , cum nostro convenire , recentiores observationes , paucis abhinc annis promulgatae , satis confirmant . Cl. FANZAGO , postquam Mediolani & Ticini istud malignum genus diligenter indagaverat , in patriam , Patavium , redux , plures huiusmodi aegrotos offendit , quorum historias singulari libro (a) com-

(a) *Memoria sopra la Pella-gra , del territorio Padova-*

plexus est. Mox alius medicus cl. DALLA BONA (a) morbum, quem diligenti investigatione excusserat, scorbuto affinem, cum elephantiasi Graecorum, & lepra Arabum plane convenire, imo adeo ipsam elephantiasin esse, declaravit. Hos excepit tractatus, magno observandi studio aequae ac iudicio elaboratus, a cl. SOLER (b), qui duodecim amplius annis, in provinciae Tarvisinae loco quodam S. Polo, morbi naturam diuturna & vigili cura penitus introspicere allaboraverat, deinceps mutato domicilio laboris sui fructus publici iuris facere decrevit. In eadem fere vicinia Aviani ad montes, sex circiter horarum ambitu, eundem invenit D. SARTAGO (c), atque nomine scorbuti montani insignivit. Morbum itaque in ditione quoque Veneta, in agro Bellunensi,

no, da D. FRANCESCO FANZAGO. In Padova 1789. 4.

(a) *Discorso comparativo sopra la Pella-gra, l' Elefantiasi de' Greci, o Lepra degli Arabi, e lo Scorbuto, ed alcune riflessioni intorno la cura del D. PAOLO DALLA BONA, Veronese Venez. 1791. 8.*

(b) *Osservazioni medico-pratiche, che formano la storia esatta di una particolar malattia chiamata Pella-gra, in cui si espongono i veri caratteri, le differenze, le cause, ed il metodo giudicato il più utile per curarla del D. LUIGI SOLER, in Venezia 1791. 8.*

(c) Leguntur haec in Ephemeridibus Venetis, quarum titulus: *Aneddoti Patrij*. no. 22. Venet. 1791. 8.

Tarvisino , Patavino , Vicentino , Bassanensi frequentem esse , multumque successu temporis augeri , ex recensitis Auctorum scriptis satis constat . Recentissime denique cl. FANZAGO (a) per eam occasionem , qua nonnulli scriptorum fusius de morbo hoc egerunt , novam eidem operam dicavit , atque scorbuto , elephantiasi , hypochondriasi , pellagra sollicitè inter se comparatis , postremum sui generis peculiarem esse morbum argumentis confirmavit .

DIAGNOSIS.

Enarratis hæctenus morbi historia , incrementis , scriptoribus , via nunc ad omnem illius decursum , stadia , symptomata constantiora & accidentalia panditur .

Decursus morbi. In nonnullis quaedam incommoda , quorum causa minus patet , morbum proxime erupturum prænuntiant . Bonus corporis habitus , vigor naturalis sensim deficient , taediosi , tristes , levi labore defatigati , debilitatique incedunt , insignis sequitur pedum gravitas , stupor , vertigo , in primis caduca ,

(a) *Paralleli fra la Pellagra ed alcune malattie , che più lo rassomigliano del D. FRANC. FANZAGO . Padova 1792. 8.*

qua mente obnubilati, nisi a lapsu sese sustineant, in solum concidunt. Interiectis aliquot septimanis, vel in plerisque absque ullo praegresso signo, sub veris initium, aucto iam solis calore, morbus in omni corporis superficie soli exposita, capite tantum immuni, magis conspicuus fit; in pedum manuumque dorso molestus tractionis, tensionisque sensus, iam ardor, pruritus, epidermis leniter inflata, tuberculis obsita diversi coloris, & rubore nitescente tincta: Aegroti nisi solis actioni sese subtrahant, languescunt, obscurato visu, totoque corpore vacillante, velut attoniti corruunt, refrigerio tandem in loco umbroso ad se redeunt. Post aliquot dierum spatium inflammationis haec cutaneae symptomata evanescunt, epidermis subsidet, siccatur, squamae paullatim decidunt, & cutis foedo veluti furfure adpersa apparet. Epidermide sic fatiscente, cutis subiacens levis, mollis, colore primum obscure rubro apparet, quo mox evanescente, pristinam integritatem recuperat. Haec cutis affectio per aestatem in omnibus, paucissimis exceptis, dissipatur, auctumno novi quidem in nonnullis insultus, hyeme omnia plane cessant. Pulsus toto morbi tempore debilis, parvus, perfecta demum hac impetigine denuo attollitur. Sic *primum* decurritur *stadium*,

quo aegroti praeter haec incommoda non adeo male se habent, plerisque ad labores consuetos redeuntibus, donec altera serius, ocys irruat periodus. Quibusdam plures defluunt anni, quibus aegroti recursum morbi neque infestantur, neque a consuetis laboribus, residua quadam debilitate, arcentur. Suborto nunc *secundo morbi stadio*, omnia iam in peius ruunt; symptomata impetiginis fortiora, pruritus magis mordens, ardor igneus, cutis durior, horrida, fissa, sulcata, debilitas multum aucta, ut vel fortissimus succumbat, maior in peragendis officiis segnities, laborum prorsus impatiens, morositas, functionum perturbatio, somnus inquietus, vigiliae, appetitus modo auctus, modo prostratus; quibus plura accedunt symptomata nervosa, capitis & spinae dorsi, de quo fere omnes conqueruntur, dolor, & quaedam delirii species, cum idearum confusione. Sic semper ingravescente malo, cutis simul indurefcit. Impetigo parum iam molestat, & nervi pessime afficiuntur; vertigines sequuntur maiores, deliria melancholica & furiosa, tristitia, solitudinis amor, memoriae debilitas, vitae taedium, & manus sibi inferendi conatus, ut multa talium essent infelicitum exempla, qui vel ipsi sibi mortem conscivere, vel saltem a facinore, felici

quodam fato, fuerunt repressi. Cl. STRAMBIUS in primis multos vidit; qui in aquam, mortis subeundae causa, prosilirent, velut in contrarium hydrophobiae vitium ruentes. Mortem qui sibi non conciliant, tanto saepe furore agitantur, ut non raro vinculis coercendi sint; diarrhoea ingruit, vires succidens, vel hydropem lethalem, phthisesque fatales inducens. Frequentissime autem febre nervosa vel stupidi, vel viribus exhausti, diro morbo tandem succumbunt. Fieri non potest, quin ex morbi, variorumque eiusdem stadiorum descriptione, similitudinem quandam cum variis febrium generibus, quilibet intelligat. Namque initio scenam intermittentis ludit, cum per maiorem anni partem sua aegroti peragunt officia; increscens ad remittentes accedit, malo denique summo, affixi lectis, nullo amplius defungi possunt negotio.

Symptomata. Quo melius autem morbi indoles pateat, uberior nunc symptomatum necessariorum, tum accidentalium, quae frequentius in huius generis aegrotis fuerunt observata, subiungenda est enarratio. Ad illa quidem impetigo, insultus illi nervosi, debilitas, stupiditas, aliaque referenda sunt. Et praecipuam quidem attentionem *affectio cutanea* meretur, quae

quae & perpetua est, & multa prorsus singularia secum habet coniuncta. Haec inflammationis in summa cute species, verum refert erysipelas, quod mox levissimum, ut vix ardorem efficiat, cum rubore minore, subsequente exsiccatione; mox simplex, cum ardore coniunctum urente, rubore roseo, & furfurum deiectione; mox phlyctænides cum phlyctænis amplis, humore aqueo, interdum acri, vel flavescente sero turgidis, quales in parte quadam corporis exusta observare solemus. Manuum iste squalor, quamvis similitudine accedat ad illum, quem rustici, ardente sole laborantes, manibus combustis quasi, fixisque calore, sibi contrahunt; examine tamen subactius instituto insigniter ab illo differt. Pellagra solas partes nudas soli expositas, ut collum, ingulem, petus, brachia, tibias, omnium autem maxime pedum manuumque dorsum invadit; faciem fere nunquam, nisi apicem frontisque superficiem raro. Exempli exstant aegrotorum, qui, ut morbum effugerent, solis ardorem studiose vitando, vitiligine quidem immunes, ipsum tamen morbum nihilominus senserunt. Quod cutis vitium, cum nonnunquam desit, perpetuis morbi signis haud annumerandum esse, aliquis forte credat. Attamen nihil plane in cute efflorescere

rarissimum est. Omnes enim, qui sole radiante in opere sunt, cutem hac ratione habent exasperatam, siue sanitas antea laesa fuerit, siue minus. Ecquis statuerit pustulas inter variolarum signa referri haud posse, quoniam subinde febris variolosa absque exanthemate observata fuit? Etsi quidam, pellagra aegrescentes, manibus pedibusque nullas maculas monstraverint; iis tamen os & labia squalent, arescunt, fiunt, vel alia cutis loca, v. c. cervix vitilagine foedantur, vel plantae pedum vehementi calent ardore, quem quidem Cl. STRAMBIO in plerisque nullo manuum vitio correptis animadvertit. Ista morbi varietas a diverso ipsius gradu, causis evolutioni faventibus, vario temperamento, cutisque sensibilitate repetenda esse videtur. Quod autem vitiligo per vices oritur, atque desinit, id plane non impedit, quominus eam inter praecipua morbi symptomata recensamus: etenim semper statim tempore, veris nempe initio revertitur. Sed si duplicem aliquis morbi faciem, manifestam alteram, alteram larvatam confingere velit, ei nullo modo molestus ero. --- Haec vero cutis affectio non tanta est, ut vitae periculum intentare possit, beneque ageretur cum aegrotantibus, nisi alia, quae ex affecto systemate nervoso oriuntur,

mala, debilitas corporis totius, dolores varii, spasmi, vertigines, deliria, accederent. Praeter debilitatem, totum corpus labefactantem, dolores capitis spinaeque dorsi frequentissimi & constantissimi sunt, non tantum in morbi vigore, verum etiam in primo eius accessu, cum saepe numero vitiliginem praecedant. Scena dolorum haec est: in capite vagi, pungentes, gravantes, lancinantes, terebrantes, rodentes cum sensu ardoris, quasi flammae in cerebro accensae, quin cum tinnitu aurium molestissimo, pulsationeque in ipsa cerebri substantia copulati. Eadem ratione spina dorsi, titillatione scilicet ingrata, rapidoque velut fulminis percussu, afficitur. Dolor huc atque illic per nervorum tractus migrat, brachia, pectus, lumbos, crura infestat, unde tam diversa, a diversis partis cuiusque nervis affectis, phaenomena, praecipue frequens ille artuum inferiorum debilitas, atque vacillatio derivanda sunt. Hinc pendent porro varia *spasmodorum* genera, sub morbi decursu observanda, quae tandem ita augentur, ut synopen, epilepsiam inducant, sic tremores, tetani variae species, tremor labii inferioris frequens, etiam in non delirantibus, crampus, rigor corporis, umbilici retractio, torpor pedum, clonica eorundem convulsio. Saepe alterutrum

latus solum laborat hemiplegia, saepe utrumque. *Vertigo* etiam in primariis morbi ineuntis adultique symptomatibus numeratur, & plerumque tam gravis est, ut ob aegrotantium oculos omnia rotando circumagi videantur, ipsique titubantes, nisi fulcrum praesto sit, succidant. Id ipsum maxime iis accidit, qui solis radiis imprudenter se commiserunt. Ab afflictione vertiginosa duo forte alia, non infrequentia symptomata, *rinnitus* nempe *aurium* molestissimus, atque *diplopia*, qua obiecta duplicia apparent, repetenda sunt. --- Sub finem morbi alia tristiora adhuc symptomata irruunt. Varii *delirii* gradus mitiores, fortiores; aegroti alii tristitia oppressi, taciturni, obmurmurantes, melancholici, solitudinem quaerentes, vitae pertaesi; alii laeti, clamitantes, canori. Interdum delirium in morbi acuti modum decurrit, & finito paroxysmo per totum corpus sudor consequitur immundus. Is, STRAMBIO teste, singulari odore foetus est, & mucorem, vel bombycum folliculos maceratos redolet. Alio tempore delirium fit chronicum, per omnem vitam summas miseris creans molestias, ut ad negotia prorsus inepti, sibi aliisque difficiles sint, donec vel febre nervosa cum signis mortis imminens, carphologia, pulsu exili, vitam si-

niant. Alii stupidi sunt, amentia sua sibi aliisque admodum graves, alii furentes, vinculis coercendi. Ad effectus delirii, praecipue melancholici, referenda illa est vesaniae species, qua vitae pertaesi mortem ultro accersant. Vesaniae convulsivae nomine hunc statum insignivit cl. SOLER, in feminis frequentissime, in viris nunquam ipsi visum. Neque solummodo delirio correpti, sed de reliquo bene etiam se habentes, vitam sibi adimere tentant; quod tamen certum infirmitatis animi signum est. --- Tanta ergo systematis nervosi turbæ, quae ex symptomatibus hucusque recensitis, functionumque laesionibus oriuntur, ipsum aegroti vultum mirum in modum distorquent. In omnibus fere, qui tam longa, tam iniqua valetudine conflictati fuerant, vultus torvitatem, verbis haud exponendam, conspexi. Singularis quidam stupor faciem urget, oculi languent, inertes, torvi, ut moeror in iisdem haud difficulter dignoscatur.

Complicatus morbus. Haec vero constantiora morbi symptomata, quae eiusdem indolem formant, cutis maculae, debilitas universalis, aliaeque nervosi generis incommoda, frequenter cum aliis multis, ab aegrotorum diversa constitutione, a temperamento, morbis praegressis, vel ab aliis complicatis malis, manantibus,

coniunguntur. Enarremus hic ea solummodo, quae frequentius morbum comitantur, vel ei similia sunt, vel denique ex regionis aërisve natura pendent. Saepissime abest *febris nervosa*, cum virium defectu maiori, pulsu inconstanti, delirio, subsultibus tendinum, aliisque malignis symptomatibus, quae non raro morbum finiunt. Cum *inflammationibus* rarior, eoque funestior complicatio, quo magis inter se pugnat utrique morbo medendi methodus, cum inflammatio motus nimios cohibere, pellagra autem vires erigere iubeat. *Dysenteria*, quae interdum sub morbi finem accessit, ab anni potius charactere repetenda est, funesta autem, quod corpus iam debilitatum magis destruit, in diarrhoeas pertinacissimas abitura, unde variae hydropis species, in primis leucophlegmatia atque ascites mortem mox inducunt. *Scorbutica* symptomata in regionibus Mediolanensibus rarius visa, quam in Venetis, ex ODOARDI, atque SOLERI testimoniis, qui frequenter gingivas laxas & cruentas, dentium nigrorum, cariem, lapsum, animam foetidissimam observarunt. Haec igitur ab alio morbi consortio potius, quam a morbi natura pendere videntur. Praeter constantem illam cutis corruptionem, supra uberius expositam, rationa sunt alia mala

cutanea, ut ecchymoses in dorso manuum, posteriori cubiti parte, in genis, vario colore distinctae, lividae, ut plurimum laete rubrae, evanescentes, redeuntes; vesiculae ad pedum malleolos; pustulae porro prurientes, a scabiosis situ atque contagii immunitate diversae. In primis cl. STRAMBIO herpeticum quoddam cutis vitium notavit, ab impetigine illa, huic morbo propria, bene distinguendum, quod ipse in aliis aegrotis, qui morbo non succumbebant, acute advertit. Cl. SOLERUS contra non pauca in diversis aegrotis vidit symptomata *elephantiasin Graecorum* aemulancia; cutis partium soli non expositarum, sub axillis, poplite, quandoque afficitur; eadem in vertice scabra, furfuracea, capilli quasi adusti, ut in tinea, decidunt, ungues incurvantur, ut quasi emortui tartareas conficiant concretiones, quae deinceps solvuntur, totius corporis color luridus, frons corrugata, oculi inflammati. In cadaverum sectionibus non raro *viscerum* imi ventris *obstructiones* repertae, quas in primis cl. SOLER in pellagra humida invenit, & veritati convenienter pro hydropis causa habet. Eadem vero phaenomena, ubi adsunt, potius ut morbi effectus, non ut causae considerata videntur, cum a morbo isto, totam machinam perturbant.

re, haec etiam viscera male affici necessarium sit. Frequentia sunt quaedam *visus vitia*, ut hemeralopia, vel amblyopia crepuscularis; in feminis praecipue menstruis per vices cedens, atque catameniorum fluxu ad tempus sublata; diplopia accusatur a plurimis, ab aliis autem continua visus hebetudo. Alia sensus saporis accedit immutatio. Nam plerisque falsus quidam molestissimus sapor cum maiori, minorive salivae profluentis copia; lingua tumida, dura, calor oris molestus, faucium dolores. Sitis magna, ciborum nunc fastidium, nunc incredibile desiderium, pica adeo, vel malacia. Tussis non raro, cum erosionis in faucibus sensu, sicca, chronica, facile in phthisin abiens. Sudant aegroti frequenter absque causa evidente, ut ex debilitate sudor praecipue partialis in manibus, pedibusve cum ardore coniunctus, repetendus videatur.

AETIOLOGIA.

Transeuntes nunc ad causarum morbi examen, magnis implicamur difficultatibus, quas & morbi ipsius obscura natura, & auctorum dissensus obiciunt. In tanta igitur rerum confusione, quo tutius versemur, neque ipsi impe-

diantur, consueta illa caussarum divisio, in remotas atque propriiores, fundamenti loco ponenda erit.

Pluribus comprobatum legimus exemplis, magnum horum aegrotorum numerum *haereditaria* quadam labe infectum, citius, tardius, huic subiectum morbo fuisse. A parentibus pelagrosis nati, plerumque adultiore aetate, frequentius post pubertatis annos, quin prima interdum infantia & lactantes adhuc, fomitis morbose intus latentis, externas notas prodiderunt. Integras non raro videris familias, quarum singula membra, ut commune gentis suae signum, morbi huius circumtulerunt indicia: sic parentes, filii, sorores, fratres, nepotes, vel ex contagii communione, communem manifestamque originem testatam fecerunt. Unde simul statum, morbi evolutioni inter alia faventem, in fomite per haereditatem propagando recte quaeri concludimus. Forte aliquis obscuram hanc esse originem statuatur, qua eo minus innotendum sit, cum aliae manifestiores caussae in promptu sint. Sed experientiam id docere respondeo, quanquam de via & ratione, qua morbus a patribus ad liberos transferatur, nihil certi nobis constat. Neque tamen inficiamur fuisse aliquos, qui huius mali gentilitii vim

effugerint. Quae quidem quorundam felicitas, vel in eo quaerenda, quod certus morbi status requiratur, ut haereditate communicari possit; vel si iam translatus ad prolem fuerit, felici fato occasiones morbo eiiciendo accommodatas vitando, vel alia ratione aptitudine infirmando, ipsum malum vincatur. Ut vero olim a quibusdam primus morbus in gentes introductus, sic nunc quoque multi, quorum parentes ab hoc malo immunes fuerunt, primi ex sua gente eodem corripuntur.

Alias vero hic causas subesse oportet, quae, ut olim gignendo, sic recens producendo malo pares sunt. Quam plurimi sane in eruendis causis, multum laboris, studiique impendunt, ut diligentius in omnem victus vitaeque rationem, iis praesertim regionibus usitatam, ubi malum primum caput extulit, maximumque agricolarum numerum prostravit, inquirerent. Tanta autem, pro agrorum vicissitudine, coelique mutationibus in his deprehenditur diversitas, ut hic iudicium experientia & ratione fundatum, inferre difficillimum sit. Non per humidiores tantum agros, paludosasque regiones, sed siccas quoque aridioresque, per collium vicinias, per montes Briantinos, disseminatum est hoc malum. Victus atque vitae ratio, nisi

omnis simul spectetur, nimis generalia exhibet
 momenta, quae inter causas tanti morbi vix
 recenseri poterunt; omnis vero illa vivendi
 ratio inter se unita, ut debilitatem totius cor-
 poris infert, sic vitale robur frangit, humorum-
 que pravorum elaborationi quam maxime favet.
 Hinc longe funestior causa in illa quaerenda
 est insigni *debilitate*, qua maior, eaque utilis-
 sima populi pars, agricolas, puto, hominesque
 rure viventes, in hisce regionibus potissimum
 prosternuntur. Iste status certe deplorabilis ab
 extrema hominum miseria derivandus, iureque
 miseriae morbus appellandus erit. Quod quo
 melius probetur, omnis miserorum vivendi ratio
 paucis adumbranda est. Puer, si pericula, quae
 ipsi in utero materno per improbos illos labo-
 res, ad quos perferendos mater ad extremum
 usque graviditatis terminum necessitate urgetur,
 vel sub ipso momento, quo lucem conspecturus
 est, imminebant, felici fato evasit; raro illo
 naturae beneficio, omnibus animalibus concessio,
 lacte scilicet materno eoque bono & abundanti,
 ut primo nutrimento fruendi, gaudebit. Aliae
 enim matres, ob magnam corporis maciem,
 viriumque defectum vix pares sunt tantae lactis
 boni copiae in uberibus parandae, quanta in-
 fans, ut probe nutriatur, indiget. Sed si forte

in matre adhuc iuvene primus hic animalis alimenti fons largo adhuc fluxerit flumine, eadem mox paupertate oppressa, spe quicquam lucrandi abrepta; ubera sua alienae matris pusionibus mercede conducta praebet, prolemque suam alimento fraudat. Sic unicus ille futuri roboris viriumque integritatis fons, infanti contra naturam negatur. Ad famem eius exstinguendam, ad ploratus leniendos, cibus durior, nondum a tenero ventriculo subigendus, pulres nempe ex aqua & frumento turcico (*Zea Mays* L.) factae vi ingeruntur, quae mox in tenacissimam abeuntes massam innumerabilium morborum semina iaciunt. Hinc frequentes illae mesenterii obstructiones, varii atrophiae effectus, multique alii morbi, gravissima per omnem vitam incommoda producentes. Sunt interdum nonnulli, qui haec infantiae pericula elactati, puerilem consecuti aetatem novas, quibuscum confictantur, nunc reperiunt difficultates. Quamprimum enim vires corporis quicquam valent, statim duro, molestissimo labore, cui isthaec aetatula impar est, parentum egestate, subesse coguntur, quibus praematurum sudorem infantiae threpteria, parca manu oblata, remunerant. Corpus enim illo ipso tempore, quo viribus ad incrementa ulterius capienda maxime indiget, labore fra-

Etiam, multo sudore diffluens, virtutem vegetam sensim amittit, alimentis haud restituendam, quippe quae nec reficiendo corpori, nec exhilarando animo sufficiunt. Maxima enim pars horum infelicium pane vescitur male fermentato, crudo, humido, ponderoso, ex frumento turcico, vel solo, vel cum exigua fecalis quantitate facto; pultibus ex farina eiusdem seminis, addito leguminum quodam siccorum genere, mera aqua coctis, lardoque & oleo conditis, massamque crudam efficientibus. Iusculum porro ex oryza, mistis fabis, vel brassicae, vel leguminum siccorum tenui particula, avidissime sorbent; qui ipse cibus incolis communissimus, optimus quidem inter reliqua alimenta, eas adhuc, quibus gaudent, vires largitur. Fructus contra horaei, ova, lac, carnes, tum nutrimentum bonum tum meliorem humorum missionem praebentia, vix unquam degustant. Potus ipsis est in profundioribus locis aqua, eaque ut plurimum impura; in elitioribus, ubi vites coluntur, vinum secundarium, *la posca* vulgo dictum. Tali ergo nutrimento, cum nunquam bonus elaboretur chylus, omnia in massam convertuntur pultaceam; cuius solutioni condimentum salis prodesset, nisi illius usus propter maius pretium, vel plane denega-

retur, vel exigua portione, paucis tantum granulis impuris & sordidis, concederetur. Sed non minor in contuberniis miseria. Habitacula ut plurimum miserrima, angusta, impura, insalubria. Quamdiu coeli amoenitas permittit, in colendis agris corpus laboribus fatigant, hyeme ob coeli asperitatem tuguria petunt, per plures menses in stabulis iumentorio vivunt contubernio. Hic ne frigidiusculus aër accedat, ianuam exiguam sedulo oclusam habent. Aëris adeo, cuius accessus novus impeditur, corruptioni favent quoque immundities habitationis summa, spurcities lectorum teterrima, sterquilinia in casarum viciniis, ut corpus humanum, nisi ab infantia eiusmodi sordibus assueverit, in tanto squalore, tantoque luctu, vix crederes, esse & servari posse. Quo igitur pacto huiusmodi vivendi genere vires corporis labore nimium quantum exhaustae refici possunt? Villicorum improbitas, quo melius Dominorum, redditus suos quotannis angere studentium, avaritiam expleant, sibi que simul prospiciant, graviores, quam exhausta corpora ferre possunt, imponere labores solent. Corpore ergo debilitato, operibus durissimis oppresso, omnis machina animalis turbatur. Hinc habitus ille tristis omnium fere per istas regiones agricolarum,

color flavus, cachecticus, parva corporis statura, facies vel tumida, vel macilenta, membra rigida; feminarum menstrua irregularia, frequentes abortus, partus difficiles; saburra primarum viarum continua, ad quam sub cuiusvis morbi, hosce homines invadentis, cura primum attendendum est; senium praematurum, ut viros quadraginta annos emensos, ad summum quinquaginta annorum, senes decrepitos, non sine admirationis sensu, putes. His quae hactenus proposui (*), quanquam istam colonorum insubrium miseriam pellagrae primariam causam esse, haud asseram; quod illa in aliis regionibus; quarum incolae simili, quin maiore adhuc calamitate opprimuntur, ignoratur; contendere tamen omnino possum, infirmitate illa, quae paupertatis progenies est, aditum morbo, corpus data occasione invasuro, parari. Videmus enim hunc ipsum frequentiore atrocioremque esse agricolarum, praecipue miserrime conditionis morbum, eumque penuria crescente, latius

(*) Quam hic paucis modo mihi adumbrandam sumpsi infelicem huius gentis sortem: eam vivis verisque coloribus, ut solet, depinxit ill. FRANK in oratione quadam academica: „de populorum miseria „morborum genitrice“ habita a. d. 5. Maii 1790. inserta eius Delectui Opusc. Vol. IX. pag. 302--324.

manare. Sunt inter scriptores, de morbo hoc in Patavino agro referentes, qui nunquam exempla hominum ingenuorum eodem afflictorum, se vidisse, asserunt; quorum quidem aliqua, quamvis rariora, in Mediolanensi tractu, occurrunt. Maxima vero horum aegrotorum pars inter artifices fuit, vel simili oppressos inopia, vel in agris miseram vitam degentes. Rarissima contra aegrotorum, in meliori fortuna constitutorum, exempla sunt, quorum levior omnino morbus, sola impetigine, atque universali debilitate distinctus, moestissimam illam faciem nunquam induit. Pluribus porro observationibus comprobatum est, morbum hunc, debiliore corpore, post aliam aegrotationem, praecipue post febres intermittentes, in chloroticis, cachecticis, frequentissime prima vice prodire. Ex amicissimo STRAMBIO saepe audiui, pueros abdomine duro, magno, denso, sequenti tempore citius, ocys morbo semper subiectos esse; quin ipse in nosocomio Mediolanensi huiusmodi puerum, sex circiter annorum, pelagrae signa manifestissima praesferentem, vidi. Similem morbi impetum mulieres graviditatis, puerperii, lactationis tempore, expertae sunt; ut, cum prodroma eiusdem signa in femina lactante apparuissent, ipse nondum perfectus,

ctus,

Etus, post novum demum puerperium, lactantem, impetiginosa eruptione, invasit. Qui robustiore firmioreque corpore sunt instructi, nisi haereditate morbum contraxerint, rarius succumbere; qui imbecilliore facillime; mulieres frequentius viris hac corporis pravitate tentari, constans medicorum observatio est.

Inter causas haecenus enarratas haereditaria dispositio, atque insignis corporis imbecillitas, ex prava vivendi ratione, summaque agricolarum miseria derivanda, non omnem morbi aetiologiam expediunt. Sunt enim, qui haereditario vitio minime infecti, morbo, in quem primi incidunt, defunguntur. Neque regionum, quas pellagra infestat, insalubritas, quorsum Mediolanensem, finitimasque referre possum, deplorandum hunc sanitatis statum apportat. A loci quidem vitio causam illius aliquis petere posset, quae tamen, quamvis victus vitaeque rationem, qua incolae harum regionum utuntur, plurimi scriptores diligenter exposuerint, certa & indubia reddi non potuit. Primam quidem morbi causam ab eiusmodi peculiari vitio repeti posse, facile largior. At vero nunc cum magis commune & vere endemium factum est malum; per vicinas adeo regiones magno augmento dissipatum, vel actioni cuidam frequentiori atrociorive, vel alij

morbosae potentiae tribuendam esse, tristi indu-
 cimur experientia. Hinc non plane supprimenda
 est suspicio *veneni* cuiusdam *contagiosi*, quod ab
 eo inde tempore, quo morbus caput suum extu-
 lit, maioraque coepit incrementa, inferre eundem
 videtur. Mihi quidem haec asserenti probe co-
 gnitum est, non raro in causis morborum paullo
 obscurioribus, ad contagia, tanquam ad occultas
 vires, multos confugere; unde magni nominis
 viri, ut contagiorum ditionem angustioribus cir-
 cumscriberent limitibus, iure permoti fuere.
 Attamen haud vanam hoc loco esse principii cu-
 iusdam contagiosi suspicionem, ut asseram, argu-
 mentis, experientia & ratione nitentibus, addu-
 cor. Primo enim analogia, quam pellagra sequi-
 tur, morborum cutaneorum, tum acutorum, tum
 chronicorum, quibus maxima ex parte contagiosi
 quicquam subest, hic multum valet. Exempla
 communissima variolarum, morbillorum, tineae,
 scabiei, leprae, hic adduxisse, sufficiat; in quo-
 rum classem pellagra, propter constantem utcun-
 que impetiginem, omnino referenda est. Ad con-
 trahendum autem contagium quaedam requiritur
 corporis convenientia, quam praedispositionem
 appellant, cum non ad omnes, eidem expositos,
 eadem labes manet. Sed quid sit, quod hanc
 praedispositionem efficiat, finire vix audebo.
 Namque omnes, qui de morbo hoc scripserunt,

vim contagiosam in universum negant. Nulla quidem morbi per concubitum, aut contactum propagati exempla exstant, neque medicorum quisquam, qui curandis aegrotis maximam dederunt operam, unquam morbo infectus fuit. Aptitudinem corporis, ad contagium excipiendum obscurissimae esse originis, docet experientia, siquidem aliud modo semel hominem corripit, aliud sub certis conditionibus, aliud petit hunc, fugit illum. Si quid coniectura assequi licet, aptitudinem corporis eiusque, ut aiunt, praedispositionem, in singulari quadam imbecillitate eius quaererem, cum corpora imbecillia, nutrimento sufficienti destituta, vel tristitia curisque exhausta, ad suscipiendum contagium aptissima esse observationibus constet. Parum autem singula illa, quae de contagii cuiusdam suspitione protuli, valerent, nisi observatio eandem confirmare videretur, quam ulteriori indagationi relinquo. Cl. STRAMBIO (Ann. I. pag. 77.) mentionem fecit ligni fissoris, qui de montibus, ubi natus, Apuanis, ad plana & aperta Insubriae loca, victus parandi causa venit, vere in patriam rediturus. Is cum sociis duobus, qui secum per hyemem huc venerant, pellagra, morbo sibi & in patria ignoto, contaminatur. Bene notat cel. Auctor, incelas sola pulte, caseo & vino

vivere. Sed potest alia quaedam hunc morbum produxisse videri causa, partim a locorum conditionibus, partim a contagionis veneno ducenda. Diversitatem locorum morbo fovendo favere, ultimis annis, quibus malum varia, eaque diversissima loca pertraxerat, compertum fuit. In ipsis autem hominibus fomitem morbi iam haberi, sequenti exemplo, quod illustris Praeceptor me coram exposuit, verisimile videtur. Acceperat enim a medico oppiduli *Rivolta*, prope flumen *Adda*, in territorio *Laudensi* (*Lodi*), ubi nosocomium viginti circiter lectorum constructum est, quod, postquam homo pellagra infectus, fortunae suae sedem, ante decem propemodum annos, ibidem posuerat, morbus ab illo tempore latius egerit, iamque frequentissimus sit, qui antea in distantia aliquot horarum, in viciniis *Treviglianis* (*Treviglio*), tantum cognitus fuerat. Quibus exemplis, quamvis nihil certi probetur, nostra tamen attentio magnopere excitatur, ut viam, qua pernicialis illa malignitas impetu clandestino incedat, modumque violentiae illius compescendae, tandem inveniamus. Quodsi revera contagium quoddam sublit, singularem propagationis habebit indolem, quae abdita & operta, medentium vigilantiam haecenus effugit. Quapropter ortum & progressum contagiosi fomitis ulterius exponere si vellem, nonne

opinionem pro vero venderem? Causa mali initio non adeo egisse fortiter, at recentiori tempore vel increviffe, vel in malum contagiosum degenerasse videtur. Prima quidem stamina vel in corpore humano nata, vel extrinsecus forte a pecoribus, quibuscum rustici miselli in stabulis hyemant, ad homines transmigrarunt.

Muetur forte aliquis, me nullam hucusque in enariandis causis, mentionem fecisse *Insolationis*, cuius tamen effectus in pravitate illa cutis producenda, evidentissimi sunt. Aegrotorum quidem fors in aëre sole carente, neque insigniter molesta, neque gravis est; at, continua solis in corpus actione, apoplectici tandem concidunt. Primo ergo ab intuitu omnis huius mali origo radiis solaribus tribuenda esse videtur, unde FRAPOLLI seductus, solis lumen pro unica & primaria causa venditat. Sed fallaciam hic subesse constat, quam GHERARDINI gravibus argumentis profligavit. Neque profecto primus morbi impetus, gravitas & augmentum, radio-
rum solarium vi respondet. Indirecta solis actio, vel radii minus fortiter illidentes, morbi sensationem adventumque, e contrario longe fortiores & directe agentes, vix quicquam incommodi contraxerunt iis, qui iisdem, ut viatores, artifices varii sub die laborantes, milites in itinere

ribus, expositi fuerunt. Praeterea malum erumpit veris initio, sole blandiore, neque tam assiduo, quam aestate, ubi plerumque minuitur, cessat, auctumno interdum iterum revertitur; verni adeo soles, neque magis efficaces, aestivis, quibus iam assuetum aegri corpus, iudicari possunt. Denique fuerunt nonnulli, qui ardorem solis, ipsumque adeo morbum evitare cum velent, maiorem quidem cutis defoedationem, symptomata vero reliqua non evitarunt, quin ingravescente malo, imminutaque ob cutis duritiem impetigine, symptomata & fortiora & funestissima exstiterunt. Quibus omnibus, quaedam in ipso corpore causas, morbo huic atroci pares, latere, satis probatur. Insolationi tamen cum non omnis deneganda sit vis, ea recte sibi locum inter causas occasionales, morbo faventes, vindicat.

Quae in praesens de causis disserui, quamvis probabilitatis quandam habeant speciem, minime tamen tam certa sunt, ut demonstrationis vim accipiant. Etenim momenta adhuc restant, quae ex hac causarum expositione explicanda sint. Sic difficilius eruitur, cur agricolae rus colentes, frequentissime, qui domi se contineant, vel alii, qui in pagis vivunt, rarius, urbium incolae rarissime adeo corripiantur, ut clariss. STRAMBIO in tanto aegrotorum numero, una

solummodo puella Mediolanensis 24 annorum, quae nunquam urbem patriam reliquerat, occurrerit. Porro cur vere symptoma illud cutaneum accedat, aestate decreseat, hyeme dispareat? Responso facilis & prompta: videlicet colligi & elaborari per hyemem acrimoniam illam pelagrosam, quae deinde solis concitata ardore, ad cutim devolvitur. Cui coniecturae symptomata favent nervosa, quae quamdiu impetigo adhuc rite succedit, minus pernicialia sunt; cute autem duriore & aspera, in quam sol agere satis nequit, morbus valde exasperatur. Sic aegroti hoc anno, maxima cutis defoedatione, mox restituuntur; alio, minori illa, pessime se habent. Nonnulli cutim inungendo vitiliginem avertere tentarunt, sed subita morte occubuerunt asphyctici. Veris quoque tempore symptomata nervosa aegrotantibus loca opaca sectantibus, adeoque quaedam morbi vernalis exacerbatio etiam sine impetigine, imminet. Latet ergo hic aliquid periodici, quod non minus obscurum est, ac aliae corporis tum sani, tum aegroti, immutationes periodicae esse solent.

Ex causis remotioribus huc usque fusius expositis, ea nunc, quae ad proximam enucleandam faciunt, deducenda sunt. Quod quidem accurate fieri nequit, nisi diversas aliorum opinio-

nes, de morbi huius natura antea enarremus, atque diiudicemus. Convenit enim causa proxima morborum cum eorundem natura, ut solo concipiendi modo inter se differant.

D I V I S I O .

In morborum divisione haec praecipua lex sit, ut aliquis eius in praxin usus redundet. Quem in finem cum felix cura, cognitis causarum natura & diversitate, nitatur, longiori earundem enarrationi ne taediosi immoremur, singulas, quae eodem tolli modo possunt, uni speciei subiiciamus. Dolendum tamen, nos in describendo morbo utroque fonte, tum certa causarum cognitione, tum conveniente, ut prorsus eradicetur, medendi methodo, destitui. Oportet igitur ad varia illius stadia, quae pro minori, maioriqve vehementia, diversam recipiunt curationem, recurramus. Omissa nempe illa, quam alii aliorum morborum, in *Haereditarios & Acquisitos*, amplexi sunt distinctionem, quae nullum fere in praxi usum habet, ordinem potius symptomatum, meliori fundamento huc usque destituti, hic sequamur. Ex toto morbi decursu antea proposito, ipsum, patet, lente, & cunctanter venire, & primo *leviorem* esse, cum quodam segnitiei, debilita-

tiſque ſenſu, & impetigine; mox *gravio-rem*
 fieri & funeſtiores iam comites ducere, melan-
 choliam, ſtupiditatem, delirationes interiectas;
 tandemque in *fortiſſimum* ultimumque gradum
 abire, in quo ſunt deliria furioſa, vera mania,
 vitae taedium, & niſi morbo quodam chronico
 aegri pereant, funeſto ſaepe auſu mortem ſibi
 conſciſcant. Non conſtantem quidem hunc or-
 dinem, neque certam annorum ſeriem ſequitur,
 cum malum nunc ſubito irrepit, nunc per ali-
 quot annos ſine ſymptomatum exacerbatione
 perſiſtat. Quapropter haec ipſa diviſio facile
 aliis, quae ad ipſam therapiam ducunt, poſt-
 ponenda erit. Quem in modum recentiſſime cl.
 SOLER novam Pellagrae diviſionem, a vario
 corporis habitu, locorumque, ubi reperitur, di-
 verſitate, deſumptam, *Humidam* nempe, & *Sic-
 cam* propoſuit. Haec quidem regionibus ſicciori-
 bus, altis, ventolis, montuoſiſque propria, corpo-
 ra reddit ſicca; quaſi aduſta, verum inducit ma-
 raſmum, cutem ſoli expoſitam rigidam, rubram
 & aduſtam, plenam fiſſuris, rhagadibuſve, quae
 ſanguinem fundunt, & dolores acutos cient.
 Humidum vero genus, locorum paluſoſorum in-
 colis moleſtum eſt, corpora eorum pallida fiunt,
 inflata, oedematosa, cachectica, venter tumi-
 dus, cutis in ſole coriacea, ſquamula albeſcente,
 dolente, cooperta, ut Elephantiaſin aemuletur.

Hanc quidem differentiam inter accidentalia primo intuitu referendam, cl. SOLER, propter insignem in praxi usum, multa laude effert; neque tamen scriptoribus, qui de Pellagra in Ducatu Mediolanensi tradiderunt, usitata est, neque regionis conditioni satis accommodatam equidem reperi. Etenim pellagrosi, quos ego maximam partem in locis humidioribus & paludosis permultos vidi, corpore omnes erant extenuati, macilenti praecipue si morbus iam longius processerat. Mihi itaque de morbo ditionis Mediolanensis differenti haec non tanti facienda est divisio, usum forte habitura, ubi contagium minus perniciosum sit, aut ubi per regionis, coelique naturam, ad eandem attendi oporteat.

P R O G N O S I S.

Quid tandem de periculis, quae hanc labem circumstant, de signis tum bonis, tum malis, de eiusdem exitu statuendum sit, nunc videamus. In universum quidem tristes admodum praesensiones huius mali habentur, tum remedium, quo penitus tollatur, huc usque nondum inventum sit. Interim prognosin, secundum diversa morbi stadia eiusdemque incrementa, limitari oportet. Quamdiu graviora symptomata; quam impetigo, & universalis imbecillitatis sensus haud urgent,

tam diu spes est, fore, ut aegrotus, si causas occasionales, labores nimios, insolationem vitet, victuque bono & salutaris utatur, ex morbo evadat. Exempla enim aegrotorum a cl. STRAMBIO commemorantur, qui cum causas, ad morbum alendum aptas, vitarent, ipsum adeo morbum a progressu refrænarunt. Equidem recordor agricolæ cuiusdam, qui per viginti quinque, & quod excedit, annos, cum puer admodum solum patrum, pellagra tentatum, cum suburbio commutasset, præter impetiginem vernalem, & imbecillitatem quandam, nulla unquam morbi incrementa persensit. Simili ratione mulieres, quæ post primos insultus, vitam in domiciliis sedentariam egerunt, ne morbus plane explicetur, facere quidem, integra autem valetudo ut recuperaretur efficere minime potuerunt. Sed miseros fortuna plerisque finxit, quibus, cum sine laboris molestia necessaria vitæ subsidia parare sibi nequeant, unicuique quoque, quod ad vim morbi conspescendam comparatum est, beneficium denegatur. Sunt alii, qui per ignorantiam aut negligentiam, morbo iam multum profecto, ubi præservationi locus amplius nullus est, auxilium quaerunt; alii perversa sub morbi initium cura, evacuantibus fortioribus, venæsectionibus, drasticeisque

vires, lento gradu decrescientes, subito peflunt. Nulla enim medendi ratio morbo huic magis inimica est, quam evacuans. Hinc maior aegrotorum numerus post primos insultus, celerissimo passu in peiora ruens, paucis annis secundum morbi stadium assequitur, ex quo citissime ad tertium, pessimum, properant, quippe quod funesta maxime symptomata nervosa, ubivis pertimescenda, ulloque haud vincenda remedio, secum coniuncta habet. Nec aetas, nec sexus, morbum admodum immutant. Etenim quo teneriore aetate aegroti invaduntur, eo minor de eorum salute spes; quamvis & alii iam adultiores, diligenti regimine morbi, vim quicquam fregerint. Omnium autem consensu feminae facilius, quam viri, plerumque menstruum inprimis tempore, succumbunt, viri tamen semel infecti, eadem, ac mulieres, patiuntur. A temperamento, anni tempestate, locorum diversitate quaedam oriatur differentiae. Sic loca montosa & sicca, qui inhabitant, ut & hyeme sicca, serena, citius evolvi labem, GHERARDINI asserit. Gravitas morbi non metienda ex impetigine. Leviori cutis affectione symptomata interna admodum urgent, & in genere ex morbi patet historia, quod decrecente cum annis vitilagine, nervosa sympto-

mata propter cutis duritiem incrementum (*). Delirium si sequantur intumescencia, aut gangraena, signa sunt pessima. Funestissimae morbi complicationes sunt, ad quas debellandas vitae vires imminui oportet; quam tamen methodum pellagra minime admittit. Neque minus nimiae corporis agitationes, imprimis amplexus venerei, malum insigniter augent. Ad quos quidem, ut singulari invitentur salacitate, ita plerumque successu temporis impotentes evadunt. Chronico plerumque vitio morbus tandem finitur. Sunt quidem nonnulli, qui febre nervosa acuta, cum deliriis vehementibus insultibus maniacis cito succumbunt; at longe plures morbo diuturno, viribusque sensim exhaustis, pereunt. Saepissime diarrhoea accedit, aquosam emittens materiam; quae, quemadmodum per se iam fatalis est, sic varias insuper hydropis species, anasarcam vel ascitem, quin hydrothoracem, pertinet, incurabilesque inducit. Similes aquae

(*) III. LEONARDI mecum benevole communicavit methodum, qua in impetiginibus pertinacioribus felici successu usus est. Praeter fomenta ex vino calido, extrinsecus repetita, partem tela cerata studiose coopertam habet; interne in corporibus siccioribus diluentia; in humidis resolventia, saponacea, gummata, adhibet. Forte & in pellagra huius generis fomenta commendanda essent, ut transpiratio iuvetur?

collectiones praeternaturales, contrario quandoque vitio, obstructionibus haud referendis, nituntur. Utrique idem tamen mali exitus. Instantis ex pellagra mortis pleraque signa reliquis quoque morbis communia sunt, ut pulsus intermittens, fornicans, convulsiones varii generis, aliaque hic uberius non commemoranda.

N A T U R A .

Expositis sic Pellagrae decursu, symptomatum grege, causis, divisione inde formanda, & prognosi, tandem quaestio, quid de eiusdem natura iudicandum sit, merito movetur. Difficile sane officium nosologi, verum morbi characterem atque naturam per quaedam signa constantia, ex omni symptomatum cohorte delecta, decernere, cum morbi, quales animo concipi possunt, rarissime puri, & simplices, sed complicati atque inter se confusi incedant, magnaque observandi diligentia, magnoque ingenii acumine ad necessaria ab iis, quae accidunt, distinguenda, opus sit. Haec morbos diiudicandi difficultas, eo etiam augetur, quod non raro praeconceptae quaedam opiniones animum vel maxime attenti ita occupent, ut rationem atque causam rei, mente conceptam, vere observasse sibi persuadeat. Idem quoque pellagrae accidit,

cui medici, diversa illius forma seducti, diversa indiderunt nomina. ODOARDI, novam scorbuti speciem, Alpinam nempe; VIDEMAR hypochondriacis affectionibus accensendam; & DALLA BONA elephantiasin Graecorum & lepram Arabum esse, indicant; in primis postremus magnam scorbutum inter & pellagram offendisse analogiam sibi visus est. Non est huius loci longa comparatione dilucidandis his discriminibus inhaerere, id, quod eo minorem nobis operam faceretur, quo maiori diligentia ab aliis hic locus satis iam tractatus est. Quaedam solummodo momenta ad speciem morbi recte informandam attulisse sufficiat.

Quod primo ad ODOARDUM attinet, qui, cum ignotum, nec in libris medicis hucusque descriptum observasset morbum, in PU-IATI partes, pellagram propter similitudinem pro *scorburo* Alpino habentis, transit. Quam sententiam recentissime cl. DALLA BONA in libro suo ulterius comprobare studuit. Quaedam omnino inter utrumque morbum intercedere similitudinis momenta, quibus uterque in hanc sententiam deductus fuerit, facile intelligitur. Num vero tanti sint ponderis, ut pellagra pro scorbuti specie haberi possit, nostrum iam est disquirere. Primo quidem singularis illa cutis affectio, pellagrae, cuius characterem adeo evi-

dentem constituit, propria est, multumque distat ab illa scorbutica cutis immutatione. In hac enim maculas latas, contusionem referentes, per omnem corporis superficiem sparsas, nulli temporis periodo adstrictas, planas, sine phlogoseos signis, sine vestigiis furfuraceis cernis, quae omnia sub morbo invalescente in conspectum veniunt. In pellagrae contrario primis statim annis cutis apparet desquamata, in progressu autem absque ullo amplius incommodo durefcit. Alterum pellagrae symptoma nervorum imbecillitatem respiciens, utrique morbo commune. Haec autem dira omnium morborum, praecipue chronicorum comes, innumeras admittit diversitates, quas sentire quidem attentus observator, sed verbis explicare satis non valet. Pedum vacillatio gravitasque, & scorbuticis & pellagrosis, aequae molesta. Idem de doloribus varii generis, vagis, dicendum, qui praeter nervorum affectionem nihil prorsus indicant. Attamen turbae, quibus sensorium commune in utrisque aegrotis subicitur, haud eiusdem generis sunt. Rara scorbuticorum dementia, & mania, tristitia potius pusillanimis, de statu deplorando conquesta; pellagrosos contra non raro furibundos videmus, & frequentissime stupidos. Pathognomonicon vero scorbuti signum,

teste

ceste LINDIO, primario illius interprete, in
 gingivarum tumore, rubore, fungositate, stom-
 acae, dentium vacillatione, nigritie, carie,
 lapsu cernitur; quae quidem omnia in pella-
 gros observantur, haud constanter tamen, ut
 morbi characterem efficiant; quin imo compli-
 citum sic malum putarem, quod scorbutica la-
 bes non adeo infrequens his regionibus sit.
 Habitus scorbuticorum immutatus, cutis palle-
 scit, flavescit; pellagroforum color naturalis vix
 mutatus. Nihil de antiscorbuticorum remedio-
 rum in pellagra inefficacia addam, cum plures
 morbi similibus prorsus symptomatibus inceden-
 tes, in praxi medica occurrunt, qui ob varias,
 unde orti sunt, causas, variam quoque curam
 exigunt. Exitus utriusque mali fere idem, per
 diarrhoeas, hydropes, paralyses, & similes,
 plerisque malis chronicis communes, eventus.
 — Iisdem, quibus haec de scorbuti & pellagrae
 similitudine, opinio, altera quoque de *hypo-*
chondriaca affectione subiecta est, dubiis. Nul-
 lum fere morbum tam diversa prodire forma,
 tantaque arti nostrae facessere negotia, quam
 hypochondriasin & hysterismum, unanimis me-
 dicorum consensus est. Difficulter ergo verus
 ipsius character, nisi ad primum harum turba-
 rum fontem recurreris, erui potest. In utroque

quidem morbo symptomata nervosa praecipue conspicua, ad eandem mali speciem constituendam, haud sufficiunt. Cl. VIDEMAR strenuus huius sententiae defensor, ad primas vias, ad atram bilem, ad obstructions abdominales, tanquam ad hypochondriasis fontes refugit. Neque exempla sectionum fuisse, negari potest, ubi eiusmodi signa in pellagrosorum cadaveribus reperta fuerunt; sed dubium oritur, an eadem, pro effectu magis, quam pro causa morbi haberi debeant. Nam in multis intestina abdominis, ut & lienes, frequentius in illis regionibus obstructi, maximam partem sana fuerunt, a naturali constitutione haud recedentia. Accesseret quidem, quod inter rusticos harum regionum tensiones abdominales, flatulentiae, anxietates & alia hypochondriasis criteria, valde frequentia sint; nullum vero certum argumentum praebent, cur ad illam pellagra referatur. Secundum recentiorum placita hypochondriasis causa rectius cuidam nervorum, quam primarum viarum vitio, tribuenda est. Itaque, si inter utrumque morbum, hypochondriasia atque pellagram, comparisonem instituere aliquis velit, ad constantia, quae veram morbi naturam constituunt, neutiquam vero ad variabilia signa confugiat, oportet. In pellagrosi, si impetigo; tum quoad temporis, tum partium affectarum,

tum decursus tam singularis ordinem, accuratius consideratur, accidentalibus illis cutis affectionibus, quas hypochondriaci patiuntur, plane aequiparari nequit. Quamvis enim interdum contingat, ut hi morbo cuidam cutaneo subiciantur; is tamen sine ordine ullo, sine regula, subsequitur. Symptomata etiam nervosa similia offerunt discrimina; qui pellagra laborant, stupidi sunt, delirantes, non raro furiosi; qui hypochondriaci, tristes, melancholici, uni rei intenti, & non raro, si grata occurrant, ingeniosi; nunc in tristitia, nunc in gaudio modum excedentes. Quod denique ad medicamenta attinet, quae hypochondriacum infirmant, pellagrosi parum prosunt. — Tertia iam, qua pellagra statuitur, ad *elephantiasin* Græcorum pertinere, opinio restat, paucis nunc examinanda. Ipsa cutis affectio, quam antea diligentius exposui, multum in pellagra ab elephantiasi differt. In hac omne defoedatur corpus, praecipue facies, ut vultus fiat horridus, summa cutis inaequaliter crassa, dura, crebri tumores, tubercula, ulcera foetida; in pellagra facies quasi immunis a labe, solumque nasi apicem, labiaque oris parum desquamata, habes. Capilli in elephantiasi incanescunt & decidunt, in pellagra neutrum accidit. In illa malum cutis,

quando morbus increfcit, vehementer augetur, afpectu tandem horridiffimo; contra in pellagra crefcente morbo malum cutis infigniter immittitur. Si ad nervorum laefionem respicis in elephantiafi, ignominiofam, ab hominum confortio alienam triftitiam habes; in pellagra, placidam, conftantem, maxime, ubi delirii, ftupiditatisque gradus aucti fuerint. Quae denique utrique morbo figna conveniunt, videlicet digestio facilis, vox rauca, balba quafi de nare, oculorum interdum lacrymatio, ea potius ad accidentalialia pertinent, & praeter ea, alia adhuc differentiae momenta ex hominum pellagra laborantium genere, ex falacitate, urina craffa, diplopia, fudore fingulari, aequae ac ex inaequali cutis vitio, ex fymptomatum nervoforum in utroque malo discrimine, peti poffent.

— Morbus Afturiensis THIERRI, quamvis plura cum pellagra communia habeat, in multis tamen ab eadem differt, magisque ad lepram Graecorum accedere videtur. Cruftae enim illae, ut in manibus & pedibus confpicuae funt, ita nec reliquis corporis partibus, capiti, abdomini, parcunt, infigniter dolent, fumum foetorem fpargunt; vefigia ipforum in cute longe funt manifestiora, cutis glabra, fplendens, pilis privata, profunda apparet; augetur haec impe-

rigo quovis anno. Tremor capitis, thoracis continuus, vigiliae, auctus caloris & frigoris sensus, animus pusillanimis; maiori morbi gradu, sensus externi, praecipue tactus, pereunt, corpus crustis, ulceribus fastidiosis, defoedatur, vera leprae phaenomena evolvuntur. Exitus huic malo cum pellagra communis, morbi plerumque chronici accedunt, hydrops, phthises, mania.

Infirmatis ergo aliorum de pellagra sententiarum, nostra nunc erit subiicienda; ex qua satis patebit, illam, quemadmodum eius pathologia antea exposita docet, peculiarem quendam morbum constituere. Negari quidem non potest, multam pellagrae cum aliis morbis cognitis esse similitudinem; quae vero non tantum valet, ut pro iisdem prorsus haberi possint. Itaque pellagrae nomen, non temere olim conditum, iure retineamus, eique aptum inter morbos, ordine legitimo distinctos, locum assignemus. In quo quidem opere, maxime symptomata potiora, constantioraque sequamur, debilitatem nempe universi corporis, impetiginem partium soli expositarum vernalem, symptomatum nervosorum familiam, stupiditatem, deliria, insultus maniacos, reliqua. Certo autem haec inter se iuncta ordine sunt, ex quo, qua ratione alterum symptoma ex altero cognoscatur, per-

spici possit. Fuerunt, qui ob insignem nervosorum symptomatum apparatus pellagram morbum absolute nervosum appellarunt; in quorum partes, praeter supra iam laudatos, **VIDEMARIUM**, **SOLERUM**, inclinare quoque cl. **VAN DEN HEUVELL** (*) videtur. Hi enim systema primo nervosum affectum esse, deinde acrimoniam, cutim defoedantem generari, tandem morbo progrediente nervos vehementius pati, statuunt. Alii (**) vero pellagrae, quam cachexiis subii- ciunt, locum inter morbos cutaneos assignarunt; ut adeo causa eius proxima ex acrimonia constaret, quae quamdiu cutim habet perviam, sanitatem minus, ac sequenti tempore, laedit, quo poris in cute per fissuras, per duritiem ex inflammationibus repetitis contractam, occlusis, materia ad systema nervosum revertitur, ibique

(*) Tentamen nosologicum sistens morborum, a vitio vis vitalis divisionem, &c. Lugd. Batav. 1787. 8. pag. 415. seqq.

(**) Legendi hic sunt inter nostros Auctores, qui huius morbi, quantum ipsis ex aliorum scriptis innoverat, mentionem fecerunt. In primis exper. **CHR. ERH. KAPP** in suis animadversionibus ad **CULLENS** *Anfangsgr. der praktischen Arzneykunst* 2te Aufg. B. IV. Leitz. 1789. pag. 505. seqq. --- Exper. I. **CHR. GUIL JUNKERI** Conspectus rerum, quae in pathologia medicinali pertractantur, Vol. II. Hal. 1790. 8. pag. 180. seqq. --- III. **HENSLER** in l. c. pag. 385. seqq.

plura eaque funestissima excitat mala. Quae quidem omnium maxime probabilior sententia, ad morbi decursum & symptomata potiora explicanda insigniter apta est. Natura quidem & huius & illarum, quae reliquorum cutis morborum causam praebent, acrimoniarum nos laeret. De contagiosae cuiusdam materiae efficacia movere quidem, haud tamen alere volui suspicionem.

Ex quibus omnibus satis haecenus disputatis sequitur, pellagram commode per *Erysipelas periodicum, nervosum, chronicum* explicari posse. Impetiginem enim pellagrosam verum erysipelas modo simplex, modo pustulosum, modo phlyctænodes effigere, ex symptomatibus suo loco expositis, apparet. Inflammatio enim in summa cute, cum tensione, splendore, rubore, dolore, ardore observatur. Frequentes quidem erysipelatum species a causis internis deducendae sunt; neque minor tamen illorum quoque numerus, qui ab externis pendent, ut maculae rubrae post combustiones, perniones; intertrigo, aliaque. Febrem in erysipelate ut plurimum coniunctam requiri, aliquis inferre posset, cuius tamen in pellagra pauca adsunt vestigia, nisi quis pulsus illum lentum, debilem, vitiliginis comitem, pro febris nervosae levioris signo ha-

beat. Neque rara sunt Erysipelatum periodico-
rum exempla; ut quaedam mulieres, menstruis
quicquam irregularibus, eiusmodi incommodis
erysipelatosis vexantur. Aliae, iracundae in pri-
mis, post iram, simili malo in quadam corpo-
ris parte, ubi sedem suam fixisse videtur, sicut
in genis, laborant. Similia phaenomena ex
quadam idiosyncrasia, post cancerorum cibum,
vel sumtis ipsorum lapidibus, eveniunt. Nervo-
sa denique symptomata, in pellagra praecipue
timenda, per omnem erysipelatum cursum, ma-
ximam requirunt attentionem, cum post levem
aliquem errorem hoc malum facile revertatur,
pessimaeque nervosi systematis affecti signa pro-
dat. Quod quidem praecipue de capitis erysi-
pelate valebit. Quae quidem omnia similitudinis
momenta, ignoti morbi naturam, cogniti no-
mine explicare, egregie inserviunt.

PROGRAMMA,

PUERPERAE, DE INFANTICIDIO SUSPECTAE,
DEFENSIONEM EXHIBENS,

Q U O D

*Die 3.^a mensis Maii, anni 1793. in
R. C. Ticinensi Archigymnasio*

RECITAVIT

IOANNES PETRUS FRANK

*Sac. Caes. & Reg. Maiest. a Consiliis Magistratus Politici &
Oeconom. Mediolan., facultatis Medicae ac Nosocomiorum
per Insubriam Austr. Praeses. Xenodochii Papiens. ad
S. Math. Moderator, Therapiae Spec. & Clinices
in Ticin. Acad. Professor P & O. Academiar.
Reg. Scientiar. Goetting., Mantuanar.,
Elect. Mogunt., tum Societ. Patriot.
Mediol. & Medic. Helvet. Sodalis.*

Quanta sit Medicinae , ac Chirurgiae in foro versantis , & iudicis circa res naturales quaestionibus satisfaciendis nobilitas , **RECTOR MAGNIFICE , PATRES SAPIENTISSIMI , COMMILITONES ORNATISSIMI !** hoc , nisi iam ipsius , quam haec scientia pertractat , rerum auctoritas loqueretur , vel ex sola cognitionum hoc ad opus necessariorum extensione , & ex summa iudicii his in casibus ferendi difficultate , sat clare appareret . Haec scilicet medicae pars ampla scientiae , quam **TU IPSE , RECTOR MAGNIFICE ,** cum tanto nominis TUI splendore , & cum tanta studiosae inventutis utilitate profiteris , non iustitiae modo brachium in civium securitate curanda , & in violentis aggressionibus puniendis dirigit ; sed & pro conservandis non minus , quam augendis civibus leges proponit , paternas Magistratus circa publicam salutem curas consilio secundat , ac saepe primum innocentiae a

sceleratis hominibus vexatae fulcrum constituit. Cum vero ipsa Civium vita honorque non raro istius ab ore pendeant scientiae: interest certe, ne in tam arduis simul ac tam difficilis iudicii rebus animo leviori incedamus; nec inutilis, aut errorum, qui a doctis caeteroquin Viris hoc in opere nonnunquam committuntur, investigatio; aut eorum, quae hominum, delicti non perpetrati accusatorum, vitam interdum salvare queant, expositio videbitur.

Frequens in foro, de crimine, quod *infanticidii* vocant, absolvenda medicis proponitur quaestio. In delicti tam enormis causas alibi ex professo inquisivi (*); nunc unicum matris adulterinae, de propriae prolis intereptione suspectae, exemplum, atque tam docti medici Doctoris *Bierenstielii*, Urbis *Bruchsalienensis* quondam *Physici* seu medici stipendiarii, *responsum* aut *visum*, ut aiunt & *repertum*, quam proprium hac super materia ante decem hos annos exhibitum iudicium exponam. Sequentem vero de infantis, a partu puellae clandestino, reperto cadavere descriptionem Magistratui hic Medicus communicaverat.

(*) System einer Vollstaendigen Medicinischen Polizey II. B.

„ Examinato infantis vix utero exclusae
 „ cadavere , hoc ipsum , longitudine , uncias de-
 „ cem & octo superare , atque unciarum sexa-
 „ ginta duarum pondere circumscribi , nec ullo
 „ ad superficiem vel integumenta violentiae aut
 „ laesionis vestigio signari conspexi . Labia ge-
 „ nitalium minora , ac anum quodammodo tu-
 „ mere , & ex hoc ultimo , quem circulus li-
 „ vidus circumdat , proprium proli maturae
 „ meconium vel sponte effluere observo . Color
 „ corporis universi , nec plantis pedum , nec
 „ volis manuum exceptis , est albus . Ungues
 „ digitorum singulorum debita constructi sunt
 „ firmitate . Modo crura , & externa humero-
 „ rum superficies lanugine obteguntur : quae ,
 „ absterfo cum aqua tepida tenaci muco , in
 „ meliorem aspectum surgebat . Capilli obscuri
 „ coloris , propriam aetati foetus maturi longi-
 „ tudinem , ac densitatem ostendunt . Supercilia
 „ ciliaque non desunt . *Wachendorffii* membra-
 „ na , quae immaturae prolis pupillam obducit ,
 „ nullum sui vestigium relinquit . Partes au-
 „ rium externarum , quas cartilaginosas esse
 „ oportet , firmitatem consuetam ostendunt .
 „ Tam oris , quam narium , partiumque alia-
 „ rum habitus , de perfecta huius foetus matu-
 „ ritate testantur . Funiculi umbilicalis cum ab-

„ domine cohaerentis portio integra & sana,
 „ ad uncias decem & quatuor extensa, ad lo-
 „ cum factae separationis lacerationem, contu-
 „ sionem, ac suggillationem manifestat. Ut
 „ huius livoris naturam pernoscerem, cellula-
 „ rem funiculi telam exploravi; sed nil san-
 „ guinis in eandem effusi inveniens; colorem
 „ lividum a cruore coagulato in ipsis funiculi
 „ vasis stagnante pendere intellexi “.

„ Sub diligenti capitis ad externam super-
 „ ficiem examine, hanc undique tumere, atque
 „ tensa esse cranii integumenta observo. Adno-
 „ tati meretur, integram foetus faciem, prae-
 „ cipue frontem, aures, iugulum, usque ad tho-
 „ racis ipsius principium, plus minus a colore
 „ livescente, ac subrubro obduci. Ossa cranii
 „ figuram, positionem, magnitudinem natura-
 „ lem ostendunt. Nulla in ossibus parietalibus,
 „ nulla ad fontanellam, ut vocant, postero-
 „ rem, seu occipitis, laesio; tum ad integu-
 „ menta, tum in ossibus comparet “.

„ Nunc thoracis cavum attentius aperio:
 „ atque sub cartilaginum costarum sectione pul-
 „ mones quidem his ipsis contiguos, sed hinc
 „ inde, praecipue versus dorsum, distantes re-
 „ perio. Pulmonum color cinnabari aequalis,
 „ intermediis hinc illinc punctis subcoeruleis.

„ Thymus ad cordis usque basin extenditur;
 „ ac duarum cum dimidia unciarum spatium
 „ occupare videtur. Cor ipsum positionem na-
 „ turalem in pericardio, aquae debita quanti-
 „ tate repleto, manifestat. Superficies huius
 „ visceris nil morborum ostendit; venae corona-
 „ riae a sanguine copioso distenduntur. Venae
 „ cavae, quo loco confluunt, & ad dextrum
 „ cordis atrium, ad pollicis latitudinem a
 „ cruore extensae sunt; & a tanta dilatatione
 „ ipsius forma auriculae deletur. Sinistrum quo-
 „ que cordis atrium ad nucis iuglandis magni-
 „ tudinem distracta est. Cruor in sinistro cor-
 „ dis ventriculo nullus; in dextro vero mul-
 „ tus, atque congruatus haeret. Foramen
 „ ovale iam tenuissima membrana obiectum
 „ est; canalis vero arteriosus apertus detegitur.
 „ Sinus pulmonalis a sanguine copioso praeter
 „ modum ac undique turgens; bronchiorum vero
 „ constitutio a naturali non abludivit.

„ Ne vero cruor in vasis cranii contentus
 „ per immaturam pulmonis incisionem reflue-
 „ ret, atque illorum sic habitus & positio mu-
 „ tarentur: intactis thoracis visceribus, mox
 „ ad capitis sectionem perveni. Separatis cra-
 „ nii tegumentis, nec ad ista, nec ad ipsa
 „ calvariae ossa, violentiae praegressae compa-

„ rent vestigia. Interim ad angulum ossis breg-
 „ matis dextri posteriorem ac superiorem, plura
 „ suggillationem ac validam contusionem te-
 „ stantur loca: quorum prima & maiora duo,
 „ linearum quatuor, altera trium, quinque vero
 „ alia, unius vel duarum linearum diametrum
 „ agnoscunt; quin ulla suggillationis nota in
 „ capillata capitis parte exterius compareat “.

„ Instituta cranii a fontanella anteriori se-
 „ ctione, mox sinus falciformis a sanguine flui-
 „ do repletus conspicitur. Detracta calvaria,
 „ vasa singula, quae per cerebri anfractus &
 „ corticalem substantiam decurrunt, a sangui-
 „ ne cinnabaris colorem referente copiose re-
 „ pleta, quasi cerebri substantiam obvelare cer-
 „ nuntur: qua substantia, vel dissecta, vel le-
 „ viter compressa, liquor subflavus ex eadem
 „ effluxit. In apertis cerebri ventriculis latera-
 „ libus, parva subcruenti & aquosi liquoris
 „ portio, — in tertio vero ventriculo, san-
 „ guinis coagulati grunulus ad pisi magnitudi-
 „ nem detecta sunt. Eadem vasorum cerebelli,
 „ quam de cerebro iam diximus, constitutio
 „ observatur. Aperto oris cavo, violentiae huic
 „ viae illatae signum non comparet. Venae
 „ iugulares a sanguine valdopere distentaе sunt.
 „ Pulmones una cum corde e thorace exempti,

„ ac vasi aqua tepida repleto immissi, superfi-
 „ ciem istius petebant, ac nequidem a cordis,
 „ fundum versus descendentis, pondere demersi,
 „ cor ipsum potius a profundiori descensu arce-
 „ bant “.

„ Aperto in longum oesophago, quo loco
 „ hic canalis per diaphragma in abdomen de-
 „ scendit, corpus osseum & quasi lapideum
 „ in eodem repertum atque in *actis* deposti-
 „ tum fuit “.

„ In abdominis cavo, mox hepar, ut hac
 „ in aetate solet, magnum visui se obtulit,
 „ nec a forma naturali comparuit diversum.
 „ Pauca bilis, quae mellis despumati consisten-
 „ tiam referebat, in vesicula reperta est. In-
 „ testina tenuia a sanis non aberrabant; colon
 „ intestinum a contento meconio profunde gri-
 „ seum colorem usque ad recti intestini confi-
 „ nia servabat. Apertis ventriculo ac intesti-
 „ nis, in illo, humor coloris cinerei, syrupi
 „ consistentiam exhibens reperiiebatur: in quo
 „ plures, corpori in oesophago reperto, quoad
 „ colorem, similes, sed solutae mollesque par-
 „ ticulae continebantur. Superficies ventriculi
 „ ac intestinorum interna perfecte sana erat; in
 „ tenuibus intestinis humor flavus, gelatinosus,
 „ in crassis vero descripta iam materies haere-

„ bant. Vesica urinalis, renes, naturaliter se
 „ habebant; omentum tenuissimum umbilico
 „ profundius non descendebat “.

„ Examinata quoque fuit placenta, atque
 „ in statu suo naturali & cum vasis sanguine
 „ adhuc satis turgidis reperta est. Altera huic
 „ adhaerebat funiculi umbilicalis portio ad qua-
 „ tuor circiter uncias extensa, ad finem suum
 „ contusa & fibrosa “.

„ Nec minus lintea sub partu ac post
 „ istum puerperae supposita examini submissa
 „ fuerunt: nec maiorem sanguinis quantitatem,
 „ quam quae sub partu naturali ac felici amit-
 „ titur, continere sunt visa “.

„ Cum igitur ex historia sectionis compa-
 „ reat, prolem, de qua agitur, partu praema-
 „ turo non fuisse exclusam; — cum partus ab-
 „ soluti periodus cum tempore, quo rem cum
 „ viro se habuisse fatetur puerpera, conspiret;
 „ — cum foetus caput tumere, atque per iu-
 „ gulum, usque ad thoracis initium, livescere
 „ observetur; — cum vasa cerebri cruore tur-
 „ geant ac ipsa substantia medullaris vel levi-
 „ ter compressa, sanguinolentum humorem tran-
 „ sudet; — cum & sinus falciformis, & venae
 „ iugulares, & venae cavae, & cordis atria,
 „ ac demum sinus pulmonalis a cruore distenta

„ sint ; — cum a pulmonibus cavitas pectoris
 „ repleatur , atque illud ipsum viscus & san-
 „ guine abundet , & de suscepto iam aere te-
 „ stetur ; — cum foramen rotundum , quod in
 „ foetu uterino sanguinis circulationem coadiu-
 „ vat , a tenui iam membrana obveletur ; —
 „ cum pulmones aquae immissi , ad istius su-
 „ perficiem mox affurgere , natare , atque non
 „ modo a cordis pondere ad profunda non de-
 „ trahi , sed cor ipsum , ne ad fundum penitus
 „ descendat , impedire observentur ; — cum
 „ tam meconium sua sponte per anum fluat ,
 „ quam vesica lotio destituta sit , quin haec
 „ ipsa excretio a viscerum abdominalium vitio
 „ proveniat , atque sic potius a pectoris dilata-
 „ tione & facta per diaphragmatis descensum
 „ compressione , intestinorum ac vesicae evacua-
 „ tio explicanda sit ; — cum haec ipsa com-
 „ pressio non aliter , quam ab aeris in pulmo-
 „ nem tracti atque thoracem ad inferiora dila-
 „ tantis , effectū contingere queat “ ;

„ Hinc sequitur , *foetum* , de quo agitur
 „ (quamvis a matre celeriter ac unico ad par-
 „ tum nixu exclusus , ac pedibus primum ex
 „ utero prodiisse dicatur) *post partum adhuc*
 „ *vixisse* . Qua interim ratione vitam hic foe-
 „ tus amiserit ; hoc aliter quidem cum funda-

„ mento determinari non potest; quamvis *materna* quasi certitudine, infantem ex suffocatione periisse, afferendum sit “.

Haec igitur Medici publici, de casu vix exposito, opinio, cum de poena capitis, *infanticidii* delicto in *Spirensi* Provincia imposita, tractaretur, insimul cum *Actis* seu libro inquisitionis, vel *protocollo*, ut vocant, iussu Principis, ut & meum de re tam gravi iudicium exponerem, mihi communicata est. Quod tunc a me *responsum* super his datum est, in sequentibus consistit.

„ Quae iussu Celsissimi Principis ab Inclyto Eiusdem Regimine die 27. Iunii anni 1783. mihi transmissae sunt causae iudiciales puncto *infanticidii* contra *Apolloniam Selzer Wiesenthalensem* directae, eas attento animo perlegi, atque meum super istis iudicium pro officii ratione fideliter communico. Quae vero potissimum a me dilucidari iubentur, sunt ea, quae sub ipso partus opere, & quae ab eodem vix absoluto contigerunt: ut quorum natura ex interrogationibus atque responsis accusatae *Apolloniae* pag. 114. 121. 122. 179. eruenda est. Altera, quae mihi proponitur, quaestio est: „ an scilicet possibile esse dici queat, hanc ipsam puellam, sub indicata rerum conditione,

atque sub foetus positione perversa, vel solam atque sine ullo hominis alterius auxilio, tam brevi, quam ipsa quidem asserit, temporis spatio, partum absolvisse? Tertia demum difficultas versatur circa corpus peregrinum, osseum, vel lapideum, in oesophago repertum, atque circa alia quaedam obiecta; in quorum naturam, ut maiori cum fundamento descendam, opus est, ut praecipua, & quae ad formandum hac super re iudicium potissime contribuunt, momenta ex ipsa accusatae puerperae historia depromam “.

„ Haec scilicet puella, annorum 27. die undecima Maii currentis anni, hora septima vespertina, primum, ut supponere fas est (*Act. pag. 68.*) partum, *sola*, vel sine alterius auxilio, ianuis clausis, absolvit, ac maturam filiam, sed vita, & mater quidem asserit, destitutam, enititur. Contendit vero haec puerpera (nec assertioni *in Actis* quidquam reluctatur) se toto graviditatis tempore nec minimum salutis incommodum persensisse; cibos quoscumque ut pridem appetiisse; consuetos labores constanter absolvisse; nec aliud conceptionis indicium, nisi menstruorum cessationem, quam potius ex choreis, ut morbosam, derivasset, habuisse. Nec enim ubera magis quam pridem, nec abdomen,

si laterales modo regiones excipiat, sibi tu-
 mere observavit. Motus, in abdomine *debilio-
 res*, — & dolores, quasi colicos, hinc inde re-
 currentes, ex flatibus derivavit: donec mensis
 unius circiter ante partum tempore, prolis in
 utero latentis agitationes evidentius perceperit.
 Interim licet tunc quidem de graviditate non
 amplius dubitasset; ob exiguam tamen abdomi-
 nis intumescentiam, non a prima fluxus men-
 strui cessatione, sed a posteriori cum viro com-
 mercio conceptionis initium deduxit (p. 83.
 86. 90. 91. 103.). Tribus vero aut quatuor
 ante partum diebus, se ex scala in humum esse
 delapsam asserit: quem post casum & sangui-
 nem ex vagina paucum amisit, & per horae
 quadrantem dolores in abdomine persensit. Hoc
 a tempore nec motum prolis, nec tormina,
 donec partus labores accederent, haec ultima,
 experta est. Hora scilicet sexta circiter cum
 dimidia vespertina a tam acerbis ad lumbos do-
 loribus se affectam fuisse monet: ut se, morti
 quasi proximam, transversim super lectulum con-
 iecerit. Cessarunt mox dolores: surrexit mise-
 ra; sed redierunt mox, iterumque redierunt
 tormenta: ut tandem se vestibus spoliaverit;
 hoc ipso vero tempore prae doloribus in ter-
 ram super genua, proprio praecinctorio suffulta,

prostrata fuerit. Hac in corporis positione, & genibus quasi insidens, lecti fulcrum ambabus manibus arripuit, & ad nixus edendos coacta, huic urgenti necessitati satisfecit. Mox aquarum copia sat magna, *praeter omnem opinionem propriam*, ex genitalibus prorupisse, novumque nixum supervenisse asserit: sub quo, ut credebat, ambo prolis pedes (p. 132.) simul ex vagina prodierint, & dimidia pars corporis infantilis, ut cuius dorsum superiora versus, pedum vero digiti versus humum directi sibi videbantur, comparuerint “.

„ Hoc ipso vero partus instantis momento, heri, ianuam pulsantis, vocem primum percepit (p. 114.); sed illam aperire, quod proles nunc ad caput usque inflaret, non potuit. Pendentem vero ex genitalibus prolem, ne in terram forte rueret, nunc manibus amplexa est: donec post *duos, tresve nixus* (p. 132.) foetus ipse, & mox ab isto, placenta, excluderetur: absoluto sic, in horae circiter dimidio, partus opere. At vitam filiola non manifestavit; sed caput retro inter humeros, nisi manibus suffultum, pependit. Magnus a morte prolis terror puerperam invasit; atque cum aquam in eiusdem ore haerere crediderit: aerem semel, neque cum impetu, inflavit. Cum hoc

a tentamine vitam redire non vidisset: prolis cadaver praecinctorio involutum, ad extremitatem lectuli inferiorem deposuit. Vix octava pars horae hoc ad opus suffecit: quo scilicet absoluto, ianuam, repagulo clausam, domino proprio, in minas prorumpenti, aperuit (pag. 121.). Nunquam se credidisse, partum adeo celeriter absolvi, testatur; atque ex quavis dolorum dissipatione, instantis necdum partus, spes nova affulsit (p. 122.). Haec erronea persuasio, & terror, quo, dum primum, mediis sub doloribus constituta, ab heri filia se compellari percepisset, perculsa fuit, ne alterius implorare potuerit auxilium fecerunt (pag. 121.); ac similis animi, a terrore mox a partu tam insigniter agitati, constitutio, ne domino suo, ac viro alteri, qui simul adstabat, quo misera in statu haereret, fateretur, impedivit “.

„ Post praemissam huius partus historiam, quaestionibus tandem ab Inclyto Regimine mihi propositis, argumentis ex ipso rerum decursu petitis innixus, nunc satisfaciam. Ac primo quidem, certissimum esse dicam, a sola fluxus menstrui cessatione, nisi alia simul conceptionis indicia succedant, mulieri, quae frequentius cum viro decumbit, sat firmum pro determi-
nando

nando partus futuri tempore, non offerri argumentum “.

„ Nec minus certum esse constat, a *primiparis*, per longum saepe tempus, prolis in utero motum non sat clare ab aliis in abdomine turbis & a flatibus posse distingui: donec fortior foetus vegetioris, sub ultimis graviditatis mensibus, agitatio, circa praegnationem dubia quidem dissipet; nec tamen ultimam istius periodum tam certe annunciet; quin plures & expertae iam matres maturam prolem vel quinque vel sex adeo septimanis, priusquam id futurum esse putassent, utero excluserint. Hinc fides accusatae puellae, se citius, quam credidisset, ad parturiendum accessisse, ac partum sibi acceleratum fuisse asserenti, negari protinus non potest; licet mei esse non contendam, huic argumento plus auctoritatis, quam ipsae leges eidem concedendum esse arbitrentur, tribuere “.

„ Nemo prudens, parturientem foeminam posse in proprias actiones, ac in ea, quae circa se ipsam contingant, tam attentam esse affirmaverit: ut rerum levioris momenti, aut temporis, quo partus absolutus sit, aut modi, quo sibi singula successerint, rationem sat exactam reddere valeat. Si quis oculo attento matris ex legitimis nuptiis prolem enitentis anxietate

tes, iactationem, desperationem, atque extremam, ob auctas dolorum ferocias, sensorii communis tensionem aspexerit; is iudicet velim, quid puellae, ab omnibus derelictae ac in angulo obscuro parturientis animo facultatis superare queat, ut singula, quae proprio quondam iudici ad veritatis cognitionem conferrent, sat attente observet; aut eorum, quae in propriam *defensionem* afferre posset, recorderetur. Sat longo a partu tempore terribilis illa animi commotio, perturbatio extenditur, & accusatae assertionem puerperae: „*se non mox potuisse*“, „*sui fieri compotem*“, valde reddit probabilem; quamvis, ob hoc quidem, primum puellae errorem (ut qui nonnisi de physica parturientis constitutione, circa quam scilicet medici interrogantur, loqui contendo) defendere hic nolim “.

„Caeterum nulla fere animalis, in sanis alias hominibus, tam diversa, quam partus, est functio. Haec diversitas, quae apud sanas eiusdemque aetatis matres, a feliciori pelvis ac genitalium cum diametro capitis infantilis proportionem, & a foetus ipsius positione plus minusve naturali dependet, ad totas adeo provincias extenditur: cum partus opus in illis vix non ab omnibus facillime, — in his, apud

plurimas mulieres, difficulter absolvatur; quemadmodum in una eademque civitate, sub certo parturientium numero, non paucae existunt, quibus vix labor est, parere; & quae paucis interdum nixibus foetum ex ampla pelvi vix tam *expellunt*, quam *amittunt*. Saepius hinc, vel apud legitimas uxores, foetus, ante obstertricis, licet promptissime accersitae, adventum excluditur; & quae partum fere ignorat, iam mater est. Quaevis igitur puerpera in temporis, quod ad partum requiritur, aestimatione, facillime a vero aberrat; ac proles, vel ab unico dolore ac nixu ad partum fortiore, interdum adeo praecipitatur: ut ruptis, quae illam circumdant, velamentis, puer illico, & quasi super undis nascatur. Foeminarum mihi exempla occurrerunt, quibus foetus, vix ab aquis emissis, ex utero cum impetu in terram delapsus est; — alias, quibus, ob nexum prolis cum utero necdum solutum, hoc viscus per vaginam protractum fuit; — infantes, quibus, hoc praecipitoso in orbem saltu, funiculus ad umbilicum disruptus est “.

„ Non quidem apud multas tam facilis puerperii est conditio; atque maiora plerumque apud *primiparas* partui ponuntur obstacula; non interim tam rara est a lege communi exceptio;

ac *primiparas* adeo, inprimis robustas, atque aetate necdum provectas, sub feliciori pelvis fabrica, ac foetus corpulentia moderata, hunc ipsum brevissimo hinc inde temporis spatio eniti observamus. Si, ut corporis totius longitudinem ac pondus, ita & *capitis* infantilis *diametrum* indicasset sectionis historia: potuisset tunc fortitan celerioris ac facilis per genitalia transitus ratio quodammodo intelligi; vix interim hanc notionem cum tot exempla de partus brevi tempore absolvendi possibilitate quotidie testentur, necessariam esse contendam “.

„ Praetendere quis posset, hanc pariendi facilitatem, ad illos modo foetus, qui capite praevio in pelvem descendunt, extendi; sed obstertrantium plurimorum hic experientiam sibi contrariam haberet; atque, ut unus ex primis huius artis Magistris, BAUDELOCQUIUS, confirmat, „ partus *agrippinus* non semper & „ ubique artis sibi auxilium necessario requirit, „ atque hinc ad *partus naturales* sine iniuria „ referri omnino potest “.

„ Hoc equidem de illis modo casibus plerumque dicendum esse fateor: in quibus nascentis cum pedibus praeviis pueri facies versus os sacrum, — pedum vero digiti versus humum diriguntur; vel ubi facies, aut pedes modo la-

teraliter inflexi, per vaginam incedunt: cum in contraria foetus positione plerumque mentum istius ad os pubis maternum haerere, ac partum obstetricantis subsidio indigentem, vel saltem diuturnum ac difficilem inducere videamus “.

„ Praeter vero illud, quod mulier sub ipso partu constituta, plerumque rerum ac temporis infida sit observatrix; & quod in proprii corporis tam insolita positione, sub tanta dolorum atrociam, impossibile sit de vera foetus per genitalia propendentis directione cum aliqua certitudine ab eadem referri; — praeterquod iam exclusi ad collum usque infantis truncus hac in directione a matre pendere queat; cum interea caput pueri eiusdem contrariam positionem agnoscat; non perpetuam quis legem esse dicat, qua partum *agrippinum*, facie ad pubem matris conversa, vel quovis in casu, obstaculum non posse evitare contendat: cum & sub ista rerum conditione, imprimis sub ampliori pelvis maternae, ac mediocri capitis infantilis diametro, non raro foetum sine difficultate excludi videamus “.

„ Positio puerperae in gubus, dum interim fulcro, utraque manu arrepto, abdominalium musculorum actionem intendit, in variis regionibus illa est, quam sibi matres vul-

gares prae aliis ad partum eligant, & quae certe huic operi, nec illo in casu, de quo sermo nunc est, obstaculum opponit “.

„ Quodsi interim partus *agrippinus*, prae illo, quo capite praevio incedit foetus, difficultatem non ubique maiorem agnoscat: pro ipsa nihilominus prole, ob funiculi umbilicalis, capitique compressionem, pericula augentur. Haec quidem a maiori, aut minori, a longiori aut breviori capitis, maternae pelvis angustias trans-euntis, compressione oriuntur; interim foetus non pauci, qui primum pedibus prodierunt, licet modo parvam his in locis remoram subiissent, vel ipso humanitatis in portu naufragium fecerunt. Ob hanc certe rationem, tam proficuum parturientibus, quibus iniqua prolis in utero positio interitum minatur, *versionis negotium*, promptiori licet manu susceptum, tot infantibus funestum est; ac diuturna saepe capitis in pelvi materna retentio, angustatio, non tanta, quam brevis ac subitanea cerebri infantilis compressio, pericula agnoscit “.

„ Non repugnat itaque, matrem, in ea corporis proprii, — atque cum illa foetus positione, quae in accusata puerpera locum habuit, solam, atque sine alterius auxilio, licet hoc beneficium, si modo hoc nomen mereatur, non

multis adeo concessum sit , partum celeriter absolvere “ .

„ Nunc ad alteram quaestionem, num scilicet ex historia sectionis non minus, quam ex caeteris concludi queat , prolem *Apolloniae*, cum nasceretur , vixisse , respondebo “ .

„ Mox autem fatebor, quod susceptum a *Phyfico pulmonis experimentum* (licet non eo, quem omnes nunc *iurisprudentiae medicae* Magistri commendant, modo, id est, cum *separatis dissecti pulmonis portionibus*, simul institutum esse videatur); cum hoc viscus nulla adhuc putredine correptum fuerit, extra dubium omnino ponat, *pulmones infantis, de quo agitur, aerem suscepisse* “ .

„ At vero, quod iam ipsa sectionis die, vel *duodecima Maii*, — hinc tempore *specialem inquisitionem*, ut vocant, praecedente, a *Phyfico* affirmatum fuerit *infantem etiam post partum vixisse*; huius certe decisionis fundamentum, tunc temporis, ex primo saltem ac generali accusatae puellae examine, peti haud potuit. Ex pulmonis scilicet non putrescentis narratione, aliud deduci argumentum non debuisset; quam *aerem*, cuius ope pulmonum superficies dilatata, & columna aquae supposita levior sit reddita, *hec in viscere contineri*. Quomodo

vero hic aer pulmones intraverit, hoc quidem tunc temporis, in quantum ex *actis* ac *viso* & *reperito*, ut vocant, usque ad diem Maii duodecimam exstinctis apparet, *incertum erat*. Hinc PLOUCQUETUS inquit: „Saepe ex „pulmonis in aqua natantis experimento, plu- „ra, quam recte possent, deducere contende- „runt, qui ex eodem, non modo ad *aeris in* „*pulmonibus praesentiam*, sed simul ad *vitam* „foetus ex utero exclusi argumentum fuisse- „runt (*)“. MORGAGNUS eodem modo docuerat: „quin etiam, dicens, ut in omne „scelus prona quorundam hominum sunt inge- „nia, posset inimico in mulierem animo quis- „piam, aut quaequam, in cuius manus infans, „mortuus editus, pervenisset, clam omnibus „id fecisse, ut immerentem calunniaretur, „quasi spirantem occidisset (**); quod certe momentum eiusmodi *cadavera* melius, quam fieri consuevit, *custodienda*, atque a Physicis in singula, quae cum illis aut fieri potuissent, aut facta sint, inquirendum esse, ostendit“.

(*) Abhandlung über die gewaltsamen Todesarten, als ein Beitrag zur medicinischen Rechtsgelehrtheit §. 144.

(**) De Sed. & caus. morb. Lib. II. Epist. XIX. art. 47.

„ Nec magis Physici nostratis opinioni, qua, ex spontaneo meconii per alvum secessu, & ex inanitate vesicae concludit, harum partium evacuationem non aliter, ac per thoracis dilatationem, & sequentem ex ista diaphragmatis descensum ac pressionem explicandam esse (p. 30.), accedo. In illa nempe partus specie, in qua puer cum natibus pelvim intrat, & ex qua, saepe illa cum pedibus, descendit, communissima, notissimaque simul res est, ex *mechanica* abdominis infantilis praevii sub partu compressione haec viscera evacuari, quin ideo ad respirationis, vel ad diaphragmatis in *vivo* infante actionem recurrenti sit necessitas “.

„ Tumor capitis infantilis externus, livor eiusdem atque iuguli ad thoracis usque initium, vasa pulmonum a sanguine multum extensa, — potuerunt utique docere, *infantem adhuc sub partu vixisse* (*); & cum ex *speciali* accusatae puerperae *examine* compareat, assertionem *Apolloniae*, „ se proli propriae, pro mortua iam „ habitae, aerem inflavisse “, huic soli fundamento, „ quod semel aerem infantis faciei „ aspiraverit (p. 107. 128. 129.), — quod

(*) PLOUCQUET, l. c. p. 158.

„ spiritum proprium foetus ori ac vultui , a
 „ pollicis unius fere cum dimidio distantia ,
 „ adflaverit (p. 138.) “ , inniti ; — cum a
 dibiliori hac & a longinquo suscepta aspiratio-
 ne , nec aer facile ad pulmones urgeri , nec hi
 ipsi adeo , ut aqua leviores redderentur , exten-
 di potuissent (*) ; apparet , inquam , ex istis ,
infantem , de quo sermo est (licet istorum no-
 titia ex *speciali* modo *Apolloniae* examine po-
 tuerit hauriri , ac melius forsitan eruta fuisset ,
 si , ob rudiorum gentis rusticae mentem , &
 explicationis clarioris difficultatem , huic ipsi
 puerperae infantem porrexissent , & quomodo
 huic aerem inflaverit , experimento comprobaf-
 sent) tractu saltem unico , quod *vitam* consti-
 tuit , *respirasse* “ .

„ Sed quo demum temporis momento pri-
 mam respirationem duxit proles ? . . . an cum
 ipsis adhucdum inhaereret genitalibus ? an vero
 post corpusculi ex utero exclusionem ? . . . hoc
 quidem difficulter eruitur ; at , si primum est

(*) „ Aerem in cuiuscunque foetus pulmones , pau-
 „ cissimum , & leni , ac debili omnino conatu a
 „ nobis immissum , imparem esse , tot vesiculis ex-
 „ pandendis , quot omnino debeat , ut pulmones
 „ in aqua natent , experimento saepe comperi “ .
 MORGAGNUS l. c. art. 46.

possibile : tunc ultimum huic ipsi possibilitati, ne in propositi argumenti solutione incerti quid maneret, ut *factum* opponi debuisset “.

„ Non posse foetum velamentis adhucdum inclusum respirare; hoc facile omnes concedent; sed „ non penitus repugnare, posse eiusmodi „ foetum aliquo ab obstaculo, ut a latis humeris retentum, ore suo deorsum in ostium „ verso, & respirare, & vagire “, docet ipse HALLERUS (*). Ad primam foetus maturi respirationem nil praeter atmosphaerae, suo pondere, vel per minima interstitia se facile insinuantis, accessum, ac thoracis cum abdomine, ad suscipiendum in pulmones aerem, dilatandi occasionem, requiritur. Quin HALLE-RIANAE doctrinae partes hic sumam, eoquod, ut & CAMPERUS iam monuit (**), in ipso uteri cavo, pro pectoris dilatatione, vix tantum, ac requiritur, spatii concedi videatur; certus sum, infantem ad iugulum usque exclusum, & cuius modo caput in cavo pelvis retinetur, ita ut, brachiis manibusque utroque ex latere appositis, vagina & ab ore & a naribus

(*) Element. physiol. T. VIII. p. 401.

(**) Abhandlung von den Kennzeichen des Lebens und des Todes bei neugebohrnen Kindern; p. 57. 58.

fatis removeatur, aerique sub thorace ac inter brachia per triangulare quasi cavum ascendendi locus concedatur, nil, quin semel iterumque respiret, impedire. Hinc & HALLERUS inquit: „ si aeri modo accessus datus fuerit, & „ praeterea caput eo modo conversum, ut *aerem* de vagina habere potuerit, potest demum „ dari, foetum & respirare posse & vagire (*), „ & MORGAGNUS, „ cum ergo pulmonem „ haud bene constitutum, sed putredine infectum deprehenderimus, inquit, non propterea foetum esse vivum editum, pronunciabimus. Multoque etiam minus, quodocunque „ probabilis suspicio erit, inter ipsos difficilioris partus conatus, ruptis iam membranis, „ potuisse aerem ducere, priusquam in ea mora postea mortuus, ederetur (**). Quam facile igitur erit foetum respirare, ubi & pectus & abdomen, ex vagina iam pendula, a quavis compressione sunt libera; ubi diaphragma descendere, atque costas attolli, thoracem dilatari nil impedit “?

„ Supponamus vero sic nascentem infantem, postquam spiritum bis terve iam duxerit

(*) L. c. Lib. XXIX. Sect. IV. §. 56.

(**) L. c. art. 47.

(ad quod certe opus nonnisi temporis momentum requiritur) vel ob unam ex causis enunciatis , vel , ut monuit BRINKMANNUS , atque ut nostro in casu non difficulter contingere potuit , sub partu ab aquis ex utero fluentibus in ipsa vagina suffocatum esse : tunc certe , sub experimento cum pulmonibus instituto , singula praegressae respirationis signa comparerent , ac nihilominus , qui puerum *post partum vixisse* assereret , is a vero valdopere aberraret “ .

„ Ex his igitur sine dubio elucet ; quod in casu ab *Inclyto Regimine* ad examinandum mihi oblato , nullum ex parte medica tam certum vitae foetus *post partum* continuatae indicium habeatur , ut prolem *Apolloniae* non in ipsis huius puerperae genitalibus , hinc priusquam *nata* esset , — sed a matre disiunctam , atque separata existentia fruentem , respirasse , asserere quis posset “ .

„ Caeterum desiderandum mihi non sine magnis rationibus videtur , *Physicum* sub cada-veris sectione & in hoc fuisse attentum : an scilicet violentiae alicuius ad *vertebras colli* infantilis signa , & quatenam ex istis , subessent . Livido illa , circa iugulum adnotata , cum potius umbilicali funiculi , collo foetus circumvoluti , atque sub violento istius ex pelvi exitu dilacerati effectus esse potuerit , violentiam non

probat. Nec in *Actis*, vel in *Apolloniae* responsis, huius lacerationis, quam forsitan dare non potuit, explicationem invenio; nec *Physici* difficultatem hanc solvit depositio. Cum vero ab illo, de instituto cum pulmonibus experimento fit mentio; huic ipsi in eo aliquid deesse videtur: quod nec de *vasis* hunc ad finem adhibiti *profunditate*, nec de *aquae*, cui pulmo cum corde immissus est, *quantitate* loquatur. Nec minus in *viso* ac *repto*, an, cum thorax aperiebatur, pulmones infantis *corculum* vel *nudum*, vel *obtectum* ostenderint, iudicandum fuisset. In foetu scilicet respirationem nondum experto, pulmones non super ipso corde extenduntur monente HALLERO (*); cui signo maiorem adhuc PLOUCQUETUS auctoritatem concedit (**). Quod si a pulmonum super aqua, nonnisi posteriori argumento comprobato, natione, quodammodo superflua videbatur reddi huius rei indicatio: non igitur eiusdem vilipendenda fuisset investigatio; semperque verum erit, in tanti ponderis inquisitione nec minimum, quod ad maiorem rerum dilucidationem faciat, argumentum sine dispendio veritatis retineri “.

(*) Oper. min. Tom. 1. p. 325.

(**) L. c. §. 149. p. 153.

„ Corpus illud peregrinum, in oesophago repertum, quod substantiam obtulit spongiosam, obscuram, ex terreis ac tendinosis quasi particulis conflata, quatuor fere lineis longam, latamque, ac lineis fere quinque profundam, id *Physiologi* magis attentionem sibi mereri, quam infantis mortem, tam brevi tempore insecutam explicare videtur “.

„ Atque haec sunt, quae ad quaestiones ab Inclyto Regimine mihi in *Apolloniae*, infanticidii suspicione detentae causa propositas respondenda esse duxi, ac manu propria corroborata, prout iubent officium ac intima persuasio, communico “.

„ Dabam *Bruchsaliae* die secunda mensis Iulii 1783. “.

His igitur argumentis pro rei dignitate ab Inclyto Regimine ponderatis, quae infelici puerperae, sub alio aspectu, imminebat, poena capitis, in aliam, eamque mitiorem conversa fuit; atque hoc ipsum magis est, PATRES SAPIENTISSIMI, AUDITORES SPECTATISSIMI, quam simplex, ut in foro loquentem docet, ac ornamenti egena dictio, quod *Vestra* non prorsus indignum attentione putavi.

Nunc VOS, qui haec dicendi occasionem dedistis, alloquor, egregii Candidati! &c.

PETRI IOSEPHI SCHWENDIMANN

SOLODARENI

DISSERTATIO

HELMINTHOCHORTI

HISTORIAM, NATURAM

ATQUE

VIRE'S EXPENDENS.

Argentorati 1780.



INTROITUS.

NOli, Benevole Lector, credere, id me animo agitare, ut lepida Tibi atque dulci oratione novum quoddam remedium obtrudam, fallaci anthelmintici specifici titulo; eo enim se iam extulit immensus remediorum numerus, ut quo ordine maxime ea proponi debeant iuvenibus, ne memoriae eorum obruantur, disputent, Mappasque Geographicas lepide pictas, addiderint ordini alphabetico, secundum quem medicamenta iuxta regna vel iuxta morbos proponere

nere soliti erant & ut omnis Medicorum turba, duce magno BOERHAAVE, de farragine im-
 mensa pharmacorum conqueratur. Quod, cum
 nullibi in suppellectili medica magis sit verum,
 quam circa Vermifuga, potius animo trivi, ut
 novi cuiusdam anthelmintici descriptionem, hi-
 storiam, determinationem, analysin, & vires
 novis aliquot observationibus suffultas, Orbi
 Medico communicarem, tribueremque Spectabili
 Facultati solvenda. Da quaeso, veniam adole-
 scentulo in arte dicendi minus exercitato, qui
 prima nunc vice in hanc palaestram perducitur,
 & sustine animum trementis, cui si desunt vi-
 res, tamen laudanda voluntas est.

§. I.

N o m e n .

Verum & genuinum huius remedii nomen
Helminthochorton est, a graeco ἑλμινς, *vermis*
 seu *lumbricus*, & χόρτος, *herba* seu *foenum*, ut vi
 vocis *helminthochorton* sit *herba contra vermes*
 adhibenda, suppressa dein, ut id Gallis solet,
 littera H, *Elminthochorton* dixere; quod tan-
Delect. Opusc. Vol. XII. P.

dem barbara contorsione abiit in *Lemithochorton*; nec id mirum hodiernis temporibus, ubi vere, quae *graeca sunt, non intelliguntur*, vel a Viris in artibus ceterum expertissimis; esse vero, qui audaces adeo sunt, ut publice dixerint, derivari a graeco quodam vocabulo *Lemitha* (a), quod *vermem intestinalem* significare aiunt, aut a Viro quodam inventore (b) *Lemita* nomine, procacitatem linguae indicat. Ceterum cum *Corallinae* species creditum fuerit, e Corsicae insula missa, hinc id quoque *Corallinae Corsicanae* nomine, *Coralline de Corse*, aut a colore rufo, ad distinctionem a corallina vulgari, alba, *Corallinam rubram*, *Coralline rouge* (c), vocavere.

§. II.

Historia.

En enim rem, pluribus abhinc seculis, cura Colonorum Graecorum, in urbe Aiacio degentium, nota Corsicanis plantae marinae spe-

(a) STEFANOPOLI *Mémoire sur le Lemithochorton*
pag. 3.

(b) KAUFFMANN *Theses Medicae* Arg. 1780.

(c) *Gazette de Santé* 1777. N. 23.

cies erat, ad littora maritima Aiacii crescens, quo tuto, cito, & iucunde vermes humanos expellere consueverant; quum dein Corsicanorum turbae victis Gallorum armis compositae, & regia cura Xenodochia militaria in hac insula exstructa essent, tentatum, & A. 1775. substitutum hoc remedium corallinae albae, vulgari anthelminthico, in omni Corsicae regno est, iussu Protomedici exercituum Gallicorum, & Xenodochiorum in hac insula Inspectoris, nomine VACHER, qui etiam omnium primus fertur (a), eam A. 1756. iam Lutetiam misisse, Lucro dein ducti, ulterius huius remedii famam extenderunt DIMO STEFANOPOLI, natione Graecus & Xenodochii militaris Aiacii Chirurgus, atque FLEURY, eiusdem Xenodochii Pharmacopola, ut A. 1775. Bastiae iam publici iuris factum fuerit aliquod impressum titulo: *sur l'usage de la Coralline nommée Lemithochorton* (b), & ut non solum per Corsicam, sed per omnem Galliam, id remedium divendendum miserint.

Eodem anno 1775. MARTIN, Pharma-

P 2

(a) *Avis sur un puissant Vermifuge &c.*

(b) Id mihi videre non contigit, sed excerpti ex *Gazette de Santé* 1777. N. 5.

ecopola Parisiensis mense Decembri venalem hanc plantae marinae speciem litteris inscripsit, in *Recueil de différens remèdes utiles dans les maladies chroniques* (a).

In *Gazette de Santé* 1777. N. 5. planta accuratius describitur, eius icon exhibetur, & alios quoque Pharmacopolas eam accepisse narratur. Eius vires confirmavere eiusdem *Gazette de Santé* N. 8 1777. De ea mentio fit iterum N. 23. Item N. 26. cum observatione pulcherrima a Medico MAIGRET exhibita. De ea iterum loquitur eiusdem anni N. 31. ubi eius agendi modus egregie explicatur. Rursus eius virtus, experientia suffulta dicitur, iisdem *novellis sanitati dicatis* N. 44. eiusdem anni. In *Journal Encyclopédique* Decembr. 1777. ea, quae MARTIN inseruit *Recueil de différens remèdes* 1775. quo magis promulgarentur, de novo imprimi curaverunt.

Prodiit quoque hoc anno ill. VITET *Pharmacopée de Lyon*, qui eius etiam mentionem iniecit (b).

Multis & Medicorum & Pharmacopolarum

(a) Pag. 2. titulo : *Observation sur la génération des vers dans le corps humain, & sur l'usage intérieur d'une espèce de coralline, nommée Lemitboskorian.*

(b) P. 551.

testimoniis suffultas observationes collegit dein
& sine loco impressionis in lucem edidit A.
1778. DIMO STEFANOPOLI in *Mémoire*
sur le Lemnibochorton, reconnu Vermifuge spe-
cifique dans les Hôpitaux militaires, & par
les observations des Médecins de France, 4^{to}
pag. 24. Per omne enim Galliae regnum suam
plantulam Medicis, Chirurgis & Pharmacopolis
tentandam exhibuerat, bonique eventus testi-
monia ab eis efflagitaverat, ut in tractatione
illa, maxima licet sit quae circa hanc mate-
riam edita fuerit, hae observationes dictae pre-
tiosiores absolvant partem, cum reliquae, quae
continet, male digestum circa vermes commen-
tum sint. Prodiit eodem anno 1778. Bastiae
impressum folium, quo FLEURY, Pharmaco-
pola Xenodochii Aiicii, historiam huius coral-
linae, (uti vocat) eius vires, exhibendi mo-
dum, doses, & loca Galliae, ubi divendendam
curavit, narrat sub titulo: *Avis sur un puissant*
Vermifuge de l' Isle de Corse appelé vulgaire-
ment Helminthochorton.

Denuo huius vermifugi, tanquam eximii,
mentio fit in supra laudatis *Novellis sanitati*
dicatis (Gazette de Santé) 1778. N. 25.

Referunt epilepsias verminosas eo curatas
eadem *Novellae* 1778. N. 27.

Observationes cum eo institutas inseruit
 SUMEIRE, Gallo-Provinciae Medicus, *Journal de Médecine* Octobr. A. 1779.

Utile remedium in multis casibus Helminthochorton esse, annuntiavit *illustris Societas Medica Regia, in Novellis sanitati dicatis* A. 1779. N. 37.

Prostat praeterea adhuc aliquod foliolum, quo hoc remedium venale proponitur, titulo *Le-mithochorton*, sed cum & impressiois locus & annus deficient, quo, id ponam, ordine, ignoravi.

Nuperrime inter praecipua vermifuga posuit Helminthochorton cel. HAPP in Dissert. inaugurali, titulo *Vermium intestinatorum hominis historia*, Lipsiae 1780. p. 47.

Eius tandem quoque mentionem iniecit *Gazette d'Agriculture* A. 1780. N. 65. p. 518. tanquam extractum ex *Affiches du Dauphiné*.

Inde concludere fas est, hoc medicamentum, ex quo in Gallia notius fuit, quinquennium dico, in diversissimis subiectis, sub diversissimis circumstantiis, & variis admodum Galliae locis se semper, ut praestantissimum vermifugum gessisse contra omnes vermium species, ut medentium iure in se trahat attentionem, & dignum sit, in quod ulterius inquiratur.

§. III.

Descriptio , Iconia , Species .

Refert Helminthochorton substantiam ex fasciculis constantem , e rufo rubentem ; quivis fasciculus in quem facile dirimitur , in omni diametro aliquot lineas sistit , & componitur ex fibrillis tenerrimis , quarum unum extremum filiforme est , incurvatum , & implexum ; alterum inferne in basin crassiolem concretum , cui in speciminibus ad nos missis adhaerent parva conchylia , aliaeque quisquiliae ; numerosae fibrillae evidenter lateraliter ramos edunt , & in quibusdam quasi nodos ad latera , rudimenta ramorum vidimus . Fibrillae capillaceae , microscopio submissae nodosae evidenter , & geniculatae , extremum vero filiforme bipartitum nobis apparuit . Odor nauseosus , qui marinis proprius est , penetrans , multum superat eum corallinae albae ; sapor praeter salsum nihil nauseosi habet ; at & hac falsedine vincit corallinam albam ; lentescit ceterum & mollescit , ubi masticatur Helminthochorton , & nil asperi & stridentis offert , cum aliquo fragore vero rumpitur sub dentibus corallina alba ; sed quid plura , qui semel in vita duas has species comparaverit , errare nequibit , nam non solum sapore , odore ,

& colore, sed & altitudine, crassitie, habitu, & structura vel nudo oculo distinguenda discrepant; alba enim fasciculos omni respectu maiores, e ramis filiformibus non geniculatis, sed articulatis compositos sistit.

Id lepida icone expressit & cum corallina alba simul tabulae aeneae insculpta, comparatum exhibuit *Gazette de Santé* 1777. N. 5. addunt auctores harum novellarum, eam esse eandem, quam VELSCHIIUS (a), quoque depinxit, nomine *Corallinae tenuifoliae conchis & topbis marinis adnatae*, at cum hanc non rubram sed expresse viridem dicat (b), cum eius species nil communis habeat cum nostro *Helminthochorto*, praeter id quod sit vermibus inimica & conchis innascatur, hinc VELSCHII corallinam tenuifoliam, non esse nostram plantulam putamus, nec ideo iconem ab similem esse miramur, ceterum quod ab Auctoribus novellarum dicatur, VELSCHIIUM referre, eam suis temporibus a circumforaneis fuisse venditam, id ego quidem apud hunc Auctorem non reperio. Eandem quoque descriptam & depictam esse putamus a BARRELIER (c),

(a) *Hecatost.* 5. p. 27. Aug. Vindel. 1675. 4to.

(b) L. c. p. 28.

(c) N. 1337. Icon 1391. n. 13.

titulo: *Musci spicati capillaris*, quem JUSSIEU *corallinam capillarem e cinereo fuscam* nominavit, & ad mare Tyrrhenium crescere ait.

Demonstrant modo dicta, ubi comparantur cum iis, quae oculus armatus lente vitrea, sive simplici, sive composita, in siccata aequae ac in aqua frigida infusa planta cernere concessit, eam corallinis adscribi non debere, cum nihil calcarei habeat (a), non posse annumerari fuscis, cum nec granula, nec vesiculae, nec corpus penicilli formae in illa conspiciantur; sed ad *Conervas vegetabiles aquaticas* pertinere, filamentis teneris & capillaceis efformatas, nulla parte a reliqua substantia distincta instructas. Proxime accedere nobis visa est, ad *Conservam dichotomam* LINNAEI (b), quae est *Conserva dichotoma, setis porcinis similibus* DILLENII (c); at cum inde differat magnitudine, colore, & ramis non erectis, hinc credimus nominan-

(a) In hunc tamen censum refertur a cel. VITET, in *Pharmacopée de Lyon* p. 551. diciturque esse *Corallinam rubentem* L. at si allegata comparavisset iconia & praecipue si ei aequae ac nobis contigisset ipsam *corallinam rubentem* L. cuius specimen excell. HERRMANN mihi benigne communicavit comparare cum *helminthochorto*, hunc errorem non errasset.

(b) *System. Nat.* T. II. p. 720. Edit. 13. Vindob.

(c) *Hist. Musc.* n. 17. *Tab. III.* fig. 9.

dam esse *Conserua helminthochortos*, *dichotoma*, *uncialis*, *rufescens*, *ramis horizontalibus*.

Plures eius varietates existere posse plus minusve anthelminticas non negamus, omnes enim plantarum maritimarum species vi vermi-fuga instructas esse notum est. In nostra plantula, difficiliter distinguenda, si fides apud eos est, qui eam divendendi ardore consumuntur, apud STEFANOPOLI (a), & FLEURY (b), duplicem praeprimis speciem agnoscunt, *Maiorem*, magis rubram & rotundam, altitudine quatuor aut sex pollicum cum extremitate acuminata, atque *Minorem* quae vix ad pollicem accedit, cineream magis; hanc optimam esse aiunt (c), estque ea quam nos descripsimus, qualis in Pharmacopoliis Argentoratensibus venalis proponitur.

§. IV.

Analysis Chemica.

Helminthochorton prouti nobis affertur, cum acidis effervesceit, quando autem accurate ab omnibus, quae ipsi adhaerent, minutis con-

(a) *Mémoire* pag. 11.

(b) *Avis sur un Ec.* p. 2.

(c) L. mox citato.

chyliis & aliis heterogeneis lotione cum aqua privatur, tunc nulla omnino effervescentia observatur.

Ardentibus iniectum carbonibus, cum aliquo strepitu seu decrepitatione consumitur, cum foetore evidenter vegetabili, hinc diverso ab eo, quem corallina alba refert, quae tunc cornu adustum redolet.

Aquae frigidae ubi committitur, in ea levissime intumescit, quod corallina non facit; per aliquot dies in ea servatum, colorem rufum exuit, & in pallide flavum, aut sordide album transiit; tertio iam die foetere incepit.

Haec aqua post duos infusionis dies filtrata, ubi syrupo violarum admiscebatur, eius colorem nullo modo mutavit; mercurium in acido nitri solutum, colore ex albo leviter flavicante praecipitem dedit, ut inde ad praesentiam salis communis, aut forte etiam mirabilis Glauberi, in nostro remedio concludere fas sit (a).

Quo videremus, quale sal contineat sapore admodum falso praeditum helminthochorton, eius uncias duas minutim conscissas, infudimus cum aquae frigidae distillatae unciis sedecim,

(a) Alia observavere cel. HOPP, & exp. LEONHARDIUS, qui sal marinum absque ullo alio, in eo deprehenderunt, *Diff. cit.* p. 47.

saepiusque miscelam spatula miscuimus; elapsis sex circiter horis per filtrum traiecimus aquam, & praelo adegimus plantulam infusam; salsum admodum lixivium erat, & colore flavo tinctum, residuum ab expressione denuo duodecim unciiis aquae distillatae infundebatur per sex horas, traiectus per filtrum liquor vix tinctus, vixque adhuc salsus reperiebatur; ab his infusionibus residuum, ferventis aquae distillatae unciiis duodecim immergebatur, elapsis duodecim horis per colum traiectus liquor viscidus admodum erat, & neutiquam salsus. Superstes ab his elixivationibus helminthochorton post ritam exsiccationem referebat pondus unciae unius, cum duabus drachmis. Confundebantur nunc prius obtenti liquores & solis radiis evaporandi ergo exponebantur, post biduum turbidi cernebantur, putridumque olebant; cum dein balneo arenae ad uncias quatuor reducerentur, nullas tamen crystallos obtinere contigit; ad cuticulam evaporatus liquor, crystallos quidem exhibuit, quas vero separare viscidior mucilago impedit. Omnibus hinc ad siccitatem, caloris ope reductis, inspissato superinfundebatur alcohol vini, quod flavo colore tingebatur, & salsum saporem acquirebat. Inde remanens solvebatur aqua distillata frigida, quae filtrata, & rite

evaporata, crystallos quidem separavit, quas vero iterum mucilaginis copia, qua tegebantur, separare impedivit. Ut inde concludere sit, helminthochorton multum salis continere, cuius vero separationi & crystallisationi maior mucilaginis quantitas, qua scatet, se opponit.

Alia hinc via ad indaganda nostrae plantulae principia, incedere tentabamus; quatuor nempe nostri remedii unciae conscissae, in retorta vitrea balneo arenae committebantur, instituebaturque igne gradatim aucto distillatio; prior, quae sub forma spiritus lactei prodierat portio, ipsius conservae odorem retulit; eum excepit statim empyreumaticus, cui aliquot adusti olei guttae supernatabant, aequabat drachmas sex; alia quidem occasione integram unciam spiritus ex eadem helminthochorti quantitate elicui, id vero maiori vel minori huius plantae siccitati tribuendum esse, facile patet. Aucto adhuc calore in excipulum transibant spiritus grana quindecim, & olei adusti drachma dimidia.

Spiritus lacteus per distillationem obtentus, cum oleum inde ablatum fuerit per aliquot dierum moram, badio tingebatur colore; rectificatus, nullam cum acidis, ne quidem cum eo nitri effervescentiam obtulit, colorem coeruleum

succi heliotropii in laete rubrum vertit, syrupum violarum non mutavit illico, sed modo post aliquot dies praeterlapsos, ex flavo parum viridis cernebatur; ubi hic spiritus addebatur solutioni mercurii in acido nitri, huius color in lucide rubrum transit, nihil statim praecipitabatur, sed paucis diebus elapsis in fundo rubri liquoris praecipitatum obtinuimus, citrino colore praeditum; cum solutione salis tartari in aqua mixtus liquor lactescebat, odoremque fortorem referebat, successu temporum color in flavum transit. Elici inde potest, spiritum ex helminthochorto obtentum ammoniacalis naturae esse cum excessu acidi, ab oleosis vero principiis ita esse circumdatum, ut suam naturam non evidenter prodere possit. Remanens a distillatione caput mortuum repetitis vicibus cum aqua distillata coquebatur & elixivabatur, parum inde tingebatur aqua, at odore & sapore referebat aliquantisper hepar sulphuris, addito acido, turbabatur liquor, & verum sulphur praeceps dabatur, procul dubio ab oleosis partibus, quae acido vitrioli e selenite aut sale Glauberi desumptis, iungebantur. Ad uncias circiter quatuor reducta, quae ad edulcorationem adhibita fuit aqua, cuticula salina tegebatur, nullae vero crystalli post refrigerationem

reperiebantur, hinc decantato liquore, ipsa cuticula siccabatur, erat ea selenitica, & pondus granorum decem aequabat; ulterius evaporato liquore, per iteratas crystallisationes sesqui-drachma salis, quod communis esse videbatur, apparuit; ulterius adhuc protracta evaporatione, grana decem alcali mineralis prodierunt; liquor ultimus, ob parvitatem non ulterius in crystallos abiens, adeo evidenter alcalinus erat, ut viride tinxerit syrupum violarum, & mox efferbuerit cum acidis. Quod ab hac elixivatione residuum erat caput mortuum, pondus retulit unciarum duarum. Ut inde pateat, nostrum helminthochorton omnium productorum marinarum ad instar, fovere maiorem quantitatem salis communis, sal Glauberi, selenitem, atque alcali fossile cum non parca terrae inertis quantitate.

Uterius dein in nostra analysi progressi sumus, extracta aquosa & resinosa ex nostra planta parare tentavimus. Hoc scopo helminthochorti uncias duas, quater repetitis vicibus cum aqua vulgari coximus, donec ultimum decoctum nullum ulterius nec saporem nec odorem retulerit; omnia decocta confusa, & evaporata ad sex unciarum remanentiam, praesentarunt, ubi refriguerant, veram quamdam mucilaginem,

quam discis impositam, clihani lento calore ad
 siccitatem perduximus; ita obtentum Extractum
 aquosum primarium, badium erat, falsum,
 inodorum, & pondus aequabat drachmarum
 quatuor cum dimidia; id quod ab hac extra-
 ctione remanebat probe siccatum, ponderabat
 novem drachmas cum dimidia. Huic cum
 superfunderentur alcoholis vini unciae octo, rite
 digereretur, & filtraretur, colore dilute viridi
 tingebatur; eodem modo, secunda vice cum
 alcoholis unciis octo digestum residuum, nihil
 ulterius huic menstruo communicabat; confusis
 his liquidis aquae distillatae unciae sex adde-
 bantur resinae praecipitandae ergo, at vix tur-
 babatur liquidum, ita ut abstracto leni igne
 spiritu, vix grana sex Resinae, seu Extracti
 resinosi secundarii remanserint. Aqua vero inde
 superstes, decem adhuc grana extracti aquosi
 primarii reliquit. Remanens ab extractionibus
 aquosa, & spiritiosa helminthochorton aequa-
 bat pondus unciae unius cum scrupulis quatuor.

Quo certiores rei essemus, inverso quoque
 modo haec experimenta instituimus. Id est un-
 cias duas nostri remedii cum duodecim alcoholis
 unciis digessimus, filtravimusque, colore e viridi
 badio tingebatur spiritus; remanens denuo dige-
 stum cum alcoholis unciis octo, versus viridem
 vergere

vergere faciebat liquorem. Iuncta menstrua ab additis aquae distillatae unciiis sex turbabantur; abstracto dein alcohole, rufa remanebat aqua cum Extracti resinosi primarii granis quindecim; ipsa haec aqua, postquam evaporaretur, exhibuit extracti aquosi, in aëre humiditatem attrahentis drachmam integram cum granis decem. Id quod ab hac extractione cum alcohole vini residuum supererat helminthochorton, exsiccatum referebat adhuc pondus unciae unius cum dimidia; quum hoc toties cum aqua coqueretur, donec tandem nullum huic menstruo, nec saporem, nec colorem communicaret, cumque dein hae aquae reducerentur per evaporationem ad uncias quatuor, veram mucilaginem praesentarunt, quae ad siccitatem clibani calore perducta, ponderabat drachmas tres. Remanens a successiva per alcohol, & dein per aquam extractione helminthochorton unciam ponderabat, cum drachmis duabus. Ut inde concludere sit, sat magnam mucilaginis, paucioris resinae partem fovere nostrum remedium (a).

Delect. Opusc. Vol. XII. Q

(a) Cur cel. HOPPE & exper. LEONHARDIUS cit. diss. p. 47. aiant: spiritum vini cum hoc remedio digestum, nil resinosi dedisse, non videmus.

Ceterum helminthochorton apparatu chemico pneumatico exploratum, in modum reliquorum vegetabilium sese gessit; eius unciae duae exhibuerunt aëris fixi 114. pollices cubicos, & 122. pollices aëris inflammabilis, cuius priores portiones cum aëre fixo erant mixtae, agitationis cum aquae ope inde separandae.

En, Benevole Lector! quae mihi cum helminthochorto domi instituere, & ductu & concessu Optimi, & omni reverentia prosequendi Praeceptoris, Magni SPIELMANNI in eius Laboratorio Chemico repetere contigit experimenta, quae id saltem boni praeseferunt, ut aliis eadem experiundi compendium faciant, monstrentque vel hic analysin chemicam ad eruendas plantae vires vix aliquid contribuere.

§. V.

V i r e s .

Solam hinc experientiam in eruendis huius plantulae viribus, nos manuducere fas sit; eamque ducem fidam si sequimur, elucescit helminthochorton omnibus aliis vermifugis facile palmam praeripere. Citissime, iucundissime, & tutissime hos hostes e corpore expellere, omnes-

que inde pendentes morbos vincere cum colonis graecis, omnis vidit Corsicae insula, & plaudunt omnes fere littorum Gallicorum Medici, plauduntque ita consentientes omnes, & Medicorum & Chirurgorum, & Pharmacopolarum cohortes, ut ubi terminos repererint alios, semperque alios, & quorum unus semper alterum laude vincit, omnino mireris (a), ut ita saepissime repetita, sub diversissimis circumstantiis experientia eundem semper huius remedii effectum probaverit, in Corsica aequè ac in Meridionalibus Galliae oris, atque in ipsa, & regni, & scientiarum Metropoli, adeo ut vel *Regia Medicorum Societas* ei publice debitam laudem tribuere non dubitaverit (b).

Qualem nunc sese stitit exteris, eam & apud Argentoratenses sese probavit, ut & optimus Praeceptor LOBSTEIN *Anatomiae & Chirurgiae* decus, quem nominare laudare est, sequens testimonium mihi exhibere non dedignatus sit: *Tribus, in infantibus, Helminthochorton efficacem suam virtutem contra Lumbricos exercuisse observavi, cum in uno eorum,*

Q 2

(a) STEFANOPOL. *Mémoire*.

(b) *Gazette de Santé* 1779. N. 37. p. 148.

antequam hoc remedium exhibitum fuerit, alia vermifuga absq̃ e sperato effectu in usum tracta fuissent; datum fuit illud partim in substantia melle in electuarii formam redactum, partim etiam in decocto cum melle edulcorato, ut hucusque in iisdem omnia symptomata, quae vermes in primis viis hospitare indicant, evanescant. Propinatum fuit dosi consueta, matutino tempore & continuatum trium dierum spatio, quo factum, ut secundo iam die, tertioque ingrati illi intestinorum hospites ex suis habitationibus fuerint expulsi. — Eadem quoque repetitis vicibus expertus est, qui omni data occasione suam mihi amicitiam probavit, Exercituum Gallicorum Medicus, Practicusque felicissimus IOH. IACOBUS SPIELMANN, tutum, citumque vermifugum ei quoque sese saepissime probavit praecipue contra Lumbricos, helminthochorton, eo praecipue commendabile, quod sub diversissima forma corpus ingredi potest. Communicavit is mihi quoque humaniter litteras, quas circa id argumentum ei miserat amicissimus huic viro Dominus GYSER, Poliater, & Dynastiae Pforzheimensis Physicus Ordinarius, quas stylo politissimo conscriptas ipsissimis verbis opponere ingratum nemini erit.

Vir experientissime, Amice suavissime!

Innumeros inter morbos, quibus miseri affliguntur mortales, is praecipue eminet, quem, uti nosti, ab antiquissimis retro seculis Verminosum Medicorum schola nominabat, multifariis, iisque atrocissimis stipatum symptomatibus; in quibus luculenter eruendis insignes, quos anteaeta coluerunt tempora, in arte medica viri, studio omni adhibito, & experientia superstructa, desudarunt, elaboraruntque. Evolvantur solummodo eorum scripta memoriae sacra, perlegantur illorum lucubrationes, a Coo sene ad nostrum usque vitae cursum exaratae; vastam inde horrendorum symptomatum, a vermibus provenientium molem, maximo horrore perfusi poterimus perspicere. Inter diros cruciatus, quos perpeti infantes praecipue coguntur, quum insensissimi intestinorum hostes ex domicilio sese eripere tendunt, illudque destruere minantur; inter fletus miserandos, quos dolor lancinans, e vermium praesertim morso oriundus procreat, ut a daemonum cohorte excruciarı tenellum saepius putes, nullus est homo, nisi pectus eius callo sit obductum, quin ad misericordiam ineffabilem adducatur. Sudore madens, viribus fractus, animi deliquiis pressus, coram

vulsionibus vexatus, inter adstantium manus
 pro mortuo collabitur aeger. Heu triste sane
 spectaculum! millia infantum hoc modo vitam
 cum morte commutant. Hinc nullo non tempore,
 artis Machaoniae periti nullum laboris & operae
 in profligando isto malo, in expellendis ominosa
 minantibus animalculis consumpserunt. Quis
 autem est, quem lateant frequentia clarissimo-
 rum virorum, contra hunc morbum inspinato
 saepius invadentem, remedia omni laude con-
 decorata, — nulli, inquam, doctissime SPIEL-
 MANN! ignota sunt ista nisi in scientiae sa-
 lutaris immenso campo hospiti, & corporum,
 in amplo almae naturae regno detectorum, in-
 scitia laboranti; mirus enim naturae cursus,
 copiosae rerum existentium mutationes, varia
 morborum indoles, obscura nonnunquam sympto-
 mata, statusque degener, opinionum in remediis
 eligendis maximam saepius pariunt varietatem.
 — Ast nostrae inprimis aetati iste contigit fe-
 lix rerum successus, ut clarissimus Dn. STE-
 FANOPOLI, Graecus natione, Exercituum
 Regis Galliae Chirurgus, muscum quendam ma-
 ris prope littora procul dubio, seu super scopulos
 crescentem, detegeret, omnium anthelminticorum
 utilissimum, praestantissimum, atque pro vero
 specifico, in cunctis morbi verminosi symptoma-

ribus unice habendum. Dignus, qui fama &
 litteris celebretur, vir iste, diligentissimus na-
 turæ perscrutator, per sedecim integros annos,
 periculo facto, eximium, quem Lemi, seu hel-
 minthochorton præsefert, usum satis abundeque
 testatus est; celebres Galliae medicos de hac re-
 medio vermifugo certiores fecit, eorumque expe-
 rimentis circa hunc muscum institutis respondit
 erentius. Et ego, corporum deceptorum notione
 lætus, cum plantæ maritimæ efficaciam ex
 amico perceperim, nonnullis malo a vermibus
 procreato laborantibus, statim iussi propinan-
 dam, aqua fervida infundendam. Acceptum
 infartibus rheiforme infusum, lacte mixtum, &
 sacchari dulcedine imprægnatum, gratus dein
 prae aliis remediis sapor, insignis insuper &
 exoptatæ helminthochorti præstantia effecit, ut
 rumore sparso, incolæ urbis, in qua Physici
 munere fungor, undique advolarent, liberisque
 adportatis, divulgationem istius musci a me
 peterent. Suavis hominum istorum oblatio &
 ingens in me confidentia, studium quorumvis
 mortalium, qui manus implorant auxiliatrices,
 sanitatem restaurandi, tuendi, ac perfectiorem
 reddendi, animique voluptas, tale possidendæ
 remedium, quale ad destruendos vermes aptissi-
 mum sit, faustum copiosæ medelæ procreave-

sunt exitum ; observationes quippe , quas charitae commisi , numerum superant quinquagesimum , virtutemque belminthochorti divinam , & nullo non tempore exploratam satis superque ostendunt . Cum nunc secundum litteras nuperrime mihi missas declarasses egregium iuvenem quendam , animo agitare ut huius plantae effectus orbi literario communicaret , simulque hunc in finem observationes quasdam notatu dignas a me desiderasses , en ! ex tota farragine saltem tres .

OBSERVATIO I.

Puer sex circiter annorum , vehementi ventriculi , & partium adiacentium dolore , missus instar , laborare incepit , qui per aliquot iam iam dies , antequam accersitus fuit , perduravit . Accedit vultus pallor , ad panem siccum insatiabilis appetitus . Adfuit insuper diu , noctuque marium pruritus , & perpetua illarum perfrictio ; cernebantur in somnis terrores , cum repetitino totius corporis subsultu , qui insomnem vexabant puerum . Abdomen turgidum deprehendebatur , & paullulum tensum , insistebant ructus , conatus vomendi , anxietas , foeda pituitae os implentis excreatio , ac mirus linguae natus . Propinabam hinc ob iustam suspicionem ,

eiusmodi intus praesto esse animalia, mane &
 vesperi drachmam belminthocorti dimidiam,
 aquae fontanae unciiis sex infundendam, sac-
 charo & lacte edulcorandam; nec eventus fe-
 fellit expectationem; expellebantur nimirum al-
 tero statim die, post assumtum divinum illud
 remedium, quatuordecim lumbrici teretes, longi-
 tudinem sex pollicum, crassitiem vero calami
 aequantes scriptorii. Per tres adhuc sequentes
 dies idem vermifugum iussi sumi, ast, nullis
 amplius e corpore eiectionis vermibus, dolores
 cessabant; bilaris redibat faciei color, omnia
 omnino aberant symptomata, nec hucusque de
 illo puer conqueritur incommodo.

OBSERVATIO II.

Puella, nonum agens annum, habitus ma-
 cillenti, corporis fero exsucco, multifariis, iisque
 pertimescendis obruta fuit symptomatibus. Vi-
 sa, & interrogata aegra, quae hectica corripit
 febre videbatur & hypocraticam fere faciem
 possidebat, foetidum oris halitum spargebat.
 Cum mater de malis atrociter furentibus, epile-
 psia nimirum, periodica aphonia, surditate
 saepius appropinquante, omnium corporis mem-
 brorum lassitudine incredibili, rosionibus intesti-

norum, ac vellicationibus saevissimis, clamorem
 cientibus, ac involuntarium partium externarum
 motum, dissectionemque vehementem gignentibus,
 & flatuum inprimis tortura, certiore me fe-
 cisset, vermes in intestinorum tractu, multam-
 que saburram latere statim sum ratiocinatus.
 Datis in principio, quae febrem, qua labora-
 bat, mitigarent, antiphlogisticis, antispasmo-
 dicis, eiectionisque copiosis cruditatibus, bile ran-
 cida, & materie summe pituitosa, atque te-
 naci, diebus quatuor praeterlapsis, egregium
 summo cum gaudii helminthochorti usum cogno-
 scendi nactus sum occasionem; expellebantur
 enim nonnullorum dierum spatio viginti teretes
 lumbrici, & vivi, & mortui, symptomata
 gravissima ante, mitiora nunc reddebantur,
 accedebat per noctem somnus, vires fractas ma-
 xime reficiens, ciborum concoctu facilius assum-
 ptio robur addidit, sexiesque deglutitis scrupulis
 helminthochorti, duobus, se nullo amplius afficere
 malo, respondit aegra; hinc eundem sequi,
 qui propositus fuit, dietae ordinem mandavi,
 corporis nunc, & animi vigore, valetudineque
 fruitur, secunda.

OBSERVATIO III.

Trium annorum puer, vegeti, & obesi
 corporis, motibus corripiebatur convulsivis perio-

*dicis , qui tanto saepius invaserunt impetu , ut
 lumi prosterneretur . Foemina , cuius curae com-
 mittebatur , miser ille , hoc malo perterrita ,
 me adibat auxiliumque implorabat meum . Ex-
 plorato morbi istius genio , praesentibus iis si-
 gnis , quae vermes annuntiabant ; statim vermi-
 fugi huius grana viginti more consueto , matu-
 rino & vespertino tempore unciiis quatuor ad
 sex aquae fervidae infusa , exhaurienda , pro-
 posui . En ! mirum in modum , ingens ascari-
 dum pituita crassa , piceaque involutorum nu-
 merus altero die eiectus , per alvum cernebatur ,
 quumque protinus cum helminthochorto insiste-
 rem , comites tandem accedebant lumbrici octo .
 Expulsi inquilini nunc demum accepti multum
 levaminis , mitigationemque symptomatum exo-
 ptatissimam procreare , sanusque ad hunc usque
 diem permansit puer .*

*Accipias nunc vir celeberrime ! hasce ob-
 servationes fronte serena velim , praestantissimi-
 que huius vermifugi virtutes mecum mireris
 eximias . Vos vero , qui arti studetis salutaris ,
 quibus miseros a morbo levasse solatium est ,
 omnes intendite nervos , ut mirificas naturae
 vias nullo non tempore , & adhibita solertia
 perquiratis . Meritis clarissimi DIMO STEFA-
 NOPOLI , si non parem , at pro nostro tamen*

studio debitam persolvamus gratiam, quod certissimum, praesentissimum, & infantibus acceptissimum medicamentum invenisse contigerit. Manifeste hinc & constanti observatione concludere licet, eam nostri seculi esse felicitatem, quod multa iam inveniamus, & utilia, & vera, quae antea inutilia, nequidem verosimilia credebantur. Vale, meque diligere perge. Dabam Pforzheimii d. XIV. Martii MDCCLXXX.

ERNEST. GODOFRIED. GYSER

*D. Poliater & Dynastiae
Physicus Ordinarius.*

§. VI.

Observationes nostrae.

Tot tantisque successibus animati, non potuimus amplius cupidini, qua pectora consumebantur nostra resistere, quin ipsi tentaremus, ipsi mortalibus succurreremus, eorumque verminosos hostes debellaremus, ipsi utilissimo Observatorum gregi annumerari gestiremus; accipe humaniter nostros conatus, Benevole Lector! & si in tanto circa effectus helminthochorti experimentorum cumulo, ea tironis in censum

venire non mereantur, consideres ea saltem quaeso, tanquam profectuum specimen, unde quid valeant artus, quid ferant humeri concludere possis.

Observat. I.

Occasionem mihi statim dedit, fecitque FRANCISCA FETT annos 38. nata, quam diarrhoea verminosa, sex abhinc menses per intervalla recurrens, ad ultimam fere tabis periodum perduxerat. Infelice nimirum fame commota, ante hos sex menses maiori brassicae copia se ingurgitaverat accessit mox omnis, quae copiam ciborum vires concoctrices superantem, malorum caterva sequi solet, flatus, borborygmi, distensus ventriculus, respirandi difficultas, prostratus appetitus, nausea, inordinati ad vomitum stimuli cum torminibus; ingruit dein tenesmus cum alvi fluxu cruento, atque animato; tandem accensa febris, & fluor menstruus suppressus est, robur corporis eiusque torositas adeo mutata sunt, ut summa successerit virium prostratio, habitusque emaciatio tanta cum lugubri faciei pallore, ut umbram potius retulerit, quam verum corpus & mortem ad fores assistere putasses. Hinc liberatis primis

viis per emetica & purgantia a sordibus, quo facilius suas vires helminthochorton exercere posset, maior iam recuperandae sanitatis affulset spes, cum expulsa insigni saburrae quantitate iam melius se haberet aegra. Sequenti tunc die propinavimus ei decoctum helminthochorti, id est eius drachmas quatuor ab aquae uncis sex ad quatuor coctione redactum, & uncia una mellis edulcoratum; en vix elapsis 24 horis prodire absque molestia tres lumbrici teretes pedis parisini longitudine, idem numerus excretus secundo quoque die est, tertio tandem & quarto quinque numero iterum apparere immensa sordium mole velati. Continuavimus adhuc huius decocti usum per tres successivos dies, nil vero expulit praeter insignem saburrae copiam; disparuere ita funesta omnia aegrae symptomata, sola superstetit diarrhoea, quae ex arte administratis remediis tandem quoque cessit.

Observat. II.

Duodecim abhinc annis Taenia vexata femina MAYER annorum quadraginta, nunc quoque Lumbricis teretibus infestabantur, ructus sentiebantur acidi, appetitus irregulares, tormina in regione epigastrica. Assumptum idem

decoctum helminthochorti, quod mox deterior-
 plinus, per tres dies subsequentes, ita ut alia
 portio matutino tempore, & alia iterum duo-
 bus a coena horis propinata fuerit, expulit
 tranquille primo statim die cum faecibus tres
 teretes lumbricos, duos secundo, totidemque
 tertio die, cum insigni numero cucurbitinorum;
 disparuere sic omnia symptomata, quibus misera
 torquebatur praeter pungentem dolorem circa
 praecordia, quem a Taenia derivare solebat,
 & fortiolem semper graviditatis tempore adesse
 aiebat; hanc expellere aggressi, duplicata dosi
 decoctum, immo & helminthochorton in sub-
 stantia dosi vulgarem multum excedente, exhi-
 buimus, at votis non respondit successus.

Observat. III.

Natus ex hac matre filius quatuor anno-
 rum, tertiam experientiam instituendi occasio-
 nem subministravit; distensus ei ventriculus,
 appetitus immanis panis praecipue, dolores su-
 bito irruentes circa umbilicum suspicionem non
 levem attulerant praesentium vermium in pri-
 mis viis; is, cum quidquid pharmaci formam
 praeseferebat, respueret, sic deceptus est, ut
 helminthochorti pulvere, dosi scrupulorum duo-

rum, inspergeretur panis cum eadem sacchari quantitate mixtus, huic super inducebatur butyri portio, & manducandam porrigebatur puero; ientaculi, & coenae loco idem per aliquot dies assumebat eo successu, ut spatio quatuor dierum, novem lumbricis teretibus ciectis, ab omni incommodo liberaretur.

Observat. IV.

Septem libros verminosos sistit ex iisdem parentibus, SCHERER nomine, natos, qui omnes helminthochorti usu gavisi sunt. 1. Puer biennais, narium pruriti, abdomine tumido, reliquo habitu macro, ciborum frigidorum panisque inprimis aviditate, vermium praesentiam prodebat, is cochleatim porrecto huius plantulae infuso, quod cum dimidia lactis vaccini quantitate miscebatur, excretis sex lumbricis teretibus, spatio trium dierum sanitati redditus est; conficiebatur infusum ex conservae drachmis duabus, & aquae fervidae unciiis duabus, his addebatur lactis uncia unica, & edulcorabatur sacchari uncia dimidia. 2. Huius fraterculus quatuor annorum, iisdem afflictus symptomatibus, cum eodem quoque modo ei porrigeretur helminthochorton, trium dierum tempore excrevit

excrevit quinque lumbricos teretes, atque ita ad salutem reductus est. 3. Tertius natu sex annorum, eodem adhibito remedio, trium dierum intervallo, expulsis septem lumbricis, sanatus est. 4. Filia septem annorum, praeter symptomata, quae fratres torquebant, vagis & fortioribus abdominis doloribus cruciata, saturatius huius remedii infusum sorbuit, eo eventu, ut emissis cum insigni saburrae quantitate novem lumbricis teretibus, sanitatem restitutam viderit. Infundebantur confervae drachmae tres, cum aquae ferventis unciiis tribus, his caffè infusum, lactisque anatica portio nempe uncia una atque dimidia sacchari addebantur, quo magis acceptum fieret poculum. 5. Puer duodecim circiter annorum, cui praeter supra recensita symptomata, tumidula facies de vermium praesentia testabatur, huius medicamenti usu septem lumbricos teretes, & cum his ipsum morbum depulit. 6. Tredecim annorum frater, eodem medicamento sex lumbricos eliminavit e corpore, atque ita evanescere fames canina, atque emaciatio, quibus praeter alia verminosa mala affligebatur. 7. Maxima natu puella erat sedecim annorum; haec pruritu narium ingrato, animi deliquiis, visu fixo in unum idemque obiectum vexata, ut & appetitu saepissime pro-

strato & menstuis suppressis, helminthochorti propinatione alvo excrevit octo lumbricos praeter modum grandes. Exhibuimus tribus ultimis remedium forma decocti, eius nempe uncia dimidia coquebatur cum aquae fontanae unciis octo ad remanentiam unciarum quatuor, quibus edulcoranti sine uncia una mellis miscebatur. Integrae huius verminosae familiae mater, quadiagenaria, convicta de evidentibus helminthochorti virtutibus anthelminticis, in semetipsa illud experiri cupivit, gravida licet fuerit, nullique illorum obnoxia incommodorum, quae turbare vulgo solent eos, qui vermibus infestantur, nisi quod levibus intestinorum puncturis, quae facile saburrae primas vias obsidenti tribui possunt, agitabatur. Huic quater licet exhibuerimus supra descriptum helminthochorti decoctum, attamen non nisi unicum eiecit vermem, cum evidenti dolorum levamine; hanc apponere observationem non incongruum putavimus, ut pateat vel graviditatis statum non impedire huius remedii usum, idque vel hic prodesse posse.

Observat. V.

Puella viginti annorum M... conquerebatur de continuo circa praecordia dolore, cui

inuncta adeo erat vertigo, ut corpus sustinere impar fuerit, fame simul vexabatur nulla panis quantitate satianda, faciei color pallidus erat, saepe erumpebant ructus acidi, & corporis sanitas alterata, menti suam valetudinem communicaverat; huic cum propinaretur quatuor vicibus helminthochorti decoctum supra descriptum, felici successu excrevit cum sordium insigni quantitate duodecim lumbricos teretes. Exhibebatur id decoctum syrupo capillorum veneris edulcoratum ientaculi loco, ieiuno ventriculo, atque duabus circiter a coena horis.

Observat. VI.

Pulsu frequenti, febre valida, & vomitu eorum quae paullo ante ciborum nomine assumerat, decumbebat in Nosocomio Civili Argentoratensi vir viginti novem annorum FRIDERICUS SCHAEFFER, vexabatur is simul ventris tumore, eiusque torminibus, atque frequenti gastrici liquoris in os ascensu, cum narium ingrato pruritu, cumque ita haud a vero ab similem suspicionem inieciisset de vermium imprimis viis praesentia, sub auspiciis Excell. Domini EHRMANN, Professoris Extraordinarii & Nosocomii huius Medici Adiuncti, supra die:

Et remediū decoctum ea dosi, eoque modo propinavi, quo observatio antecedens id describit, vidique omnia symptomata mox evanescere, quum duos lumbricos teretes eiecerat aeger spatio trium dierum.

Observat. VII.

Natu eiusdem Praeceptoris mei Clinici, in eodem Nosocomio, quod mox laudavi, in adolescentulo quodam KAYSER, qui nondum decimum octavum annum egressus erat, helminthochorton tentare mihi contigit. Is tumido ventre onustus, anxius spiravit, doloribus tenebatur in hypochondrio sinistro, qui versus regionem epigastricam ducebantur, ita ut vel huic parti incumbere impossibile fuerit, tussi ingrata atque vertigine laborabat semper, & quoties corpus parum movebatur, in animi incidit deliquia: Tot, tantisque a vermibus productis malis idem opponebatur decoctum melle edulcoratum, quod supra dixi, vidique incantationis in modum quatuor dierum spatio prodire octodecim teretes lumbricos, & cum eis omnem malorum catervam fugere.

§. VII.

Modus agendi explicatur.

At si quaeras ex nobis, quo praecipue modo helminthochorton sua miracula prodat, noli quaeso credere nos hic portenti quid aut specifici allegaturos esse, id enim serenis temporibus nostris turpe esset, aut nos praemissis his prodigiis, nunc illud divendendum oblato-
ros, & dulci sermone, veteratorum more verba daturos esse, quibus nostrae praeprimis crumenae bene consuleremus, in hoc enim veri, ingenique Medici non sunt conditi. Sed id potius volumus, hoc remedium omnium falsorum ad instar, mucum intestinorum, vermium nidum solvere, & irritando deiectiones promoveri, quibus haec animalia sive viva, sive mortua, e corpore eliminantur, tandem suo stimulo chylicationis vias roborare, atque ita a futuris vermibus corpus praemunire. Salina vero esse vera anthelmintica, omni tempore adeo agnovere Medici (a), ut aquas Sedlicen-

R 3

(a) VAN SWIETEN *Comment. in Aphor. BOERH.*
T. IV. §. 1371.

ses, Ebshamenses, Niederbrunenses (a), aliosque his similes semper laudaverint tanquam vermifugas; ut & ipsemet, ubi non sat efficaciter expulerit vermes helminthochorton, eius vires exhibito poculo solutionis alicuius salis medii in aqua fontana adauxerim. Sic & rem bene indicavit, pulchrisque tentatis suffulcit ANONYMUS (b), nautis enim ipsa aqua marina mane & sero vesperi epota, & clysmatis forma iniecta vermes expulit. At licet prodigiosi, & specifici nil habeat helminthochorton multis tamen, & fere dixerim omnibus vermifugis palmam praeripit eo, quod est multo minus ingratum, quam cinæ nauseosum semen; magis multo efficax, quam absorbens & vix falsa corallina alba, mitiusque multo agit, quam ricini oleum, aut praeparata mercurialia, aut & remedium Noufferianum (c), vel & illud *Herrenschwandii* (d). Adeo ut omnibus, & singulis, cuiuscunque & aetatis & temperamenti

(a) PETRI *Vom Niederbrumer Bad*. Argent. 1770. p. 28. & WEGELIN *dissertatio duas circa vermes observat*. Argent. 1779.

(b) *Gazette de Santé* 1777. N. 31. p. 124.

(c) *Traitement contre les Ténia ou vers solitaires pratiqué à Morat en Suisse, examiné & approuvé à Paris, publié par ordre du Roi à Paris* 1775.

(d) VAN SWIETEN *Comment. in aphor. BOERH.* §. 1372. Tom. IV. p. 738. edit. Lugd. Batav.

& in omni fere morbo (a), cui se iungere verminosa saburra posset, conduceret id remedium. Ut vere dicant, omnium vermifugorum facile esse id, quod tutissime, citissime, & iucundissime vermes e corpore expellit atque in omnibus aliis praefendum erit, quod merebitur, ut in pharmacopolia introducatur, sunt verba omnium fere, qui testimonia circa insignem helminthochorti virtutem exhibuere (b). Rarissime enim ter repetere dosin coguntur, cum intra viginti quatuor iam horas absque ulla molestia, praecipue lumbricos insensissimum homini vermium genus expellat, eosque saepissime vivos, ut omnes ferunt Observatores, ipseque vidi; non enim mortui prodire, nisi ubi data aqua salina deiectiones alvinas promoveram.

Num vero quaecunque salis medii, aut alcalini in aqua solutio eundem contra vermes effectum exhiberet, ac helminthochorton, nec ne, aliis dirimendum mitto; iungit, unitque saepe natura duo corpora modo nobis incogni-

R 4

& ROSEN VON ROSENSTEIN *Kinderkrankheiten*, trad. MURRAY Ed. III. 1774. p. 522.

(a) STEFANOPOLI *Mémoire passim & Journ. de Méd.* Octobre 1779.

(b) *Ib.*

to, atque non ita facile imitando. Aliquid huc & facere insignior videtur ea viscidae mucilaginis quantitas, quae in nostra plantula deprehenditur, ex quo decoctum magis saturatum cum ea facimus, & quam primo intuitu moderare potius irritantis salis effectus putares; sed nonne idem circa ricini unguinosum oleum verum est? quod primum vermifugorum sese probat, & in quo irritans purgansque etiam velatum quasi est oleo pingui involvente. Meliora ceterum doceri parato, ignosce dubia.

§. VIII.

Exhibendi Modus, & Dosis.

Eo vero omnibus vermifugis praecipue praecellentissimum facile helminthochorton est, quod omni quasi sub forma & dosi aegris exhiberi possit. In substantia statim assumptum, nil quicquam ingrati, nec sapore, nec odore refert, ut facile sicca sub forma, vel non velatum nebula deglutiri possit, sed modo aqua, iusculo, syrupo, aut & lacte dilutum, praeferantque hanc methodum omnibus reliquis (a), ubi aegri

(a) *Avis sur un puissant &c.*

aetas vel potius ratio animi id fert, atque tum dosis est pro infante, qui quartum nondum exegit annum a granis duodecim ad triginta sex; ab hoc anno quarto ad decimum, scrupulorum duorum ad drachmam integram; maioribus natu drachma dimidia immo & duae porriguntur, rarius tamen hanc excedunt dosin; eam vero absque noxa augeri posse nostra evicit.

Observatio II. Sic quoque idem pulvis, pulchre melli, saccharove, aut & butyro misceri potest, panique vel illiniri, vel in electuarii formam reduci, vel & variis pulticulis nubi, aut addita farina, butyro, & aqua, in placentulas & bellaria formari, quae in oleo seu butyro calefacto friguntur, aut ante addito & saccharo, & butyro & farina artocreatum more in clibano coquuntur (a). Conditorum dein artem inde rotulas, trochiscos, tragemata varia confecisse facile capiunt artis periti.

At infusionis etiam & decocti forma exhiberi potest (b), dosibus iisdem quas supra descripsi, aiunt tamen minorem pro decocto, quam pro infuso dosin requiri (c), nec id pro modo, quo id remedium agere putamus difficile

(a) *Gazette de Santé* 1777. N. 26. p. 103.

(b) STEFANOPOLI *Mémoire* p. 24.

(c) L. c.

capto erit, namque tam infusio in aqua fervida, quam decoctio in eadem, efficacem salem, quo plantula scatet, solvet, at cum decoctio plus salis aquae miscabit, quam infusio, illam huic praeferendam esse putamus, si nempe eadem dosis datur, ubi vero minuitur dosis pro decoctione, tunc eodem redire rem putamus, an duplicata dosis infundatur, an vero dimidiata decoquatur; nec erunt nisi ubique *specificae* quaerenres (a), qui hanc rem ulteriorem disquisitionem requirete putabunt. Vulgo pro dosi drachmae dimidia helminthochorti sumunt unciam unam cum dimidia aquae, & tertiam menstrui partem calore agunt in auras, reliquum filtratum addito melle, saccharo, vel alio quocunque corrigente, gratus redditum aegris offerunt. Infusionem eodem modo quam Theae parant, conservam per aliquod tempus cum bulliente aqua infundunt, expressam filtratamque & edulcoratam epotat. Addere id liceat, haec eadem infusa, & decocta delicatioribus clysmatis forma iamiam fuisse iniecta cum fructu (b). At licet varii Auctores duce STEFANOPOLI solliciti (c) regi infusionem

(a) Ibid.

(b) MARTIN *Recueil* p. 5.

(c) Ibid. p. 25.

praecipiant, cur id fieri debeat non videmus; cum nec odor, nec analysis chemica, quidquam volatile quod per calorem in auras pelli posset, adesse designent.

Reverentiae in suum specificum num dei beatur, & desiderio praestantiam eius clarius demonstrandi, an vero ardori maiorem eius quantitatem dividendi, ambigimus, quod afferat, atque protestetur STEFANOPOLI (a) male aliis remediis, purgantibus praeprimis, nubi helminthochorton, eiusque vires evidenter sic minui, contrarium enim nos docuit observatio nostra (b) coïncidens cum eis, quas dexterrimus MARTIN (c) allegat, ubi bonis avibus ricini oleum iunxit infusioni huius conservae, id est olei ricini unciam dimidiam miscbat cum infusione helminthochorti, in qua plantulae drachma infusa erat cum uncia aquae bullientis, eamque dosin repetere quavis dimidia hora iubebat donec aeger olei supra dicti uncias tres consumferit. Is idem contrarium quoque vidit in septuagenario quodam, cui, cum omnia alia vermifuga frustra exhibita fuissent, iunctum resinae ialappae atque syrupo cichorei cum rhabarbaro helminthochorton in

(a) Ibidem

(b) §. antec.

(c) *Recueil* p. 5.

mixturae formam, maximam vermium copiam expulit (a).

Ut ergo rem conferam in pauca, helminthochorton omnium vermifugorum minime ingratum est, tutissime & praestantissime agit, omni aetati, & sexui, & statui aegri, imo & non verminosis convenit, atque sub omni fere forma & dosi solum aequae ac cum appropriatis unitum exhiberi potest, ut rite aliis lumbricos expellentibus praeferatur.

§. IX.

Vires reliquae.

Magnum nunc morborum & rebellium & supernaturalium quasi catalogum referre cogemur, si omnes & singulos, quos vermium cumulus in corpore nostro gigneret, helminthochorton vero expulsis his hostibus superare valet, nominare nobis proponeremus, atque ita facile esset illud Antepilepticum, Antispasmodicum, Anodynum, Stomachicum, Cephalicum &c. celebrare, id vero, ut longum nimis atque in-

(a) R. Pulv. Helminth. unam drachm.

Res. ialap. pin. tr. scrupul. un. c. dimid.

Syrup. de cich. c. Rhab. unam unc.

Aquae Menth. unc. quat.

M. d. ad vitr. s. omni hora dimidia exhibeatur cochlear unum donec exoptatus successus sequatur.

utile mittimus, quis enim ignorat, nullum esse adeo singulare symptoma, aut morbum, quem verminosa familia non producere valeat, & iamiam produxerit, sublata vero causa tolli effectum. Id vero volumus, alias quoque helminthochorto praeter vermifugas tribui vires, has rimari fas sit.

Salsum statim remedium, suo sale, succos & saburram tenacem, quae primas saepe vias obducit incidere, nullus facile negabit, ut sic aliorum salium vires exserere possit, atque ita leniter irritando, & motum peristalticum augendo attenuatos humores e corpore eliminare; num vero ideo *Absorbentis* titulum mereatur, dubitamus, non enim adeo evidenter fordes primarum viarum acidae sunt, nec alcalinae naturae conservae, atque sic perspicere non potuimus, quomodo STEFANOPOLI (a) inde *sal saponaceum purgans* produci crediderit, unde nam oleum desumit? viscida enim mucilagine repletam hanc plantulam esse, Graecum illum, felicem ceterum Practicum latuit. Cum dein praeter vermes, ut omnes norunt, vel in arte rirones sola quoque ductum intestinale gravans, & irritans saburra tormina, tenesmos, &

(a) *Mémoire* p. 7. & p. 17.

omnes intestinorum difficultatum species procreare possit, hinc *diarrhoeas* a STEFANO POLI & exper. Medico PARIS (a) inde curatus minime miramur, ut certe ipsi non putarint, qui principiis Medicis instructi sunt hi viri, absque discrimine in omni diarrhoea, specificè competere hoc remedium; sed, ut falsum attenuare, expellere sordes primarum viarum, tenacem mucum, vermes, totidem alvi fluxum, dolorum (b), flatuum affectuum hypochondriacorum, & histericorum causas (c). *Tonicum* dein ubi nominatur ab eodem Viro Medico PARIS (d) id quoque ei non specificè, sed omni falso competere, facile apparet; ut bene dicatur opponi temperiei debili, cacoehymiae pituitosae, fibrae laxae, atque obstructionibus viscerum chlylopoieticarum (e). Incidens dein remedium, lenè stimulans transpirationem promoverè, *diaphoreticis*, & diureticis annumerari (f) posse per se patet. Atque cum ipsa saburra primarum viarum, ut vermes mittam, putredinis & flatuum saepe causa sit, hinc *carminativum* simul helminthochorton & *antisepticum* (g) depraedici quoque poterit.

(a) L. c. (b) Ibid. p. 9. (c) Ibid. p. 10. (d) Ibid. p. 9.
 (e) Ibid. p. 10. (f) Ib. (g) Ib.

C A R O L I S T R A C K


PROF. MED. MOGUNT. &c.

DISSERTATIO

D E

E P I N Y C T I D E .

Moguntiae 1776.



NEque vulgaris neque omnino rarus morbus ἐπινυκτις est; de quo & antiquiores olim medicinae Professores, & superiore saeculo aliqui celebres viri, multique novi prostromis hucusque temporibus Medici & scripserunt, & disputarunt; quorum nomina, quoniam ea nota sunt, hic recitare superfluum esse existimo.

Ex his pauci (utique qui A. C. CELSUM veluti SENNERTUS secuti sunt) aliquantum rectius scripserunt; plurimi vero a recto longe abfuerunt. Quod in morbis, qui raro obtinent, fieri consuescit, quando per coniecturas scribitur, atque per opiniones disputatur.

Et iam in limine a nonnullis disputatur, Epinyctis quaenam morborum species sit? ad Psylraciamne, ad Terminthum, an ad Arabum Effere pertineat? quae quidem diversae sententiae, quoniam eae absque rerum cognitione fuerunt, tanquam vanae & supervacuae repudiari debent.

Diversa item curationum genera proposita fuere, prout suos quaeque Auctores habebant, qui nihil laudabile nobis reliquerunt. Utrique *cuius rei non est notitia, eius opinio certum reperire remedium non potest (a).*

Ego deposita tali disputationum contentione atque spreta supervacua ista differentiarum perquisitione hic ea proponam, quae Experientia in ipsis istius morbi curationibus docuit me.

Igitur, ut supra dixi, non vulgaris morbus Epinyctis est: siquidem in tanta tamque populosa civitate Moguntina inter quamplurimos aegros per longos successive annos non nisi duodecim ita affectos homines & videre mihi obtinuit, & curare eosdem. Idemque omnes simili modo ac ratione male habebant: neque eorum sive aetatis sive sexus, sive tempestatum
sive

(a) A. C. CELSUS de Med. in Praefat.

sive epidemicarum constitutionum, sive valetudinis etiam ante vitatae, diversitas quicquam ex morbo alteravit. Unde patet, habere illum quidem morbum suam sibi privatam causam, neque posse eundem communi cuipiam vitio attribui. Quae res omnem opinionum differentiam expungit.

Est autem Epinyctis pustularum genus, quod noctu erumpit, & magis quam interdiu excruciat: *peffima pustula est, quae ἐπινυκτὶς vocatur*. Ea colore vel sublivida vel subnigra, vel alba esse consuevit: circa hanc autem vehemens inflammatio est; & cum aperta est, reperitur intus exulceratio mucosa, colore humori suo similis. Dolor ex ea supra magnitudinem eius est; neque enim ea faba maior est. Atque haec quoque oritur in eminentibus partibus, & fere noctu, unde nomen quoque a Graecis ei ἐπινυκτὶς est impositum (a).

Et si enim aliqui ex his, quos ita affectos vini, aliquot dies ante male habuissent; nihilominus nulli horum aliqua pustula interdiu evenit, omnes noctu eruperunt. Unde morbus

Delect. Opusc. Vol. XII. S

(a) A. C. CELSUS Lib. V. cap. 28.

item iure *ἐνθυξτις* a Graecis, a Germanis ideo *der Nachts-Brand* appellatur.

Ex his alii aliquot dies ante male habebant, quam pustulas noctu acceperunt; alii nihil horum sentiebant, sed diluculo ita uri se pustulis mirati sunt.

Qui ita aliquot dies male traxerant, fatigata membra habebant, & toto corpore torpebant, faciem pallidam, collapsas genas tristes cavosque oculos habebant; & cibos nauseabant; spiritum lasse ducebant, atque arteriarum pulsus parvum, debilem, frequentem, aequalem habebant; neque inter haec, donec eruptae pustulae fuissent, aeger sive alsit, sive arsit. Atque tale quidem morbi exordium Stadium Incubationis posset appellari.

Eruptis pustulis dolor in plaga quemadmodum ex igne erat: maior, ubi pustulae in uno loco convenere, & veluti cohaeserunt: minor, si discretas atque procul invicem dispersas eadem fuere.

Ubi Epinyctis unicam tantum corporis partem occupavit (quemadmodum id iuxta quatuor aegros obtinuit) plaga quinque vel sex pollices longa, & quatuor fere pollices lata erat; tota ubique profunde rubra: intraque eandem sub tenui cuticula quamplurimae pustu-

lae Lente non maiores extabant, tenui lymphâ refertae veluti ab unctione: quarum plurimae, ut aqua fontis expertes coloris erant: his multae sublividae, aliquaeque lividae interfedebant. Lividus autem color ipse non pustulae sed ipsi infra cuti inerat.

Progressu temporis aliquantum ex rubro colore in plaga deletum est, atque alba in cute interstiria evenerunt; quae nonnisi rubrum limbum cuique pustulae circum reliquerunt.

Ad id temporis pustulae, quae sublividae ante fuerunt, factae lividae sunt, lividae autem ipse nigrae.

Post, rupta pustula humor effluxit, lace-
raque cuticula fauciae infra cuti incubuit eidem-
que adhaesit, quae postremo inutilis ut faex secessit.

Interea calor in rubro Limbo, qui nigras pustulas ambiebat, intendebatur atque dolor, orta-
que febre facta suppuratio est, quae corru-
ptam cutim ab integra seiunxit, ibidemque lo-
corum foveam reliquit, qualem variolae ex-
dere consuecunt.

Atque sic Epinyctis, cuius pustulae omnes in una plaga convenere.

At discretæ dispersaeque pustulae (quales oënes vidi) ubi fuere, omnes ut eruperunt,

subnigrae erant : apertaue item pustula humor effluxit, ruptaque cuticula nigrae infra cuti imposuit se eidemque adhaesit : post ambae exaruerunt adeo, ut nigra istius cutis portio dura evenerit, non secus ac corium candente ferro adustum. Paulo post ruber in integra cute circulus, qui corruptam escharam ambiebat, factus profundi coloris est, in eodemque ortus maior calor est, qui pus coxit; quod corruptam partem a sana seiunxit. Purgato ulcere facta cicatrix est, quae foveam reliquit.

Porro, discretæ pustulae cohaerentibus maiores erant, lentis nempe aut pisi latitudinæ, vix faba maiores. Unica foemina ampulas nucem moschata maiores habebat.

Denique Epinyctidis pustulae omnes ex tenera raraque corporis cute eruperunt: nunquam ex densa. Etenim decem aegri pustulas e lumbis suprave abdomen aut versus pubem habebant; duo aegri tales iuxta pectus atque secundum collum; neuter in dorso brachiisve aut cruribus.

Postremo neque & hoc praeterendum sed notatu dignum est, Epinyctidem semper eandem & sibi omnino similem fuisse tam in integris corporibus, quam in his, quorum valetudo antiqua aliqua labe ante vitiata fuerat. Prehen-

derunt enim Epinyctides quinque prosperae valetudinis Infantes: unam foeminam, quo tempore febre tertiana laborabat; unam virginem, quae mensibus gaudebat; alteram, quae occulto mammae cancro male habebat, virum unum, de quo, quod podagrico atque venereo miasmate affectus esset, suspicio erat; item, senem tympaniticum, quem arthritica colica exagitabat; denique septuaginta annorum vetulam, cuius mammam ulceratus cancer exedebat; postremo mulierem anno 1775. quo tempore & fluxiones & ophtalmiae, & lippitudines & eruptiones ad labia, & variolae & morbilli, & scarlatina febris, & erysipelata & ambustiones populares erant. Diversos omnes hos Epinyctis similiter male habebat.

Ex quo capite ad credendum persuadeor; Epinyctidem a singulari atque privato quopiam miasmate excitari.

Ut autem sinistra valetudo, quam antiqua labes ante vitiaverat, nihil ex Epinyctide mutavit; ita Epinyctis ipsa, si supervenit, nihil ex morbo, qui ante insedit, alteravit. Contra (quod maxime mirum videri posset) eiusdem pustulae ex integris partibus, procul a corruptis eruperunt. Eruperunt nimirum supra ventrem atque iuxta pubem quinque Infantum prosperae

valetudinis: eruperunt procul ab obscœnis partibus viri, qui ob venericum venenum suscectus erat: eruperunt in regione renali virginis infra eandem mammam, quae cancro occulto affecta erat: eruperunt item supra pectus iuxtaque collum tympanitici, qui arthritica colica laborabat, & ventrem ipsum expertem reliquerunt: eruperunt denique omnes ex adverso in integra corporis parte a sterno versum latus supraque collum vetulae, cuius mammam cancer exulceraverat; contra nulla erupit, quo latere ulcus erat. Quae res item singularem mali indolem significat.

Atque talis quidem Epinyctis erat. Sequitur curatio, qua cum profectu usus sum. Haec in universum duplex erat: altera quae pustulas implere iuvat, altera quae pus perfecit.

Rectius autem in quatuor stadia morbus distinguitur; quorum primum Incubationis, alterum Eruptionis, tertium Coctionis, quartum Suppurationis sive Depurationis iure nominari potest.

Incubationis stadium illud morbi primordium appello, intra quod natura veluti homo Incubo oppressus, vitata ista materia aliquot dies ante quatitur, quam victrix eandem extus pellit. Id, ut supra memoravi, non saepe ob-

tinuit: sed contra plurimi eorum, quos accepi, protinus a pustulis aegrotare coeperunt quin, veluti ipsi quidem retulerunt, aliquod futuri morbi indicium pridie habuissent.

Ubi pustulae extant, morbus patet; eiusdemque cognitio, quoniam certa est, certum utique reperire remedium potest. Non item cum morbus aliquot dies trahit, antequam pustulae erumpunt. Incertum enim est id, quod futurum est; maximeque in morbis, qui familia initia habent, neque certas sibi notas retinent. Quae res, quoniam incertum iudicium efficit incertam quoque medelam reddit.

Quare operae pretium facturum me esse existimo; si eas notas hic posuero, per quas ante nosci possit, Epinyctidis materia quod intus lateat.

Igitur, ut supra recitavi, si absque manifesta ratione fatigata membra sunt, totumque corpus torpet, si facies pallida est, si collapsae genae, & tristes cavique oculi sunt, si aeger cibos nauseat, & spiritum lasse ducit; si arteriarum pulsus parvus & frequens debilis atque aequalis est, nec inter haec aeger vel alget vel ardet, neque vomendi desiderio angitur; scire licet, sphacelosum miasma, cuius generis Epinyctis est, intus residere, quod extus pelli debeat.

Ubi id cognitum erit, protinus medicamentis restaurantibus succurrendum est; scilicet his, quae suppressas naturae vires excitent, eandemque in expellendi opera adiuvent.

At ubi morbus sive corporis sive medicinae beneficio explicuit se, ipsaeque pustulae, veluti saepius obtinuit, extant, certior medicina est. Potus nempe calidus non nimium aromaticus esto; cibus, cremor prisanæ; medicamento autem mixtura ex aquae florum sambuci unciiis sex, roob sambuci drachmis duabus, & nitri semidrachma, adiecta syrupi rubi idaei uncia: scilicet ut his vitiosus humor extus feratur quo natura tendit; utique per cutim tanquam locum conferentem. *Quae ducere oportet, quo maxime repunt, eo ducere oportet per convenientes, locos (a).*

Per haec atque progressu temporis, quidquid intus adversi est, idem omne erumpit, turgent pustulae totaque plaga (nempe quae in cohaerentibus pustulis omnis rubra ante erat) nunc in areolas, quae pustulas ambiunt, distinguit se; arteriae ipsae liberalius moventur, atque sanguine implentur, earundemque pulsus maior fit: proveniunt oculi, facies ipsa colorem flo-

(a) HIPPOCRATES. Aphor. 21. Sect. I.

remque recipit , totumque corpus torpor dimit-
tit. Post rampuntur pustulae , atque suum hu-
morem emittunt : deinde rubor ipse a pustulis
albis evanescit , siccaeque pustularum pelles fur-
furis instar decidunt .

Aliter autem res iuxta nigras pustulas se
habet , quales discretæ dispersaeque esse consue-
scunt ; & non paucae intercohaerentes . Etenim
calor atque rubor in circulo , qui eas ambit ,
intenditur ; nova oritur febris , arteriae inten-
sius moventur , earundemque pulsus plenus , fre-
quens & celer evenit : circumque & infra cor-
rupta stigmata inflammatio est , quae pus co-
quere debet . Quare etiam istud morbi curricu-
lum Stadium Coctionis appello .

Ad id temporis aquam Potui do , cibo
vero cremorem prisanæ , adiecto citrei succo :
medicinae autem item mixturam , quam supra
posui , ammissis extracti corticis peruviani dra-
chmis tribus ; scilicet ut per istud quoque gene-
rosum remedium & puris coctio perficiatur , &
nequid sphacelus circum offendat .

Confecto pure corruptae partes ab integris
separantur ; depuratoque ulcere cicatrix fit ,
quae foveam relinquit . Ultimum istud stadium
Depurationis est ,

Neque iste morbus obnoxius recidivis erat ,

Utique quidquid suppuratur, non revertitur.
Ipsa enim maturatio & iudicatio simul, &
abscessus (a).

Atque talis quidem mea Epinyctides curandi ratio hucusque fuit, quae, etsi enim diversa ab aliorum auctorum opinione sit; nihilominus nunquam fefellit me.

(a) HIPPOCRATES. de morbo populari. Lib. VI. Sect. 3.

ODOLPHI MURRAY

MED. ET CHIRURG. PROFESS.

DISSERTATIO ACADEMICA

D E

SENSIBILITATE OSSIUM

MORBOSA.

Upsaliae 1780.



§. I.

SI quis unquam mortalium, per sua merita, immortale sibi peperit nomen, certe illustrissimus ab HALLER is est, quem ultima venerabitur & maximi faciet posteritas.

Singula enim eius Anatomica & Physiologica Scripta (de ceteris alii iudicent) tantae eruditionis, & in perscrutandis naturae mysteriis, sagacitatis produnt documenta, ut quempiam illi equiparandum vix ac ne vix quidem iustus rerum arbiter inveniat: praecipue vero gloriam eius adauget, quod in enodandis diffi-

cillimis Physiologiae partibus sollertissime desudaverit, inque iis plura, quam ante illum ullus, praestiterit.

Ut vero unicum, quod ad materiam in hac Dissertatione pertractandam ducet & summae est celebritatis, documentum adducam, nemo sane doctrinam sensibilitatis & irritabilitatis mille experimentis ab eo enodatam & stabilitam perleger, quin summa perfundi se admiratione sentiat Viri, qui ad hanc Physiologiae partem illustrandam & ab erroribus repurgandam ultimos adhuc vitae annos impendere grave non duxerit. Praesensit enim emolumenta maxima in totum genus humanum ex hac doctrina redundatura, hique suavissimi stimuli ad laborem difficillimum perficiendum incitarunt animum eius, superabiles omnes spernentem difficultates. Erat enim contra falsas magnorum Virorum opiniones per experimenta in vivis animalibus instituenda dimicandum. Quum vero animadverteret, plurimos errores saepius repetitis observationibus unice profligandos per minimam in experiundo negligentiam facile exoriri, alios neutram in partem inclinantes, eosque sagacissimos Observatores ad eadem pericula invitavit; quo coniuncto studio doctrinam hanc demum certissimis superstrueret fundamentis.

§. II.

His suis itaque conaminibus limites genuinos inter sensibilitatem & irritabilitatem animantium praescripsit, ut non solum pro certo sciamus, fibris muscularibus unice irritabilitatem competere, nervosque sensus acerrimi esse participes; verum etiam has duas corporis facultates nullam habere cognationem; musculo enim tacto, in ipsa eius carne mutatio subita & efficacissima exoritur, quae tamen ulterius non defertur; si vero nervus a corpore quodam attingitur, nullam ipse sensibilem mutationem subit, verum impressiones ei illatas ad cerebrum propagat, ibique animam de contactus indole & vigore consciam reddit.

§. III.

Sed nervos eosque solos sentiendi facultate esse praeditos, partesque omnes, quibus nervi defunt, sensu etiam destitui, altera eaque probatissima est HALLERIANA adsertio. Licet enim nonnulli magni nominis Viri, inque his divus BOERHAAVE & BIANCHI totum corpus ex nervis componi crediderint, subtilioribus

tamen dissectionibus & ipsis experimentis in vivo animali institutis didicimus, tum nervis tum sensu quasdam carere partes. Sic duram piamque matrem, arachnoideam tunicam, tendines, ligamenta omnia, periosteum, latissimas membranas, pleuram nempe & peritoneum, telam cellularem, nullam nervi fibrillam in suam intimam compositionem admittere, & sine doloris sensu sauciari atque lacerari, ex plurimis certis experimentis novimus. Negari quidem non potest, a validissimis Adversariis sententias has fuisse oppugnatas; eorum vero argumenta plurima, ratiociniis astutissimis potius, quam experimentis stipata, repetitis non solum novisque experimentis HALLERUM ipsum destruxisse, verum etiam causas errorum, & in argumentando fallaciam detexisse, merito gaudemus.

§. IV.

Cum enim funiculi nervorum tela cellulari inter se & ad partes appositae ligentur, eiusque ope numerosi nervuli in superficie tendinum & capsularum ad destinatas sedes decurrant, omnis cura adhibenda erit, ut prius a membranis suis cellulosisque vaginis vel carne ex tendinum superficie in ulceribus efflorescente, repurgentur

partes irritandae, ne sensus sub experimento instituendo excitatus his adscribatur, qui nervis tamen circum repentibus debetur. Contra hanc cautelam non adeo facilem observatores adversantes peccasse, ipsa nos docet experientia. Altera est cautela, ut sana nullaue labe infecta loca inquisitioni subiiciantur. Nam, si vel maxime non nunquam pari eventu susceptum experimentum in membris morbo affectis succedit, commutationem tamen aliquando tantam ex morbo partes subeunt, ut tendinum e. gr. ipsa exterior substantia resolvatur, huicque resolutioni nervi, extus in cellulosa circum ludentes, admisceantur, adeoque tendinum massas corruptas sensiles inveniamus, quas in aliis animalibus sanisque insensibiles deprehenderemus.

§. V.

Hanc vero alterationem singularem insensibilium partium nullam citius subire puto, quam ligamenta, & nisi ex ipsa eorum structurae transmutatione morbosa rationes phaenomenorum eruere liceret, parum abesset, quin in eam fallacem licet abriperemur sententiam, ut partes nervorum plane expertes, morbosa sub constitutione, sensum statueremus adipisci. Etenim si

vulnus quoddam ligamentis sanis infligitur, aut tota capsula articularia ad evacuandam aquam aperitur, perforatur, amburitur, causticis liquoribus irritatur, ne minimo doloris sensu afficitur homo: quando autem pure clam collecto, decubitu humorum lento & acri fungove structura ligamentorum ipsa patitur, incisiones non solum dolorificae esse solent, verum etiam aegri continuo dein dolore non raro excruciantur, in convulsiones & spasmus cynicum cito aliquando abeunte. In his autem morbis lente prorepentibus ligamentorum textura maximam subire solet mutationem; humore nempe stagnante & irritante, cellulosa tela ipsa, tam ea quae fibras singulas ligat, quam quae ligamentosas fibras formavit vel exterius stratum totum obregit, excrescit, turgescit & adeo evolvitur, ut ipsum articuli volumen augeatur, & nervi inter extrema strata leviter antea decurrentes, non solum fortius ad ligamenta revinciantur, sed ab ipsa morbosa substantia quasi circumvelentur & includantur. Et, si conicere liceat, vero simile videtur, nervorum ipsorum telam cellularem, singulas fibrillas in fasciculos colligantem, irritatam evolutione nova adaugeri, quo fibrillae, sine ulla interioris medullae irritatione in latiora spatia dispersae, multo plura quam in statu sano

sano loca, externae violentiae impatientia reddunt. Etenim in plerisque nervis a cerebro remotis, non solum fasciculi cylindrici, nusquam confusi, sed ad finem usque distincti, verum etiam horum nervuli minimi, microscopio vix distinguendi, si arte separantur, tenera cellulositate obducti & ligati conspiciuntur, eaque cellulositas adeo non nunquam augetur & durescit, quod in ischiade nervosa semel observavi, ut triplam nervus acquirat crassitiem. Praeterea diu afflicti nervi & in pauca puncta vi quadam continuo laceffiti multo acriores, cum denique irritantur, in anima excitare videntur sensationes, quam cum antea nullam perpeffi fuerunt iniuriam; unde etiam prono alveo fluit, quod ab acri materia, circa articulos collecta, vel alio modo irritati nervi vehementius vi illata afficiantur.

§. VI.

Ab iisdem fere causis sensibilitatem telae cellulosae singularem, quam ill. MECKEL nuperrime defendendam in se suscepisse videtur, derivandam esse reor. Nam cum nervi quemcumque stimulum perfontientes tantum imperium in arterias exercent, ut, ad averruncandum

Stimulum, humores ad loca stimolata derivent & ipsum sanguinem per vasorum parietes in tela cellulari exprimant, sensibilitas vero eorum a stimulo perpetuo agente adeo increfcit & cum circumiacentibus ita communicatur, ut levissimo tactu ventique halitu moleste tota pars afficiatur; id nostram admirationem movere non debet, quod quaecumque fibrilla ab inflammatione vexata ad tactum nunc doleat, nosque sentientium locorum limites cum insensibilibus confusas existimemus. Sub omni praeterea vel lenta vel violenta inflammatione nova filamenta cellularia evolvuntur, telaque cellularis prius existens tam variis subiicitur mutationibus, ut in locis saepe, ubi parca fuerat, exuberet, in aliis vero in arctiora vincula concreascit, adeoque priorem nervorum cursum non tantum perturbet, verum etiam iis in locis, ubi antea nulli fuerint, alios recipiat atque condat, veluti novi surculi nervorum hic sub inflammatione progerminassent.

Sed aliud demum phaenomenon singulare adhuc est adiiciendum: videmus nempe, cum magnam semel subierunt nervi vehementiam, quod impressiones communicatae, morbo profligato, superstites saepe maneant, hisque nervis multo iam delicatiora sentum inesse. Singula-

ritatem hanc praecipue in iis observamus, quibus natura multo subtiliores dedit nervos, quorumque corpus debilitate quadam nervorum laborat, qua ad impressiones retinendas aptiores & ad sensationes a minimo stimulo excitandas procliviores reddi videntur. Et ex his coniunctis causis forsan sensibilitas cellulosa scroti, quam cel. MECKEL in illustri hernioso observavit, exorta fuit. Nam quod ingens numerus nervorum in superficie darti circumvagetur, darts vero ipse & cellulosa subiacens, licet nervuli quidem eam permeent, nulli vero ibi permaneant, insensibilis sit, non dissectiones tantum testantur, verum quoque operationes chirurgicae ad hydrocelen radicatus curandam institutae. Darti nempe discisso, nullo de dolore amplius queritur aeger; si vero lenta inflammatione vel acri quodam humore prius scrotum testesque corrupti fuerunt & nervi supra dictam subierunt mutationem, ad unumquemque cultri ictum aeger dolore quasi fulmine percutitur.

§. VII.

Allatae circa cellularis telae apparentem sensibilitatem rationes ad explicandum ossium

sensum, quem hisce pagellis pro ingenii mei modulo tueri volui, parum conferunt. Magni nominis Viri eam in dubium vocant, & aperte negant, nervos ad ossa deferri, quum ossa sana terebratula sine doloris sensu perterebrentur. Expendamus igitur argumenta, quibus de sensibilitate ossium convincamur iisque alia contrariam sententiam confirmantia adiiciamus; ne sine sufficienti ratione partes summi HALLERI in hac re deseruisse videamur.

§. VIII.

Quemadmodum omnes partes nervis carentes nulla sensatione esse praeditas, veritati atque experientiae quotidianae consentaneum est, & ad explicanda phaenomena in oeconomia animali obvia confert; ita illud certe, quod celeb. CALDANI (a) protulit, contendens, non omnia loca, quae nervis sunt instructa, perceptibili praedita esse sensatione, ad nodum hunc gordium solvendum maxime idoneum invenio. Plura exempla adferri possunt sententiam hanc affatim confirmantia. Hepar, splen, re-

(a) HALLER Mémoire sur l'irritab. & la sensib.
T. III. p. 71.

nes, pulmones & vasa arteriosa nervos accipiunt plures, cum vero subtiles sint & tenuiores, viscera haec, ut & vascula fere insensibilia deprehenduntur, ita ut nullo fere doloris sensu a causticis laceffi & incisionibus irritari possint. Inflammationes, quae graviores comitantur supurationes, in hisce visceribus detectae fuerunt, nullis omnino signis praeceuntibus. Quid? quod saepe uterus, magno nervorum plexu ditatus, inflammatur & sub partu laeditur, immo in operatione caesarea cultro aperitur sine magna violentiae sensatione. An vero hisce partibus, quae, licet nervos habeant, attamen parum vel nihil sentiunt, ossa sint adnumeranda, quaestio est, quae, quamquam variis iisque difficilissimis premitur difficultatibus, nostram meretur investigationem. Binae enim viae, quibus existentia nervorum in parte aliqua demonstrari solet, artificiosa nempe nervi dissectio, vel si ob subtilitatem hoc fieri vix potest, experimenta in animantibus instituta, ad ossa quod attinet, tam lubricae & erroribus obnoxiae esse videntur, ut omnia tentamina nil nisi incertum rerum prodant statum. Summi etiam Anatomici de nervis ossium ambigue loquuntur, sique nonnulli eos prorsus negent, alii paucissimos, non ubique, sed in nonnullis tantum locis dis-

perforos admittunt; vel alteram, licet timide ineuntes viam, eorum existentiam experimentis suffulti vel negant vel vix admittunt. III. HALLERUS (a) aperte dicit, paucissimos ossa per tubulos suos arteriarum sodales penetrare, ossa plana vero, ut in cranio, nullos, qui innotuerint: quam leve pretium autem his cognitis adscribat, ex alia assertione magni huius observatoris (b) perspicitur, cum ossa non sentire dicit.

Et sane rationes non desunt, quibus eorum in ossium nervis detegendis impotentia expurgari possit. Nervi enim in artubus, alias durioribus membranis obducti, musculos penetrantes, vel super ossa decurrentes, in adeo subtilia filamenta abeunt, ut acutissimi plures observatoris oculum effugiant, nec subtilissimum instrumenti tactum ob mollitiem pulpae cerebri simillimam ferant. Quo propius etiam nervi ad fines suos veniunt, cylindricam suam amittere videntur formam, & in planam quasi fasciam aegre ab ipsis cellulosis filis fortioribus distinguendam extendi. Hanc facile decipientem formam plurimi s. ti 7. mique paris & cer-

(a) Element. Phys. Lib. X. T. IV. p. 198.

(b) Ibidem p. 272.

vicalium nervi super cranium circumvagantes, plexus hypogastrici abdominis furculi multique alii acceperunt; unde non mirum, quod cum descriptionibus auctorum adeo raro dissectiones ex arte convenient & difficiliter iidem detegantur nervi.

Arterias nervos frequentes comitari & communi cellulosa cum illis irretiri, ubicumque videmus. Raro enim truncus nervi maior longum incedit ductum, sine arteriae cuiusdam comitatu, quod in nervo crurali & ischiatico est videndum, sed nervus phrenicus suum etiam habet comitem, nervi brachiales, plerique nervi musculorum suos. Quo subtiliores vero evadunt, eo fortius arteriis adglutinantur, ut ab his separari nequeant, nec sine acutiori disquisitione pateat, an arteria sine sodali nervo incedat. Eodem porro modo, quo arteriolae furculos subtilissimos emittentes, cellulas tenuiores obambulant, nervi pariter ramosi, retia nervea utcumque formantes, superficiem telae cellularis circum legere videntur. Mirari igitur non licet, quod veterum plurimi; totque recentiores telae cellulari, periosteo atque pericranio sentiendi vim adscripserint, cum in ipsa harum membranarum superficie furculos nerveos detegere potuerunt & experimentis; etiam si fallas

cibus, sententiam comprobari autumarunt. Ab hoc errore cel. CHESELDEN & summus HALLER, cum suis illustribus affeclis, inter quos cel. CASTELLUM, FONTANAM, TOSSETTUM & CALDANUM nominasse sufficiat, innumeris suis experimentis, nos iam diu liberarunt, disceptationem de sensatione ossium aliis relinquentes.

§. IX.

Quamquam igitur difficile nervos ad ossa usque prosequi liceat, & a periosteo ad alias transcurrere partes videantur, in nonnullis tamen locis eos ad canaliculos ossium deducere possumus. In tuberculo occipitali, musculis insertionem praebenti, praeter vasa plura penetrantia, nonnulla fila nervorum cervicalium subtilia arteriarum ductum ad ipsam ossis substantiam sequi videntur, & ramuli quidam subtilissimi temporalium profundiorum, crotaphitide penetrato, alis sphenoidalibus maioribus se immittunt. Plures in cranio detegere non potui, sed in artubus multo facilius procedit labor; nam in ossis brachii apertura, sulco bicipitali vicina, in femore prope lineam asperam, in tibiae facie posteriore & superiore, inque cal-

canei latere interno cum ipsis arteriis nutritiis nervi immerguntur, arteriae in ductu suo re-
vincti. Non desunt igitur exempla nervorum
offium interiora penetrantium.

§. X.

Altioris vero indaginis exoritur iam quae-
sio, quomodo nervuli hi offium dispergantur,
utrum omnes ad medullam ossis tendant, an
vero nonnulli in fibris ipsis ossibus subsistant.
Omnis, quaecumque tandem fuerit, subtilior
dissectio in hoc negotio deludatur & per expe-
rimenta in vivis instituenda, veritas unice erit
enodanda. Primus ergo, ni fallor, cel. DU-
VERNEY (*) fuit, qui medullosa farcimini,
tenerrima pellucida cellulositate arachnoideae si-
mili extrinsecus obducto, inque minora, mul-
tiformia, vesicularia loculamenta diviso, certis
argumentis sensibilitatem adscripsit, licet divus
HIPPOCRATES iam adferat, vulnera offium
ad medullam penetrantia, deliria ob dolorem
excitare. Contendit enim, arterias, venas ner-
vorumque propagines, communi vagina cellulari

(a) Mémoires de l'Acad. des Sciences, Paris A.
1700. p. 196. item Oeuvres Anatomiques 1761.
p. 352.

inclusas & canaliculos ossium permeantes, in superficiem huius membranae infinite multos emittere ramulos, eosque cum medulla eam vitalitatem communicare, quam in sequentibus detexit experimentis. Quum enim tactu rudiore medullam eorum, quibus crura vel brachia amputata erant, laceffens, aegris eo dolores excitari observaret, aliis magis convenientibus experimentis eadem tentamina in animalibus instituit. Femur nempe vivi animalis, carne omni membranisque discissis, ut os ab omni parte nudum esset, ferra detruncandum curavit, cumque inde vehementibus cruciatibus angeretur animal, ab experimento tandiu destitit, usque dum tranquillitatem pristinam recuperaret animal, tumque stylum in medullam intrudit, quo vehementissime sensationis probabantur signa. Harum observationum certitudinem celeb. ALEX. MONRO quoque (a) dissectionibus suis innixus, defendere non dubitat, nec minus clar. DEVENTER & BERTIN (b); eadem sub experiundo phaenomena saepenumero viderunt. Si vero contra haec acute obiiciunt adversarii, animalia tot praecedentibus incisionibus

(a) The Anatomies of human bones, Edinburg. 1743. p. 20.

(b) Traité d'Osteologie p. 216.

prius adeo fuisse exagitata, ut veteri liceat, ne dolor, quem a nova irritatione derivant, potius a priore fuerit excitatus, cum adeo difficile sit sub eodem experimento novos a praegressis distinguere sensationis effectus; eandem certe contra alia experimenta; quae partium denudationem requirunt, ferri posse existimaverim objectionem, licet vana esset, si cautelae a cel. DUVERNEY adhibitae rite observantur. Confirmatur etiam haecce sensibilitas medullae cel. BORDENAVII experimento (a), cum sine praecedente violentiore laniatione, canalem ossis cuiusdam aperiret, & irritatione membranae medullae animal doloribus affici vivis, videret. Sique dubium quoddam eo tempore nihilo fecius contra sensibilitatem medullae ei haerebat, illud experimentis cl. TROIA (b) profligatum esse speramus. Hic enim, cum ad enodandam difficilem circa regenerationem ossium materiam columbarum canumque femora amputaret, & medullam stylo immisso destrueret, violentissimi doloris signa constanter edere animalia, vidit, prioris iniuriae immemora.

(a) *Mercure de France* Jun. 1757.

(b) *De novorum ossium regeneratione*, Lutetiae 1775.

§. XI.

Morbi denique medullam adgredientes sensibilitatem eius in aprico collocare videntur. Quando enim medulla ossium, mitem suam, per humores lue venerea, scorbuto, scrophulis atque rachitide inquinatos, amittit naturam, & in acrem putridamque saniem commutatur; inflammationes clandestinae mox exoriri solent. Sub his autem in meditullio ipso citius tardiusve dolores excitantur atrocissimi, fixi, nunc continui, nunc pungentes, & cum calore atque pulsatione interna coniuncti. In ipso denique canali abscessus generantur, substantiam ipsam ossis in omnem sensum dilatantes & carie illam intus destruantes. Dolorem vero hunc in ipso esse eiusque medulla residere, inde patet, quod partes ossa obtegentes, sub initio morbi nulla sint contaminatae labe, rumoris elevati pressio nullum doloris incrementum faciat, calida vero intus sumta vel externe applicata eum adaugeant, quodque, cum demum caries ipsam superficiem destruxit, ossea substantia in pumicem quasi conversa, aliquando ad tactum summam producat sensibilitatem. Terribilem hunc morbum a PETRO DE MARCHETTIS, M. A. SEVE-

RINO multisque aliis descriptum, sub spinæ ventosæ nomine novimus, eumque a nodis rachiticorum indolentibus distinguimus, licet inficias non sit eundem, spinam ventosam extrema ossium præcipue adgredientem, in principio morbi, quo aliquando ossa unice inflata apparent, nec semper dolent, cum iis magnam habere similitudinem. Exoriente vero dolore profundo, cute etiamsi adhuc intacta, malignam, cancro comparandam, tumoris indolem mox agnoscimus. Spinæ ventosæ præterea extremitates ossium non solum adgrediuntur, verum etiam alias ossium partes, ut diaphyses & ipsum cranium. In diploë cranii RIOLANUS iam humorem invenit collectum, acerbissimi doloris atque exostoceos causam, & BONE-TUS in *Sepulchreto* suo immedicabilis doloris rationem a sanie inter binas cranii tabulas derivat. Saepe etiam abscessus in internis ossium latebris sine ossium intumescencia generantur, qui summos, & cum perforatione ossis solum levandos, excitant cruciatus.

§. XII.

Sententia nostra de sensibilitate medullæ ossium, quam etiam ill. HALLER aperte ne-

gare non videtur, sic declarata, alteram eamque multo difficiliorem attingamus quaestionem, an nempe ossea substantia sensu sit praedita? Nervos nonnullos canales ossium penetrare audivimus, sed cum dissectione Anatomica fibrillas ipsi substantiae sese immergentes detegere non valeamus, plures celebratissimi Viri ipsam naturam viventem consulere allaborarunt, cumque sub ignis (a), butyri antimonii, spiritus nitri fumantis aliorumque corrodentium applicatione, & ab ictu, rosione atque ipsa ossium perterebratione nullum doloris sensum exortum fuisse observarunt, omnem ossibus sensationem abrogare non dubitarunt. Quid? quod **CHESELDEN**, **HALLERUM**, **CALDANUM** & **VERNAM**, cet. testes habemus oculares, quod cranio in aegris, sensus & mentis optime compotibus, ope trepani, perfosso, hi scissitati declararunt, se nihil sentire, nec ullo sub operatione angi dolore. Perforativo etiam & radula Chirurgi superficiem ossis corruptam saepe abradunt sine ullo aegri incommodo.

Sed pulchra etsi haecce experimenta primo intuitu totum disquisitionis cardinem sustulisse

(a) *Mémor. sur l'irrit. & sensib. Epist. CALDANI*
T. III. p. 36.

videantur, puto tamen, illis nil aliud demonstrari, quam quod ossa sana vel leviter corrupta omni sensu sint expertia, nervique latentes; si qui adsunt, naturalem suam facultatem non exserant. Sic etiam cel. CALDANI, cum de insensibilitate nonnullarum partium agit, sequenti ratione caute se exprimit: „aut nulli in iis partibus, quas insensibiles praedicavimus, inveniuntur nervi, aut si quidam existunt, ita talem videntur induisse indolem, ut impressiones externas recipere atque transmittere non valeant, adeoque sensu carent (a)“. Nec aliud de his subtilioribus surculis sane sperandum erit, quippe cum firma substantia interpositos nervos ita perstringat & comprimatur, ut obiectorum impressionibus animam movere nequeant. Uti enim callis obductae manus pedumque plantae sensum subiectorum nervorum non experiuntur, artusque compressione protractione nervorum stupent acrioremque sensum & denique omnem amittunt; sic etiam ii, qui ad ipsam substantiam ossium dividuntur, materia adeo compacta atque dura non possunt non quasi strangulari & proprietates suas essentielles exuere. Extrema praecipue ossium strata, quas

(a) Ibid. p. 348.

semper firmiora sunt, minima produnt sensus indicia, interiora autem & diploë multo maiora (a), cum textura heic mollior, totum nervorum organismum nondum destruxerit.

§. XIII.

Si vero haecce fortiora vincula nervis ab osseis fibrillis imposita, rursus in affectionibus ossium variis solvuntur, hi deperditas vires recuperare videntur, ita ut omnes illatas iniurias aegre ferant. Scio quidem hancce receptam & a multis observatam sensibilitatem a nonnullis fuisse in dubium vocatam, ab aliis varia ratione explicatam vel etiam plane reiectam (*). Sed argumenta his obliicienda & ex praxi petita non levioris esse ponderis & difficulter refelli credo. Casum ergo primum enarrabo, eo memorabiliorem, quod meo quidem iudicio; sensibilitatem ossium extra aleam dubitationis collocare videatur. Debeo illum cel. D. Praefidi, qui Lugduni Gallorum anno 1774. commorans, aegram

(a) Anatomie chirurgicale par Palfin retendue par Petit T. I. p. 17. an. 1753.

(*) Lege commentat. ill. HALL. T. III. p. 1. Nov. Comment. Gott. 1773. insertam.

aegram in Nosodochio magno quotidie visitavit, & ipse experimenta, svasore cl. CARET, Nosocomii tum Chirurgo primario sagacissimo, varia instituit. Accipe igitur illa, quae ex adversariis suis excerpsit & mecum communicavit.

Ancilla XXXVI. circiter annorum, quae supra indicato anno innumeris angebatur cruciatibus, malorum suorum natales lapsui ante sex retro annos facto adscripsit. Ex scalis enim fortuito decidens, caput in lapidem ita illisit, ut in ossis parietalis medio cutis vulneraretur. Laesionem hanc autem adeo levem credidit, ut sine chirurgi auxilio eam se consolidare posse speraret. Cito etiam hoc successit; cum vero cicatricis formatio ante ulcusculi perfectam depurationem promoveretur, illa, ut fieri solet, inaequalis, crassa atque ad tactum dolens fuit, quae tamen incommoda, successu temporis, mitigari aegra speravit. Sed post biennium cicatrix multo turgidior facta, tam acerbe dolere incepit, ut noctes atque dies insomnes transigere cogeretur. Dirupta demum cicatrice, mitigati sunt violentiores cruciatus, cumque ulcusculum aliquantum dilataretur & aptis remediis purgaretur, omnis dolor discessit, & coalitio ipsa non tarde insecuta est. Eodem vero passu quo ulcus coivit, dolores consueti capitis, nulla proflic

gandi arte, iterum increverunt. Adivit demum aegra summis defatigata doloribus clariss. CA-RET, auxilium ipsius sibi expetitura. Hic sub capitis examine duas cicatrices sibi vicinas inveniebat, recentiore nempe & primum, easque tumidas, inaequales, duras & ad tactum dolentissimas. Excidebat igitur ambas ad os usque, quod tum carie late erosum deprehendebat. Ex hac quidem operatione lenimen iam sensit exoptatissimum aegra; cum vero cariei esset obveniendum, totam ossis erosi superficiem a suis tegumentis probe liberatam, butyro antimonii, lacte aliquantum edulcorato, penecillo oblinivit, probe simul sollicitus, ne adiacentia eo polluerentur. Inunctionem vero illam adeo graviter ferebat femina, ut statim atrocissimis premeretur doloribus & convulsionibus vehementissimis totum corpus exagitantibus, quas tamen acredinem omnem lacte & oleo colluens, demum lenire potuit. Aliud igitur consilium coepit Chirurgus praestantissimus, cum ex irritatione praecedente substantiam ipsam ossream, spongiae instar excrecentem, & exploratione accuratiore cariem in sua medietate ad ipsum cranii cavum penetrantem, videret. Sperabat scilicet, ut trepani coronis tribus quatuorve, recenti firmoque ossi applicatis, totam carie correptam fistulam excindere, & per

aperturam, si quae vitia duram matrem adgressa essent, ea libere destruere posset. Solito itaque more cutem circum circa in ea distantia a loco adfecto incidebat, ut terebratula commode applicari posset, & periosteo optime abrafo, coronam primam admovebat. Inopinato vero phaenomeno interrompebatur mox operatio, nam trepani cuspide & quavis instrumenti circumgyratione acerbis adeo percellebatur doloribus misera, ut non solum eiulatu eos prodere cogeretur, sed membris vehementer convulsis, animo linqueretur. Absoluta igitur prima hac opera, quam ad scopum insufficientem vidit, trium reliquarum coronarum applicationem ad crastinum distulit; cum vero nova tentamina ad perficiendam operationem instituerentur, & iisdem aegra corripereetur symptomatibus, unicam singulis diebus ceteris applicavit, iamque his demum feliciter peractis, ad alterum operationis momentum properavit, ad excisionem nempe carie destructi frustuli. Attonitus vero cito observavit, ipsam duram matrem cum eo non tantum cohaesionem contraxisse, sed ex superficie eius fungosam excretionem cum illo ita se commiscuisse, ut os sine lata durae matris excisione exscindere non valeret. Ad tactum leviozem omnemque quam-

enimque irritationem adeo insuper dolebat locus affectus, ut ne radula quidem vel forcipe frustatim correpta ossa tollere auderet. Fato ergo miseram hanc mulierculam committere coactus fuit cl. CARET, a natura id expectans, quod arte obtinere non potuerat. Foramina etiam trepano facta cito coiverunt, & superficies optimae notae carne tecta fuit, fungosa vero caries in eodem statu diutissime persistit. Demum vero cute pederentim sine praegressa exfoliatione locus corrosus obduci videbatur, eadem autem proportionem, qua ulceris extensio minuebatur, dolores capitis, quibus per plures menses liberata fuerat, rursus ingruiebant. Quam postea sortem subierit femina, cel. Praeses ignorat; id vero sancte adseverat, illum saepe specillo nudum os in variis locis, inscia aegra, tetigisse, eamque semper ex leviori tactu dolore statim fuisse cruciatam.

§. XIV.

Quod igitur in genere antea contendere audebam, ossa nempe sub morbosa dissolutione sensibilia fieri, illud casu hocce plane evictum esse spero. Quum vero ossium substantia variis obnoxia sit commutationibus, quaeritur, an in omnibus & in quibus praesertim restitutae sensibilitatis observaverint indicia scriptores. Tota scilicet ossium massa iam sanie vermiculatim

quasi eroditur, iam terra omni orbatur, & glutinosa eius pars, quae formam ossis, licet saepe contortam simulet, intacta remanet, iam autem glutinae spoliatur, & terra relicta ossibus singularem fragilitatem largitur, iam denique acredo quaedam humores corripiciens, terra & glutine in ossibus exuberante, tam vehementer in fibras osseas agit, ut expandi & tumores formare osseos cogantur; sed an in omnibus his morbis sensibilitatem ossa sint nacta, nondum satis repetitis experimentis est confirmatum.

§. XV.

In carie ossa saepe sensu praedita sunt. Contendere quidem nolo, in omni carie dolores existentes ab ossibus ipsis exoriri, omnemque ossium erosionem cum dolore esse coniunctam; nam saepe nullis gravioribus incommodis stipatur, & dolorificus sensus, de quo aegri sub exfoliatione naturali frustulorum, eorumque extractione queruntur, aliam saepe agnoscit causam, nempe periosteum, in superficie sua pluribus in locis instructi nervis, fortiolem diducationem atque dilacerationem. Contendere autem sustineo in nonnullis cariei speciebus ab humorum labe ortis, & praecipue in scorbutica, venerea & cancroso, ipsa cariosa officula tantam obtinuisse sensibilitatem, ut specillo ruditer tangi sine aegri incommodo non possint.

Etenim quaedam acredines gradu alias videntur antecellere. De veritate huius rei quisque facillime convinci potest, & NICOLAUS MASSA in carie femoris, cum ulcere magno coniuncta, eam optime detexit. Quid? quod papillae carneaе (a), rubentes & vasculis innumeris intertextae, ex superficie ossium denudatorum uberime efflorescentes, suaque propulsione vi strata externa ossium labefactata a sanis separantes, singularem produnt sensibilitatem. Granulosam hancce carnem eo minus a textu celluloso circumiacente & periosteo ossa rursus tegente, ut nonnulli volunt, derivamus, cum ea, quae a media superficie & a centro ossis progerminat, vel quae, si BELLOSTII methodo cum perforativo exfoliationem promovendi utimur, ex foraminibus ipsis elevatur & excrescit, aequae sensibilis sit; ac margines ipsi ulceris periosteo tecti. Caro quoque sub frustulis cariosis ex profundo enata, & ex fissuris rimisque corroforum ossium evoluta, qua proprio adminiculo natura a sano esse corrupta seiungere atque expellere adnititur, eandem, si tangitur, sensationem prodit. Ab externa vero os obducente cellulosa eo minus haec erit derivanda; cum

(a) MONRO on the bones, item Bagieu des amputations 557. citante HALLERO.

saepe superficies externa circumcirca exsiccata & membranis destituta invenitur. Cel. TENON (a) praeterea, innumeris experimentis nixus, huius carnis ex ipsa cellulari ossis tela natales derivat; ostenditque eandem ea ratione osseam demum acquirere duritiem, ut maiorem sensim firmitatem nacta, ad basin cartilaginea evadat; atque tum demum, ulcere consolidato, tota in durum os commutetur.

§. XVI.

Ossa, sine externa praesente laesione, morbo emollita, sentire ex observationibus cl. DEIDIER & PETIT, quos ill. HALLER allegat; iam patet. Mirandam sane metamorphosin ossa in eo morbo subeunt. Absorpta enim terra omni, gluten osseum cum remanente cellulari substantia parenchyma singulare format, scalpello scissile, & cerae instar flexile. Ex observationibus vero multis circa hunc morbum collectis, perspicimus, variis gradibus emolliationis ossa affici; iam enim totius corporis ossa morbo correpta esse invenimus, ut ex famosissimo mulieris SUPPIOT (b) a multis descripto

(a) Mémoires de l'Acad. Royale des sciences an. 1753 sur l'exfoliation des os, 2me & 3me Mémoire.

(b) Philosoph. Transact. Vol. 48. an. 1753.

casu & ex eo, quem ill. PRINGLE (a) nobis reliquit, elucet; iam vero nonnulla tantum ossa corripimus; in nonnullis maior terrae quantitas, in aliis minor est destructa, quo ipsa firmitas variis subiicitur vicissitudinibus. Id quod vero praecipue memoratu dignum & ad sensibilitatem ossium demonstrandam conferre videtur, in eo consistit, quod aegri omnes, antequam ossa emollescant, de dolore totius corporis, & praecipue artuum conquerantur, & incedendi vel artus movendi difficultate laborent (b). Alii in ipsis ossibus sensum lassitudinis percipiunt, pungentibus mixtum ictibus. Sub his ipsis continuis vexationibus urina eiecta calcareo sedimento copiosissime ditata invenitur, atque tum demum ossa torqueri & musculorum tractioni obedire incipiunt, firmitate iam nunc ossis omni destructa. Videmus igitur sub hac commutatione ossium structuram valde agitari, & aegros non vehementer errare, cum ossa dolere contendunt. Annuit etiam ill. PRINGLE, hocce malum a medulla, dissolvente qualitate instructa, originem ducere & ab interiore superficie ad externam proserpere. Variarum humorum corruptiones ossa praedicta ratione

(a) In eodem Volum. p. 297.

(b) LUDVIG. progr. de laesa ossium nutritione.

adgredi solent, ita ut nonnunquam acredinis genuinam indolem indagare non valeamus: sed scorbuticam acrimoniam luemque veneream in primis suos in ossa exferere effectus, & non solum ad emollienda illa, verum etiam ad fragilitatem illis conciliandam, plurimum valere, quotidiana docet experientia. Præeuntibus doloribus continuis, fixis & atrocissimis in interiore brachii substantia hærentibus, adeo os ipsum, velamentis eius intactis, læsum fuit, ut motu violentiore frangeretur (a). Clam vero & sine ullis præeuntibus signis raro syphilis ossa destruit: vexantur enim aegri doloribus sic dictis osteocopis, ad desperationem usque interdum furentibus, subque his ossa corripì videntur. Quo profundius vero malum iacet, eo violentiores excitare dolores, & maiorem ossium promovere destructionem solet. Aliquando tamen exostosis vere venerea, quam ea ratione formatam credunt, quod virus ipsum inter fibras osseas nidulans, suam efficaciam adeo exercent, ut fibras expandat atque elevet, lancinantes & continuos dolores comites habet, quos autem eo minus periosteï nervorumque ibi proserpen-

(a) Medicinische und Chirurg. Wahrnehmungen, Erste Sammlung. von MUTZELL. Berlin 1754. cal. XIX.

tium tensioni adscribere possumus, cum exostoses sic dictae benignae, licet saepe maximi voluminis, dolorem nullum excitent, malignae vero vehementer furant.

§. XVII.

Duplex vero, cum sensibilitas ossium non sit deneganda, ea prodit phaenomenon, explanatione Physiologorum indigens. Primum nempe, quid causae sit, cur nervi hi subtiliores, substantiam ipsam intrantes & a dura materia per tot annos undique ita compressi, ut in statu sano insitam suam vim exserere non possint, illam tamen occultatam retineant; cum aliis experimentis in nervis institutis didicimus, eorum medullam ligatione & compressione diuturna, vel violentiori, facile admodum destrui; alterum autem, quaenam sit ratio, cur in his morbis maiorem saepissime inveniamus sensum, quam qui a tam subtilibus metui possit nervis. Concedo quidem lubentissime, omnia ratioecinia, nisi ab ipsa probe observata natura fundamenta ceperint, lubrica esse atque vana, eumque difficilem in se suscipere laborem, qui experimentis unice hasce quaestiones enodare aditus fuerit. Nullus tamen dubito, quin observationibus saepissime iteratis, experimentis & dissectionibus frequentioribus ex atra hac caligine,

qua adhuc dum obvolvimur, denique emergere possimus. His nempe, quod ad primam difficultatem attinet, certiores nos reddi posse confido, anne ea praecise loca, quae nervis permeantur, etiam in ossium statu sano sensum prodant, anne nervorum canales ita sint firma materia circumvallati, ut a materie circumiacente premi non possint, & anne in iunioribus, qui molliusculis minusque firmis praediti sunt ossibus, sensus sit exquisitior, & in sensibus ille ob ossium maiorem firmitatem ita perdatur, ut nulla ratione resuscitari queat? Quantum his dilucidatis disquisitionibus theoria ossium sensibilibus ex tenebris emergeret, nemo non praevidet.

Quod vero ad alterum phaenomenon attinet, ossa nempe morbosa maiorem sensum prodere, quam a tam delicatulis fibrillis expectaremus, illud ab antea cognitis aliquam explanationem admittit. Mirificum enim sentientis naturae in nervis augmentum in partibus inflammatis & diu irritatis observaverunt cl. WHYTT (a), HALLER & alii. Hominem noctu videntem, cum oculus inflammatus esset; a cerebro inflammato, tetano correptum; ab ictu cranio illato, ingenio summo praeditum,

(a) *Physiological Essays* p. 120.

qui stupidus fuerat, describunt observatores; quibus docemur, sensationes ab irritatione diuturna & pertinace adaugeri. Huic vero explanationi, ut & alteri, circa nervorum, ope cellularis telae auctam crassitiem, cum ad summam nervis ossium a morbo irritatis & corrosis iniunctam sensibilitatem explicandam non sufficere videantur, aliam hypothesein adiungam, forsitan non plane contemnendam. Experimentis scilicet in nervis institutis condocemur (a), telam cellularem fibrillas revincientem insensibilem esse, earum vero medullam unice sentire & eandem medullam, quae maximum cerebri volumen constituit, simili facultate esse praeditam. LAURENTIUS quidem, SIMSON, aliique cerebri medullae laesiones a vivo animali non sentiri contendunt. Horum vero experimenta parum recte instituta esse, omnemque medullae laesionem a viventibus aegerrime ferri, optimis ill. HALLERUS evicit argumentis. Dacta praeterea docet experientia, resectum nervum in innumeros medullares colliculos protuberare & fungosam carnem vel concrementum glandulosum, teste cel. I. van HORNE & MAIOW, ex dissecto vel compuncto nervo excreescere, cum cellulosa ipsa tela circa expressam medul-

(a) HALLER Elem. physiolog. Lib. X. p. 312.

iam contrahatur. Nec ullum in Chirurgicis initium fugere potest, ex cerebro, si ipsa eius substantia dilaceratur laediturque, fungos enasci magnos; quibus omnibus ex observationibus patet, medullae vim sese evolvendi & expandendi inesse. Fungos vero cerebri ipsos sensiles esse, celeberrima doctissimorum virorum experimenta testantur. Licet enim **LOTHIERI** fungos cerebri insensiles, eosque, qui nonnunquam a dura matre progerminant, cum **cl. LE CAT & VHYTT**, sensiles describat; in **GOOCHII (a)** & **IOHANNIS FANTONI (b)** experientia contraria; atque naturae rei plane conveniente, nostram reponere fiduciam debemus. Ex hac enim scimus, veros cerebri processus periculose laedi & a vitriolo admoto vertiginem & oculorum distortionem exortam fuisse. Si vero caro, qua tegitur dura mater, sentit, ex diploë ossium sensili originem duxisse videtur. Ex his autem allatis experimentis in eam ducor sententiam, ut existimem, nervulos in morbis ossium, ab acredine quadam lacestios, demumque corrosos in fungulos quasi excrecere posse, qui, cum latiori superficie sint

(a) Cases and Practical remarks in Surgery Lond. p. 10.
 (b) Opusculorum Medicor. & Phys. Genevae 1738.
 Observ. 28. p. 172.

instructi, non possunt non sensibilitatem illam adaugere, eamque ad omnia quasi puncta partis laesae expandere.

His omnibus ALEXANDRI MONRO explicationem sensibilitatis morbosae ossium addere lubet. Notissimum est omnibus, sensationem nullam existere posse, nisi nervi tali molitiae & flexibilitate sint instructi, ut corpora prementia impressionem quamdam in illis exserere possint. Ossium ergo duritiae in statu sano nervos defendente, imminuta & ablata, naturam suam indolem iterum acquirere videntur, cum iam nunc impressioni obsecundent; veluti ungues, si priores morbo sint destructi, recrescentes, dum molles sunt, sensum habent exquisitum, eum vero dein plane amittunt.

Sed diutius in hoc argumento immorari, tam ipsa cognitionis meae levitas, quam parca in difficili hoc labore experimentorum copia vetat, ossa in statu sano insensibilia, morbo sensibilia fieri, tot rationibus comprobare volui, quot colligere & experimentis arguere mihi licuit; nullo alio impulsus incitamento, quam ut alii in eam rem suam acrius convertant attentionem, atque, si forte erraverim, me in veram veritatis viam reducant.

D E

CONVALESCENTIUM CONDITIONE,
AC PROSPERITATE TUENDA

ORATIO ACADEMICA,

Q U A M

*Die mensis Iunii 10.^a anni 1793. in
R. C. Ticinensi Archigymnasio*

R E C I T A V I T

IOANNES PETRUS FRANK, M. D.

*Sac. Caes. & Reg. Maiest. a Consiliis Magistratus Politici &
Oeconom. Mediolan., facultatis Medicae ac Nosocomiorum
per Insubriam Austr. Praeses, Xenodochii Papiens. ad
S. Math. Moderator, Therapiae Spec., & Clinices
in Ticin. Acad. Professor P. & O. Academicar.
Reg. Scientiar. Goetting., Mantuanus, &
Elect. Mogunt., tum Societ. Patriot.
Mediol. & Medic. Helvet. Sedalis.*

D E

CONVALESCENTIUM CONDITIOE,
AC PROSPERITATE TUENDA

O R A T I O.

SI praecipuas vitae animalis conditiones animo in res proprias attento rimemur, **RECTOR MAGNIFICE, PATRES SAPIENTISSIMI, COMMILITONES SPECTATISSIMI!** quatuor illas esse, non difficulter eruemus: quarum prima, *sanitatem*, — *morbum*, secunda, — *tertia vero & quarta, intermedia his tempora* quibus nec nomen quidem in Arte concessum fuit, concernunt. Omnes scilicet quoad vitam hanc auram trahimus, reddimusque vicissim, aut recte valemus; aut salutem inter & morbum incerti vacillamus; aut hoc ipso iam prehensi, angimur atque languemus; aut demum amissam valetudinem recuperamus, convalescimus.

Sed quae mutationes humana in machina, vix a prima causarum; a quibus morbus inducitur, actione, priusquam hic se ipsum evolvet, occurrant; — quae in corporis penetra-

libus, a devicta iam aegritudine, contingant; haec certe, quamvis legum physicarum, quibus regimur, partem non exiguam constituent, ignoramus. Est quidem, ubi, vix admotâ corpori morborum causa, functionum mox una vel altera labescat, aut celerrima sanitatis in conditionem peiorem conversio succedat; sed multa sane morborum semina, non secus, ac illa plantarum faciunt, quemadmodum sub certis modo coeli solique recipientis conditionibus *se-runtur*: sic praescriptum quoque temporis, quo foveantur, germinare incipiant, radiculamque figant, intervallum sibi exigunt; nec, priusquam paulisper adoleverint, sanitatem subvertunt ac suffocant. Magna quidem morborum principia inter ac semina, quibus vegetabilium continuatur creatio, diversitas in eo intercedit: quod illa, non organicum, ac certam modo evolutionem exspectans, ut ista, *germen* exhibeant; sed, si forte sola contagia (quae eosdem, quibus suam originem debuerunt, motus in corpore animali excitando, semetipsa rege-nerant) excipiam; aut solo stimulo, aut virium naturalium inversione, prostratione, in corpus operantur: quod scilicet *solum animale* longe aliam cum rebus sinu proprio susceptis, quam semina plantarum cum agro inerte sen-

suque destituto rationem agnoscit; — at vero, quaecunque demum futuri causa morbi praecesserit; ea, nunc *certum* per tempus, quasi sepulta, in corpore delitescit, nunc sine ordine, vel breviori, vel longiore intervallo sub cineribus gliscens inducias agit, ac tandem apertas in flammis prorumpit. Utriusque rei exemplum tum variolarum, morbillorum, tum leprae, syphilidis, caninaeque rabiei contagia prae caeteris, nobis offerunt: ut quorum prima, tempore sat fixo, — altera, incerto ac interdum remotissimo, in conspectum rapiuntur, ac morbi iam diutius suscepti indolem non prius, quam summo iam maiori incremento, manifestant.

Quodsi vero signa, quae profundius iam carnibus infixata haec tela satis indicent, nos fugiant; an ideo minus interna sauciantur? & an subdolus ille inimicae potentiae labor, quo partes ad defectionem sollicitantur, disponuntur, *sanitatis*, aut *morbi* confiniis includitur? . . . Sunt quidem aliqua hinc inde futuri morbi, quae *prodroma* vocantur, atque ab ipsa aegritudine distincta incedunt, indicia; sed quam egena, quamque incompleta istorum est *semeiotica*, & quam parum de primo morborum ingressu, sub quo toties securus artem

triumphus exspectaret, pernoscimus! Februum non pauca interdum phoenomena adventum praenunciant; quae, si morbum constituere dicantur, vix tamen, an ad illum magis, qui futurus est, an ad alium quemcunque spectent, sat clare distinguimus; ac saepe functiones non tam impediunt, suspendunt; quam certa modo inertia, quae vel sanissimis hominibus, sub variis atmosphaerae mutationibus insolita non est, circumdant. Sed vel *chronicos* affectus hinc inde (quasi nubem opacam per aera volitantem, umbra tellurem celeriter percurrentem) sua signa praecedunt: quae futurarum aegritudinum indicia in tempore & rectius animadversa, non appropinquantem modo ex suo fulgure tempestatem, sed & locum, in quem fulmina cadent, & quo filo averti, abduci haec possent, aliquando sat certe indicarent. Quae menstruam excretionem iam saepius experta est, foemina, haec, licet temporis elapsi calculum non ponat, instantis tamen uterinae purgationis indicia seite ab aliis distinguit; nec minus sua & alios, tum fluxus periodicos, tum morbos diuturnos, quae medicorum oculos communiter haud feriunt, signa praecedunt. Podagrici, distantes in pedibus accessus, ex ventriculi inertia, fastidio ciborum, ac flatibus molestis apposite praesae-

giunt. Mulierem, asthma, ex quo iam tribus a mensibus liberata videbatur, spasmodicum, sibi alteram in diem, dum vel minime suspirarer, cum certitudine praedixisse audiui; ac plura sane existunt, quae medicos hucusque nequidquam moverunt, *morborum auguria*.

Vix opus est AUDITORES, ut tantae dignitatis, ac tantae simul vastitatis & obscuritatis argumentum angustis Academicæ Orationis cancellis circumscribi non posse, VOS moneam. Hinc servato mihi in alteram occasionem eorum, quae hominis, sanitatem inter ac morbum instantem trepidantis, conditionem respiciant, examine; ad vitae, modo paucas ante horas ab aegritudine concussae, & ad pristinam integritatem redeuntis, seu hominis *convalescentis conditionem*, & quam haec a medicis *curam generalem* sibi exigat, considerata me hodie accingam; & VESTRAM, quam mihi alias hoc ipso in loco concessistis, & qua, in re tam ardua, vel maxime indigeo, benevolentiam imploro.

Paradoxum haud paucis, a primo iam Orationis ingressu proferre videbor; sed tamen proferam! *Ad perfectam sanitatem vix natum est animal; sed illi ipsi, quam felicem ac integram vocamus, valetudini, necessarii quidam*

morbi intexti sunt: qui ad totius conservatio-
nem ac ordinem naturalem contribuunt. — Non
 minus scilicet *vitae*, tum animali, tum vege-
 tabili, ac ipsi, quam haurimus, *atmosphærae*,
 proprii ac fere periodici sunt *turbines*: qui,
 sicut ordinem rerumque harmoniam in ista non
 turbant; sed ad magnificentiora naturae, totius
 conservationi operantis, pertinent phenomena:
 ita & corporum viventium elementa, non ubi-
 que subvertere, sed iisdem evolvendis, ordinan-
 dis inservire comperio.

Quae materno in sinu, atque ipso con-
 ceptionis ab opere, sub tam rapida corpusculi
 extensione, embrionem pessumdent, licet mor-
 bis non raro detentum hoc in alveo homuncio-
 nem conflictari satis constet, ignoramus; sed
 vix genitricis a gremio pendet, — iam vagit,
 & quasi suum hunc in orbem adventum deplo-
 rat puer: quos in fletus, si primae ac violen-
 tae respirationis potius, quam ingratae sensatio-
 nis effectu prorumpere dicatis; non tamen vel
 sanissimo infanti tam nauseae, quam dolorum
 rationes deesse, non minus ex communissimo
 ad vomendum conatu, quam ex ipsa meconii
 per oesophagam alvumque reiectione, tum de-
 nique ex cutis universae, per primos a partu
 dies, erysipelaceo quasi rubore, & ex funiculi

reliquiis, specie suppurationis ab umbilico, non sine quadam ad hunc ipsum phlogosi, separandis coniicimus. Quod si res istas nascentibus tam communes, quamvis ingratas ac molestas, ad *morbos* igitur referre non liceat; non magis certe ad istos revocabimus aut continuos capitis capillati, densioribus a squamis mox primis a mensibus obiecti pruritus, --- aut succedentes a quinto vel sexto iam mense gingivarum ardores, tensionem, dolores, ac phlogosin, atque sub istis vel fugaces faciei rubores, vel salivationem, vel diarrhoeam continuam, — aut secundae dentitionis molestias, urinae incontinentias, — aut singularem, a celeriori corporis incremento, maciem, — aut frequentes glandularum inguinalium dolentesque sub incipiente pubertate apud pueros tumores, — aut somnia, vel molesta & anxia, vel inopportunae ac saepe debilitanti liquoris genitalis iacturae coniuncta, aut virginum tenerarum, quibus menstrua parantur, languores, morositates, pallores, — aut lumborum, mammarum, apud foeminas, redeuntis hac sub periodo tensiones, — aut molestias gravidarum, ut nauseas, vomitus, pallores, maculas, pedum oedemata, varices; haemorrhoidalium vasorum infarctus, &c., — aut consuetos a partu dolores, debis

lilitatem, febrem lacteam, — aut denique cessantis, ob aetatis rationem, fluxus uterini incommoda: quae singula (: de caeteris ut sileam, & ne animalium plurimorum, quae aut cuticulam, aut plumas, crinesque, aut cornua, aut testas quotannis, sub manifesto languore, moerore, deponunt, — vel illorum, quae, praeviae quasi mortis sub imagine, metamorphoses subire, ac habitum formamque pristinam cum novi animalis conditione commutare, — vel saltem, hiberni frigoris redeuntis, non tam effectu, quam providentia, angustas sibi speluncas, quasi annua sepulchra, parare, ac in istis aut protinus obrigescere, aut profundo sub lethargo vitam inter mortemque solis reditum anhelare coguntur, periodicas molestias adducam :) perfectam quidem sanitatem excludunt; nec interim ad *morbos*, nisi ipsam, quam natura concessit, vitam, pro morbo ingrati declaremus, revocari merentur.

Atque hoc fere rerum sub statu, qui nec morbus dici, nec sanitas apte nominari potest, versantur illi: qui, sub causae, quae valetudinem subverterat, gravioris fuga, mortis inter vitaeque confinia vacillantes incedunt, ac superato licet aegritudinis discrimine, istius potius reliquias, & pristinae valetudinis magis rudera,

quam vitae renascentis primordia , sollicito atque anxio amicorum oculo pallentes ac tremuli exponunt .

Sed quodnam demum principium , hac ipsa sub vitae redeuntis conditione , vegetabilium non minus , quam animalium conservationi invigilat ? quid partes vulnere , fractura disunctas coagmentat ; excisas , consumptas redintegrat ; sectione ablatas in multis animalibus reproducit , regenerat ? quid noxia vel expellit , vel immutat , vel mucos , membranis ; aut crustis , ne obsint , oblinat , investit , involvit , nascondit ? Est illud ipsum , dicetis , quod vitam in sanis hominibus constituit , ac stimulis admotis respondet , *irritabilitatis* , *sensibilitatis* , vel unum idemque , principium ; . . . Sed , si facile hoc ipsum functioni partium cuique in animalibus praesidere intelligam ; est tamen non minor & singulis in plantis , quae nec fibrae irritabili , nec nervo inniti videtur , — non modo actionis indefinitae ac mechanicae , sed *regerminationis organicae* , potentia : quam , si a stimulis in animalibus excitari atque regi concedamus ; oportet tamen eandem a lege incognita , tam corpori universo communi , quam parti cuivis propria , sic dirigi : ut hic non informis modo nec finibus respon-

dens massa, sed pars organica, vasisque suis; quin interdum articulis, instructa, & formae pristinae aequalis reproducatur; illic vero, ut effectus ad partis, vel ad totius conservationem directus, ex solius modo lege *stimuli* nequaquam expectandus, impetretur. A stimulo quidem & partis irritabilis *contractionem*, & sentientis principii *perceptionem a priori diversam*; atque nunc de pruritu, titillatione, voluptate, nunc de dolore, aut quavis alia in sensibus mutatione, testantem, — sed minime, quae alia ab eadem in partibus contingunt, phaenomena, id est affluxum humorum, vel sine cordis consentientis auxilio, adauctum, aut eorum, quae in his ipsis detrita, mutata, destructa fuerunt, reparationem organicam, expectare valemus. Quae in parte vel ista, vel illa, ex incognita hac lege, contingunt: ea sub machinae animalis totius affectibus in fine morborum ab eodem principio praestantur, atque tum *crisium perfectarum*, tum miro *metastasis* exemplo confirmantur: quae singula tam parum a *stimuli* solius imperio reguntur: ut vel in parte eiusdem experte quamplurimum obveniant; vel tempore, quo ille iam infractus est, & quo vires quam maxime languent, nunc ad epidemiae regnantis, nunc ad morbi praecedentis praescri-

ptionem, vel certas ad partes, vel certa, eademque in omnibus, per organa secernentia, succedant. Sic in febre periodica intermittente, tum labia, tum lien, tum pedes, frequentius, quam partes aliae quaecumque, nec raro cum aegrotantis emolumento, petuntur; — sic in febribus acutis, a contagio exortis, sub maximo irritabilitatis ac sensibilitatis stupore, per vias salivae, per cutem aut sudoribus apertam, aut exanthematis diversis correptam, vel per glandulas lymphaticas, ad aures, sub axillis, ad inguina haerentes, recuperandae salutis tentamina feliciori cum eventu suscipiuntur; — sic in morbis inflammatoriis, crises per urinas puriformes, lateritias, ac simul per sudores, sub febris impetu haud parum iam infracto, salutare contingunt; — sic in cynanche parotidaea ex glandulis salivalibus, in muliere, ad ubera, — in viris ad testes, depositio frequenter, nec certe *stimuli* communis, sed principii ignoti ad leges suscipitur; & quae, sub necrosi non minus, quam post medullae destructionem, post fracturas cum substantiae, ut vocant, iactura coniunctas, in ossibus reproducitur, nova ossis materia, — quae post unguium pilorumque recisionem, — quae post vulnera quaecumque, ac in cicatricum formatione succedunt;

ea, sicut in regno vegetabili, sine ulla plantarum, quae aliquam ab attractu, vel ad folia, vel ad organa sexualia irritabilitatem manifestant, ab illis, quae hanc minime ostendunt, distinctione, post somnos hibernos, variasque laesiones, similia occurrunt: ita ex stimulo, qui modo paucas in plantas agit, explicari non queunt; sed ex peculiari, nec aliter, quam ex effectu nobis cognito, tum animalibus, tum plantis omnibus communi, ac ab *irritabilitate*, *sensibilitate* distincto, — forsitan ab eodem, quod futuri animalis formationi in utero materno iam praeest, — quod alimenta quaecunque in animale substantiam convertit, — quod secretionum mysteriis in partibus animalium, plantarum, praefigitur, nequaquam diverso, principio repetenda videntur.

Sed quaecunque demum potentia, tum sub ipsa sanitate, tum in morbis, ac post corporis animalis, vegetabilis, laesiones externas, vel totius, vel partes integritatem custodiat; haec *vis magna conservatrix*, cuius modo *particulam*, & *effectum* *qualitates illae*, quas *irritabilitatem*, *sensibilitatem* vocamus, *constituere videntur*, sub morborum decursu (licet frequenter, a vi causae morbosae contrarios ad motus abrepta, in se ipsa saevire observetur)

praecipuum medentis obiectum constituit, & quo tempore morbus cessare, sanitasque redire asseritur, dum singulae functiones languescunt, in reparandis humorum iacturis, in expellendis vel causis, vel effectuum morbosorum reliquiis, reficiendisque solidorum damnis, quam maxime intenditur. Duplex hinc in convalescentibus, vix non ubique, notanda occurrit periodus: in quarum prima, potiore *morbis*, ac eorum, quae sanitatem offendunt, expulsio, — in altera, maiorem *sanitas* & virium fractarum recuperatio, habere partem observantur. Nec aliter natura sub laesionibus externis procedit: ut in quibus, si recens modo ac simplex vulnus, cuius labia mox inter se uniantur, excipiam, impura primum a vivis separantur, mox vero ab isto, deperdita substantia renasci, atque cicatrix, aut callus formari conspiciuntur. Quodsi praecipuas morborum causas, ut quondam solebant, ex *vicio humorum* derivari liceret; quomodo sanitas a devicta aegritudine restituatur, explicare, res tam ardua non foret: morbi scilicet *materia*, ceu corpus delicti, ut vocant, per morbum praeparata, ac certo dierum numero *concocta*, vel omnis, vel in parte, aut sensim sensimque eiecta, vel alium in locum deposita, *crisin*, illinc *completam*, hinc vero *imperfectam*, aut

lysin, aut *novam aegritudinem* constituere dicebatur; nec ulla scholas circa theoriam tam ambiguam, dubia premebant. Ast vero cum tot morbos sine culpa humorum ex solidorum modo vitio oriri, experientia docuisset; atque illud, quod sub *crisi* expellitur, in multis ut morbi potius effectus, quam ut causa considerari coepisset; oportuit simul concedere: non paucas aegritudines, quo tempore morboosi tumultus cessarent, mox & sine quavis, *criticae* indolis, evacuatione, in statum sanitati propinquum, seu ad *secundam*, ut vocavimus, convalescentium periodum, cui, praeter virium ac debitae nutritionis absentiam, ad perfectam valetudinem nil desit, transilire. Sed in hac ipsa concessione, erroris non deficit occasio. Per ipsam scilicet, quaecunque demum haec fuerit, aegritudinem, non exiguas saepe mutationes tum in solidis, tum in fluidis contingere, aut latentia antehac in corpore morborum semina evolvi necesse est; &, quin primariae adfectioni *materia*, ut dicunt, *morbofa*, subsuerit, non raro tamen vitiosa, turbarum in corpore praegressarum actione, producitur, ac nova pericula minatur nova progenies: quae, priusquam sanitas perfecta sequatur, vel a viribus naturae subigenda, vel, *crisis secundariae*

sub forma, sensim sensimque expellenda, vel, metastasis sub aspectu, ad partem deponenda est. Sic, quam in morbis *inflammatoriis*, aut sub locali inflammatione, sanguis e vena deductus concretam ex lymphâ in superficie ostendit materiam; hanc, utpote nutritionis ad opus haud amplius idoneam & a naturali aberrantem, sub crisi, vix non ubique, sedimenti puriformis sub specie, aut urinae manifestant, aut ad partes, praeviae licet inflammationis immunes, celeriter propullulantes abscessus suscipiunt; aut simul visceri atque copiosi sudores, non certe inflammatoriae affectionis ut causam, sed ut effectum, e corpore eliminant. Sic, *biliosae* constitutionis sub imperio, copiosam fellis acrioris, & corruptae materiae generationem vel apud illos, qui in victu, aut in animi pathemate nec minime deliquerunt, observamus; atque gastrici systematis affecti ratione *produ-*
citur, non morbum ipsum in genere *produxit*, quae per vomitum, aut per alvum cum emolumento expellitur, saburra. Sic demum in *fe-*
bre nervosa, vel contagium, vel res quaevis, veneni in morem, systemati nervoso infensa, petechias, aut vibices, miliaria, aut aphthas, parotides, gangraenas, non semper ob causae primariae ad cutim depositionem, in corporis

superficie inducit, nec tamen ubique innoxia est, aut retropressa, morbos non saepe exasperat, aut novos non creat, quae ad illam, ut *effectus*, generatur, ac potissimum per cutem diffusi, aut ad glandulas lymphaticas deponi amat, materia.

Cuius vero morbo, sexui, aetati, temperamento, quin partibus corporis quibusvis, suus atque proprius ad sanitatem amissam redeundi, quem propius describere angusti academicae Orationis limites non sinunt, est modus. Sic, praeter ea, quae de febrium diversarum natura & consuetudine iudicio iam dicta sunt, post continuas *nervosas malignas*, licet temporis intervallo brevissimo aegrotantem detinuerint, longiorem tamen, ut sanitas perfecta restituatur, sibi moram hae requirunt, atque per plures, in multis, hebdomadas, debilitatem insignem, tremores diuturnos, sarditates, agrypnias, aut sopores, memoriae iacturam, imbecillitatem, stupiditatem, — in aliis, sensibilitatem excessivam, ac infantilem in lacrymas promptitudinem, — in quibusdam, rebelles, ad aures, ad cutem abscessus, sudores colliquativos, salivationes taediosas, relinquunt. Sic *inflammatoriae* affectiones, licet graviter & cum periculo homines vexaverint; celeriores
tamen

tamen in plenam valetudinem his transitum concedunt; at, si modo sudores, aut urinae vel copiosae, vel sedimento puriformi instructae, diutius non fluant; abscessibus frequenter, quia localis inflammatio aegrotantes tenerit, convalescentes flagellant. Quas verò partes incendium corripuit: has, eodem licet feliciter extincto; vel pseudomembranae, quasi carcere organico includunt; vel nova ligamenta cum partibus vicinis, ac inter se ipsas revinciunt, & mobilitate, libertate naturali, variisque functionibus in perpetuum defraudant. Sic post febres, quas *gastricas* appellamus, quamvis feliciter absolutas, per longas saepe moras inappetentia ciborum, ventriculi oppressio, flatulentiae, meteorismus, alvi tarditas molesta, sequuntur. Sic post febres *intermittentes* neglectas, viscerum, lienis praecipue ac hepatis infarctus, oedemata pedum, hydropes veremur. Post *morbillos*, tussis atque phthises pulmonales, — post *variolas*, chronicae oculorum inflammationes, caecitates, abscessus aurium, metastases ad nervos, paralyses, — post *scarlatinam*, hydrops anasarca, hydrothorax, meliori iure, quam alii morborum effectus, in convalescentibus timentur, &c. Sunt vero morbi, qui aegrotos, quos penitus emancipasse videbantur,

cum summa facilitate, recidivi ac inopinato de novo corripiant: quo febres periodicas, intermittentes, haemorrhagias quascunque, convulsiones, imprimis epilepticas, apoplexias, manias, prae aliis, pertinere, nemo ex nobis ignorat. Sunt, qui perpetuam eundem in morbum in partibus sic quondam affectis dispositionem, vel sanissimos apud homines, relinquunt: ut ophthalmia, otitis, cynanche, peripneumoniae, hepatitides, erysipelata, rheumatismi, calculi, podagra; cum alii, vel semel absoluti, libertatem aut vix non perpetuam, ut variolae, morbilli, scarlatina, aut saltem immunitatem sat amplam, ut cynanche parotidaea, ferina tussis, febrisque nosocomialis, concedant. Sunt adeo, quae habitus morbosos, nativam debilitatem dispellant, ac sanitatem, priusquam accederent, homini denegatam, superatae, concedant, aegritudines; & quemadmodum plantula inermis, ex solo, in quo primum germinavit, extirpata, modo languet, frontem exsucca inclinat, ac vix non emoritur, — in alterum transvecta, felicissime vegetat, ac relictas in agro patrio sorores, & formae elegantia, & succi nobilitate antecellit; sic debilior ac languida hominum quorundam valetudinariorum constitutio, a morbo violento potentius con-

cussa, quasi corpore mutato, corrigitur, ac vigorem antehac incognitum acquirit. Ad *sexum* quod pertinet, is varietatem in convalescendiratione non exiguam inducit. In genere, mulier, a morbis gravioribus & acutis liberata, prae viro, in *chronicos* affectus inclinat; & quominora in febribus a stimuli excessu pericula incurrit; eo lentius plerumque sanitati restituitur, & diutius languore, & indolis spasmodicae incommodis vexatur. Accedit, quod menstrua excretio in teneris, hanc necdum expetis, sed eidem propinquis, virginibus, a morbo praegresso, plerumque cum longissimo laetioris valetudinis dispendio, ac taediosae sub chlorosis incremento, retardetur; — in adultis, vel nimis augeatur, vel turbetur, vel, quod frequentius contingit, per menses haud paucos, in integrum suspendatur; ac pristinae salutis recuperationem praepediat. Quodsi mulierem utero ferentem, quin ad abortum hunc urgeat, gravior forte morbus corripuerit; quantum non in foetu, sub maiori iam matris debilitate, nutriendo, &, sub auctis quotidie graviditatis molestiis, ad partus usque terminum sustinendo difficultatis, — vel quantum non a partu vel praemature, vel forsitan difficili, vel a nova sanguinis ac virium, in exhausta iam nimis

convalescente, periculi, timendum est! Plurimas certe morborum causas, effectus non paucos, mulieri per vaginam ac per fluxus uterinos, mucosos, fonticuli quasi vices assumentes, fatemur eliminari; sed illud ipsum, quod vitam nonnullis conservat, salutare pro momento profluvium, quam saepe non, abacto iam periculo, in corporis languentis detrimentum, per menses protrahitur, & vix liberatam a morbo mulierem, in novam ac forsitan perpetuam, aegritudinem, praecipitat! quam arduus, & quam ambiguus foeminarum, quae, sub menstrui, ab aetatis rationem vacillantis, periodo, a morbo graviore salvantur, ad perfectam valetudinem est reditus! *Aetatem* infantilem, ob summam in ista nervorum sensibilitatem, insignia in morbis discrimina expectant; & quae hodie Reipublicae nascuntur proles, has, priusquam adolescentiam attigerint, mors immatura ad mediam iam partem parentibus & Patriae abripuit. Vix interim, cum quondam morbum aut infans, aut puer superavit, si modo tempus pubertatis excipiam, tam longa, vel tam ardua hac in aetate ad perfectam valetudinem est via; sed vis vitae, sub debili apparatu, ac sub somno post morbos in longissimum tempus protracto, later maior, desiderium ci-

borum mox redit; ventriculus hos subigit, ac mira celeritate nutrientem in succum convertit: ita ut, si macies convalescentis diuturna apud multos de perfectae valetudinis recuperatione dubium relinquat: hoc ipsum tandem ex corporis puerilis mirabili post morbos absolutos in longum incremento solvatur. Quam prompta in aetate puerili, quamque lenta, vel fere nulla est in senibus, callorum sub ossium fracturis generatio, — quam facilis in iunioribus plerumque, — quam vero tarda, taedique plena est vulnerum in decrepitis cicatrix! Hinc magna aetatem proVectam, vel devicto iam morbo, continuo circumdant discrimina; ac tam opposita ab organis secernentibus, excernentibus, a cute inprimis ac renibus, noxiorum separationi resistentia; quam latens in viscere vel isto, vel illo, antiquum iam virium, defectus virium, & negata alimentorum per ventriculum, cuius tanta in convalescentibus est dignitas, alimentorum subactio, quas aetati senili, per morbos concussae, superadditas ab arte fuisse dies gloriamur, has, levioris incommodi sub aspectu, deletas tam saepe dolemus. Nec minus ipsa *hominum constitutio*, ac peculiaris, a primaeva corporis structura, & ab irritabilitate, sensibilitate diversis pendens, dispositio ad lentam,

aut facilem sanitatis amissae recuperationem contribuit; ac sicut morbi hoc immutabili fundamento, quod & animi dotes potissimum ac pathemata sustinet, non pauci nituntur: ita & reditum salutis, *temperamentum*, pro aegritudinis praegressae natura, ac in ratione, ut dicunt, inversa, dirigit atque determinat. Vel ipsa temporis, ac atmosphaerae, sub quibus aegrotamus, constitutio, convalescendi rationem non parum immutat; ac plures, quae hieme, ac pluvioso sub coelo vix cedunt, aut facile repullulant, — redeunte aut verno tepore, aut amico viventibus solis radio, vel sponte, vel brevissimo temporis intervallo, dissipantur aegritudines.

Quemadmodum vero morbus aut corpus omne, aut modo partem, — & hoc ultimo in casu, vel cum totius consensu, vel locali prorsus vitio, solitarius occupavit; sic, dissipato illius impetu, vel corporis universi, vel modo partis affectae compages convalescit. Quid in parte aut viscere ex morbo in salutem redeunte mutationis succedat? hoc non minus, quam ipsum, quo corpus universum convalescat, modum, ignoramus. Interim certe non una eademque ratione & ventriculus & pulmo, — non una, & muscoli & ossa, & cerebrum &

entis, sanitatem, vel eodem a morbo affecta, recuperant; sed, praeter eam, quae ex diversa structura descendit, actionis differentiam, pars corporis quaevis & *vitam* cum aliis vivit *communem*, ac simul *propriam* ducit, &, qua se metipsam in sanitate conservet, & in morbis defendat, & sanitatem convalescens attingat, ab omnibus distinctam. In morbis corporis totius, fere primum rediturae salutis indicium ex *facie*, & ex *oculo* inprimis, desumitur: quas partes, per morbi violentiam distractas, mutatas, sibi similes restitui, ac, licet pallore, splendore languentes, de turbis iam maxima & parte compositis testari videmus. Non minoris dignitatis est *lingua*: quae, volubilissima corporis particula, sicut nervis, qui machinae animalis alibi Imperium dividunt, instructa est: ita (: licet & in aegrotis interdum mentiantur :) reliquarum aut pacem, aut bella provinciarum, propriis sibi nitore, rubore, humiditate, mollitie, libertate functionum, sat fideliter indicat. Non eadem de *auribus* dicenda sunt, quae saepe in illis, qui ex febre nervosa convalescunt, sub melioribus auspiciis, diutius surdescent. Quam vero *sonnus reficiens* necdum confirmat, apparentem a morbo quietem, hanc, velut ambiguam & infidam, non immerito pro

suspecta declaramus. Nec tutior aegrotantis,
 qui, sub meliori caeteroquin rerum aspectu,
 vel a *siti* continuo vexatur, vel *cibos abhorret*,
 positio est. Nil vero securitatem graviore a mor-
 bo redeuntem potius, ac *sensûs aegritudinis*,
 quem modo aegrotus interna gratissimaque per-
 ceptione agnoscit, cessatio confirmat: quae per-
 ceptio non ex doloris modo silentio, ac vitae
 renascentis solatio componitur; sed propriam &
 peculiarem convalescentibus, cuius indolem ipsi-
 met ignorant, ac describere non possunt, sensa-
 tionem constituit. Quae vero tanti in morbo
 momenti fuit, *pulsationum ad arterias frequen-
 tia*: haec, eodem licet iam penitus sublato, in
 multis, praecipue dum pedibus insistant, aut ex
 somno evigilant, conspicua & per multas saepe
 dies extensa, si modo caetera valetudinem cre-
 scientem confirmant, quod vereamur, nil effert;
 ac interdum, quam ipsa sub febre, maior, sine
 rerum discrimine apparet. Nec magis *tarditas
 arteriae*, quae in convalescentibus naturali sub-
 inde maior occurrit, aut *ravior* forsitan *inter-
 missio*, timenda est. Quin pulsus exploravi,
 qui, sano homini sine ordine succedentes, sub
 febre vel maximè compositi, dum, illâ cessan-
 te, more pristino intermitterent, ac digitum
 inaequali denuo ritu ferirent, de superato nunc

morbi periculo, vel soli, testimonium edebant. Maxima in convalescentibus *excretionum naturalium* est dignitas. Inter istas, ea, quae per *alvum* absolvitur, plerumque sine damno est tardior; quae fluidas crudasque materias egerere continuat: haec, viribus, nisi sordes latuerint, intensa, nutritionem necessariam avertit; & non minus, ac illa, quae faeces aut albes, aut spumosas, ichorosas educit, tam ut signum, quam ut causa, post morbos superatos timenda est. *Urinae*, si paucae secedant, sanitatem constantem non promittunt; sed facile post febres, imprimis periodicas, hydropem praenunciant. Convalescentium urinas turbari, si facile sedimentum deponant, nil interest; abscessus etiam aut metastasis molestae timorem hae ipsae frequenter dispellunt. Post febres, lotium cum aliquo ardore excerni, dummodo sat multum, sedimentosum, sanitatem accelerat. Quae in acutis adeo timentur, urinae aquosae seu crudae: hae, convalescentibus, si parum transpirent, communes, significationem amittunt. Potissimam vero *cutis*, hac sub vitae conditione, medentis attentionem meretur; nec facile cum sicco pellis calore, ariditate, sanitatem, sine quovis sudore, attigisse, aegrotantem conspexi. Noxius tamen est qui in longum protrahitur, aut quo

corpus fere diffluit, sudor, ac plurimum *diabetis* naturam imitare videtur. Foeminam ex morbo graviori, priusquam menstrua excretio ab isto, redierit, nisi utero ferentem, aut, quod vehemens interdum febris non semper impedit, lactantem, perfecte convaluisset, vix ausim asserere.

Quos malum, ut vocant, *locale*, cum totius consensu affligit: hi duplici plerumque ratione, ac citius reliquis, quam illis, quas morbus occupaverat, partibus, convalescunt. Quae partis vitia solitariae, in corpore turbas haud excitant; hae Marte suo valetudinem, sine conspicua excretionem, recuperant. Fere constans tamen ac propria ad *cutem*, quae partem aegrotantem investit, aut quae ipsa per morbum vexata fuit, est *epidermidis* desquamatio: quae ipsa generales adeo post morbos, interdum per universam superficiem extenditur, ac in multis, quo tempore convalescunt, iterum iterumque suscipitur. Sunt, quibus & ungues, & pili, post febres violentas, quin, isti, a solo iam puerperio, vix non omnes, deciderint; sed proprium est capiti, diuturno ac vehemente dolore prehenso, capillos, quo tempore convalescimus, defluere, ac iunioribus celeriter renasci. Quae vero partibus locali affectu detentis

communis, & medicorum attentione dignissima phaenomena constituunt: sunt, tiliarum, a morbo iam penitus superato, aut *maior sensibilitas*, aut contrarius huic *stupor*, per longum saepe tempus, ac sub ipsa nonnunquam sanitate continuata. Hic partium a morbo vexatarum habitus, non ad solam modo cutis, sed ad viscerum quoque superficiem ac integram substantiam extenditur, & faciles istorum in pristinam aegritudinem reversiones, plerumque sensibilitati morbosae innixas, illustrat. Sic non modo oculus ab inflammatione liberatus, lucem clariorem averfatur, ac minoribus a causis incenditur; sed & cutis ab erysipellate aut crassior reddi ac stupefieri, aut longos per annos sensibilitate excedere observatur. Sic a scarlatinae exanthemate, cutis sensus, apud convalescentes acutissimus, non paucos, qui sese aeri liberiori incaute exponunt, in anasarca aliosque hydro pes praecipitat. Post ipsas ossium fracturas, luxationes, post vulnera, licet optime, & a longo iam tempore sanata, sub violentis atmosphaerae mutationibus, dolores, tensiones partem noviter divexant.

Cum vero tanta sint, quae hominis a morbo ad salutem redeuntis securitatem concernant, momenta; mirabimur *Auditores!* Medici

corum partem fere maximam ad sola tempestatis vigentis pericula animum convertere, & quasi portus tam securus hic esset, cum tot naufragia navigantium sub oculis occurrant, gubernacula incautos & praepostere deponere!... mirabimur, vel ipsos convalescentes ac si Medicus, qui, dispulso iam maiori ac evidente rerum discrimine, solitudinem manifestat, hanc lucri magis, quam necessitatis ratione, ultro quam par sit, continuaret, consiliis desistere, aut aegrius praeceptis obtemperare, & ad pristinos errores, istorum vix poena liberatos, tam incaute reverti!... mirabimur denique, in multis, quae pro hominum miserorum sustentatione in Civitatibus exstructa sunt, valetudinariis, de opportuno convalescentibus subsidio perparum cogitari; sed cadaveris sub aspectu vacillantes ac viribus exhaustos cives, quo vitae momento potissimum indigerent, opportuno alimento atque consilio destitui, & ad graves, quos brachia recusant, labores, familiae ac propria necessitate coactos, damnari.

Utinam vero hos limites convalescentium agnoscerent pericula!... Sed ipsa Medicorum hinc inde ex culpa quam saepe non illorum pervertitur conditio! & quam frequenter, ex morbo ereptus, ea ipsa a manu, quae vitae

servandae causa ad miseras extenditur, per mortis defertur praecipitia! Hic etenim, qui morbi a stimuli excessu provenerant, — hoc ipso quidem vel a tempore, ac natura, vel ab arte quodammodo composito, sed igne sub cineribus adhucdum gliscente, roborantium victusve nutrientis, cuicunque ex morbo graviore redeunti ac debilitatis sub specie constituto, ut putant, necessariorum, abusu, novas ac prioribus deteriores in flammam aguntur; — illinc, ob virium, non quidem, ut ibi, fallacem, sed veram iacturam, concedendae nutritionis indicationi, cum stomachi, subigendis alimentis necdum penitus capacis dispendio, satisfacere praeter modum festinant; — in his, ob reliqua ventriculi, ex debilitate, sensibilitate maiori, incommoda, nauseas, flatulentias, aut forsitan ob aliquam oris amaritiam, ac linguae spurcitiem, — vel ob dilectam, hoc vitae sub statu gastricas saburras generari, aut noxias materias ex sanguine in canalem intestinale deponi, hypothesein, noviter ad illa, quae resolvant, evacuent, confugiunt, ac paucum, quod superest, vitae pabulum studiose subducunt; — in illis, dum ciborum desiderio ac fame intensam flagrent, ac singula debilitatis, inanitionis ac infomniae symptomata, non *Medicum*, sed

Coquum implorent, ob *putridae*, quam febribus praegressis *nervosis* impertiuntur, titulum, vegetabilia modo pauca, aquosa & succo nutriente destituta, flatulenta concedunt, &, quas morbus non omnes detrivit, vires, imperiose subvertunt ac sufflaminant. Hi, aegrotos, a morbis iam penitus liberatos, ac modo aeris purioris motusque beneficio egentes, vel ad stragula condemnant; vel atmosphaerae a propriis & aliorum halitibus infectae solícite includunt; illi, alios, quos longior a morbo quies, & aucta transpiratio iuvissent, ut citius curasse videantur, vel, quod, Optimatum sub cura, conspicuae mercedis impatientia id iubeat, aut lectulos deferere, aut aeris iniuriis praepostere exponi cogunt; ac saepe morbis *supina* corporis debilioris *positione* praeventendis, haemorrhagiis ac fluxibus per uterum, aut per anum, submitunt; vel in gravidis abortus, — prolapsus in puerperis, pedumque in aliis oedemata inducunt.

Non una igitur, sed multiplex convalescentium conditio est: quae, sicut in declivi, non minus ad morbum, quam ad ipsam salutem, via versatur: ita Medicorum solertiam quam vulgo adhibeant, sibi maiorem requirit. Quod vero potissimum curandae tam ambiguae sanitatis ar-

gumentum constituit: est illud, quod attentæ observatio quemcunque docebit: *scilicet eadem, qua prodroma symptomata cum morbo futuro conspirant, ratione, — & ipsam, quæ hunc sequitur valetudinem, præviæ ægrotudinis naturam ac indolem plerumque per tempus sat longum retinere.* Qui febre *inflammatoria*, vel locali ad partem phlogosi correptus, sanitatem recuperat: is, multos per dies, interdum per annos, sub redeuntis, aut & integræ sanitatis aspectu, ad eosdem tumultus inclinat; ac stimulo non magno, vel a medicamine, vel a cibis potuque ingestis, vel ab iris, aut corporis, vel partis violento exercitio, admoto, in similem priori affectum facillime relabitur. Post febres, quæ ex *biliosa* constitutione, vel ex abdominali saburra originem traxerunt, quemadmodum ventriculi languor ac ciborum fastidia diutius a morbo continuant; ita vel levis in victu error, convalescentes in pristinam ægrotudinem præcipitat. Quem febris *nervosa* detinuit; hic, a morbo superato, vel curis, ac animi pathemate deprimente, vel studiis præpostere susceptis deiectus, vel evacuantibus medicinis, aut diæta rigorosiore, ac parum nutriente, vel a venere, hæmorrhagiis, suppuratione, sudoribus immoderatis exhaustus, aut atmospheræ impuræ, noso-

comiali, diutius expositus, in pristina discrimina, vel in hydropem, aut tabem conicitur. Hominem a febre *periodica intermittente*, vel sponte vel arte restitutum, quaecunque debilitant, quo magis ille superato vicinus est morbo, aut quo magis causa debilitans in pristinae affectionis punctum, seu in diem ac tempus paroxysmi, inciderit; eo certius ad statum, quo emerferat, febrilem reducunt; atque hinc aut evacuans alvum medicina, aut sanguinis detractio, aut sola iam menstrua purgatio, aut moeror animi, aut demum aeris paludum effluviis corrupti, vel humidi frigidique actio, frequentissimam morbi recidivi occasionem largiuntur.

Quodsi haec vel in illis, quos crisi *perfecta* iudicatos fuisse novimus, occurrant; quam facile apud alios, qui sanitatem per crises repetitas longiori intervallo recuperant, — aut qui per metastasin, vel per morbi mutationem in alium, gravioris aegritudinis pericula evaserunt, convalescentium variabitur conditio! & quam necessaria, & simul quam difficilis est eorum, quae tam ambiguam ac vacillantem salutem confirmant, praescriptio! Hic etenim febris, pro maxima quidem parte infracta, quo exacerbari alias consueverat, tempore, nunc singulis, nunc alternis fere diebus, redeunte,

ut omnis iuguletur, aut placidos, olentesque sudores; aut urinas puriformi sedimento instructas, aut utramque simul excretionem, exspectat; — illic, depositae in partem ignobilem, materiae, quae morbum aut fecit, aut ab eodem inducta fuit, maturationem, evacuationem desiderat; aut, si per solita colatoria, quod stimulum, lentamque febriculam continuat, expelli recusat, artificiales abscessus fœnticulos, fetacea, repetita vesicantia, — aut frequentes blandasque per alvum evacuationes sibi expetit; — in his, omnis, in quem prior aegritudo transivisse videtur, morbus, in irritabilitatis excessu, & chronica quasi systematis arteriosi inflammatione, cum pulsum frequentia, duritie, calore interno, ac siti coniuncta consistit; & acida mineralia, non sola, sed aromaticis, spirituosus remissa, ut Elixirium vitrioli, aut similia, requirit; — in illis, nervosae potius potentiae aut stupor, aut sensibilitas morbosa, secundariam aegritudinem fovet, & grata roborantia, antispasmodicis coniuncta, vinum atque corticem peruvianum, liquorem anodinum, subinde & opium, sibi exigit; — in aliis, a morbo superato, vera laxitas solidorum, ac systematis lymphatici inertia, debilitatem comitantur: & statum convalescentis, aut foe-

minae, aut viri, *chloroticis* simillimum aut in corpora universo, aut, post morbos locales, in partibus, inducit: atque, sub victu nutriente, frictiones, equitationem, & corporis in aere campestri exercitium, aquas minerales, aut ferrum, corticemque chinae, aut frigida simul balnea, & fascias exposcit; — in aliis demum latens in corpore, praevium ante morbum, dispositio, aut acre rheumaticum; arthriticum, scrophulosum, vel aliud, in diversam ab illo aegritudinem evolvitur; quae, sicut perfectae valetudinis recuperationem diutius praescindunt: ita peculiarem medentis attentionem, & sedulitatem communi maiorem efflagitant; & quam ambigua convalescentium conditio, quam difficilis recta eorundem curatio in multis esse soleat, abunde manifestant.

Sed ne limites praescriptos Oratio excedat, Vos nunc compello, egregios Artis Apollineae Candidatos, TE FRANCISCUM NOCETTI, atque TE IOSEPHUM DOMINICUM BONFIGIUM, Ticinenses, TE ANTONIUM FRIERI, Tyrolensem, ac TE AUGUSTUM CRAMER, Bado-Badensem, accedite, & quam Vobis studio indefesso parastis, mercedem accipite! Tu egregie NOCETTI, priusquam Medicinae te traderes, naturae in corporum

singulorum principiis struendis mysteria scrutari
 voluisti, & qua, hoc ipso in studio colendo,
 felicitate non communi progressus es; solidis-
 simum simul Medicinae fundamentum posuisti.
 TU, morum suavitatem, ingenio ac industria
 singulari bonis omnibus dilecte BONFICE,
 quos fors TIBI bona, hac in alma Musarum
 sede honorificos Natales concessit: hos, qui
donum tunc fuerant, ut *meritum* nunc TUUM
 considerari fecisti! TU, dulcis quoque meae,
 Patriae BADENSIS fili dignissime, CRAME-
 RE! quod probitatis eximiae, indefessi laboris,
 ac felicioris ingenii hac in alma TICINENSI
 Academia retulisti, testimonium, hoc TIBI,
 elegantissimam ac Civium candore, humanitate,
 probitate non minus, quam pace, Europae
 quondam concessa, celebrem in Urbem reduci,
 RASTADII fiduciam, qua fere quinque ab-
 hinc lustris, nec hodie in eandem ingratus,
 fruebar, honorificentissimam merebitur. I fe-
 lix! & sub dulci Principis, CAROLI FRIDE-
 RICHI, TRAIANI in subditos amorem pater-
 num superantis, Imperio, Civicam TIBI nocte
 Coronam! — Haec, frontem quoque TUAM
 egregie FRIERI, quondam exornet! nunc *lau-
 ro*, quem dilectis Apollo filiis concedit, sub pi-
 lei imagine, caput, — *annulo* hoc, digitos cin-

gite, ac equestris dignitatem honoris in miserrum valetudine tuenda quaesitote! Quem VOBIS aperio, liber, continuandi VOS studii, — & quem claudo, hic naturae saepius, quam ambiguae theoriae, interrogandae necessitatis, commoneat! ad ultimos Amici amplexus venite! felices aliorum felicitate estote!

IOSEPHI WENZEL

MED. ET CHIRURG. DOCT.

DISSERTATIO INAUGURALIS

D E

OSSIUM ARTHRITICORUM

I N D O L E .

Moguntiae 1791.



LECTORI S.

*I*mmortalis CAMPERI demonstrationes anatomico-pathologicas (opus magnae sane utilitatis) suadente praeceptore perill. SOEMMER-
RINGIO, iam ante duos continuare decrevi
annos. Extremitatum enim inferiorum, quae
superest expositio & anatomica & pathologica,
eiusdem mihi videbatur momenti, ac superio-
rum. Absolutum etiam esset opus, studium cum
per biennium fere omne in id impendi; verum
de quibusdam morbis chirurgicis hucusque in-
Delect. Opusc. Vol. XII. Z

complete peractis, fusius differui libuissetque simul, quae observari a natura iterato stabilita, quam ut incerta (fugiunt enim talia tempus) ea tradidissem. Insuper tabulis formae illa, quibus B. CAMPERUS suum decoravit opus & meum instruere propositum est. Quae omnia operis prorogarunt absolutionem. Angustius igitur de arthritide selegi thema, etsi satis tritum, attamen nondum exhaustum. Auctores enim quam plurimi essentialem huius morbi neglexerunt partem, ossium nempe mutationis disquisitionem accuratior, & quando de morbi sede disputatur, exigui sane momenti non est, ossium arthriticorum indolis cognitio. Equidem non ignoro, viros in arte medica celeberrimos, qui meliora de huius morbi sede commendarunt, ossium ab arthritide vitia, tanquam primarium considerasse criterium.

Magna ossium morbosorum collectio nostra me iam plures ante annos in has deduxit observationes, quas postea continuo novis augere & cadaverum dissectionibus probare conatus eram.

Si opera, quam describendis talibus vitiis impendero, non inutilis habeatur, plura alio tempore de iisdem tradere decrevi.

OSSIIUM ARTHRITICORUM DESCRIPTIO.

IN describenda ossium arthriticorum indole & structura, a superioribus quidem extremitatibus incipere, ordo postulasset; verum cum inferiorum extremitatum ossa praecipue hic morbus invadat laedatque, maiorem etiam eorum copiam coemeteria cuiuscunque praebeant loci, sicque generalia huius generis affectionis ossium morbosae signa, melius ex iis, quam ex prioribus abstrahi possint, eorum praemissi delineationem.

OSSA COXARUM.

An dextri, an finistri lateris ossa haec saepius dicto laborent morbo, non omnino discernere leve est. Inter quindecim collectionis nostrae ab illo octo, septem ab altero morbosa sunt.

Sexum, quem prae altero invadat, aequè dicere difficile est.

Eorum aliqua anchylosi cum sacro osse iuncta sunt; plurima non. Partim respectu ma-

gnitudinis levia, tenuia, angustisque & exilibus pubis, nec non ischii ossibus sunt instructa, ita ut articulo excepto non parum cum iis consentiant coxis quarum femora luxata. E contrario alia magna, ponderosa itemque crassa sunt.

Exceptis articulorum caveis partibusque in vicinia sitis, in quam plurimis os reliquum sanum, solius tuberis forma mutata videtur.

In duabus latus acetabuli internam pelvis respiciens caveam ad semiunciam protrusum est, tribus aliis idem, at incipiens tantum est malum.

Acetabula tunc vel angusta sunt & minore comprehenduntur volumine, vel ossa sunt minus crassa & ponderosa.

In plurimis nihil huius acetabuli mutationis cernitur, & vel robusta ossa sunt, vel acetabula magis minusve superficialia amplaque.

Numerus coxarum profundarum maior; minor vero superficialiis instructus est acetabulis. Ratio in iis, quas nos servamus circiterprehenditur, ut 12. ad 3.

Vix non omnia rotunda gaudent figura acetabula. Profundorum diameter pollices duas lineasque circiter quatuor, altitudo pollicem & lineas metitur quinque.

Planiorum magis seu superficialiorum dia-

meter uncias itemque lineas duas , altitudo vero novem ad decem usque metitur lineas .

Sani omnino , quod contra censetur acetabuli diameter pollice uno decemque lineis , altitudo vero undecim prehenditur lineis .

Sana si spectentur itidem acetabula eorum diameter ab incisura inferiore ad oppositum marginem evidenter maior esset eo , qui ab interiori versus pubis ileique iuncturam respiciente exit margine & in opposito finitur inferiore , si nempe acetabulum inferius uti superius clausum esset , quandoquidem pars eiusdem superior ovali magis quam rotunda gaudet figura .

In huius generis (arthriticis nempe) morbos ossibus vero totum quantum acetabulum cernitur rotundius . Plerumque acetabuli margo superior quidquam introrsum vel deorsum versus inferiorem depressus est (quo nempe ovalis magis oritur figura) quo fit , ut ab ea coxae parte , qua ramus pubis horizontalis ilei osse iungitur , quasi planum inclinatum ad marginem acetabuli descendit superiorem , quod sursum ad spinam ilei inferiorem distincte procedit . In coxis arthriticis vero superficies haec ab adhaerente acetabuli volumine vere tota tegitur & sursum properat , non ut in praecedentibus descendit . Solum in iis coxarum ossibus arthriticae indo-

lis, quorum acetabula vi morbi prolongata simulque vero angusta sunt, haec superficies libera, inque planum horizontale extensa est.

Posterior seu exterior acetabuli margo in plurimis hisce ossibus ob novam, quasi vallatam osseam materiam, uno pollice lineaque una, in aliis semipollice tamen maior est ac in statu naturali.

Oritur ergo hoc modo retro acetabulum planum quoddam, quod cum isto ex iunctura ilei ischiique osse pollicis unius linearumque aliquarum latitudine, in primis coxis (ubi nempe osseae materiei novae latitudo pollex unus & linea est) latitudinem pollicum duorum triumque linearum attingit; in alteris vero (ubi tantum semipollicis latitudo est novae materiei) unius tertiique pollicis quadrantis.

Exinde luculenter explicandus est ille mox maior, minorve alias in diu arthritide passis tumor, quem cum in exteriori coxae parte observamus, pro luxatione femoris definire non haesitamus.

Si porro sanae cernuntur coxae, in anteriori ovale foramen versus directo acetabuli margine, invenimus incisuram ratione magnitudinis satis variantem, qua hoc in loco acetabulum paullisper hiat. In arthriticis ossibus super hanc incisuram pons quasi extensus, materia consistens ossea. Introrsum in cavea nempe

articuli pons hic vel lamina ossea quasi patera, seu lanx excavatus est, & non solum superioris acetabuli partis formae quam maxime respondet, sed & anteriorem caveae articulariae marginem respectu altitudinis posteriori perfectissime adaequat.

Sub osseo hoc ponte in plurimis tali morbo affectis ossibus foramen deprehenditur, cuius facies interna ab adiacente ischii parte, externa vero a nova generata ossea materie formatur.

Foraminis forma perquam differt, ovalis tamen saepius ac rotunda apparet.

Eiusdem altitudo non insignis, plerumque trium seu quatuor linearum.

Ut plurimum extrinsecus tantum cernitur apertura haec; in ipsa cavea articulari vero omnis incisura nova impleta est ossea materie; subinde tamen hic parvus ductus ad caveam ipsam continuatur & illinc altero patet fine.

Quae ab ischii osse formatur paries interna huius foraminis & foraminis ovalis simul marginem constituit posteriorem in plurimis tenuior exiliorque fieri, ac in statu sano esse videtur.

Plerumque in ipso acetabulo neque prehenditur vestigium, ubi nova inceperit ossea materies. In aliquibus tamen versus acetabuli marginem distincta videnda est linea separatoria,

veteris nempe recentisque ossis, & progrediens ab hinc ulterius nova ossea materies, quando ad marginem venerit acetabuli, extrorsum recedit, verosimiliter ob novam circa femoris caput exortam osseam coronam, quae priori circulo circa acetabulum firmiter incumbit.

Potissimum superior acetabuli paries laevis politaque quasi, caetera vero huius caveae pars magis minusve inaequalis, & aspera reperitur. Raro politura haec ultra acetabuli dimidium se distendit. Paucissima denique sunt acetabula, quibus nulla laevisitas, vel quae omnino inaequalia inveniuntur. In diversis quasi facieculae politae regulares arte factae observantur.

Ut plurimum laevis illa superficies fungi adinstar magis vel minus perforata est, at saepe etiam extra hanc superficiem adhuc alia reperiuntur foramina magnitudinis valde diversae, & videtur perniciosior morbi gradus adesse, quando interna haec superficies acetabuli valde foraminibus scatet.

Laevis enim illa arctaeque compagis superficies conteri prius omnino debet, quam illa cellulosa magis apparet ossis pars, quam foramina incidere obvium est.

Acetabuli incisura, uti iam supra monui, in plurimis tota omninoque nova expleta est

ossea materie, partem tantum si exceperis anteriorem, ubi pontis adinstar ossa materies applicata invenitur. Frustra in quibusdam quaeritur locus ille, ubi olim incisura erat, tam plana & aequalis tota cernitur cavitas.

In aliis incisurae situs formaque simul vel sulco exiguo, vel margine a nova exorta materie ossea parum prominente discernendus est.

Ad fossam quod attinet ligamenti suspensorii seu teretis insertioni inservientem, desideratur illa omnino.

Si facies ossee materiei novae ad prorogandam vel ampliandam articuli caveam applicatam spectetur externa, utplurimum inaequalis invenitur atque diversis valde, maioribus minoribusque osseis laminis & exostosis obseffa. Ischii tuberis forma consueta plerumque mihi mutata videtur, magis enim expressus, pluribus quasi instructus facieculis novaque subinde etiam adhaesus ossea materie, quae pulvinaris adinstar ei incumbit, tuber apparet.

In planioribus seu minus profundis acetabulis, femur luxationis periculo haud difficulter & quidem secundum omnes directiones expostum est (*).

(*) Idem verosimiliter morbus in equi pelvis aceta-

F E M O R A .

Quam supra monuimus difficultatem in discernendo, cuius lateris ossa saepius hoc morbo corripiantur, hic exemplo statuitur, inter

bulo dextro, quam in collectione nostra servamus, observari licet.

Figura acetabuli naturalis parum tantum mutata videtur.

Nova quidem ad eiusdem marginem seu peripheriam exorta est ossea materies, at copia exigua, quare etiam tantum paullo profundius ac in statu prehenditur sano.

E contra os ischii ad totum externum acetabuli latus multo magis laborat, ac id in homine pro more solito accidit. Carie enim quadam hoc loco correptum est, qua os diversimode perforatum, multasque habet fissuras.

Incisura acetabuli omnino nova repleta est ossea materie & quasi deleta, sic ut excepto parvo hiatu versus foramen ovale, quo loco in statu sano incisura patet, neque minimum eiusdem reperitur vestigium.

Facies acetabuli interna deorsum ac retrorsum laevigata, splendens atque subtiliter perforata est; sursum ac introrsum vero gaudet adhucdum naturali suo colore substantiaque illaesa. Luculenter admodum hic patet, uti color texturaque ossis naturalis per frictionem perpetuam & laevigationem gradatim deperditur & quomodo cum candidiore ossis colore, simul & fissurae, foramina, laevitasque apparent. Qui pelvis cavum respicit acetabuli paries quidquam propulsus est, simulque scaber, parvis obliquis exostosis, cribratus, & fissuris denique mutatus.

femora enim hoc morbo affecta triginta quatuor, sedecim a dextro, octodecim ab opposito sunt latere.

Plurima excepto capite articulari, caeterum omnino sana sunt. Duo a morbo rachitico paullulum incurvata sunt, quibusdam aliis in diaphysi sunt exostoses parvae, quarum origo vero forsitan & alii adscribenda est morbo. Plurimorum condyli carent laevitate; in paucis tantum, & quidem saepius in interno maiori reperitur.

Ipsam femoris collum subinde, sed non frequenter (ratio circiter est, ut 8. 36.) omnis expers est effusae materiae osseae & exostosium inde ortarum; plerumque vero tantum de posteriore eiusdem latere hoc valet. Idem videtur quidquam brevius, etsi revera non est, ob constantem nempe (quod dicere licet) circa capitis peripheriam exortam novam coronam osseam, quae retrorsum in aliqua a colli distantia excurrit; collum vero ipsum omnino intactum ad caput usque adscendere finit.

E contra in anteriore colli femoris latere fere semper plures vel pauciores, maiores seu minores adsunt exostoses. Diceres materiam osseam pro conficiendis illis exostosis a femoris capite defluxisse.

Caput femoris articulare unumquodque ar-

thritide laborans in margine suo, nova uti iam supra dixi coronide ossea a morbo producta, ut plurimum circumcinctum est. Sequentes in hisce fertis seu coronis observandae sunt varietates.

Vel enim quaquaversum a collo femoris exporriguntur, capitisque ambitum eiusdem marginem versus valde adaugent, vel retrorsum secundum capitis diametrum maximum in directione colli femoris currunt, sicque caput in longum magis extendunt.

Varietas prior rarius occurrit altera. Primi generis femorum capita (ampla nempe & magna) superficialiis, magnis amplisque respondent acetabulis; secundi (quorum capita in longum protensa sunt) angustioribus & profundioribus.

De superficialibus autem acetabulis supra annotavi rariora eadem esse ac profunda, convenit igitur cum eo, quod modo de femorum capitibus arthriticis dictum est.

Porro vel nullatenus coronae osseae circa caput observatur initium, ita, ut capitis articularis superficies in illam quasi transire videatur & tota superficies omnino aequalis sit.

Vel parva ubi incipit observatur protuberantia, quae simul indicio est, ubi sanum & naturale desiverit acetabulum, nova vero circa eiusdem marginem inceperit ossea materia.

Subinde haec corona ossea corticis mox crassioris mox tenuioris adinstar circa posterius femoris capitis segmentum circumiacet, quin in sui fine observentur exostoses. Ut plurimum vero ex eo una vel plures, maiores seu minores prodeunt exostoses, vel quod etiam fieri solet, iterum versus caput articulare reflectit, & sic eiusdem volumen, non vero uniformiter adauget.

Inter locos, quibus hae plerumque observantur exostoses, sequentes numerandi sunt.

1) Infra foveam istam parvam in capite articulari, quae ligamenti suspensorii seu teretis inservit insertioni (*).

2) In anteriore colli femoris parte, exostoses vero ipsi collo adhaerent. Quoad coronae osseae (ut nuncupavi) originem, a fovea ista pro ligamenti suspensorii insertionem derivari debere videtur. In quam plurimis enim distincte videmus, uti ossea materies ab illo loco capitis

(*) Sine dubio exostosis haec toties hic observatur, quoniam nempe exacte illi acetabuli loco concinna est, ubi acetabuli exitus reperitur, qui uti iam supra dictum est, saepius nondum omnino nova impleta est ossea materie. Per hanc exostosin vero caput femoris maiorem acquirit firmitatem & praesente agenteque in id vi non ita cito deorsum cedit.

articularis marginem versus descendat, seu ut dicam, defluat hacque via superius citatam exostofin formet, & tunc demum caeterum capitis marginem circumdet, qua via ligamentum capsulare progredienti osseae materiae quasi limites ponit.

Forfan vero ex iisdem caussis eodemque modo & in caetero femoris capitis margine nova haec exoritur ossea materia & non a dicto ad caeterum marginem ascendit loco.

Fossa ligamenti teretis insertioni destinata in multis ita deleta est, ut nullum amplius eiusdem observetur vestigium.

In aliis parvus adhucdum recessus hoc in loco reperitur.

Modus, quo evanescit haec fovea triplex invenitur, vel enim defluens seu descendens ad capitis femoris marginem ossea materia eam implet, vel parva quaedam osseae materiei separata pars cuneoli seu coni adinstar eam complet, vel (quod etiam non alienum esse putem) per continuam capitis laevigationem, qua manifeste decrescere debet, subducitur. Plerumque forma curvaturaque capitis femoris globosa omnino mutatur. Praesertim vero id contingit, quando nova materies ossea in inferiore capitis margine ample se extendat, & ad superiorem

eiusdem marginem oblique & retrorsum prolongatur; caput articulare tunc minus globosum & rotundum fit, magis confimile est plano inclinato, superficies eiusdem fit maior, inferius plerumque acutam admittit formam, & huc maxima eius referenda esse videtur altitudo, cum in statu sano supra foveam pro ligamento suspensorio reperitur.

In quibusdam dimidia fere capitis pars nova obducta est ossea materie & prorsus inaequalis.

Plurimorum capitum anterius superiusque latus reperitur laeve, saepe vero etiam ad medium capitis usque se extendit politura.

In aliquibus maxima capitis articulatorii pars invenitur polita. In paucis tantum posteriorem occupat faciem.

Raro ad eam capitis partem extenditur politura, quae infra foveam pro ligamento suspensorio sita est.

Ut plurimum pars seu facies polita, segregata, ovalis seu rotunda apparet.

In iis, quae nos servamus femora, loca omnia laevigata subtiliter perforata observantur.

In quibusdam femorum capitibus manifesta cernitur caries. Ampla erosa foramina ossis penetrant substantiam, & quidem uti luculenter

videre est in iis locis, ubi antea politura aderat. Maior ergo morbi gradus in iis videtur, mitior e contra censendus, si laeve tantum reperiatur caput.

Quod ad structuram femorum capitum arthriticorum attinet internam, aequè manifesta ea inter & sana reperitur differentia. Serra enim & plura femorum sanorum & arthriticorum dissecuimus capita & constanter tunc observare nobis licuit priora (sanorum nempe capita) exterius tenuissima circumcincta seu obvoluta esse lamina ossea, quam immediate attingit diploe fere ubique aequaliter conditiōnata, seu cellulis undique fere aequaliter magnis instructa. Posteriora vero (arthriticorum femorum capita) iis in locis, ubi in externa superficie laevia reperiantur, cortice obducta esse quasi eburneos, ita compacto & colore simili albido flavo, cellularem item contextum osseum (vulgo diploen), corticem hunc insequentem multo, ad capitis circiter medium usque esse arctiorem seu densiorem. Nihil manifestius hoc reperiri potest discrimine, si enim pars in femoris capitis superficie laevigata adhuc exigua reperiatur; caeterum vero caput adhuc dum incolume, interna capitis substantia, quando serra dissectum est in illa tantum parte polita,

polita, arcta, alba & eburnea; in caetera vero peripheria tenui illa lamina ossea & diploe laxiori instructa invenitur. Quod sufficienter probat mutationem hanc in capitis femoris substantia interna a morbo derivandam esse.

Denique condyli femoris subinde (non enim frequenter perquam observatur, imo in iis femorum ossibus, quorum capita arthritide valde laesa reperiuntur) cortice quasi osseo prorsus obducti sunt, cuius (corticis) superficies, modo in hoc, modo in illo condylo laevigata est, simulque perforata. Servatur tale femur in collectione nostra, ubi cortex crassus, firmus in ea anterioris lateris incipit regione, cui patella insidet, postea descendit, condylos femoris obducit totos & demum ad latus condylorum posterius ascendit, ubi in suprema eorum regione desinit. Pulvinaris adinstar haec lamina ossea femoris obvolvitur condylos, forsan hac ex causa, ut condyli ipsi contra vim morbi tueantur, seriusque laedantur. Corticis huius margo ad latera condylorum reflexus, superficies ubique, excepto tantum in condylo interno loco, qui laevigatus & foraminibus obsessus reperitur, inaequalis est. Subinde tam & laevis in alterutro condylo reperitur locus, quia simul cortex talis offensus obducatur condylos.

CRURIS OSSA.

Tantum nobis in tibiis licitum est considerare ab arthritide mutationes; fibulas enim affectas desideramus.

Alterius tibiae superficies articularis superior uno tantum loco condylum externum versus affecta est. Laevis illa & subtiliter perforatus est.

In altera vero articulus multo magis destructus reperitur.

Condylus nempe internus, qui cum externo in statu sano horizontalem admittit situm seu directionem & tantum paullo magis in superficie excavatus invenitur, hic in latere exteriore oblique perquam deorsum laevigatus est simulque splendens, & fere omnino perforatus.

Femoris ergo condylo interno hoc in latere exiguum tantum superstit fulcrum.

Foveae ligamentorum cruciatorum insertioni destinatae duae, quae duabus interiacent superficiebus articularibus, anterieus nempe & posterius, tantum pro parte adhuc reperiuntur, simulque morbosae, ita, ut manifesto appareat, ligamenta cruciata laborasse morbo. Duo parvi illi processus, qui inter nominatas observantur fo-

veas omnino desiderantur, haecque pars intermedia, inaequalis alias, in horizontale, splendens laeveque mutata est planum.

In tertia demum tibia tota superficies articularis in unum quasi & fere omnino aequale mutata est planum. Deletae sunt foveae pro insertione ligamentorum cruciatorum, itemque parvi processus ipsis interiacentes. Singulae superficiei articularis (quarum duas semper invenimus) margo, qui in statu sano circa excavatam partem quidquam elevatur, hac in tibia excavatae parti omnino aequalis reperitur. In media superficiei articulariae parte locus reperitur laevigatus, colore gaudens eburneo, simulque perforatus.

Naturalis igitur articuli firmitas, seu ea, qua homo in statu pollet sano, non potuit non diminui.

PEDIS OSSA.

Quae vidi arthritide affecta, in cadaveribus reperi; raro enim ob exiguitatem in coemeteriis inveniuntur. Interim tamen haud dubito, quin & in his eadem, pro morbi gradu, observentur signa characteristica.

OSSA EXTREMITATUM SUPERIORUM.

Uti coxa, ita similem in modum etiam, rarius tantum, scapula ab arthritide destruitur. Superficies articularis praeternaturaliter per novam exortam osseam materiem extenditur, laevigatur, simulque foraminibus obseffa apparet. Servatur huius generis specimen illustre in Museo SOEMMERRINGIANO.

H U M E R U S.

Cum rariora itidem humerorum ab arthritide affectorum sint specimina, etiam de eo, in quod nempe latus saepius vel atrocius id agat malum, haud mentionem facere tentabo.

Quae possidemus exempla paucis describam. Incipiam ab eo, quod minime destructum reperitur.

In hoc capitis articularis media & externa pars, excepta lamina ossea tenui, exteriorem eiusdem partem obducente, adhuc incolumis omnino reperitur; interna vero scapulae articulum versus directa capitis pars quasi resecta est, indeque exorta superficies polita & perforata.

Ad basin huius laevigatae superficiei, exostosis, durante morbo orta, satis firma, super-

Sciētiā illam versus directā , interius leniter excavata , simulque aspera & perforata prostat . Exinde incisura quasi formata est , cuius inferior pars , quam exostosis illa format capiti fulcro inservire videtur . Inferior humeri articulus similiter affectus est .

Lamina illa ossea , ut plurimum quidem tenuis , quae inter foveas istas pro olecrano & ulnae processu coronoides in statu reperitur sano , hic omnino deleta est . Trochleae forma quidem , sed non omnis superest substantia , multo exilior , etiam inaequalis est , & in eiusdem tubere exteriorē locus observatur politus , & foraminibus perforatus .

Insuper condyli ambo exostosis deformati sunt .

Alterius humeri caput vix nomen adhucdum meretur , similis enim est exostosi magnae , deformi , partim tuberosae & partim politae , oblique deorsum humero adhaerenti , superius & posterius tantum exigua adhucdum reperitur capitis pars incolumis , caetera multo maior in oblique introrsum descendente , simulque maxima ex parte politam & perforatam mutata est superficiem .

Forma eiusdem pene ovalis est , & magnitudo plani laevigati adaequata reperitur scapulae

superficiei articulari. Inferius & anterius superficiem hanc nova materies ossea coronae adinstar robustae & exterius tuberosae circumdat, quod ad maiorem laesi articuli firmitatem certe non parum confert.

Humeri vero eiusdem articulus inferior omnino sanus reperitur.

Tertii humeri caput articulare non minus ac praecedentia naturalem suam amisit formam; non enim globosum, ut in statu sano, sed plano inclinato paullulum tantum elevato similis reperitur. Superficies eiusdem (si caput dicere auserim, magis enim fungum refert) non rotunda, ut in statu naturali, sed incertae figurae, magis multangulae, simulque omnino laevigata est, foraminibus maxima ex parte intermixta, & colore subflavo-eburneo. In superficiei huius margine nova cernitur ossea materies, quae vero non circum circa se distendit.

ANTIBRACHII OSSA.

Ulnam possidemus, cuius superficiem articulare inferiorem nova omnino obduxit ossea materies, quae anterius & ad latera in aliqua ab ossis diaphysi distantia assurgit & mox desinens quasi vallum, seu canalem circa maximam

ossis partem format; inferius vero, ubi ulna cum carpo articulatur, tota laevigata reperitur.

Ipse processus styloideus ab accessa nova ossea materia augmentum cepit, & in duas quasi divisus est facieculas politas.

Articulus ulnae superior omnino sanus est.

Vidi e contra superficiem ulnae articulare superiorem valde affectam & distensam; inferiorem vero tantum exigue.

In radiis etiam vel solum in superiore, vel tantum in inferiore, vel denique utroque simul articulo prehenditur morbus.

Si primum, tota subinde superficies articularis (servamus huius generis specimina in collectione nostra) nova obducta est ossea materie, quae simul circum circa in margine quasi defluxisset, reperitur & sic uti supra de ulnae articulo inferiore dixi, quasi vallum seu canalem circa ossis diaphysin constituit. Ipsa vero superficies articularis laevigata, colore subflavo-eburneo, & perforata invenitur.

Si alterum (quando nempe inferior radii articulus tantum laboret) & illa superficies, qua cum carpo, & altera, qua cum ulna articulatur radius, affecta reperitur. Interea tamen haud nego unam tantum etiam dictarum superficierum laborare posse.

Utrumque vero sit, superficies articularis affecta, nova vel omnino, vel pro parte saltem circumdata est ossea materia & sic praeternaturaliter distensa simulque in superficie laevigata, subflava, & cribrata est.

Si tertium (quando nempe in utroque radii articulo superiore & inferiore reperitur morbus) eadem quae iamdum recensui, observantur phaenomena.

MANUS OSSA.

Quae de pedis commemoravi ossibus, eadem & de his valent.

OBSERVATIONES IN CADAVERIBUS INSTITUTAE.

Observatio I.

Factas in ossibus, quae coemeteria praebuerunt, hucusque recensitas observationes, quam libenter a natura stabilitas vidissem, non est quod moneam; diu desideravi occasionem, quae tandem fausta, mense Ianuario 1790. sese obtulit mihi.

Foemina, quae multos per annos arthritide laboraverat vehementer, ita ut inter alia, quae ab hoc morbo in totius corporis articulis passa est incommoda, etiam extremitatum inferiorum

sinistra, altera multo brevior facta sit, ut tantum pedis digitis, non vero planta insistere poterit, & fulcro stipata circumire coacta fuerit, tandem extincta erat, & ad theatrum deportabatur anatomicum.

Coxae obliquum & inaequalem tenebant situm; cavitas tamen pelvis interna non deformis, e contra ampla, imo solito spatiosior erat.

Coxa sinistra altior locata supra dextram prominebat. Idem de sinistri lateris trochantere valet.

Totus coxae articulus in sinistro latere multo maioris erat voluminis (tantus erat ambitus, ut luxationem suspicati simus, tali enim perquam similis erat) & femur totum oblique introrsum versus dextrum directum erat, ita ut non parum a linea discederet recta, & triangulare igitur spatium, quod in statu sano a musculo pectineo & obturatorio expletur, omnino evanesceret. Musculi hi exiliores inde, breviores multo, simulque rugati erant.

Idem de caeteris totius extremitatis valet musculis, omnes enim erant multo pallidiores & graciliores, quam in opposito latere sano. Simul etiam extremitas morbosa propter retractam pedis plantam circa sesqui unciam diminuta seu brevior erat opposita, planta aurem verosimiliter ob id mutata cernebatur, quoniam

nempe totum fere femoris collum extinctum, quasi in femoris caput transierat, ab acetabulo rectum, & non ut plerumque in statu sano fit, oblique sursum ascendebat, sed magis horizontale directum erat.

Vasa femoris & nervi profundi in illo supra citato spatio angusto inter pelvim & femur coarctata erant.

Articulus motu fere carebat omni, fixus & quasi anchylosi laborans reperiiebatur, sic ut & magna vi adhibita, extrorsum non moveri potuerit femur, paullulum tantum antrorsum & retrorsum.

Disquisitione articuli continuata manifesto apparuit, praeternaturalem capsulari ligamento accessisse cellulosum contextum, solito enim multo crassius fuit.

In coxae superficie externa anterieus & superius prope acetabulum magna simulque obtusa observatur ossis protuberantia, cuius color magis albus, ac in caetero osse reperitur, ubi ex rubro in lividum transit.

In interna facie, diversa reperiiebantur loca, quibus os tenue perquam ac transparens apparebat. Locorum talium peripheria colore gaudebat rubro, media vero eorum pars, albido, ut tenuis lamina ossea.

Circum circa haec loca sani ossis eminebat margo, omnino foliosus, manifesto indicio, quod gradatim ope resorptionis interna seu media pars tenuior facta sit.

Discisso undique ligamento capsulari, attamen caput femoris articulare, nullo eximi poterat modo. Desiderabatur pene totum femoris collum & acetabulum ad trochanterem maiorem usque prolongatum seu extensum erat. Hac ex causa & ut simul partes in situ appareant naturali cum ill. Praeceptore SOEMMERRINGIO acetabulum simul & femoris caput ab exteriori ad interiorem partem ferra dissecuri.

Acetabulum tunc praeternaturaliter extensum seu longum & una angustius, & quoad formam ovale reperi.

Paries eiusdem inferior dimidia fere ex parte superiore tenuior erat; ambo vero parietes ab acetabuli veteris margine circa semipollicem prolongati erant.

Novum hoc osseum acetabuli augmentum colore (quod praecipue in parte dissecta observandum est) a veteri acetabulo distinguitur subflavo albo. Videtur ac si pauciora vasa sanguifera huius novae partis penetrarent substantiam, cum vetus acetabulum colore gaudet magis rubro. Nova eadem pars interius ver-

sus acetabuli caveam cartilagine obducta est, quae simul candidior reperitur. Non minus caput femoris manifesto extensum seu prolongatum, novaque exorta pars similiter rotunda & cartilagine obducta erat.

Caeterum tota capitis articularii superficies cum interna acetabuli facie per multas subtiles membranas spurias intime iuncta erat, quae nisi descendantur etiam magna vi adhibita, tamen prohibuere caput ex acetabulo eximere.

Tam in tota acetabuli veteris interna, quam in capitis articularii veteris superficie omnis pene deleta seu consummata erat cartilago; sparsim tantum tenuis adhuc reperiiebatur lamina cartilaginosa os obtegens, in aliis vero locis os nudum omnino erat eademque haec loca rubra & quasi inflammata cernebantur.

Ut firmitas pateat, qua femoris caput cum acetabulo cohaereat, dimidia inferior eorum pars incolumis, seu indissoluta relinquebatur, ex superiori vero alteram capitis partem eximebam.

Foveae pro ligamenti suspensorii insertionem, quarum una (in statu nempe sano) in acetabuli fundo, altera in summo femoris capite prehenditur, una cum ipso ligamento terete omnino desiderantur.

Simul & incisura acetabuli tota deleta reperitur; nova enim expleta est ossea materie.

Nullum omnino inter femoris caput, internamque acetabuli superficiem observatur spatium, immediate haec ossa se invicem con-
trectant seu amplectuntur.

In oppositi lateris femore & acetabulo nihil simile quidpiam reperi.

Verum in condylo utriusque femoris externo parvum observari locum manifesto affectum. Cartilago mollis fungiformis erat, colore spadiceo & super circumiacentem sanam cartilaginem paullulum eminebat, etiam alia in parte epiphyseos ossis femoris dextri omnino iamdum deleta erat & os nudum apparebat.

In aliis extremitatum inferiorum articulis nihil reperi, quod momenti esset.

In utriusque scapulae superficie articulari exiguum in eiusdem medio reperi locum fere rotundum, cuius cartilago mollis, subfusca, partim etiam iamdum deleta erat, ita ut parum abfuerit, quin os nudum apparuerit.

In humerorum capitibus vero articularibus cartilaginem omnino immutatam inveni, sana erat quoad structuram & colorem. Articulus humeri inferior in utroque latere iterum morbosus reperiiebatur. In tubere nempe, quod

iuxta trochleam exterius situm est radiique interservit articulationi, inferius & antrorsum parvus reperitur locus lentis magnitudine, qui omni plane orbatus est cartilagine, os nudum omnino apparet, & speculi adinstar politum est, simulque splendet. Circumcirca hunc locum cartilago etiam naturalem suam amisit laevitatem & colorem lacteum, cuius loco subfuscum magis admisit, simul etiam in posteriore trochleae latere eiusdem humeri cartilago affecta invenitur & subiacens os in diversis locis iamdum denu datum, nondum vero politum.

Similiter & humeri sinistri tuber & trochleam obtegens cartilago, in priore (tubere nempe) sursum & antrorsum, in altera vero (trochlea) in posteriora latere superius foveam versus pro olecrano affecta est.

Quoad antibrachii ossa in interna olecrani superficie utriusque ulnae cartilago partim affecta, & subfusca erat.

Quae demum radiorum marginem interiorum, quo cum ulna iunguntur tegit cartilago, itidem laborabat, mollis enim erat, spongiola, subfusca & pro parte iamdum absorpta.

Observatio II.

Viri circiter quinquagenarii cadaver ad theatrum perlatum fuit anatomicum. Laboraverat is per multos ante mortem annos arthritide, non quidem feroci, sed miti & lenta seu serpente magis. Investigavi articulos maiores tantum, quos iure coniecere poteram morbo hoc affectos fuisse. In femorum capitibus vero uti & in acetabulis neque vestigium mutationis morbosae reperi.

At in condylo utriusque femoris externo, & quidem in anteriore & superiore eiusdem parte locus trium vel quatuor linearum reperiabatur, quo cartilago laborabat.

In margine huius affectae partis cartilago aliquantum eminebat & mollis simul subruberque erat, in medio vero eiusdem loci omnino desiderabatur, & os nudum scabrumque apparebat. Circumiacens cartilago subfusco prehendebatur colore, manifestum affectionis eiusdem morbosae indicium.

In rotulae utriusque facie interna & quidem magis extrorsum cartilago puniceo cernebatur colore, item mollis, soluta quasi, fungiformis & super circumiacentem cartilaginem prominens; os vero adhucdum illaefum erat.

Cum suffecerint expectationi meae observata haec, caeteros non inquisivi articulos.

Observatio III.

Adolescens viginti annorum antea omnino sanus, prima vice arthritide per quatuor septimanas satis vehementer laborabat. Restitutus est brevi, medicaminibus huic morbo convenientibus. Reconvalescens in horto domui proxime adiacente deambulans, subito quasi apoplexia tactus decidebat. In lectum deportabatur, simulque omnia, quae Ars praebet, adhibebantur remedia, verum frustra, altero enim exspiravit mane.

Sectio cadaveris, quam cel. D. BURCKARD (medicus Nosocomii felicissimus, cui pro singulari erga me benevolentia grates hic pulice refero maximas) humanissime mihi concessit, diu exoptatam observandi occasionem praebebat, qualem mutationem in articulis cartilago & ossa simul inirent, si breve tantum temporis spatium arthritidis laeserit corpus.

Scrutinio subieci acetabulum, femoris caput, utriusque femoris condylos & tybiarum superficies articulares. Nihil vero omnino reperi morbose, exceptis quibusdam in femorum condylis locis, quorum cartilago uti faciecula marginata erat.

GENE.

GENERALIA QUAEDAM.

Notatu digna mihi videntur :

1) Quatuor praecipuae huius morbi in partibus duris (cartilagine scilicet & osse) observari posse gradus , quorum primus (ab initio nempe morbi) parvulas , irregulares , simulque angulosas in cartilagine , vel uno tantum , vel pluribus locis ostendit fissuras . Postea cartilago gradatim mollis evadit & naturalem suum in spadiceum mutat colorem . Simul parva haec superficies affecta elevatur seu affurgit , super circumiacentem cartilaginem sanam prominet , & quidem pedetentim magis , ut locus ille affectus volumine maior & una mollior fit . Prominens illa superficies affecta tota inaequalis reperitur .

In gradu secundo , quando scilicet morbus aegrum vel saepius , vel atrocior invadit , vel denique diutius intendit , simulque partis laesae attritus ab articuli motu continuatur , pars illa cartilaginis ossium extrema obducentis affecta & prominens , sensim absorbetur , tenuior fit & tandem omnis evanescit , sic ut subiacens os quasi involucro suo orbatum nudum appareat .

Circumcirea hanc partem cartilaginis ablatam in margine nempe sanae cartilaginis tunc omnes adhucdum observandi sunt gradus, per quos malum ad praesentem pervenit.

Exterius nempe sana adhucdum & lactei colorisprehenditur cartilago, ex cuius periphæria morbosa pars se quasi exfoliavit.

Margo inaequalis reperitur, denticulatus & fissuris instructus minimis. Sub hac sana cartilaginis lamina alia distincte reperitur, cuius vero structura iamdum & color mutata sunt, quaeque partis absorptae cartilagineae adhucdum satis aperte indicat habitum. Hanc tandem subsequitur os, mollius quidquam, ac in statu sano & inaequale.

In tertio gradu ossis exoritur laevitas cui, si morbus simul ulterius procedat, diversae magnitudinis accedunt foramina, destruitur item ligamentum suspensorium, deletur fovea pro eius insertionem, & oriuntur exostoses.

Eundem passum procedentes in acetabulo mutationes observare videntur.

In quarto demum gradu timenda articulum invadit caries, ampla & profunda simulque erosio in femoris capite & acetabulo oriuntur foramina, accedunt ulcera, & nisi potente succurrat manus natura, periculum subit aeger.

Quod ipse vidi in viro viginti quatuor annorum arthritide laborante, & alii observarunt Auctores.

2) Omnia ossa arthritide affecta, quae ad proposita mihi inservierunt corollaria ex hominibus a vicesimo circiter ad sex vel septuagesimum esse annum.

3) Non ex uno, sed ex diversis & quidem in & extra urbem sitis coemeteriis eadem esse ossa, manifesto indicio arthritidem apud nos perquam vulgarem esse morbum.

4) Non sine difficultate magna discerni posse ex ossibus hisce morboris, quinam sexus prae altero saepius hoc afficiatur morbo.

5) Etsi universi sceleti ossa hoc corripì possint morbo & reapse corripiantur, plura tamen ab extremitatibus inferioribus, quam a supernis inveniri affecta.

6) Maximam fere semper reperiri destructionem in coxa & femore, in omoplata & humero, minorem vero in caeteris harum extremitatum articulis.

7) Arthritis si ossa iam valde laeserit, aequae naturae auxilio ac medicaminibus sanari debere.

8) Ossium arthriticorum structuram, habitum, seu indolem, maxime cum ea convenire, quae in ossibus subinde observatur luxatis.

9) Signa ossium arthriticorum characteristica esse: superficies articularis quoad locum immutata, ut plurimum completa regularis & rotunda, pro excipiendo capite ossis articulari satis ampla, nova adaugeta simulque mutata ossea materie, & ut plurimum seu semper fere polita; os caeterum vero, cui inest, sanum, immutatum, & ut plurimum robustum. Haec praecipue de osse innominato & scapula valent.

Ossium capita articularia, quae in illas excipiuntur caveas, etsi naturalem suam magis vel minus amiserunt formam, attamen magna, immo plerumque ob novam illa obducentem & circumgentem osseam materiam ampliora ac in statu reperiuntur sano. Exostosis saepe magis deformata sunt & plerumque polita. Ossis diaphysis fere semper sana, robusta & omnino immutata invenitur. In aliis articulis, ubi recensita arthritidis observantur phaenomena, ex loco, habitu & figura partis affectae & reliqui ossis indole non minus discerni potest, an ab arthritide seu luxatione haec ossis derivanda sit mutatio. Caeterum discrimina haec ossium arthriticorum essentialia, tunc primum luculenter apparebunt, quando cum aliis hic morbus quoad productos in ossibus effectus rite comparetur.

10) Quoad morbi causam vel materiam (de qua nondum disputare cessarunt Medici) summi hanc ossium arthriticorum disquisitionem momenti esse .

Dicta sufficient. Quas de bursis tendinum mucosis in vivis arthritide laborantibus aequae ac in cadaveribus , — in partibus patellam cingentibus , — aliisque in articulis collegi observationes non paucas , nec exiguas , una cum tabulis ossium affectorum indolem rite explicantibus , altera occasione typis mandabo .

Finis Duodecimi Voluminis .

E L E N C H U S :

- I.) Io. Petr. FRANK, *Dissertatio inauguralis Medica Curas Infantum Physico-Medicas exhibens.* pag. 1 -- 95
- II.) Io. GAUDELII, *Dissertatio de Hydrocephalo.* 96 -- 120
- III.) Salom. Constant. TITII, *Oratio de Pellagrae morbi inter Insubriae Austriacae agricolae grassantis pathologia.* 121 -- 176
- IV.) Io. Petr. FRANK, *Programma, Puerperae, de infanticidio suspectae, defensionem exhibens.* 177 -- 207
- V.) Petri Iosephi SCHWENDIMANN, *Dissertatio Helminthochorti historiam, naturam atque vires expendens.* 208 -- 254
- VI.) Caroli STRACK, *Dissertatio de Epinyride.* 255 -- 266
- VII.) Odolphi MURRAY, *Diff. Academica de sensibilitate Ossium morbosa.* 267 -- 302
- VIII.) Io. Petr. FRANK, *Oratio Academica, de Convalescentium conditione, ac prosperitate tuenda.* 303 -- 340
- IX.) Iosephi WENZEL, *Dissertatio inauguralis de Ossium Artbritorum indole.* 341 -- 377

